

Namo tassa bhagavato arahato sammāsambuddhassa

# Abhidhammāvatāro

## Ganthārambhakathā

1. Anantakarūṇāpaññaṃ, tathāgatamanuttaraṃ;  
Vanditvā sirasā buddhaṃ, dhammaṃ sādhuḡaṇampi ca.
2. Paṇḍukambalanāmāya, silāyātulavikkamo;  
Nisīno devarājassa, vimale sītale tale.
3. Yaṃ devadevo devānaṃ, devadevehi pūjito;  
Desesi devalokasmiṃ, dhammaṃ devapurakkhato.
4. Tatthāhaṃ pāṭavatthāya, bhikkhūnaṃ piṭakuttame;  
Abhidhammāvatāraṃ, madhuraṃ mativaḡḡhanaṃ.
5. Tāḷaṃ mohakavāṭassa, vighāṭanamanuttaraṃ;  
Bhikkhūnaṃ pavisaṇtānaṃ, abhidhammamahāpuraṃ.
6. Suduttaraṃ tarantānaṃ, abhidhammamahodadhiṃ;  
Suduttaraṃ tarantānaṃ, taraṃva makarākaraṃ.
7. Ābhidhammikabhikkhūnaṃ, hatthasāraṃmanuttaraṃ;  
Pavakkhāmi samāseṇa, taṃ suṇātha samāhitā.

## 1. Paṭhamaṃ paricchedo

### Cittaniddeso

8. Cittaṃ cetasiḡaṃ rūpaṃ, nibbānanti niruttaro;  
Catudhā desayī dhamme, catusaccappakāsaṇo.

Tattha **cittanti** visayaviḡānanaṃ cittaṃ, tassa pana ko vacanaṭṭho? Vuccate – sabbasaṅgāhakavasena pana cintetīti cittaṃ, attasaṇtānaṃ vā cinoṭītipi cittaṃ.

9. Vicittakaraṇā cittaṃ, attano cittaṭāya vā;  
Pañṇattiyampi viñṇāṇe, vicitte cittaḡammaḡe;  
Cittasaṃmuti daṭṭhabbā, viñṇāṇe idha viñṇunā.

Taṃ pana sāraṃmaṇato ekavidhaṃ, savipākāvipākato duvidhaṃ. Tattha savipākaṃ nāma kusalākusalaṃ, avipākaṃ abyākataṃ. Kusalākusalābyākataḡātibhedato tividhaṃ.

Tattha **kusalanti** panetassa ko vacanaṭṭho?

10. Kucchitānaṃ salanato, kusānaṃ lavanaṇa vā;  
Kusena lātabbattā vā, kusalanti pavuccati.

11. Cheke kusalasaddoḃyaṃ, ārogye anavajjake;  
Dit̤tho it̤thavipākepi, anavajjādiḃe idha.

Tasmā anavajjaiṭṭhavipākalakkhaṇaṃ kusalaṃ, akusalaviddhaṃsanarasaṃ, vodānapaccupaṭṭhānaṃ. Vajjapaṭipakkhattā anavajjalakkhaṇaṃ vā kusalaṃ, vodānabhāvarasaṃ, it̤thavipākapaccupaṭṭhānaṃ, yonisomanasikārapadaṭṭhānaṃ. Sāvajjāniṭṭhavipākalakkhaṇamakusalaṃ. Tadubhayaviparītalakkhaṇamabyākataṃ, avipākārahaṃ vā.

Tattha kusalacittaṃ ekavīsatividhaṃ hoti, tadidaṃ bhūmito catubbidhaṃ hoti – kāmāvacaraṃ, rūpāvacaraṃ, arūpāvacaraṃ, lokuttarañceti.

Tattha **kāmāvacarakusalacittaṃ** bhūmito ekavidhaṃ, savatthukāvattukabhedato duvidhaṃ, hīnamajjhimaṇṭabhedato tividhaṃ, somanassupekkhāñāṇappayogabhedato aṭṭhavidhaṃ hoti. Seyyathidaṃ – somanassasahagataṃ ñāṇasampayuttaṃ asaṅkhārikamekaṃ, sasaṅkhārikamekaṃ, somanassasahagataṃ ñāṇavippayuttaṃ asaṅkhārikamekaṃ, sasaṅkhārikamekaṃ, upekkhāsahagataṃ ñāṇasampayuttaṃ asaṅkhārikamekaṃ, sasaṅkhārikamekaṃ, upekkhāsahagataṃ ñāṇavippayuttaṃ asaṅkhārikamekaṃ, sasaṅkhārikamekanti idaṃ aṭṭhavidhampi kāmāvacarakusalacittaṃ nāma.

12. Uddānato duve kāmā, klesavatthuvasā pana;  
Kilesa chandarāgoḃa, vatthu tebhūmavaṭṭakaṃ.
13. Kilesakāmo kāmēti, vatthu kāmīyatīti ca;  
Sijjhati duvidhopesa, kāmo vo kārakadvaye.
14. Yasmiṃ pana padese so, kāmoyaṃ duvidhopi ca;  
Sampattīnaṃ vasaṇāva-caratīti ca so pana.
15. Padeso catupāyānaṃ, channaṃ devānameva ca;  
Manussānaṃ vaseneva, ekādasavidho pana.
16. Kāmōvacaratītettha, kāmāvacarasaññito;  
Assābhilakkhitattā hi, sasatthāvacaro viya.
17. Svāyaṃ rūpabhavo rūpaṃ, evaṃ kāmōti saññito;  
Uttarassa padasseva, lopaṃ katvā udīrito.
18. Tasmiṃ kāmē idaṃ cittaṃ, sadāvacaratīti ca;  
Kāmāvacaramiccevaṃ, kathitaṃ kāmāghātīnā.
19. Paṭisaṇḃhiṃ bhave kāmē, avacārayatīti vā;  
Kāmāvacaramiccevaṃ, pariyaṇnanti tatra vā.
20. Idaṃ aṭṭhavidhaṃ cittaṃ, kāmāvacarasaññitaṃ;  
Dasapuññakriyavatthu-vaseneva pavattati.
21. Dānaṃ sīlaṃ bhāvanā pattidānaṃ,  
Veyyāvaccāṃ desanā cānumodo;  
Dit̤thijjuttaṃ saṃsuticcāpacāyo,  
Ñeyyo evaṃ puññavatthuppabhedo.
22. Gacchanti saṅgahaṃ dāne, pattidānānumodanā;  
Tathā sīlamaye puññe, veyyāvaccāpacāyanā.

23. Desanā savanaṃ diṭṭhi-ujukā bhāvanāmaye;  
Puna tīṇeva sambhonti, dasa puññakriyāpi ca.
24. Sabbānussatipuññañca, pasamsā saraṇattayaṃ;  
Yanti diṭṭhijukammasmim, saṅgahaṃ natthi saṃsayo.
25. Purimā muñcanā ceva, parā tissopi cetanā;  
Hoti dānamayaṃ puññaṃ, evaṃ sesesu dīpaye.

Idāni assa panaṭṭhavidhassāpi kāmāvacarakusalacittassa ayamuppattikkamo veditabbo. Yadā hi yo deyyadhammapaṭiggāhakādīsampattim, aññaṃ vā somanassahetuṃ āgamma haṭṭhapahaṭṭho “atthi dinna”nti ādinayappavattaṃ sammādiṭṭhim purakkhatvā parehi anussāhito dānādīni puññaṇi karoti, tadāssa somanassasahagataṃ ñāṇasampayuttaṃ asaṅkhārikam paṭhamam mahākusalacittam uppajjati. Yadā pana vuttanayeneva haṭṭhapahaṭṭho sammādiṭṭhim purakkhatvā parehi ussāhito karoti, tadāssa tameva cittaṃ sasaṅkhārikam hoti. Imasmim panatthe **saṅkhāroti** attano vā parassa vā pavattassa pubbappayogassādhivacanaṃ. Yadā pana ñātijanassa paṭipattidassanena jātāparicayā bālakā bhikkhū disvā somanassajātā sahasā yaṃ kiñci hatthagataṃ dadanti vā vandanti vā, tadā tesam tatiyacittamuppajjati. Yadā pana te “detha vandatha, ayye”ti vadanti, evaṃ ñātijanena ussāhitā hutvā hatthagataṃ dadanti vā vandanti vā, tadā tesam catutthacittamuppajjati. Yadā pana deyyadhammapaṭiggāhakādīnaṃ asampattim vā aññesaṃ vā somanassahetūnaṃ abhāvaṃ āgamma catūsupi vikappesu somanassarahitā honti, tadā sesāni cattāri upekkhāsahagatāni uppajjanti. Evaṃ somanassupekkhāñāṇappayogabhedato aṭṭhavidham kāmāvacarakusalacittam veditabbaṃ.

26. Dasapuññakriyādīnaṃ, vasena ca bahūnipi;  
Etāni pana cittāni, bhavantīti pakāsaye.
27. Sattarasa sahasāni, dve satāni asīti ca;  
Kāmāvacarapuññaṇi, bhavantīti viniddise.

Taṃ pana yathānurūpaṃ kāmāvacarasugatiyaṃ bhavabhogasampattim abhinipphādeti.

Itaresu pana **rūpāvacarakusalacittam** savatthukato ekavidham, dvīsu bhavesu uppajjanato duvidham, hīnamajjhimaṇṭabhedato tividham, paṭipadādībhedato catubbidham, jhānaṅgayogabhedato pañcavidham. Seyyathidaṃ –  
kāmāvacaradāyāpādathinamidhaudhaccakukkuccavicikicchāvippahīnaṃ  
vitakkavicārapītisukhacittekaggatāsampayuttaṃ paṭhamam, vitakkavippahīnaṃ  
vicārapītisukhacittekaggatāsampayuttaṃ dutiyaṃ, vitakkavicāravippahīnaṃ  
pītisukhacittekaggatāsampayuttaṃ tatiyaṃ, vitakkavicārapītivippahīnaṃ sukhacittekaggatāsampayuttaṃ  
catuttham, vitakkavicārapītisukhavippahīnaṃ upekkhācitetkaggatāsampayuttaṃ pañcamanti idaṃ  
pañcavidham rūpāvacarakusalacittam nāma.

Taṃ pana yathāsambhavaṃ pathavīkaṣiṇādīsu ārammaṇesu pavattivasena anekavidham hoti. Sabbaṃ panetaṃ rūpāvacarabhāvanāpuññavasappavattaṃ yathānurūpaṃ rūpāvacarūpapattinipphādaṃ hoti. Evaṃ tāva rūpāvacarakusalāṃ veditabbaṃ.

Sesesu pana dvīsu **arūpāvacarakusalacittam** tāva upekkhāvedanāyogabhedato ekavidham, savatthukāvattukabhedato duvidham, hīnamajjhimaṇṭabhedato tividham, ārammaṇabhedato catubbidham. Kaṣiṇugghāṭimākāsaṃ, tattha pavattaviññānaṃ, tassa apagamo, ākiñcaññāyatananti idamassa catubbidhamārammaṇam. Yathāpaṭipāṭiyā etassārammaṇassa bhedato catubbidham hoti. Seyyathidaṃ – sabbaso rūpasaññānaṃ samatikkamā paṭighasaññānaṃ atthaṅgamā nānattasaññānaṃ amanasikārā ākāsānañcāyatanasaññāsahagataṃ, viññānañcāyatanasaññāsahagataṃ,

ākiñcaññāyatanasaññāsahagataṃ, nevasaññānāsaññāyatanasaññāsahagatanti idaṃ catubbidhaṃ arūpāvacarakusalacittaṃ nāma. Sabbhaṃ panetaṃ arūpāvacarabhāvanāpuññavasappavattaṃ yathānurūpaṃ arūpūpapattinipphādakaṃ hoti. Evaṃ arūpāvacarakusalacittaṃ veditabbaṃ.

Itaraṃ pana **lokuttarakusalacittaṃ** nibbānārammaṇato ekavidhaṃ, niyatāniyatavatthukabhedato duvidhaṃ, tīhi vimokkhamukhehi pattabbato tividhaṃ, catumaggayogabhedato catubbidhaṃ. Seyyathidaṃ – sakkāyadiṭṭhivicikicchāsīlabbataparāmāsasaññojanappahānakaraṃ sotāpattimaggaṃ, rāgadosamohānaṃ tanuttakaraṃ sakadāgāmimaggaṃ, kāmarāgabyāpādānaṃ niravasesappahānakaraṃ anāgāmimaggaṃ, rūparāgarūparāgamānauddhaccaavijjāpahānakaraṃ arahattamaggacittanti idaṃ catubbidhaṃ lokuttarakusalacittaṃ nāma. Ekekaṃ panettha jhānaṅgayogabhedato pañcavidhaṃ hoti, tasmā vīsatividhaṃ hoti. Sabbhaṃ panetaṃ lokuttarabhāvanāpuññavasappavattaṃ maggānurūpaphalappavattiyā cattāro ariyapuggale abhinipphādeti. Evaṃ lokuttarakusalaṃ veditabbaṃ.

28. Kāme aṭṭheva rūpe ca, pañca cattārirūpīsu;  
Cattārānuttarānevaṃ, kusalānekavīsati.

29. Kusalākusalāpagatena satā,  
Kusale kusalena ca yaṃ kusalaṃ;  
Catubhūmigataṃ muninā vasinā,  
Lapitaṃ lapitaṃ sakalampi mayā.

**Akusalaṃ** pana bhūmito ekavidhaṃ kāmāvacarameva, niyatāniyatavatthuvaseṇa ca ekahetukaduhetukavaseṇa ca paṭisandhijanakājanakavaseṇa ca duvidhaṃ, tīhi vedanāhi yogato ca lobhamūlaṃ dosamūlaṃ mohamūlanti mūlato ca tividhaṃ hoti. Tattha **lobhamūlaṃ** pana somanassupekkhādiṭṭhippayogabhedato aṭṭhavidhaṃ hoti. Seyyathidaṃ – somanassasahagataṃ diṭṭhigatasampayuttaṃ asaṅkhārikamekaṃ, sasaṅkhārikamekaṃ, somanassasahagataṃ diṭṭhigatavippayuttaṃ asaṅkhārikamekaṃ, sasaṅkhārikamekaṃ, upekkhāsahagataṃ diṭṭhigatasampayuttaṃ asaṅkhārikamekaṃ, sasaṅkhārikamekaṃ, upekkhāsahagataṃ diṭṭhigatavippayuttaṃ asaṅkhārikamekaṃ, sasaṅkhārikamekanti.

Yadā hi “natthi kāmesu ādīnavo” tiādīnā nayena micchādiṭṭhiṃ purakkhatvā kevalaṃ haṭṭhatuṭṭho kāme vā paribhuñjati, diṭṭhamaṅgalādīni vā sārato pacceti sabhāvatikkheneva anussāhitena cittena, tadāssa paṭhamaṃ akusalacittaṃ uppajjati. Yadā pana mandena samussāhitena, tadā dutiyaṃ. Yadā micchādiṭṭhiṃ apurakkhatvā kevalaṃ haṭṭhatuṭṭho methunaṃ dhammaṃ vā paribhuñjati, parasampattiṃ vā abhijjhāyati, parassa bhaṇḍaṃ vā harati sabhāvatikkheneva anussāhitena cittena, tadā tatiyaṃ. Yadā mandena samussāhitena, tadā catutthaṃ uppajjati. Yadā pana kāmānaṃ vā asampattiṃ āgamma aññesaṃ vā somanassahetūnaṃ abhāvena catūsūpi vikappesu somanassarahitā honti, tadā sesāni cattāri upekkhāsahagatāni uppajjantīti. Evaṃ somanassupekkhādiṭṭhippayogabhedato aṭṭhavidhaṃ lobhamūlaṃ veditabbaṃ.

**Dosamūlaṃ** pana ekantasavatthukato ekavidhaṃ, asaṅkhārasasaṅkhārabhedato duvidhaṃ domanassasahagataṃ paṭighasampayuttaṃ asaṅkhāraṃ, sasaṅkhāraṃ. Assa pana pañātipātādīsu tikkhamandappavattikāle uppatti veditabbā.

**Mohamūlampi** vicikicchuddhaccayogato duvidhaṃ hoti upekkhāsahagataṃ vicikicchāsampayuttaṃ, upekkhāsahagataṃ uddhaccasampayuttanti. Tassa asanniṭṭhānavikkhepakālesu pavatti veditabbāti.

Evaṃ tāva dvādasavidhaṃ akusalacittaṃ veditabbaṃ, sabbhaṃ panetaṃ yathānurūpaṃ apāyesu upapattiyā, sugatīyampi dukkhavisesassa abhinipphādakaṃ hoti.



42. Idam aṭṭhavidham cittam, ekantena savatthukam;  
Jāyate kāmālokasmim, na panaññattha jāyate.

Evam tva sahetukavipākacittam veditabbam.

**Ahetukavipākacittam** pana alobhādihetuvirahitam upekkhāsahagatam cakkhuviññānam, upekkhāsahagatam sotaviññānam, upekkhāsahagatam ghānaviññānam, upekkhāsahagatam jivhaviññānam, sukhasahagatam kāyaviññānam, upekkhāsahagatam ahetukamanodhātusampaṭicchanaṃ, somanassasahagatam ahetukamanoviññādhātusantīraṇam, upekkhāsahagatam ahetukamanoviññādhātusantīraṇanti idam pana aṭṭhavidham ahetukavipākacittam nāma.

Idam pana aṭṭhavidham niyatavattukato ekavidham, niyatāniyatārammaṇato duvidham. Tattha viññāṇapañcakaṃ niyatārammaṇam, sesattayam aniyatārammaṇam. Sukhasomanassupekkhāvedanāyogato tividham. Tattha sukhasahagatam kāyaviññānam, dviṭṭhānikam santīraṇam somanassupekkhāyuttam, sesamupekkhāyuttanti.

Diṭṭhārammaṇasutārammaṇamutārammaṇadiṭṭhasutamutārammaṇadiṭṭhasutamutaviññātārammaṇavasena pañcavidham. Tattha diṭṭhārammaṇam cakkhuviññānam, sutārammaṇam sotaviññānam, mutārammaṇam ghānaviññānam, diṭṭhasutamutārammaṇam manodhātusampaṭicchanaṃ, diṭṭhasutamutaviññātārammaṇam sesamanoviññādhātudvayanti.

Vatthuto chabbidham. Katham? Cakkhuviññāṇassa cakkhumeva vatthu, tathā sotaghānaviññāṇam sotaghānaviññāṇam sotaghānaviññāṇam, avasesattayassa hadayavatthumevāti.

Ārammaṇato sattavidham hoti. Katham? Rūpārammaṇameva cakkhuviññānam, tathā saddagandharasaphoṭṭhabbārammaṇāni paṭipāṭiyā sotaghānaviññāṇāni, rūpādipañcārammaṇā manodhātu, sesamanoviññādhātudvayam chaḷārammaṇanti.

Tam sabbam pana ahetukavipākacittam kiccato aṭṭhavidham hoti. Katham? Dassanakiccaṃ cakkhuviññānam, savanaghāyanasāyanaphusanasampaṭicchanasantīraṇatadārammaṇakiccāni avasesāni.

Tattha cakkhuto pavattam viññānam, cakkhumhi sannissitam viññānti vā cakkhuviññānam, tathā sotaviññāṇādīni. Tattha cakkhusannissitarūpavijānanalakkhaṇam cakkhuviññānam, rūpamattārammaṇarasam, rūpābhimukhabhāvapaccupaṭṭhānam, rūpārammaṇāya kiriyāmanodhātuyā apagamapadaṭṭhānam. Tathā sotaghānaviññāṇāni sotādisannissitasaddādivijānanalakkhaṇāni, saddādimattārammaṇarasāni, saddādīsū abhimukhabhāvapaccupaṭṭhānāni, saddādiārammaṇānam kiriyāmanodhātūnam apagamapadaṭṭhānāni. Manodhātusampaṭicchanaṃ pana cakkhuviññāṇādīnam anantarā rūpādivijānanalakkhaṇam, rūpādisampaṭicchanaṃ, tathābhāvapaccupaṭṭhānam, cakkhuviññāṇādīnam apagamapadaṭṭhānam.

Sesā pana dve ahetukamanoviññādhātuyo chaḷārammaṇavijānanalakkhaṇā, santīraṇādirasā, tathābhāvapaccupaṭṭhānā, hadayavatthupadaṭṭhānāti veditabbā. Tattha paṭhamā ekantamiṭṭhārammaṇe pavattisabbhāvato somanassayuttāva hutvā pañcadvāre santīraṇakiccaṃ sādhamānā pañcasu dvāresu ṭhatvā vipaccati, chasu pana dvāresu balavārammaṇe tadārammaṇam hutvā vipaccati. Dutiyā pana iṭṭhamajjhārammaṇe pavattisabbhāvato upekkhāsahagatā hutvā santīraṇatadārammaṇapaṭisandhibhavaṅgacutivasena pavattanato pañcasu ṭhānesu vipaccati. Katham? Manussaloke tva jaccandhajaccabhadhirajaccajājaccummattakapaṇḍakaubhatobyañjananapumsakādīnam paṭisandhiggahaṇakāle paṭisandhi hutvā vipaccati. Paṭisandhiyā vītivattāya pavattiyam yāvātāyukam bhavaṅgam hutvā vipaccati. Iṭṭhamajjhārammaṇavīthiyā santīraṇam hutvā, balavārammaṇe

chadvāre tadārammaṇaṃ hutvā, maraṇakāle cuti hutvāti imesu pana pañcasu ṭhānesu vipaccatīti.  
Evaṃ tāva ahetakavipākacittāni veditabbāni.

43. Kāmāvacarapuññaṃ, vipākā honti soḷasa;  
Taṃ tihetukapuññaṃ, vasena paridīpaye.

Idāni **rūpāvacaravipākacittāni** vuccanti. Tāni niyatavattukato ekavidhāni, jhānaṅgayogabhedato pañcavidhāni. Kathaṃ? Vitakkavicārapītisukhacittekaggatāsampayuttaṃ paṭhamam,  
vicārapītisukhacittekaggatāsampayuttaṃ dutiyam, pītisukhacittekaggatāsampayuttaṃ tatiyam,  
sukhacittekaggatāsampayuttaṃ catuttham, upekkhācittekaggatāsampayuttaṃ pañcamanti imāni pañcapi rūpāvacaravipākacittāni upapattiyam paṭisandhibhavaṅgacutivasena pavattanti.

Idāni **arūpāvacaravipākacittāni** vuccanti. Tāni sakakusalāni viya ārammaṇabhedato catubbidhāni honti. Kathaṃ? Ākāsānañcāyatanasaññāsahagataṃ, viññānañcāyatanasaññāsahagataṃ,  
ākiñcaññāyatanasaññāsahagataṃ, nevasaññānāsaññāyatanasaññāsahagatanti imāni cattāri arūpāvacaravipākacittāni.

44. Kusalānugataṃ katvā, bhājitaṃ kiṃ mahaggataṃ;  
Kāmāvacarapuññaṃva, nāsamānaphalaṃ yato.
45. Attano kusaleheva, samānaṃ sabbathā idaṃ;  
Gajādīnaṃ yathā chāyā, gajādisadisā tathā.
46. Kāmāvacarapuññaṃva, nāparāpariyavedanaṃ;  
Jhānā aparihīnaṃ, sattassa bhavaḡāmino.
47. Kusalānantaraṃyeva, phalaṃ uppajjati ca;  
Ñāpanatthaṃ panetassa, kusalānugataṃ kataṃ.
48. Paṭippadākkamo ceva, hīnādīnañca bhedato;  
Jhānāgamanato cettha, veditabbo vibhāvinā.
49. Abhāvodhipatīnañca, ayameva visesako;  
Sesaṃ sabbaṃ ca sesena, kusaleṇa samaṃ mataṃ. –

Evaṃ rūpāvacarārūpāvacaravipākā veditabbā.

Idāni **lokuttaravipākacittāni** honti. Tāni catumaggayuttacittaphalattā catubbidhāni honti. Kathaṃ? Sotāpattimaggaphalacittaṃ, sakadāḡāmimaggaphalacittaṃ, anāḡāmimaggaphalacittaṃ,  
arahattamaggaphalacittanti. Evaṃ panettha ekekaṃ jhānaṅgayogabhedato pañcavidhaṃ, puna  
maggavīthiphalasamāpattivasena pavattito duvidhaṃ. Evaṃ lokuttarakusalavipākacittāni veditabbāni.

50. Suññataṃ animittanti, tathāpaṇihitantipi;  
Etāni tīṇi nāmāni, maggassānantare phale.
51. Labbhanti parabhāḡasmim, vaḷaṇjanaphalesu na;  
Vipassanāvaseneva, tāni nāmāni labbhare.
52. Honti sādhipatīneva, lokuttaraphalāni tu;  
Vipākedhipatī natthi, ṭhāpetvā tu anāsava.

53. Attano maggabhāvena, maggo ‘‘maggo’’ti vuccati;  
Phalaṃ maggamupādāya, maggo nāmāti vuccati. –

Evam lokuttaravipākā veditabbā.

Idāni **sattākusalavipākāni** vuccanti. Akusalavipākaṃ upekkhāsahagataṃ cakkhuviññāṇaṃ, upekkhāsahagataṃ sotaviññāṇaṃ, upekkhāsahagataṃ ghānaviññāṇaṃ, upekkhāsahagataṃ jivhaviññāṇaṃ, dukkhasahagataṃ kāyaviññāṇaṃ, upekkhāsahagataṃ ahetukamanodhātusampañcchanaṃ, upekkhāsahagataṃ ahetukamanoviññāṇadhātusantīraṇanti imāni satta akusalavipākacittāni.

Ettha pana upekkhāsahagatāhetukamanoviññāṇadhātu ekādasavidhenāpi akusalacittena kamme āyūhite kammakammanimittagatinimittesu aññataraṃ ārammaṇaṃ katvā catūsu apāyesu paṭisandhi hutvā vipaccati, paṭisandhiyā vītivattāya dutiyacittavāraṃ tato paṭṭhāya yāvatāyukaṃ bhavaṅgaṃ hutvā, aniṭṭhamajjhataṃ pañcaviññāṇavīthiyā santīraṇaṃ hutvā, balavārammaṇe chasu dvāresu tadārammaṇaṃ hutvā, maraṇakāle cuti hutvā vipaccati. Evam pañcasu ṭhānesu vipaccati. Kevalaṃ hi tāni kusalavipākāhetukacittāni kusalakammappaccayāni, imāni akusalakammappaccayāni. Ayamimesaṃ, tesaṅca vireso.

54. Aniṭṭhāniṭṭhamajjhataṃ vattare ime;  
Sukhādittayayuttā te, dukkhupekkhāyutā ime.

Evam kāmāvacarakusalavipākasahetukamaṭṭhavidhaṃ, ahetukamaṭṭhavidhaṃ, jhānaṅgayogabhedato rūpāvacaravipākaṃ pañcavidhaṃ, ārammaṇabhedato arūpāvacaravipākaṃ catubbidhaṃ, maggasampayuttacittaphalabhedato lokuttaravipākaṃ catubbidhaṃ, cakkhuviññāṇādibhedato akusalavipākaṃ sattavidhanti chatṭimsavidhaṃ vipākacittaṃ veditabbam.

55. Evam chatṭimsadhā pākaṃ, pākasāsanapūjito;  
Savipākāvīpākesu, kusalo sugatobravi.

**Kiriyābyākatacittaṃ** pana avipākato ekavidhaṃ, parittamahaggatato duvidhaṃ, kāmāvacararūpāvacaraarūpāvacarabhūmibhedato tividhaṃ. Tattha kāmāvacaraṃ duvidhaṃ sahetukamahetukanti. Tattha **sahetukaṃ** ekavidhaṃ arahato eva uppajjanato. Somanassupekkhāṇāṇappayogabhedato kāmāvacarakusalaṃ viya aṭṭhavidhaṃ hoti. Seyyathidaṃ – somanassasahagataṃ ñāṇasampayuttaṃ asaṅkhārikaṃ, asaṅkhārikaṃ, somanassasahagataṃ ñāṇavippayuttaṃ asaṅkhārikaṃ, asaṅkhārikaṃ, upekkhāsahagataṃ ñāṇasampayuttaṃ asaṅkhārikaṃ, asaṅkhārikaṃ, upekkhāsahagataṃ ñāṇavippayuttaṃ asaṅkhārikaṃ, asaṅkhārikanti imāni aṭṭha sahetukakiriyacittāni. Etāni pana yathānurūpaṃ dānādivasena khīṇāsavānaṃyeva pavattanti. Evam sahetukakiriyacittāni veditabbāni.

**Ahetukakiriyacittaṃ** pana tividhaṃ kiriyāhetukamanodhātuupekkhāsahagatāvajjanacittaṃ, kiriyāhetukamanoviññāṇadhātusomanassasahagataṃ hasituppādacittaṃ, kiriyāhetukamanoviññāṇadhātuupekkhāsahagataṃ voṭṭhabbanacittanti.

Tattha kiriyāhetukamanodhātu upekkhāsahagatā hadayavatthum nissāya cakkhudvāre iṭṭhaiṭṭhamajjhataṃ aniṭṭhaaniṭṭhamajjhatesu rūpārammaṇesu yena kenaci pasāde ghaṭṭite taṃ taṃ ārammaṇaṃ gahetvā āvajjanavasena cakkhuviññāṇassa purecārī hutvā bhavaṅgaṃ āvaṭṭayamānā uppajjati. Sotadvārādīsopi eseva nayo. Itarā pana dve ahetukamanoviññāṇadhātuyo sādharmaṇāsādharmaṇāti duvidhā honti. Tattha **asādhāraṇā** pana kiriyāhetukamanoviññāṇadhātu somanassasahagatā khīṇāsavasseva chasu dvāresu chasu anuḷāresu ārammaṇesu hasituppādakiccā niyatavatthukā uppajjati. **Sādhāraṇā** pana ahetukamanoviññāṇadhātu upekkhāsahagatā





Ettāvātā ekavīsatividhaṃ kusalaṃ, dvādasavidhaṃ akusalaṃ chattiṃsavidhaṃ vipākaṃ, vīsatividhaṃ kiriyacittanti ādimhi nikkhittaṃ cittaṃ ekūnanavutippabhedena vidhinā pakāsitaṃ hotīti.

63. Ekavīsati puññāni, dvādasākusalāni ca;  
Chattiṃseva vipākāni, kriyacittāni vīsati.
64. Ekūnanavuti sabbe, cittuppādā mahesinā;  
Aṭṭha lokuttare katvā, niddiṭṭhā hi samāsato.
65. Piṭake abhidhammasmiṃ, ye bhikkhū pāṭavatthino;  
Tehāyaṃ uggahetabbo, cintetabbo punappunaṃ.
66. Abhidhammāvātārena, abhidhammamahodadhiṃ;  
Ye taranti imaṃ lokaṃ, parañceva taranti teti.

Iti abhidhammāvātāre cittaniddeso nāma

Paṭhamo paricchedo.

## 2. Dutīyo paricchedo

### Cetasikaniddeso

67. Cittānantaramuddiṭṭhā, ye ca cetasikā mayā;  
Tesaṃ dāni karissāmi, vibhājanamito paraṃ.

Tattha cittasampayuttā, citte bhavā vā cetasikā. Tepi cittaṃ viya sārammaṇato ekavidhā, savipākāvīpākato duvidhā, kusalākusalābyākatabhedato tividhā, kāmāvacarādibhedato catubbidhā.

Tattha kāmāvacaracittasampayuttā **kāmāvacarā**. Tesu kāmāvacarapaṭhamamahākusalacittasampayuttā tāva niyatā sarūpena āgatā ekūnatiṃsa dhammā honti. Seyyathidaṃ – phasso vedanā saññā cetanā vitakko vicāro pīti cittekaggatā saddhā sati vīriyaṃ paññā jīvitindriyaṃ alobho adoso hirī ottappaṃ kāyappassaddhi cittappassaddhi kāyalahutā cittalahunā kāyamudutā cittamudutā kāyakammaññatā cittakammaññatā kāyapāguññatā cittaṭṭapāguññatā kāyujukatā cittaṭṭujukatāti. Puna chando, adhimokkho, tatramajjhataṭṭā, manasikāro cāti cattāro niyatayevāpanakā honti. Imehi catūhi tettiṃsa honti. Puna karuṇā muditā kāyaduccaritavirati vacīduccaritavirati micchājīvavirati ceti ime pañca aniyatā. Ime pana kadāci uppajjanti.

Imesu pana karuṇāmuditāvasena bhāvanākāle karuṇāpubbabhāgo vā muditāpubbabhāgo vā etā uppajjanti, na panekato uppajjanti. Yadā pana iminā cittaena micchākammantādīhi viramati, tadā sammākammantādīni pariṭṭenti, ekā virati uppajjati, karuṇāmuditāhi saha, aññamaññena ca na uppajjanti. Tasmā etesu ekena saha catuttiṃseva dhammā honti.

68. Ādinā puññacittena, tettiṃsa niyatā matā;  
Karuṇāmuditekena, catuttiṃsa bhavanti te.
69. Kasmā panettha mettā ca, upekkhā ca na uddhaṭā;  
Yevāpanakadhammesu, dhammarājena satthunā.
70. Abyāpādena mettāpi, tatramajjhataṭṭāya ca;  
Upekkhā gahitā yasmā, tasmā na gahitā ubho.

71. Kasmā yevāpanā dhammā, buddhenādiccabandhunā;  
Sarūpeneva sabbete, pāḷiyaṃ na ca uddhaṭā.
72. Yasmā aniyatā keci, yasmā rāsiṃ bhajanti na;  
Yasmā ca dubbalā keci, tasmā vuttā na pāḷiyaṃ.
73. Chandādhimokkhamuditā manasi ca kāro,  
Majjhataṭā ca karuṇā viratittayaṃ ca;  
Puññesu tena niyatāniyatā ca sabbe,  
Yevāpanā munivarena na ceva vuttā.
74. Kasmā panettha phassova, paṭhamaṃ samudīrito;  
Paṭhamābhiniṭattā, cittassārammaṇe kira.
75. Phusitvā pana phassena, vedanāya ca vedaye;  
Sañjānāti ca saññāya, cetanāya ca cetaye.
76. Balavapaccayattā ca, saḥajātānameva hi;  
Phassova paṭhamaṃ vutto, tasmā idha mahesinā.
77. Akāraṇamidaṃ sabbaṃ, cittānaṃ tu saheva ca;  
Ekuppādādibhāvena, cittajānaṃ pavattito.
78. Ayaṃ tu paṭhamuppanno, ayaṃ pacchāti natthidaṃ;  
Balavapaccayattepi, kāraṇaṇca na dissati.
79. Desanākkamato ceva, paṭhamaṃ samudīrito;  
Icevaṃ pana viññeyyaṃ, viññunā na visesato.
80. Na ca pariyesitabboyaṃ, tasmā pubbāparakkamo;  
Vacanatthalakkhaṇādīhi, dhammā eva vijānatā.

Yasmā pana ime dhammā vacanatthalakkhaṇādīhi vuccamānā pākaṭā honti suviññeyyāva, tasmā tesam vacanatthalakkhaṇādīni pavakkhāmi. Seyyathidaṃ – phusatīti **phasso**. Svāyaṃ phusanalakkhaṇo, saṅghaṭṭanaraso, sannipātapaccupaṭṭhāno, phalaṭṭhena vedanāpaccupaṭṭhāno vā, āpāthagatavisayapadaṭṭhāno. Ayaṃ hi arūpadhammopi samāno ārammaṇesu phusanākāreneva pavattati, so dvinnaṃ meṇḍānaṃ sannipāto viya daṭṭhabbo.

Sundaraṃ manoti sumano, sumanassa bhāvo somanassaṃ, somanassameva vedanā **somanassavedanā**. Sā vedayitalakkhaṇā, iṭṭhākārānubhavanarasā rājā viya subhojanarasaṃ, cetasikaassādapaccupaṭṭhānā, passaddhipadaṭṭhānā.

Nīlādibhedaṃ ārammaṇaṃ sañjānātīti **saññā**. Sā sañjānanalakkhaṇā, paccābhiññāṇakaraṇarasā vaḍḍhakissa abhiññāṇakaraṇamiva, yathāgahitanimittavasena abhinivesakaraṇapaccupaṭṭhānā, yathopaṭṭhitavisayapadaṭṭhānā.

Cetayatīti **cetanā**. Saddhiṃ attanā sampayuttadhamme ārammaṇe abhisandahatīti attho. Sā cetayitalakkhaṇā, āyūhanarasā, saṃvidahanapaccupaṭṭhānā sakakiccaparakiccasādhakā jeṭṭhasissamahāvaddhakiādayo viya.

Vitakketīti **vitakko**. Vitakkaṃ vā **vitakko**. Svāyaṃ ārammaṇe cittassa abhiniropanalakkhaṇo,

āhananapariyāhananaraso, ārammaṇe cittaassa ānayanapaccupaṭṭhāno.

Ārammaṇe tena cittaṃ vicaratīti **vicāro**. Vicaraṇaṃ vā **vicāro**. Anusañcaraṇanti vuttaṃ hoti. Svāyaṃ ārammaṇānumajjanalakkhaṇo, tattha sahaḷātānuyojanaraso, cittaassa anupabandhapaccupaṭṭhāno.

Pinayatīti **pīti**. Sā sampiyāyanalakkhaṇā, kāyacittapīṇanarasā, pharaṇarasā vā, odagypaccupaṭṭhānā.

Cittaassa ekaggabhāvo **cittekkaggatā**. Samādhissetaṃ nāmaṃ. So avisāralakkhaṇo, avikkhepalakkhaṇo vā, sahaḷātānaṃ sampiṇḍanaraso nhāniyacunṇānaṃ udakaṃ viya, upasamapaccupaṭṭhāno, visesato sukhapadaṭṭhāno.

Saddahanti etāya, sayamaṃ vā saddahati, saddahanamattameva vā esāti **saddhā**. Sā panesā saddahanalakkhaṇā, pasādanarasā udakappasādakamaṇi viya, akālusiyapaccupaṭṭhānā, saddheyavattupadaṭṭhānā.

Saranti etāya, sayamaṃ vā sarati, saraṇamattameva vā esāti **sati**. Sā apilāpanalakkhaṇā, asammaṇarasā, āraḷkhapaccupaṭṭhānā, thiraṣaṇṇāpadaṭṭhānā.

Vīrabhāvo **vīriyaṃ**. Vīraṇaṃ vā kammaṃ **vīriyaṃ**. Taṃ panetaṃ ussāhanalakkhaṇaṃ, sahaḷātānaṃ upatthambhanarasaṃ, asaṃsīdanabhāvapaccupaṭṭhānaṃ, saṃvegapadaṭṭhānaṃ.

Pajānātīti **paññā**. Sā panesā vijānanalakkhaṇā, visayobhāsanarasā padīpo viya, asammohapaccupaṭṭhānā araṇṇagatasudesako viya.

Jīvanti tena taṃsamyuttadhammāti **jīvitaṃ**. Taṃ pana attanā avinibbhuttānaṃ dhammānaṃ anupālanalakkhaṇaṃ, tesamaṃ pavattanarasaṃ, tesameva ṭhapanapaccupaṭṭhānaṃ, yāpayitabbadhammapadaṭṭhānaṃ. Santepi ca tesamaṃ anupālanalakkhaṇādīmhi vidhāne atthikkhaṇeyeva taṃ te dhamme anupāleti udakaṃ viya uppālādīni, yathāsaḷakamaṃ paccayuppannepi ca dhamme anupāleti dhāti viya kumāraṃ, sayamaṃpavattitadhammasambandheneva pavattati niyāmakko viya, na bhaṅgato uddamaṃ pavattayati attano ca pavattayitabbānaṃca abhāvā, na bhaṅgakkhaṇe ṭhāpeti sayamaṃ bhijjamānattā khīyamāno viya vattisnehova padīpasikhanti.

Na lubbhanti tena, sayamaṃ vā na lubbhati, alubbhanamattameva vā tanti **alobho**. So ārammaṇe cittaassa alaggabhāvalakkhaṇo kamaladale jalabindu viya, apariggaharaso muttabhikkhu viya, anallīnabhāvapaccupaṭṭhāno asucimhi patitapuriso viya.

Na dussanti tena, sayamaṃ vā na dussati, adussanamattameva vā tanti **adoso**. So acaṇḍikkalakkhaṇo, avirodhalakkhaṇo vā anukūlamitto viya, āghātavinayanaraso, pariḷāhavinayanaraso vā candanaṃ viya, sammabhāvapaccupaṭṭhāno puṇṇacando viya.

Kāyaduccarītādīhi hiriyatīti **hirī**. Lajjāyetaṃ adhivacanaṃ. Tehiyeva ottappatīti **ottappaṃ**. Pāpato ubbegassetamaṃ adhivacanaṃ. Tattha pāpato jigucchanaḷakkhaṇā hirī, ottāsalakkhaṇaṃ ottappaṃ. Ubhopi pāpānaṃ akaraṇarasā, pāpato saṅkocanapaccupaṭṭhānā, attagāravaparagāravapadaṭṭhānā. Ime dhammā lokapālāti daṭṭhabbā.

Kāyapassambhanaṃ **kāyapassaddhi**. Cittapassambhanaṃ **cittapassaddhi**. **Kāyoti** cettha vedanādayo tayo khandhā. Ubhopi panetā ekato hutvā kāyacittadarathavūpasamalakkhaṇā, kāyacittadarathanimadanarasā, kāyacittānaṃ aparipphandanasītibhāvapaccupaṭṭhānā, kāyacittapadaṭṭhānā, kāyacittānaṃ avūpasamatāuddhaccādikilesappaṭipakkhabhūtāti veditabbā.

Kāyalahubhāvo **kāyalahutā**. Cittalahubhāvo **cittalahutā**. Kāyacittānaṃ garubhāvavūpasamalakkhaṇā, kāyacittagarubhāvanimadanarasā, kāyacittānaṃ adandhatāpaccupaṭṭhānā, kāyacittapadaṭṭhānā, kāyacittānaṃ garubhāvakarathinamiddhādikilesappaṭipakkhabhūtāti veditabbā.

Kāyamudubhāvo **kāyamudutā**. Cittamudubhāvo **cittamudutā**. Kāyacittānaṃ thaddhabhāvavūpasamalakkhaṇā, kāyacittānaṃ thaddhabhāvanimadanarasā, appaṭighātapaccupaṭṭhānā, kāyacittapadaṭṭhānā, kāyacittānaṃ thaddhabhāvakaradiṭṭhimānādikilesappaṭipakkhabhūtāti veditabbā.

Kāyakammaññabhāvo **kāyakammaññatā**. Cittakammaññabhāvo **cittakammaññatā**. Kāyacittānaṃ akammaññabhāvavūpasamalakkhaṇā, kāyacittānaṃ akammaññabhāvanimadanarasā, kāyacittānaṃ ārammaṇakaraṇasampattipaccupaṭṭhānā, kāyacittapadaṭṭhānaṃ, kāyacittānaṃ akammaññabhāvakaraavasesanīvaraṇādikilesappaṭipakkhabhūtāti veditabbā.

Kāyapāguññabhāvo **kāyapāguññatā**. Cittapāguññabhāvo **cittapāguññatā**. Kāyacittānaṃ agelaññabhāvalakkhaṇā, kāyacittānaṃ gelaññanimadanarasā, nirādīnavapaccupaṭṭhānā, kāyacittapadaṭṭhānā, kāyacittānaṃ gelaññabhāvakaraassaddhādikilesappaṭipakkhabhūtāti daṭṭhabbā.

Kāyassa ujukabhāvo **kāyujukatā**. Cittassa ujukabhāvo **cittujukatā**. Kāyacittānaṃ akuṭilabhāvalakkhaṇā, kāyacittānaṃ ajjavalakkhaṇā vā, kāyacittānaṃ kuṭilabhāvanimadanarasā, ajimhatāpaccupaṭṭhānā, kāyacittapadaṭṭhānā, kāyacittānaṃ kuṭilabhāvakaramāyāsāṭṭheyyādikilesappaṭipakkhabhūtāti daṭṭhabbā.

**Chandoti** kattukamyatāyetaṃ adhivacanaṃ. Tasmā so kattukamyatālakkaṇo chando, ārammaṇapariyesanaraso, ārammaṇena atthikatāpaccupaṭṭhāno, tadevassa padaṭṭhāno.

Adhimuccanaṃ **adhimokkho**. So sannitṭhānalakkhaṇo, asaṃsappanaraso, nicchayapaccupaṭṭhāno, sannitṭheyyadhammapadaṭṭhāno, ārammaṇe niccalabhāvena indakhīlo viya daṭṭhabbo.

Tesu tesu dhammesu majjhatabhāvo **tatramajjhattatā**. Sā cittacetāsikānaṃ samavāhitalakkhaṇā, ūnādhikatānivāraṇarasā, pakkhapātupacchedanarasā vā, majjhatabhāvapaccupaṭṭhānā.

Kiriya kāro, manasmim kāro **manasikāro**. Purimamanato visadisaṃ manaṃ karotīti ca **manasikāro**.

Svāyaṃ ārammaṇapaṭipādako, vīthipaṭipādako, javanapaṭipādakoti tippakāro. Tattha **ārammaṇapaṭipādako** manasmim kāro manasikāro. So sāraṇalakkhaṇo, sampayuttānaṃ ārammaṇe saṃyojanaraso, ārammaṇābhimukhabhāvapaccupaṭṭhāno, ārammaṇapadaṭṭhāno, saṅkhārakkhandhāpariyāpanno ārammaṇapaṭipādakattena sampayuttānaṃ sārathī viya daṭṭhabbo. **Vīthipaṭipādakoti** pañcadvārāvajjanassetāṃ adhivacanaṃ, **javanapaṭipādakoti** manodvārāvajjanassetāṃ adhivacanaṃ, na te idha adhippetā.

**Karuṇāti** paradukkhe sati sādhuṇaṃ hadayakampanaṃ karotīti **karuṇā**, kināti vināseti vā paradukkanti **karuṇā**. Sā paradukkāpanayanākārappavattilakkhaṇā, paradukkāsahanarasā, avihimsāpaccupaṭṭhānā, dukkhābhībhūtānaṃ anāthabhāvadassanapadaṭṭhānā.

Modanti tāya, sayāṃ vā modatīti **muditā**. Sā pamodanalakkhaṇā, anissāyanarasā, arativighātapaccupaṭṭhānā, sattānaṃ sampattidassanapadaṭṭhānā. Keci pana mettupekkhāyopi aniyate icchanti, taṃ na gahetabbaṃ. Atthato hi adoso eva mettā, tatramajjhattupekkhāyeva upekkhāti.

Kāyaduccaritato virati **kāyaduccaritavirati**. Eseva nayo sesesupi dvīsu. Lakkhaṇādito pana etā tissopi viratiyo kāyaduccaritādivatthūnaṃ avītikkamalakkhaṇā, kāyaduccaritādivatthuto saṅkocanarasā, akiriyaṃaccupaṭṭhānā, saddhāhiriottappaappicchatādiguṇapadaṭṭhānā. Keci pana imāsu ekekaṃ niyataṃ viratiṃ icchanti. Evaṃ kāmāvacarapaṭhamamahākusalacittena ime tettiṃsa vā catuttiṃsa vā dhammā sampayogaṃ gacchantīti veditabbā.

Yathā ca paṭhamena, evaṃ dutiyacittenāpi. Sasaṅkhārabhāvamattameva hi ettha vireso. Puna tatiyena ñāṇavippayogato ṭhapetvā amohaṃ avasesā dvattiṃsa vā tettiṃsa vā veditabbā. Tathā catutthenāpi sasaṅkhārabhāvamattameva vireso, paṭhame vuttesu pana ṭhapetvā pītiṃ avasesā pañcamena sampayogaṃ gacchanti. Somanassaṭṭhāne cettha upekkhāvedanā pavīṭṭhā. Sā pana iṭṭhāniṭṭhaviparītānubhavanalakkhaṇā, pakkhapātupacchedanarasā. Yathā ca pañcamena, evaṃ chatṭhenāpi. Sasaṅkhāramattameva hoti vireso. Sattamena pana ṭhapetvā paññaṃ avasesā ekattiṃsa vā dvattiṃsa vā dhammā honti, tathā aṭṭhamenāpi. Sasaṅkhāramattameva vireso. Evaṃ tāva kāmāvacarakusalacetāsikā veditabbā.

81. Upekkhāyuttacittesu, na dukkhasukhapītiyo;  
Jāyanteva viṣuṃ pañca, karuṇāmoditādayo.

Avasesesu pana rūpāvacaracittasampayuttā **rūpāvacarā**, tattha paṭhamacittasampayuttā tāva kāmāvacarapaṭhamacitte vuttesu ṭhapetvā viratittayaṃ avasesā veditabbā. Viratiyo pana kāmāvacarakusalalokuttaresveva uppajjanti, na aññesu. Dutiyena vitakkavajjā dvattiṃsa vā tettiṃsa vā. Tatiyena vicāravajjā ekattiṃsa vā dvattiṃsa vā. Catutthena tato pītivajjā tiṃsa vā ekattiṃsa vā. Pañcamena tato karuṇāmoditāvajjā tiṃsa honti, somanassaṭṭhāne upekkhā pavīṭṭhā. Evaṃ rūpāvacarakusalacetāsikā veditabbā.

Arūpāvacaracittasampayuttā **arūpāvacarā**, te pana rūpāvacarapañcame vuttanayena veditabbā. Arūpāvacarabhāvovettha vireso.

Lokuttaracittasampayuttā **lokuttarā**, te pana paṭhamajjhānike maggacitte paṭhamarūpāvacaracitte vuttanayena dutiyajjhānikādibhedepi maggacitte dutiyarūpāvacaracittādisu vuttanayeneva veditabbā. Karuṇāmoditānamabhāvo ca niyataviratibhāvo ca lokuttarabhāvo cettha vireso. Evaṃ tāva kusalaṅcittasampayuttacetāsikā veditabbā.

**Akusalā** pana **cetasikā** bhūmito ekavidhā kāmāvacarāyeva, tesu lobhamūlapaṭhamākusalacittasampayuttā tāva niyatā sarūpenāgatā pannarasa, yevāpanakā niyatā cattāroti ekūnavīsati honti. Aniyatā cha yevāpanakāti sabbe pañcavīsati honti. Seyyathidaṃ – phasso somanassavedanā saññā cetanā vitakko vicāro pīti cittassekaggatā vīriyaṃ jīvitam ahirikaṃ anottappaṃ lobho moho micchādiṭṭhīti ime sarūpenāgatā pannarasa, chando adhimokkho uddhaccaṃ manasikāroti ime cattāro niyatayevāpanakā, ime pana paṭipāṭiyā dasasu cittesu niyatā honti, māno issā macchariyaṃ kukkuccaṃ thinamiddhanti ime chayeveva aniyatayevāpanakā.

82. Evaṃ yevāpanā sabbe, niyatāniyatā dasa;  
Niddiṭṭhā pāpacittesu, hatapāpena tādina.

Tattha **phassoti** akusalacittasahajāto phasso. Esa nayo sesesupi. Na hiriyatīti ahiriko, ahirikassa bhāvo **ahirikaṃ**. Kāyaduccaritādīhi ottappatīti ottappaṃ, na ottappaṃ **anottappaṃ**. Tattha kāyaduccaritādīhi ajjucchanalakkhaṇaṃ, alajjālakkhaṇaṃ vā ahirikaṃ, anottappaṃ teheva asārajjanalakkhaṇaṃ, anuttāsalakkhaṇaṃ vā.

Lubbhanti tena, sayam vā lubbhati, lubbhanamattameva vā tanti **lobho**. So ārammaṇagahaṇalakkhaṇo makkaṭālepo viya, abhisāṅgaraso tattakapāle pakkhittamaṃsapesi viya,

apariccāgappaccupaṭṭhāno telañjanarāgo viya, saṃyojanīyesu dhammesu assādadassanapadaṭṭhāno.

Muyhanti tena, sayaṃ vā muyhati, muyhanamattameva vā tanti **moho**. So cittassa andhabhāvalakkhaṇo, aññānalakkhaṇo vā, asampaṭivedharaso, ārammaṇasabhāvachhādanaraso vā, andhakārapaccupaṭṭhāno, ayonisomanasikārapadaṭṭhāno.

Micchā passanti tāya, sayaṃ vā micchā passati, micchādassanamattameva vā eṣāti **micchādīṭṭhi**. Sā ayonisoabhinivesalakkhaṇā, parāmāsarasā, micchābhinivesapaccupaṭṭhānā, ariyānaṃ adassanakāmatādipadaṭṭhānā.

Uddhatabhāvo **uddhaccaṃ**. Taṃ avūpasamalakkhaṇaṃ vātābhighātacalajalaṃ viya, anavaṭṭhānarasaṃ vātābhighātacaladhajapaṭākā viya, bhantattapaccupaṭṭhānaṃ pāsāñābhighātasamuddhatabhasmaṃ viya, ayonisomanasikārapadaṭṭhānaṃ.

Maññatīti **māno**. So uṇṇatilakkhaṇo, sampaggahaṇaraso, ketukamyatāpaccupaṭṭhāno, diṭṭhivippayuttalobhapadaṭṭhāno.

Issatīti **issā**. Sā parasampattīnaṃ usūyanalakkhaṇā, tattheva anabhiratirasā, tato vimukhabhāvapaccupaṭṭhānā, parasampattipadaṭṭhānā.

Maccharabhāvo **macchariyaṃ**. Taṃ attano sampattīnaṃ niguhaṇalakkhaṇaṃ, tāsamyeva parehi sādharmaṇabhāvaakkhamanarasaṃ, saṅkocanapaccupaṭṭhānaṃ, attasampattipadaṭṭhānaṃ.

Kucchitaṃ kataṃ kukataṃ, tassa bhāvo **kukkuccaṃ**. Taṃ pacchānutāpalakkhaṇaṃ, katākatānusocanarasaṃ, vippaṭisārapaccupaṭṭhānaṃ, katākatapadaṭṭhānaṃ.

Thinatā **thinam**. Middhatā **middham**. Anussāhanasamsīdanatā, asattivighāto cāti attho. Thinañca middhañca thinamiddham. Tattha thinam anussāhanalakkhaṇaṃ, vīriyavinodanarasaṃ, samsīdanabhāvapaccupaṭṭhānaṃ. Middham akammaññatālakkaṇaṃ, onahanarasaṃ, līnatāpaccupaṭṭhānaṃ, ubhayampi ayonisomanasikārapadaṭṭhānaṃ. Sesā kusale vuttanayena veditabbā.

Ettha pana vitakkavīriyasamādhīnaṃ micchāsāṅkappamicchāvāyāmicchāsamādhayo viwesakā. Iti ime ekūnavīsati cetāsikā paṭhamākusalacittena sampayogaṃ gacchantīti veditabbā. Yathā ca paṭhamena, evaṃ dutiyenāpi. Sasaṅkhārabhāvo cettha thinamiddhassa niyatābhāvo ca viwesā. Tatiyena paṭhame vuttesu ṭhapetvā diṭṭhiṃ sesā aṭṭhārasa veditabbā. Māno panettha aniyato hoti, diṭṭhiyā saha na uppajjati. Catutthena dutiye vuttesu ṭhapetvā diṭṭhiṃ avasesā veditabbā. Etthāpi ca māno aniyato hoti. Pañcamena paṭhame vuttesu ṭhapetvā pītiṃ avasesā sampayogaṃ gacchantīti. Somanassaṭṭhāne panettha upekkhā pavīṭṭhā. Chaṭṭhenāpi pañcame vuttasadisā eva. Sasaṅkhāratā, thinamiddhassa niyatābhāvo ca viwesā. Sattamena pañcame vuttesu ṭhapetvā diṭṭhiṃ avasesā veditabbā. Māno panettha aniyato. Aṭṭhamena chaṭṭhe vuttesu ṭhapetvā diṭṭhiṃ avasesā veditabbā. Etthāpi māno aniyato hoti. Evaṃ **lobhamūlacetasikā** veditabbā.

Domanassasahagatesu paṭiḥhasampayuttesu dosamūlesu dvīsu paṭhamena asaṅkhārikena sampayuttā niyatā sarūpenāgatā terasa. Seyyathidaṃ – phasso domanassavedanā saññā cetanā cittekaggatā vitakko vicāro vīriyaṃ jīvitam ahirikaṃ anottappaṃ doso moho ceti ime terasa dhammā chandādīhi catūhi niyatāyevāpanakehi sattarasa honti issāmacchariyakukkucsesu aniyatesu tīsu ekena saha aṭṭhārasa honti, etepi tayo na ekato uppajjanti.

Tattha duṭṭhu manoti dumanā, dumanassa bhāvo domanassaṃ, domanassavedanāyetam adhivacanaṃ. Tena sahatam domanassasahagataṃ. Taṃ aniṭṭhārammaṇānubhavanalakkhaṇaṃ, aniṭṭhākārasambhogarasaṃ, cetāsikābādhapaccupaṭṭhānaṃ, ekanteneva hadayavatthupadaṭṭhānaṃ.

Dussanti tena, sayam vā dussati, dussanamattameva vā tanti **doso**. So caṇḍikkalakkhaṇo pahatāsīviso viya, visappanaraso visanipāto viya, attano nissayadhanaraso vā dāvaggi viya, dussanapaccupaṭṭhāno laddhokāso viya sapatto, āghātavattupadaṭṭhāno. Avasesā heṭṭhā vuttappakārāva. Iti ime sattarasa vā aṭṭhārasa vā navamena sampayogaṃ gacchantīti veditabbā. Yathā ca navamena, evaṃ dasamenāpi. Sasaṅkhāratā, panettha thinamiddhasambhavo ca viseso.

Dvīsu pana mohamūlesu vicikicchāsampayuttēna ekādasamena sampayuttā tāva phasso upekkhāvedanā saññā cetanā vitakko vicāro vīriyaṃ jīvitam cittaṭṭhiti ahirikaṃ anottappaṃ moho vicikicchāti sarūpenāgatā terasa, uddhaccaṃ manasikāroti dve yevāpanakā niyatā. Tehi saddhiṃ pannarasa honti.

Tattha pavattaṭṭhitimattā ekaggaṭā. Vigatā cikicchāti **vicikicchā**. Sabhāvaṃ vicinanto etāya kicchati kilamatīti **vicikicchā**. Sā saṃsayalakkhaṇā, kampanarasā, anicchayapaccupaṭṭhānā, ayonisomanasikārapadaṭṭhānā. Sesā vuttanayā eva.

Dvādasamena uddhaccasampayuttēna sampayuttā sarūpenāgatā vicikicchāsahagate vuttēsu vicikicchāhīnā uddhaccaṃ sarūpena āgataṃ, tasmā teraseva honti. Vicikicchāya abhāvena panettha adhimokkho uppajjati, tena saddhiṃ cuddasa honti. Adhimokkhasambhavato samādhi balavā hoti, adhimokkhamanasikārā dve yevāpanakā, tehi saha pannaraseva honti. Evaṃ tāva akusalacetāsikā veditabbā.

Idāni **abyākatā** vuccanti, abyākatā pana duvidhā vipākakiriyabhedato. Tattha **vipākā** kusalā viya bhūmivasena catubbidhā kāmāvacaraṃ rūpāvacaraṃ arūpāvacaraṃ lokuttarañceti. Tattha kāmāvacaravipākā sahetukāhetukavasena duvidhā. Tattha sahetukavipākasampayuttā **sahetukā**. Te sahetukakāmāvacarakusalasampayuttasadisā. Yā pana karuṇāmuditā aniyatā, tā sattārammaṇattā vipākesu nuppajjanti. Kāmāvacaravipākānaṃ ekantaparittārammaṇattā viratiyo panettha ekantakusalattā na labbhanti. **Vibhaṅge** ‘‘pañca sikkhāpadā kusalāyevā’’ti hi vuttaṃ. Evaṃ kāmāvacarasahetukavipākacetāsikā veditabbā.

83. Tettiṃsādivvaye dhammā, dvattiṃseva tato pare;  
Bāttiṃsa pañcame chaṭṭhe, ekattiṃsa tato pare.

Ahetukacittasampayuttā pana **ahetukā**. Tesu cakkhaviññāṇasampayuttā tāva phasso upekkhāvedanā saññā cetanā jīvitam cittaṭṭhiti sarūpenāgatā cha, manasikārena ca satta honti. Sotaghānajivhākāyaviññāṇasampayuttāpi satta satteva cetāsikā. Tattha kāyaviññāṇasampayuttēsu pana upekkhāṭṭhāne sukhavedanā pavīṭṭhā. Sā kāyikasātalakkhaṇā, pīṇanarasā, sesā vuttanayā eva.

84. Iṭṭhārammaṇayogasmim, cakkhaviññāṇakādisu;  
Sati kasmā upekkhāva, vuttā catūsu satthunā.
85. Upādāya ca rūpena, upādārūpake pana;  
Saṅghaṭṭanānighaṃsassa, dubbalattāti dīpaye.
86. Pasādaṃ panatikkamma, kūṭamva picupiṇḍakaṃ;  
Bhūtarūpena bhūtānaṃ, ghaṭṭanāya sukhādikaṃ.

Tasmā kāyaviññāṇam sukhādisampayuttanti veditabbaṃ. Manodhātunā sampayuttā sarūpenāgatā cakkhaviññāṇena saddhiṃ vuttā cha, vitakkavicārehi saha aṭṭha, adhimokkhamanasikārehi dvīhi yevāpanakehi dasa dhammā honti. Tathā manoviññāṇadhātuupekkhāsahagatena. Somanassasahagatena pītiadhikā vedanāparivattanañca nānattaṃ. Tasmāvettha ekādasa dhammā honti. Evaṃ ahetukāpi kāmāvacaravipākacetāsikā veditabbā.



Rūpāvacaravipākacittasampayuttā pana **rūpāvacarā**. Arūpāvacaravipākacittasampayuttā **arūpāvacarā**. Te sabbepi attano attano kusalacittasampayuttacetāsikehi sadisāyevāti.

Lokuttaravipākacittasampayuttā **lokuttarā**. Te sabbe tesamyeva lokuttaravipākacittānaṃ sadisā kusalacittasampayuttehi cetāsikehi sadisā. Evaṃ rūpāvacarārūpāvacaralokuttaravipākacetāsikā veditabbā.

Akusalavipākacittasampayuttā pana **akusalavipākacetāsikā** nāma. Te pana kusalavipākāhetukacittesu cakkhuviññāṇādīsu vuttacetāsikasadisā. Ettha pana kāyaviññāṇe dukkhavedanā pavitṭhā. Sā kāyikābādhalakkhaṇā. Sesā vuttanayāyevāti. Evaṃ chattimsa vipākacittasampayuttacetāsikā veditabbā.

Kiriyābyākatā ca cetāsikā bhūmito tividhā honti kāmāvacarā rūpāvacarā arūpāvacarāti. Tattha **kāmāvacarā** sahetukāhetukato duvidhā honti. Tesu sahetukakiriyacittasampayuttā **sahetukā**, te pana aṭṭhahi kāmāvacarakusalacittasampayuttehi samānā ṭhapetvā viratittayaṃ aniyatayevāpanakesu karuṇāmudītāyeva uppajjanti. Ahetukakiriyacittasampayuttā **ahetukā**, te kusalavipākāhetukamanodhātumanoviññāṇadhātucittasampayuttehi samānā. Manoviññāṇadhātudvaye pana vīriyindriyaṃ adhikaṃ. Vīriyindriyasambhavato panettha balappatto samādhi hoti. Hasituppādacittena sampayuttā dvādasa dhammā honti pītiyā saha. Ayamettha viseso.

Rūpāvacarakiriyacittasampayuttā pana **rūpāvacarā**. Arūpāvacarakiriyacittasampayuttā **arūpāvacarā**. Te sabbepi sakasakabhūmikusalacittasampayuttehi samānāti. Evaṃ vīsati kiriyacittasampayuttā ca cetāsikā veditabbā.

Ettāvatā kusalākusalavipākakiriyabhedabhinnena ekūnanavutiyā cittaena sampayuttā cetāsikā niddiṭṭhā honti.

87. Kusalākusalehi vipākakriyā-  
Hadayehi yutā pana cetāsikā;  
Sakalāpi ca sādhu mayā kathitā,  
Sugatena mahāmuninā kathitā.
88. Avagacchati yo imaṃ anunaṃ,  
Paramaṃ tassa samantato mati;  
Abhidhammanaye dūrāsade,  
Atigambhīraṭṭhāne vijambhate.

Iti abhidhammāvatāre cetāsikaniddeso nāma

Dutiyo paricchedo.

### 3. Tatiyo paricchedo

#### Cetāsikavibhāganiddeso

89. Sabbe cetāsikā vuttā, buddhenādiccabandhunā;  
Nāmasāmaññatoyeva, dvepaññāsa bhavanti te.

Seyyathidaṃ – phasso vedanā saññā cetanā vitakko vicāro pīti cittekaggatā vīriyaṃ jīvitam chando adhimokkho manasikāro tatramajjhataṭṭhā saddhā sati hirī ottappaṃ alobho adoso amoho

kāyappassaddhiādīni cha yugāni, tisso viratiyo, karuṇā muditā lobho doso moho uddhaccaṃ māno diṭṭhi issā macchariyaṃ kukkuccaṃ thināṃ middhaṃ vicikicchā ahirikaṃ anottappañcāti.

90. Catupaññāsadhā kāme, rūpe pañcadaseritā;  
Te honti dvādasārūpe, cattālīsamanāsavā.
91. Ekavīśasataṃ sabbe, cittuppādā samāsato;  
Etesu tesamuppattiṃ, uddharitvā panekakaṃ.
92. Phassādīnaṃ tu dhammānaṃ, pavakkhāmi ito paraṃ;  
Pāṭavathāya bhikkhūnaṃ, cittacetāsikesvahaṃ.
93. Ekaggatā manakkāro, jīvitaṃ phassapañcakaṃ;  
Aṭṭhete avinibbhogā, ekuppādā sahaṃkaya.
94. Phasso ca vedanā saññā, cetanā jīvitindriyaṃ;  
Ekaggatā manakkāro, sabbasādhāraṇā ime.
95. Vitakko pañcapaññāsa-cittesu samudārito;  
Cāro chasaṭṭhicittesu, jāyate natthi saṃsayo.
96. Ekapaññāsacittesu, pīti tesatṭhiyā sukhaṃ;  
Upekkhā pañcapaññāsa-citte dukkhaṃ tu tīsu hi.
97. Hoti dvāsaṭṭhicittesu, somanassindriyaṃ pana;  
Dukkhindriyaṃ panekasmīṃ, tathekamhi sukhindriyaṃ.
98. Pañcuttarasate citte, vīriyaṃ āha nāyako;  
Catuttarasate citte, samādhindriyamabravi.
99. Sabbāhetukacittāni, ṭhapetvā cekahetuke;  
Ekuttarasate citte, chandassuppattimuddise.
100. Ṭhapetvā dasa viññāṇe, vicikicchāyutampi ca;  
Dasuttarasate citte, adhimokkho udārito.
101. Saddhā sati hirottappaṃ, alobhādosamajjhātā;  
Chaḷeva yugaḷā cāti, dhammā ekūnavīsati.
102. Ekanavutiyā citte, jāyanti niyatā ime;  
Ahetukesu cittesu, apuññesu na jāyare.
103. Ekūnāsītiyā citte, paññā jāyati sabbadā;  
Aṭṭhavīsatiyā citte, karuṇāmuditā siyuṃ.
104. Kāmāvacarapuññesu, sabbalokuttaresu ca;  
Cattālīsavidhe citte, sātṭhake viratittayaṃ.
105. Saddhā sati hirottappaṃ, alobhādittayampi ca;  
Yugaḷāni cha majjhattaṃ, karuṇāmuditāpi ca.
106. Tathā viratiyo tisso, sabbe te pañcavīsati;

Kusalābyākatā cāpi, kusalena pakāsītā.

107. Ahirīkamanottappaṃ, moho uddhaccameva ca;  
Dvādasāpuññacittesu, niyatāyeva jāyare.
108. Lobho doso ca moho ca, māno diṭṭhi ca saṃsayo;  
Middhamuddhaccakukkuccaṃ, thināṃ macchariyampi ca.
109. Ahirīkamanottappaṃ, issā ca domanassakaṃ;  
Ete akusalā vuttā, ekantena mahesinā.
110. Lobho aṭṭhasu niddiṭṭho, vuttā catūsu diṭṭhitu;  
Māno diṭṭhiviyuttesu, dosodvīsveva jāyate.
111. Issāmaccherakukkuccā, dvīsū jāyanti no saha;  
Vicikicchā panekasmiṃ, thinamiddhaṃ tu pañcasu.
112. Phasso ca vedanā saññā, cetanā jīvitāṃ mano;  
Vitakko ca vicāro ca, pīti vīriyasamādhi ca.
113. Chando cevādhimokkho ca, manasikāro ca cuddasa;  
Kusalākusalā ceva, honti abyākatāpi ca.
114. Ekūnatīṃsacittesu, jhānaṃ pañcaṅgikaṃ matāṃ;  
Catujhānaṅgayuttāni, sattatīṃsāti niddise.
115. Ekādasavidhaṃ cittaṃ, tivaṅgikamudīritaṃ;  
Catutīṃsavidhaṃ cittaṃ, duvaṅgikamudīritaṃ.
116. Sabhāvenāvitakkesu, jhānaṅgāni na uddhare;  
Sabbāhetukacittesu, maggaṅgāni na uddhare.
117. Tīṇi soḷasacittesu, indriyāni vade budho;  
Ekasmiṃ pana cattāri, pañca terasasuddhare.
118. Satta dvādasacittesu, indriyāni jinobravi;  
Ekenūnesu aṭṭheva, cattālīsamanesu ca.
119. Cattālīsāya cittesu, navakaṃ nāyakobravi;  
Evaṃ indriyayogopi, veditabbo vibhāvinā.
120. Amaggaṅgāni nāmettha, aṭṭhārasa ahetukā;  
Jhānaṅgāni na vijjanti, viññāṇesu dvipañcasu.
121. Ekaṃ cittaṃ dumaggaṅgaṃ, timaggaṅgāni sattu;  
Cattālīsāya cittesu, maggo so caturaṅgiko.
122. Pañcaddasasu cittesu, maggo pañcaṅgiko mato;  
Vutto dvattīṃsacittesu, maggo sattaṅgikopi ca.
123. Maggo aṭṭhasu cittesu, mato aṭṭhaṅgikoti hi;  
Evaṃ tu sabbacittesu, maggaṅgāni samuddhare.

124. Balāni dve dvicittesu, ekasmiṃ tīṇi dīpaye;  
Ekādasasu cattāri, cha dvādasasu niddise.
125. Ekūnāsītiyā satta, soḷasevābalāni tu;  
Cittamevaṃ tu viññeyyaṃ, sabalaṃ abalampi ca.
126. Jhānaṅgamaggaṅgabalindriyāni,  
Cittesu jāyanti hi yesu yāni;  
Mayā samāsenā samuddharitvā,  
Vuttāni sabbānipi tāni tesu.

Iti abhidhammāvatāre cetasikavibhāganiddeso nāma

Tatiyo paricchedo.

## 4. Catuttho paricchedo

### Ekavidhādiniddeso

127. Ito paraṃ pavakkhāmi, nayamekavidhādikam;  
Ābhidhammikabhikkhūnaṃ, buddhiyā pana vuddhiyā.
128. Sabbamekavidham cittaṃ, vijānanasabhāvato;  
**Duvidha**ñca bhava cittaṃ, ahetukasahetuto.
129. Puññāpuññavipākā hi, kāme dasa ca pañca ca;  
Kriyā tissoti sabbepi, aṭṭhārasa ahetakā.
130. Ekasattati sesāni, cittuppādā mahesinā;  
Sahetukāti niddiṭṭhā, tādinaṃ hetuvādinā.
131. Savatthukāvattukato, tathobhayavasena ca;  
Sabbam vuttapakāraṃ tu, **tividham** hoti mānasaṃ.
132. Sabbo kāmavipāko ca, rūpe pañcadasāpi ca;  
Ādimaggo situppādo, manodhātu kriyāpi ca.
133. Domanassadvayañcāpi, tecattālīsa mānasā;  
Nuppajjanti vinā vatthum, ekantena savatthukā.
134. Arūpāvacarapākā ca, ekantena avatthukā;  
Dvācattālīsa sesāni, cittānubhayathā siyumu.
135. Ekekārammaṇaṃ cittaṃ, pañcārammaṇameva ca;  
Chalārammaṇakañceti, evampi **tividham** siyā.
136. Viññāṇāni ca dvepañca, aṭṭha lokuttarāni ca;  
Sabbam mahaggatañceva, ṭhapetvābhiññamānasaṃ.
137. Tecattālīsa viññeyyā, ekekārammaṇā pana;  
Manodhātuttayaṃ tattha, pañcārammaṇamīritam.

138. Tecattālīsa sesāni, chaḷārammaṇikā matā;  
Tathā ca **tividham** cittaṃ, kusalākusalādito.
139. Ahetuṃ ekahetuñca, dvihetuñca tihetukaṃ;  
Evaṃ **catubbidham** cittaṃ, viññātabbaṃ vibhāvinā.
140. Heṭṭhā mayāpi niddiṭṭhā, aṭṭhārasa ahetakā;  
Vicikicchuddhaccasaṃyuttaṃ, ekahetumudīritaṃ.
141. Kāme dvādasadhā puñña-vipākakriyato pana;  
Dasadhākusalā cāti, bāvīsati duhetukā.
142. Kāme dvādasadhā puñña-vipākakriyato pana;  
Sabbhaṃ mahaggatañceva, appamāṇaṃ tihetukaṃ.
143. Rūpīriyāpathaviññatti-janakājanakādito;  
Evañcāpi hi taṃ cittaṃ, hoti sabbhaṃ **catubbidham**.
144. Dvādasākusalā tattha, kusalā kāmadhātuyā;  
Tathā dasa kriyā kāme, abhiññāmānasaṃ dvayaṃ.
145. Samuṭṭhāpenti rūpāni, kappenti iriyāpathaṃ;  
Janayanti ca viññattiṃ, ime dvattiṃsa mānasā.
146. Kusalā ca kriyā ceva, te mahaggatamānasā;  
Aṭṭhānāsavacittāni, chabbīsati ca mānasā.
147. Samuṭṭhāpenti rūpāni, kappenti iriyāpathaṃ;  
Copanaṃ na ca pāpenti, dvikiccā niyatā ime.
148. Ṭhapetvā dasa viññāṇe, vipākā dvīsu bhūmisu;  
Kriyā ceva manodhātu, imānekūnavīsati.
149. Samuṭṭhāpenti rūpāni, na karontitaradvayaṃ;  
Puna dvepañcaviññāṇā, vipākā ca arūpisu.
150. Sabbesaṃ sandhicittañca, cuticittañcārahato;  
Na karonti tikiccāni, ime soḷasa mānasā.
151. Ekadviticatūṭṭhāna-pañcaṭṭhānapabhedato;  
**Pañcadhā** cittamakkhāsi, pañcānimmalalocano.
152. Kusalākusalā sabbe, cittuppādā mahākriyā;  
Mahaggatā kriyā ceva, cattāro phalamānasā.
153. Sabbeva pañcapaññāsa, nippapañcena satthunā;  
Javanaṭṭhānatoyeva, ekaṭṭhāne niyāmitā.
154. Puna dvepañcaviññāṇā, dassane savane tathā;  
Ghāyane sāyane ṭhāne, phusane paṭipāṭiyā.
155. Manodhātuttikaṃ ṭhāne, āvajjane paṭicchane;

Aṭṭhasatṭhi bhavantete, ekaṭṭhānikataṃ gatā.

156. Puna dviṭṭhānikaṃ nāma, cittadvayamudīritaṃ;  
Somanassayutaṃ pañca-dvāre santīraṇaṃ siyā.
157. Tadārammaṇaṃ chadvāre, balavārammaṇe sati;  
Tathā voṭṭhabbanaṃ hoti, pañcadvāresu voṭṭhabo.
158. Manodvāresu sabbesaṃ, hoti āvajjanaṃ pana;  
Idaṃ dviṭṭhānikaṃ nāma, hoti cittadvayaṃ pana.
159. Paṭisandhibhavaṅgassa, cutiyā ṭhānato pana;  
Mahaggatavipākā te, nava tiṭṭhānikā matā.
160. Aṭṭha kāmā mahāpākā, paṭisandhibhavaṅgato;  
Tadārammaṇato ceva, cutiṭṭhānavasena ca.
161. Catuṭṭhānikacittāni, aṭṭha hontīti niddise;  
Kusalākusalapākā tu-pekkhāsahagatadvayaṃ.
162. Santīraṇaṃ bhava pañca-dvāre chadvārikesu ca;  
Tadārammaṇataṃ yāti, balavārammaṇe sati.
163. Paṭisandhibhavaṅgānaṃ, cutiṭṭhānavasena ca;  
Pañcaṭṭhānikacittanti, idaṃ dvayamudīritaṃ.
164. Pañcakiccaṃ dvayaṃ cittaṃ, catukiccaṃ panaṭṭhakaṃ;  
Tikiccaṃ navakaṃ dve tu, dvikiccā sesamekakaṃ.
165. Bhavaṅgāvajjanañceva, dassanaṃ sampaṭicchanaṃ;  
Santīraṇaṃ voṭṭhabbanaṃ, javanaṃ bhavati sattamaṃ.
166. **Chabbidhaṃ** hoti taṃ channaṃ, viññāṇānaṃ pabhedato;  
**Sattadhā** sattaviññāṇa-dhātūnaṃ tu pabhedato.
167. Ekekārammaṇaṃ chakkaṃ, pañcārammaṇabhedato;  
Chaḷārammaṇato ceva, hoti **aṭṭhavidhaṃ** mano.
168. Tattha dvepañcaviññāṇā, honti ekekagocarā;  
Rūpārammaṇikā dve tu, dve dve saddādigocarā.
169. Sabbaṃ mahaggataṃ cittaṃ, pañcābhiññāvivajjitaṃ;  
Sabbaṃ lokuttarañceti, ekekārammaṇaṃ bhava.
170. Ekekārammaṇaṃ chakka-midaṃ ñeyyaṃ vibhāvinā;  
Pañcārammaṇikaṃ nāma, manodhātuttayaṃ bhava.
171. Kāmāvacaracittāni, cattālīsaṃ tathekakaṃ;  
Abhiññāni ca sabbāni, chaḷārammaṇikāniti.
172. Cittaṃ **navavidhaṃ** hoti, sattaviññāṇadhātusu;  
Pacchimañca tidhā katvā, kusalākusalādito.

173. Puññāpuññavaseneva, vipākakriyabhedato;  
Chasattatividho bhedo, manoviññāṇadhātuyā.
174. Manodhātuṃ dvidhā katvā, vipākakriyabhedato;  
**Navadhā** pubbavuttehi, **dasadhā** hoti mānasam.
175. Dhātudvayaṃ tidhā katvā, pacchimaṃ puna paṇḍito;  
**Ekādasavidham** cittaṃ, hotīti paridīpaye.
176. Manoviññāṇadhātumpi, kusalākusalādito;  
Catudhā vibhajitvāna, vade **dvādasadhā** ṭhitaṃ.
177. Bhave **cuddasadhā** cittaṃ, cuddasaṭṭhānabhedato;  
Paṭisandhibhavaṅgassa, cutiyāvajjanassa ca.
178. Pañcannaṃ dassanādīnaṃ, sampaṭicchanacetaso;  
Santīraṇassa voṭṭhabba-javanānaṃ vasena ca.
179. Tadārammaṇacittassa, tatheva ṭhānabhedato;  
Evaṃ cuddasadhā cittaṃ, hotīti paridīpaye.
180. Bhūmipuggalanānāṭṭa-vasena ca pavattito;  
**Bahudhā** panidaṃ cittaṃ, hotīti ca vibhāvaye.
181. Ekavidhādinaye panimasmiṃ,  
Yo kusalo matimā idha bhikkhu;  
Tassabhidhammagatā pana atthā,  
Hatthagatāmalakā viya honti.

Iti abhidhammāvatāre ekavidhādiniddeso nāma

Catuttho paricchedo.

## 5. Pañcama paricchedo

### Bhūmipuggalacittuppattiniddeso

182. Ito paraṃ pavakkhāmi, buddhivuddhikaraṃ nayaṃ;  
Cittānaṃ bhūmīsippattiṃ, puggalānaṃ vasena ca.
183. Devāceva manussā ca, tisso vāpāyabhūmiyo;  
Gatiyo pañca niddiṭṭhā, satthunā tu tayo bhavā.
184. Bhūmiyo tattha tiṃseva, tāsū tiṃseva puggalā;  
Bhūmīsivētāsū uppannā, sabbe ca pana puggalā.
185. Paṭisandhikacittānaṃ, vasenekūnavīsati;  
Paṭisandhi ca nāmesā, duvidhā samudīritā.
186. Acittakā sacittā ca, asaññīnamacittakā;  
Sesā **sacittakā** ñeyyā, sā panekūnavīsati.

187. Paṭisandhivaseneva, honti vīsati puggalā;  
Idha cittādhikārattā, acittā na ca uddhaṭā.
188. Ahetudvitihetūti, puggalā tividhā siyuṃ;  
Ariyā pana aṭṭhāti, sabbe ekādasaritā.
189. Etesaṃ pana sabbesaṃ, puggalānaṃ pabhedato;  
Cittānaṃ bhūmīsappattiṃ, bhaṇato me nibodhatha.
190. Tiṃsabhūmīsu cittāni, kati jāyanti me vada;  
Cuddaseva tu cittāni, honti sabbāsu bhūmisu.
191. Sadā vīsati cittāni, kāmeveva bhava siyuṃ;  
Pañca rūpabhaveveva, cattāreva arūpisu.
192. Kāmarūpabhavesveva, aṭṭhārasa bhavanti hi;  
Dvecattālīsa cittāni, honti tīsu bhavesupi.
193. Ṭhapetvā pana sabbāsaṃ, catassopāyabhūmiyo;  
Teraseva ca cittāni, honti chabbīsabhūmisu.
194. Aparāni catassopi, ṭhapetvārūpabhūmiyo;  
Cittāni pana jāyanti, cha ca chabbīsabhūmisu.
195. Suddhāvāsikadevānaṃ, ṭhapetvā pañca bhūmiyo;  
Pañca cittāni jāyante, pañcavīsatibhūmisu.
196. Aparāni duve honti, pañcavīsatibhūmisu;  
Ṭhapetvā nevasaññaṇa, catassopāyabhūmiyo.
197. Dvepi cittāni jāyanti, catuvīsatibhūmisu;  
Ākiñcaññaṃ nevasaññaṇa, ṭhapetvāpāyabhūmiyo.
198. Apāyabhūmiyo hitvā, tisso āruppabhūmiyo;  
Dveyeva pana cittāni, honti tevīsabhūmisu.
199. Arūpe ca apāye ca, ṭhapetvā aṭṭha bhūmiyo;  
Ekādasavidhaṃ cittaṃ, honti dvāvīsabhūmisu.
200. Suddhāvāse apāye ca, ṭhapetvā nava bhūmiyo;  
Ekavīsāsu niccampi, cattārova bhavanti hi.
201. Ekaṃ sattarasasveva, cittaṃ jāyati bhūmisu;  
Suddhāvāse ṭhapetvā tu, apāyārūpabhūmiyo.
202. Dvādaseva tu jāyante, ekādasasu bhūmisu;  
Ṭhapetvā pana sabbāpi, bhūmiyo hi mahaggatā.
203. Kāmāvacaradevānaṃ, manussānaṃ vasena tu;  
Aṭṭha cittāni jāyante, sadā sattasu bhūmisu.
204. Pañcamajjhānapākeko, jāyate chasu bhūmisu;



- Cattāri pana cittāni, tīsu tīsveva bhūmisu.
205. Cattāri pana cittāni, honti ekeabhūmisu;  
Arūpāvacarapākānaṃ, vasena paridīpaye.
206. Kusalākusalā kāme,  
Tesaṃ pākā ahetukā;  
Āvajjanadvayañcāti,  
Sattatiṃseva mānasā.
207. Narakādīsvapāyesu, catūsupi ca jāyare;  
Dvepaññāsāvasesāni, nuppajjanti kadācipi.
208. Kāme devamanussānaṃ, nava pākā mahaggaṭā;  
Neva jāyanti jāyanti, asīti hadayā sadā.
209. Kāme aṭṭha mahāpākā, domanassadvayampi ca;  
Tathā ghānādiviññāṇa-ttayaṃ pākā apuññajā.
210. Natthi āruppapakā ca, rūpāvacarabhūmiyaṃ;  
Imehi saha cīttehi, tayo maggā phaladvayaṃ.
211. Cattāro diṭṭhisamyuttā, vicikicchāyutampi ca;  
Cattāro heṭṭhimā pākā, suddhāvāse na labbhare.
212. Sesāni ekapaññāsa, cittāni pana labbhare;  
Rūpāvacarikā sabbe, vipākā kāmadvayā.
213. Domanassādimaggo ca, kriyā ca dve ahetukā;  
Tecatālīsa cittāni, natthi āruppabhūmiyaṃ.
214. Evaṃ bhūmivaseneva, cittupattim vibhāvaye;  
Tathā ekādasannampi, puggalānaṃ vasena ca.
215. Kusalākusalā kāme,  
Tesaṃ pākā ahetukā;  
Āvajjanadvayañcāti,  
**Sattatiṃseva** mānasā.
216. Ahetukassa sattassa, jāyante pañcabhūmisu;  
Dvepaññāsāvasesāni, na jāyanti kadācipi.
217. Ahetukassa vuttehi, kāmāpākā duhetukā;  
Duhetukassa jāyante, **cattālīsaṃ tathekakaṃ**.
218. Sabbe mahaggaṭā ceva, sabbepi ca anāsavā;  
Tihetukā vipākā ca, kāme nava kriyāpi ca.
219. Duhetuno na jāyanti, **cattālīsaṃ** tathāṭṭha ca;  
Kāmāvacarasattassa, tihetupaṭṭisandhino.
220. Puthujjanassa jāyante, **catupaññāsa** mānasā;

Dvihetukassa vuttāni, **cattālīsaṃ tathekakaṃ**.

221. Cattāro nāṇasaṃyuttā, vipākā kāmādhātuyā;  
Rūpārūpesu puññāni, **catupaññāsa** mānasā.
222. Puthujjanassa jāyante, pañcatīṃsa na jāyare;  
Chadevesu manusse, sotāpannassa dehino.
223. **Paññāsevassa** cittāni, jāyantīti viniddise;  
Navatīṃseva cittāni, nuppajantīti dīpaye.
224. Sotāpannassa vuttāni, ṭhapetvā paṭhamaṃ phalaṃ;  
Attanova phalenassa, sakadāgāmino siyūṃ.
225. Sotāpannassa vuttāni, ṭhapetvā paṭighadvayaṃ;  
Dutiyaṃ ca phalaṃ hitvā, yāni cittāni tāniti;  
Anāgāmissa sattassa, jāyantīti viniddise.
226. Kati cittāni jāyante, kāme arahato pana;  
**Cattārisaṅca cattāri**, kāme arahato siyūṃ.
227. Maggaṭṭhānaṃ catunnampi, puggalānaṃ sakaṃ sakaṃ;  
Maggacittaṃ siyā tesāṃ, ekacittakkhaṇā hi te.
228. Puthujjanassa tīsveva, paṭhamajjhānabhūmisu;  
**Pañcatīṃseva** cittāni, jāyanteti viniddise.
229. Ghānādīsu ca viññāṇa-ttayaṃ satta apuññajā;  
Mahāpākā tathā pākā, uparijjhānabhūmikā.
230. Vipākāpi ca āruppā, domanassadvayampi ca;  
Aṭṭhārasa kriyā ceva, aṭṭha lokuttarāni ca.
231. Paṭhamajjhānanibbatta-puthujjanasarīrino;  
Etāni catupaññāsa, cittāni na ca labbhare.
232. Sotāpannassa cittāni, tathekatiṃsa jāyare;  
Puthujjanassa vuttesu, hitvā cāpuññāpañcakaṃ.
233. Sakadāgāmino tattha, ṭhapetvā paṭhamaṃ phalaṃ;  
**Ekatiṃseva** jāyante, pakkipitvā sakaṃ phalaṃ.
234. Anāgāmissa tattheva, ṭhapetvā dutiyaṃ phalaṃ;  
**Ekatiṃseva** jāyante, phalacittena attano.
235. Viññāṇaṃ cakkhusotānaṃ, puññajaṃ sampañcchanāṃ;  
Santīraṇadvayañceva, kriyacittāni vīsati.
236. Arahattaphalaṃ pāko, paṭhamajjhānasambhavo;  
**Sattavīsati** cittāni, arahantassa jāyare.
237. Puthujjanassa tīsveva, dutiyajjhānabhūmisu;

**Chattimsa** dutiyajjhāna-tatijajjhānapākato.

238. Puthujjanassa vuttesu, hitvā vāpuññaṇapañcakam;  
Sotāpannassa **bāttimsa**, phalena saha attano.
239. Sotāpannassa vuttesu, ṭhapetvā paṭhamam phalam;  
**Bāttimsa** phalacittena, sakadāgāmissa attano.
240. Sakadāgāmīsu vuttesu, ṭhapetvā dutiyam phalam;  
Anāgāmiphalenassa, **bāttimseva** bhavanti hi.
241. Arahantassa tīsveva, **aṭṭhavīsati** attano;  
Phalena dutiyajjhāna-tatijajjhānapākato.
242. Parittakasubhādīnam, devānam tīsu bhūmisu;  
**Pañcatimseva** jāyante, catutthajjhānapākato.
243. Sotāpannassa **tattheke-timsa** cittāni jāyare;  
Sakadāgāmino evam, tathānāgāminopi ca.
244. Khīṇāsavassa tattheva, **sattavīsati** mānasā;  
Tathā vehapphale cāpi, sabbesaṃ honti mānasā.
245. **Ekatimseva** cittāni, suddhāvāsikabhūmisu;  
Anāgāmikasattassa, hontīti paridīpaye.
246. Arahato pana tattheva, mānasā **sattavīsati**;  
Evam rūpīsu cittāni, viññeyyāni vibhāvīnā.
247. **Catuvīsati** cittāni, paṭhamārubbabhūmiyam;  
Puthujjanassa sattassa, jāyantīti viniddise.
248. Sotāpannassa tattheva, ṭhapetvāpuññaṇapañcakam;  
**Samavīsati** cittāni, phalena saha attano.
249. Sakadāgāmino tattha, tathānāgāminopi ca;  
Jāyanti **vīsa** cittāni, pubbapubbaphalam vinā.
250. Khīṇāsavassa tattheva, **dasapañca** ca mānasā;  
Puthujjanassa sattassa, dutiyārubbabhūmiyam.
251. Honti **tevīsa** cittāni, iti vatvā vibhāvaye;  
Tiṇṇannampettha sekhānam, cittānekūnavīsati.
252. **Cuddaseva** tu cittāni, dutiyārubbabhūmiyam;  
Kriyādvādasa pākeko, phalam khīṇāsavassa tu.
253. Puthujjanassa sattassa, tatiyārubbabhūmiyam;  
**Bāvīsati** ca cittāni, bhavantīti pakāsaye.
254. **Aṭṭhāraseva** cittāni, sotāpannassa jāyare;

- Sakadāgāmino tāni, ṭhapetvā paṭhamamaṃ phalaṃ.
255. Sakadāgānivuttesu, ṭhapetvā dutiyamaṃ phalaṃ;  
Aṭṭhāraseva cittāni, anāgāmissa jāyare.
256. **Teraseva** ca cittāni, tatiyāruppabhūmiyaṃ;  
Khīṇāsavassa sattassa, bhavantīti viniddise.
257. **Ekavīsati** cittāni, catutthāruppabhūmiyaṃ;  
Puthujjanassa sattassa, jāyantīti viniddise.
258. Sotāpannassa sattassa, **sattarasa** pakāsaye;  
Sakadāgāmino tāni, ṭhapetvā paṭhamamaṃ phalaṃ.
259. Sakadāgānivuttesu, ṭhapetvā dutiyamaṃ phalaṃ;  
Honti **sattarasevassa**, anāgāmissa mānasā.
260. **Dvādaseva** tu cittāni, catutthāruppabhūmiyaṃ;  
Jāyanti arahantassa, iti vatvā vibhāvaye.
261. Heṭṭhimānaṃ arūpīnaṃ, brahmānaṃ uparūpari;  
Arūpakusalā ceva, uppajjanti kriyāpi ca.
262. Uddhamuddhamarūpīnaṃ, heṭṭhimā heṭṭhimā pana;  
Āruppāneva jāyante, diṭṭhādīnavato kira.
263. Ṭhapetvā paṭhamamaṃ maggaṃ, kusalānuttarā tayo;  
Kāmāvacarapuññāni, apuññāni tathā dasa.
264. Cattārāruppapuññāni, sabbe pākā anuttarā;  
Paṭhamāruppapakā ca, nava kāmakriyāpi ca.
265. Āruppāpi kriyā sabbā, tecattālīsa mānasā;  
Uppajjanti panetāni, paṭhamāruppabhūmiyaṃ.
266. Sabbo kāmavipāko ca, sabbo rūpomahaggato;  
Cittuppādo manodhātu, domanassadvayampi ca.
267. Ādimaggo tayo pākā, āruppā ca tathūpari;  
Chacattālīsa natthettha, paṭhamāruppabhūmiyaṃ.
268. Vuttesu pana cittesu, paṭhamāruppabhūmiyaṃ;  
Ṭhapetvā paṭhamāruppa-ttayaṃ pakā ca attano.
269. Tālīsetāni jāyante, dutiyāruppabhūmiyaṃ;  
Evaṃ sesadvaye ñeyyā, hitvā heṭṭhimahetṭhimamaṃ.
270. Attano attano pākā, cattāro ca anāsavā;  
Vipākā honti sabbeva, catūsvāruppabhūmisu.
271. Voṭṭhabbanena cittena, kāme aṭṭha mahākriyā;  
Catassopi ca āruppā, teraseva kriyā siyuṃ.

272. Khīṇāsavassa jāyante, paṭhamārubbabhūmiyaṃ;  
Dvādaseva kriyā honti, dutiyārubbabhūmiyaṃ.
273. Ekādasa kriyā honti, tatiyārubbabhūmiyaṃ;  
Daseva ca kriyā ñeyyā, catutthārubbabhūmiyaṃ.
274. Arahato pana cittāni, honti ekūnavīsati;  
Arahattaṃ kriyā sabbā, ṭhapetvāvajjanadvayaṃ.
275. Catunnaṅca phalaṭṭhānaṃ, tihetukaputhujjane;  
Teraseva ca cittāni, bhavantīti pakāsaye.
276. Cattāro ñāṇasaṃyuttā, mahāpākā tathā nava;  
Rūpārūpavipākā ca, teraseva bhavantime.
277. Catunnaṅca phalaṭṭhānaṃ, duhetukaputhujjane;  
Ñāṇahīnāni cattāri, vipākā eva jāyare.
278. Puthujjanānaṃ tiṇṇampi, catunnaṃ ariyadehināṃ;  
Sattaraseva cittāni, sattannampi bhavanti hi.
279. Viññāṇāni duve pañca, manodhātuttayampi ca;  
Santīraṇāni voṭṭhabbaṃ, honti sattarasevime.
280. Heṭṭhā tiṇṇaṃ phalaṭṭhānaṃ, tihetukaputhujjane;  
Naveva kusalā honti, catunnampi mahaggatā.
281. Tiṇṇaṃ puthujjanānaṅca, tiṇṇamariyānamādito;  
Teraseva tu cittāni, uppajjantīti niddise.
282. Aṭṭheva kāmapuññāni, diṭṭhihīnā apuññato;  
Cattāropi ca uddhacca-saṃyuttañcāti terasa.
283. Heṭṭhā dvinnaṃ phalaṭṭhānaṃ, tathā sabbaputhujjane;  
Domanassayuttaṃ cittaṃ, dvayameva tu jāyate.
284. Tiṇṇaṃ puthujjanānaṃ tu, pañceva pana jāyare;  
Cattāri diṭṭhiyuttāni, vicikicchāyutampi ca.
285. Maggaṭṭhānaṃ catunnampi, maggacittaṃ sakaṃ sakaṃ;  
Ekameva bhava tesāṃ, iti vatvā vibhāvaye.
286. Mayā bhavesu cittānaṃ, puggalānaṃ vasena ca;  
Bhikkhūnaṃ pāṭavattāya, cittuppatti pakāsītā.
287. Evaṃ sabbamidaṃ cittaṃ, bhūmipuggalabhedato;  
Bahudhāpi ca hotīti, viññātabbaṃ vibhāvinā.
288. Sakkā vuttānusārena, bhedo ñātuṃ vibhāvinā;  
Ganthavittārabhītena, saṃkhittaṃ panidaṃ mayā.
289. Pubbāparaṃ viloketvā, cintetvā ca punappunaṃ;

Atthaṃ upaparikkhitvā, gahetabbaṃ vibhāvinā.

290. Imañcābhidhammāvatāraṃ susāraṃ,  
Varaṃ sattamohandhakārappadīpaṃ;  
Sadā sādhu cinteti vāceti yo taṃ,  
Naraṃ rāgadosā ciraṃ nopayanti.

Iti abhidhammāvatāre bhūmipuggalavasena cittuppattiniddeso nāma

Pañcama paricchedo.

## 6. Chaṭṭho paricchedo

### Ārammaṇavibhāganiddeso

291. Etesaṃ pana cittānaṃ, ārammaṇamito paraṃ;  
Dassayissāmahaṃ tena, vinā natthi hi sambhavo.
292. Rūpaṃ saddaṃ gandhaṃ rasaṃ, phoṭṭhabbaṃ dhammeva ca;  
Chadhā ārammaṇaṃ āhu, chaḷārammaṇakovidā.
293. Tattha bhūte upādāya, vaṇṇo catusamuṭṭhito;  
Sanidassanaṭṭhito, rūpārammaṇasaññito.
294. Duvidho hi samuddiṭṭho, saddo cittotusambhavo;  
Saviññāṇakasaddova, hoti cittaṃsamūṭṭhito.
295. Aviññāṇakasaddo yo,  
So hotūtusamuṭṭhito;  
Duvidhopi ayaṃ saddo,  
Saddārammaṇataṃ gato.
296. Dharīyatīti gacchanto, gandho sūcanatopi vā;  
Ayaṃ catusamuṭṭhāno, gandhārammaṇasammato.
297. Rasamānā rasantīti, rasoti parikittito;  
Sova catusamuṭṭhāno, rasārammaṇanāmako.
298. Phusīyatīti phoṭṭhabbaṃ, pathavītejavāyavo;  
Phoṭṭhabbaṃ catusambhūtaṃ, phoṭṭhabbārammaṇaṃ mataṃ.
299. Sabbaṃ nāmañca rūpañca, hitvā rūpādipañcakaṃ;  
Lakkhaṇāni ca paññatti-dhammārammaṇasaññitaṃ.
300. Chārammaṇāni labbhanti, kāmāvacarabhūmiyaṃ;  
Tīṇi rūpe panārūpe, dhammārammaṇamekakaṃ.
301. Khaṇavatthuparittatā, āpāthaṃ na vajanti ye;  
Te dhammārammaṇā honti, yesaṃ rūpādayo kira.
302. Te paṭikkhipitabbāva, aññamaññassa gocaraṃ;

Neva paccanubhontānaṃ, mano tesam tu gocaraṃ.

- 303.** Tañca ‘‘paccanubhotī’’ti, vuttattā pana satthunā;  
Rūpādārammaṇāneva, honti rūpādayo pana.
- 304.** Dibbacakkhādiññānaṃ, rūpādīneva gocarā;  
Anāpāthagatāneva, tñītipi na yujjati.
- 305.** Yaṃ rūpārammaṇaṃ hontaṃ, taṃ dhammārammaṇaṃ kathaṃ;  
Evaṃ satī panetesam, niyamoti kathaṃ bhava.
- 306.** Sabbaṃ ārammaṇaṃ etaṃ, chabbidhaṃ samudīritaṃ;  
Taṃ parittattikādīnaṃ, vasena bahudhā mataṃ.
- 307.** Sabbo kāmavipāko ca, kriyāhetudvayampi ca;  
Pañcavīsati ekantaṃ, parittārammaṇā siyuṃ.
- 308.** Itthādibhedā pañceva, rūpasaddādayo pana;  
Viññānaṃ dvipañcannaṃ, gocarā paṭipāṭiyā.
- 309.** Rūpādipañcakaṃ sabbaṃ, manodhātuttayassa tu;  
Terasannaṃ panetesam, rūpakkhandhova gocarō.
- 310.** Nārūpaṃ na ca paññattaṃ, nātītaṃ na canāgataṃ;  
Ārammaṇaṃ karonte ca, vattamāno hi gocarō.
- 311.** Terasetāni cittāni, jāyante kāmadhātuyam;  
Cattāri rūpāvacare, neva kiñci arūpīsu.
- 312.** Mahāpākānamaṭṭhannaṃ, santīraṇattayassapi;  
Chasu dvāresu rūpādichaparittāni gocarā.
- 313.** Rūpādayo parittā cha, hasituppādagocarā;  
Pañcadvāre paṭuppannā, manodvāre tikālikā.
- 314.** Dutiyāruppacittañca, catutthāruppamānasam;  
Chabbidhaṃ niyataṃ hoti, taṃ mahaggatagocaraṃ.
- 315.** Nibbānārammaṇattā hi, ekantena anaññato;  
Aṭṭhānāsavacittānaṃ, appamāṇova gocarō.
- 316.** Cattāro ñāṇahīnā ca, kāmāvacarapuññato;  
Kriyatopī ca cattāro, dvādasākusalāni ca.
- 317.** Parittārammaṇā ceva, te mahaggatagocarā;  
Paññattārammaṇattā hi, navattabbāva honti te.
- 318.** Cattāro ñāṇasaṃyuttā, puññato kriyatopī ca;  
Tathābhiññādvayañceva, kriyāvoṭṭhabbanampi ca.
- 319.** Ekādasannametesam, tividho hoti gocarō;  
Paññattārammaṇattā hi, navattabbāpi hontime.

320. Yāni vuttāvasesāni, cittāni pana tāni hi;  
Navattabbārammaṇānīti, viññeyyāni vibhāvinā.

Parittārammaṇattikaṃ samattaṃ.

321. Dutiyāruppacittañca, catutthāruppamānasam;  
Chabbidhamṃ pana ekanta-atītārammaṇam siyā.

322. Viññāṇaṃ dvipañcannaṃ, manodhātuttayassa ca;  
Pañca rūpādayo dhammā, paccuppannāva gocarā.

323. Aṭṭha kāmamahāpākā, santīraṇattayampi ca;  
Hasituppādacittanti, dvādasete tu mānasā.

324. Siyātītārammaṇā paccu-ppannānāgatagocarā;  
Kusalākusalā kāme, kriyato nava mānasā.

325. Abhiññāmānasā dvepi, siyātītādigocarā;  
Santapaññattikālepi, navattabbā bhavantime.

326. Sesāni pana sabbāni, rūpārūpabhavesupi;  
Navattabbāni honteva, atītārammaṇādīnā.

327. Kāmato ca kriyā pañca, rūpato pañcamī kriyā;  
Cittānaṃ channametesam, natthi kiñci gocaram.

328. Nibbānañca phalaṃ maggaṃ, rūpañcārūpameva ca;  
Sakkonti gocaram kātuṃ, kati cittāni me vada.

329. Cattāro ñāṇasaṃyuttā,  
Puññato kriyato tathā;  
Abhiññāhadayā dvepi,  
Kriyā voṭṭhabbanampi ca.

330. Sakkonti gocaram kātuṃ, cittānekādasāpi ca;  
Nibbānañca phalaṃ maggaṃ, rūpañcārūpameva ca.

331. Cittesu pana sabbesu, kati cittāni me vada;  
Arahattaphalaṃ maggaṃ, kātuṃ sakkonti gocaram.

332. Sabbesu pana cittesu, cha ca cittāni me suṇa;  
Arahattaphalaṃ maggaṃ, kātuṃ sakkonti gocaram.

333. Cattāro ñāṇasaṃyuttā, kriyā voṭṭhabbanampi ca;  
Kriyābhiññā manodhātu, cha ca sakkonti gocaram.

334. Cattāro ñāṇasaṃyuttā-bhiññācittañca puññato;  
Nārahattaṃ phalaṃ maggaṃ, kātuṃ sakkonti gocaram.

335. Kasmā arahato magga-cittaṃ vā phalamānasam;  
Puthujjanā vā sekkhā vā, na sakkonti hi jānituṃ.



336. Puthujjano na jānāti,  
Sotāpannassa mānasam;  
Sotāpanno na jānāti,  
Sakadāgāmissa mānasam.
337. Sakadāgāmī na jānāti, anāgāmissa mānasam;  
Anāgāmī na jānāti, arahantassa mānasam.
338. Heṭṭhimo heṭṭhimo neva, jānāti uparūpari;  
Uparūpari jānāti, heṭṭhimassa ca mānasam.
339. Yo dhammo yassa dhammassa,  
Hoti ārammaṇam pana;  
Tamuddharitvā ekekaṃ,  
Pavakkhāmi ito paraṃ.
340. Kusalārammaṇam kāme, kusalākusalassa ca;  
Abhiññāmānasassāpi, kusalassa kriyassa ca.
341. Kāmāvacarapākassa, tathā kāmakriyassa ca;  
Etesam pana rāsīnaṃ, channaṃ ārammaṇam siyā.
342. Rūpāvacarapuññāni, kāmapākaṃ tato vinā;  
Pañcannaṃ pana rāsīnaṃ, honti ārammaṇāni hi.
343. Āruppakusalañcāpi, tebhūmakusalassa ca;  
Tebhūmakriyassāpi, tathevākusalassāpi.
344. Arūpāvacarapākānaṃ, dvinnaṃ pana catutthadu;  
Imesaṃ aṭṭharāsīnaṃ, hotārammaṇapaccayo.
345. Apariyāpannapuññampi, kāmāvacaratopi ca;  
Rūpato pañcamassāpi, kusalassa kriyassa ca.
346. Catunnaṃ pana rāsīnaṃ, hoti ārammaṇam sadā;  
Tathevākusalaṃ kāma-rūpāvacarato pana.
347. Kusalassa kriyassāpi, tathevākusalassa ca;  
Kāmāvacarapākānaṃ, channaṃ rāsīnamīritaṃ.
348. Vipākārammaṇam kāme, kāmāvacaratopi ca;  
Rūpāvacarato ceva, kusalassa kriyassa ca.
349. Kāmāvacarapākānaṃ, tathevākusalassa ca;  
Channañca pana rāsīnaṃ, hotārammaṇapaccayo.
350. Vipākārammaṇam rūpe, kāmāvacaratopi ca;  
Rūpāvacarato ceva, kusalassa kriyassa ca.
351. Apuññassāti pañcannaṃ, rāsīnaṃ hoti gocaro;  
Arūpāvacarapākesu, ayameva nayo mato.

352. Apariyāpannapākampi, kāmato rūpatopi ca;  
Kusalassa kriyassāpi, hoti ārammaṇaṃ pana.
353. Kriyacittamidaṃ kāme, kāmāvacaratopi ca;  
Rūpāvacarato ceva, kusalassa kriyassa ca.
354. Kāmāvacarapākassa, tathevākusalassa ca;  
Channaṃ rāsīnametesam, hotārammaṇapaccayo.
355. Yaṃ kriyāmānasaṃ rūpe, kāmapākaṃ tato vinā;  
Pañcannaṃ pana rāsīnaṃ, hoti ārammaṇaṃ pana.
356. Kriyācittaṃ panāruppe, tesam pañcannameva ca;  
Āruppassa kriyassāpi, channaṃ hoteva gocaro.
357. Rūpaṃ catusamuṭṭhānaṃ, rūpārammaṇasaññitaṃ;  
Kāmāvacarapuññaṃ, tatheva kusalassa ca.
358. Abhiññādvayacittassa, kāmapākakriyassa ca;  
Channaṃ rāsīnametesam, hotārammaṇapaccayo.
359. Nibbānārammaṇaṃ kāma-rūpāvacarato pana;  
Kusalassubhayassāpi, kāmarūpakriyassa ca.
360. Apariyāpannato ceva, phalassa kusalassa ca;  
Channaṃ rāsīnametesam, hotārammaṇapaccayo.
361. Nānappakāraṃ sabbam, paññattārammaṇaṃ pana;  
Tebhūmakassa puññaṃ, tathevākusalassa ca.
362. Rūpārūpavipākassa, tebhūmakakriyassa ca;  
Navannaṃ pana rāsīnaṃ, hotārammaṇapaccayo.
363. Rūpārammaṇikā dve tu, dve dve saddhādigocarā;  
Pañcārammaṇikā nāma, cittuppādā tayo matā.
364. Idhekacattālīseva, chaḷārammaṇikā matā;  
Kāmāvacaracittāna-mayamārammaṇakkamo.
365. Pañcābhiññā vivajjetvā, rūpārūpā anāsavā;  
Cittuppādā ime sabbe, dhammārammaṇagocarā.
366. Paṭhamārūppakusalaṃ, dutiyārūppacetaso;  
Kusalassa vipākassa, kriyassārammaṇaṃ bhava.
367. Paṭhamārūppapākoyaṃ, dutiyārūppacetaso;  
Kusalassa vipākassa, kriyassārammaṇaṃ na hi.
368. Paṭhamaṃ tu kriyācittaṃ, dutiyārūppacetaso;  
Na puññaṃ na pākassa, hoti ārammaṇaṃ pana.
369. Paṭhamaṃ tu kriyācittaṃ, dutiyārūppacetaso;

Kriyassārammaṇaṃ hoti, iti ñeyyaṃ vibhāvinā.

370. Puthujjanassa sekkhassa, arūpārammaṇaṃ dvidhā;  
Kusalaṃ kusalassāpi, vipākassa ca taṃ siyā.
371. Khīṇāsavassa bhikkhussa, paṭhamāruppamānasam;  
Ārammaṇaṃ tidhā hoti, iti vuttaṃ mahesinā.
372. Kriyassāpi kriyā hoti, kusalampi kriyassa ca;  
Kusalaṃ tu vipākassa, evaṃ hoti tidhā pana.
373. Tatiyāruppacittampi, catutthāruppacetaso;  
Evameva dvidhā ceva, tidhā cārammaṇaṃ siyā.
374. Yaṃ yaṃ pana idhārabba,  
Ye ye jāyanti gocaraṃ;  
So so tesaṅca tesaṅca,  
Hotārammaṇapaccayo.
375. Yo panimassa naro kira pāraṃ,  
Duttaramuttaramuttaratīdha;  
So abhidhammahāṇṇavapāraṃ,  
Duttaramuttaramuttarateva.

Iti abhidhammāvātāre ārammaṇavibhāgo nāma

Chaṭṭho paricchedo.

## 7. Sattamo paricchedo

### Vipākacittappavattiniddeso

376. Anantañāṇena niraṅgaṇena,  
Guṇesinā kāruṇikena tena;  
Vutte vipāke matipāṭavatthaṃ,  
Vipākacittappabhavaṃ suṇātha.
377. Ekūnatīṃsa kammāni, pākā dvattīṃsa dassitā;  
Tīsu dvāresu kammāni, vipākā chasu dissare.
378. Kusalaṃ kāmalokasmim, pavatte paṭisandhiyaṃ;  
Taṃ taṃ paccayamāgamma, dadāti vividhaṃ phalaṃ.
379. Ekāya cetanāyekā, paṭisandhi pakāsītā;  
Nānākammehi nānā ca, bhavanti paṭisandhiyo.
380. Tihetukaṃ tu yaṃ kammaṃ, kāmāvacarasaññitaṃ;  
Tihetukaṃ duhetuṅca, vipākaṃ detyahetukaṃ.
381. Duhetukaṃ tu yaṃ kammaṃ, taṃ na deti tihetukaṃ;  
Duhetukamahetuṅca, vipākaṃ deti attano.

382. Tihetukena kammena,  
Paṭisandhi tihetukā;  
Duhetukāpi hoteva,  
Na ca hoti ahetukā.
383. Duhetukena kammena,  
Paṭisandhi duhetukā;  
Ahetukāpi hoteva,  
Na ca hoti tihetukā.
384. Asaṅkhāramasaṅkhāraṃ, sasaṅkhāraṃpi deti hi;  
Sasaṅkhāramasaṅkhāraṃ, sasaṅkhāraṃ phalaṃ tathā.
385. Ekāya cetanāyetha, kusalassa ca soḷasa;  
Vidhā vipākacittāni, bhavantīti pakāsaya.
386. Ārammaṇena hoteva, vedanāparivattanaṃ;  
Tadārammaṇacittampi, javanena niyāmitaṃ.
387. Kāmāvacaracittena, kusalenādinā pana;  
Tulyena pākacittena, gahitā paṭisandhi ce.
388. Balavārammaṇe iṭṭhe, cakkhussāpāthamāgate;  
Manodhātu bhavaṅgasmim, tāya āvaṭṭite pana.
389. Vīthiccittesu jātesu, cakkhuviññāṅakādisu;  
Jāyate javanaṃ hutvā, paṭhamaṃ kāmamānaṃ.
390. Sattakkhattuṃ javitvāna, paṭhame kusale gate;  
Tadevārammaṇaṃ katvā, teneva sadisaṃ puna.
391. Vipākaṃ jāyate cittaṃ, tadārammaṇasaññitaṃ;  
Sandhiyā tulyato mūla-bhavaṅganti pavuccate.
392. Tañca santīraṇaṃ ettha, dassanaṃ sampaṭicchanaṃ;  
Gaṇanūpagacittāni, cattāreva bhavanti hi.
393. Yadā hi dutiyaṃ cittaṃ, kusalaṃ javanaṃ tadā;  
Tena tulyavipākampi, tadārammaṇakaṃ siyā.
394. Sandhiyā asamānattā, dve nāmānissa labbhare;  
“Āgantukabhavaṅga”nti, “tadārammaṇaka”nti ca.
395. Yadā hi tatiyaṃ puññaṃ, javanaṃ hoti tena ca;  
Sadisaṃ tatiyaṃ pākaṃ, tadārammaṇakaṃ siyā.
396. “Āgantukabhavaṅga”nti, idampi ca pavuccati;  
Iminā pana saddhiṃ cha, purimāni ca pañcapi.
397. Yadā catutthaṃ kusalaṃ, javanaṃ hoti tena ca;  
Tulyaṃ catutthaṃ pākaṃ tu, tadārammaṇataṃ vaje.

398. Āgantukabhavaṅgaṃ tu, tadārammaṇanāmakaṃ;  
Purimāni cha pākāni, iminā honti satta tu.
399. Tasmim dvāre yadā iṭṭha-majjhāttārammaṇaṃ pana;  
Āgacchati tadāpāthaṃ, tadā vuttanayenidha.
400. Ārammaṇavaseneva, vedanā parivattati;  
Upekkhāsahitaṃ tasmā, hoti santīraṇaṃ mano.
401. Upekkhāsahitesveva, javanesu catūsupi;  
Tehi tulyāni cattāri, pākacittāni jāyare.
402. Vedanāyāsamānattā, accantaṃ purimehi tu;  
Honti piṭṭhibhavaṅgāni, cattārīti ca nāmato.
403. Pañcimāni vipākāni, purimehi ca sattahi;  
Saddhim dvādasa pākāni, bhavantīti viniddise.
404. Cakkhudvāre tathā evaṃ, sotādīsvapi niddise;  
Dvādasa dvādasa pākā, samasaṭṭhi bhavantime.
405. Ekāya cetanāyeva, kamme āyūhite pana;  
Samasaṭṭhi vipākāni, uppajjanti na saṃsayo.
406. Gahitāgahaṇenettha, cakkhudvāresu dvādasa;  
Sotaviññānakādīni, cattārīti ca soḷasa.
407. Evameva sasaṅkhāra-tihetukusalenapi;  
Asaṅkhārasasaṅkhāru-pekkhāsahagatehipi.
408. Kamme āyūhite tesam, vipākehi ca tīhipi;  
Eseva ca nayo tehi, dinnāya paṭisandhiyā.
409. Paṭhamaṃ iṭṭhamajjhāta-gocarassa vasenidha;  
Pavattim pana dassetvā, upekkhāsahitadvaye.
410. Dassetabbā tappaccā tu, iṭṭhasmim gocare idha;  
Ekekasmim pana dvāre, dvādasa dvādaseva tu.
411. Gahitāgahaṇenettha, pākacittāni soḷasa;  
Pubbe vuttanayeneva, ñeyyaṃ sabbamasesato.
412. Tihetukena kammena, paṭisandhi tihetukā;  
Bhavatīti ayaṃ vāro, vutto ettāvātā mayā.
413. Sandhimekaṃ tu kammekaṃ, janeti na tato paraṃ;  
Anekāni vipākāni, sañjaneti pavattiyam.
414. Ekasmā hi yathā bijā, jāyate ekamaṅkuraṃ;  
Subahūni phalānissa, honti hetupavattito.
415. Duhetukena kammena, paṭisandhi duhetukā;

Hotīti hi ayam vāro, anupubbena āgato.

416. Duhetukena kammaena, somanassayutenidha;  
Asaṅkhārikacittena, kamme āyūhite pana.
417. Tena tulyena pākena, gahitā paṭisandhi ce;  
Iṭṭhe ārammaṇe cakkhu-dvāre āpāthamāgate.
418. Somanassayute ñāṇa-hīne kusalamānase;  
Sattakkhattuṃ javitvāna, gate tasmim duhetuke.
419. Tadevārammaṇaṃ katvā, jāyate tadanantaram;  
Taṃsarikkhakamekaṃ tu, asaṅkhārikamānasam.
420. Taṃ hi mūlabhavaṅganti, tadārammaṇamiccapi;  
Ubhayampi ca tasseva, nāmantī paridīpitaṃ.
421. Duhetukasasaṅkhāre, javitepi ca taṃsamam;  
Hotāgantukasasaṅkhātāṃ, tadārammaṇamānasam.
422. Tatheva ca duhetūnaṃ, iṭṭhamajjhagocare;  
Dvinnam upekkhāyuttānaṃ, javanānamanantaram.
423. Dve tādisāni jāyante, tadārammaṇamānasā;  
Tesam “piṭṭhibhavaṅga”nti, nāmaṃ “āgantuka”nti ca.
424. Santīraṇadvayañceva, dassanaṃ sampaṭicchanaṃ;  
Imāni ca bhavaṅgāni, cakkhudvāre panaṭṭha hi.
425. Evamaṭṭhaṭṭha katvāna, dvāresupi ca pañcasu;  
Cattālīsa vipākāni, bhavantīti pavattiyam.
426. Gahitāgahaṇenettha, cakkhudvāre panaṭṭha ca;  
Sotaghānādīnā saddhim, dvādaseva bhavanti hi.
427. Ekāya cetanāyevaṃ, kamme āyūhite pana;  
Dvādaseva vipākāni, bhavantīti pakāsitaṃ.
428. Duhetukattayenāpi, sesena sadisena tu;  
Pākenādinnasandhiyā, ayameva nayo mato.
429. Duhetukena kammaena, paṭisandhi duhetukā;  
Hotītipi ayam vāro, vutto ettāvatā mayā.
430. Duhetukena kammaena, paṭisandhi ahetukā;  
Hotīti ca ayam vāro, anupubbena āgato.
431. Duhetukesu cittesu, kusalesu catūsipi;  
Tesu aññatareneva, kamme āyūhite pana.
432. Tasseva pakabhūtāya, ādinnapaṭisandhino;  
Upekkhāsahitāhetu, manoviññādhātuyā.

433. Paṭisandhi na vattabbā, sā kammaśadisāti hi;  
Kammaṃ duhetukaṃ hoti, paṭisandhi ahetukā.
434. Tassa buddhimupetassa, iṭṭhamajjhagocare;  
Āpāthamāgate cakkhu-dvāre puna ca dehino.
435. Duhetūnaṃ catunnampi, puññānaṃ yassa kassaci;  
Javanassāvasānasmim, ahetukamidaṃ mano.
436. Tadārammaṇabhāvena, jāyate natthi saṃsayo;  
Taṃ tu mūlabhavaṅgañca, tadārammaṇameva ca.
437. Vīthiccittesu jātesu, cakkhuviññāṅakādisu;  
Upekkhāsahitaṃyeva, hoti santīraṇampi ca.
438. Tesu ekaṃ ṭhapetvāna, gahitāgahaṇenidha;  
Gaṇanūpagacittāni, tīṇīyeva bhavanti hi.
439. Iṭṭhe ārammaṇe cakkhu-dvāre āpāthamāgate;  
Tadā santīraṇaṅceva, tadārammaṇamānasam.
440. Somanassayutaṃyeva, gahetvā tesu ekakaṃ;  
Purimāni ca tīṇīti, cattārova bhavanti hi.
441. Evaṃ cattāri cittāni, dvāresupi ca pañcasu;  
Honti vīsati cittāni, vipākāni pavattiyam.
442. Cakkhudvāre tu cattāri, gahitāgahaṇenidha;  
Sotaghānādinā saddhim, hotevāhetukaṭṭhakaṃ.
443. Ahetupaṭisandhissa, na tadārammaṇaṃ bhava;  
Duhetukaṃ tihetuṃ vā, duhetupaṭisandhino.
444. Jātā sugatiyaṃ yena, pākena paṭisandhi tu;  
Tena tulyampi hīnaṃ vā, tadārammaṇakaṃ bhava.
445. Manussalokaṃ sandhāya, vuttañcāhetukaṭṭhakaṃ;  
Catūsipi apāyesu, pavatte pana labbhati.
446. Thero nerayikānaṃ tu, dhammaṃ deseti vassati;  
Gandhaṃ vāyuñca māpeti, yadā tesam tadā pana.
447. Theraṃ disvā ca sutvā ca, dhammaṃ gandhañca ghāyataṃ;  
Pivatañca jalaṃ vāyuṃ, phusataṃ mudumeva ca.
448. Cakkhuviññāṅakādīni, puññajāneva pañcapi;  
Santīraṇadvayaṃ ekā, manodhātūti aṭṭhakaṃ.
449. Ayaṃ tāva kathā iṭṭha-iṭṭhamajjhagocare;  
Kāmāvacarapuññānaṃ, javanānaṃ vasenidha.
450. Niyamatthaṃ tu yaṃ vuttaṃ, tadārammaṇacetaso;

Kusalaṃ pana sandhāya, taṃ vuttanti hi dīpitaṃ.

451. Idhākusalacittesu, somanassayutesupi;  
Iṭṭhe ārammaṇe tesu, javitesu catūsupi.
452. Somanassayutāhetu-manoviññāṇadhātu hi;  
Tadārammaṇabhāvena, jāyate tadanantaraṃ.
453. Chasvākusalacittesu, upekkhāya yutesu hi;  
Gocare iṭṭhamajjhatte, javitesu anantaraṃ.
454. Upekkhāsahitāhetu-manoviññāṇadhātu hi;  
Tadārammaṇabhāvena, jāyate pana puññajā.
455. Iṭṭhārammaṇayogasmim, kaṅkhato uddhatassa vā;  
Somanassayutaṃ hoti, tadārammaṇamānasam.
456. Somanassayute citte, javane javite pana;  
Gavesitabbā pañceva, tadārammaṇamānasā.
457. Upekkhāsahite citte, javane javite pana;  
Chaḷeva gavesitabbā, tadārammaṇamānasā.
458. Tihetusomanassena, ādinnapaṭisandhino;  
Jhānato parihīnassa, taṃ jhānaṃ paccavekkhato.
459. Domanassayutaṃ cittaṃ, hoti vippaṭisārino;  
Tassa kiṃ jāyate brūhi, tadārammaṇamānasam.
460. **Paṭṭhāne** paṭisiddhā hi, domanassaanantaraṃ;  
Somanassassa uppatti, domanassassa cassa vā.
461. Mahaggataṃ panārabbha, javane javitepi ca;  
Tattheva paṭisiddhaṃ tu, tadārammaṇamānasam.
462. Tasmā bhavaṅgapātova, tadārammaṇameva vā;  
Na hoti kiṃ nu kātabbaṃ, vada tvaṃ ābhidhammika.
463. Upekkhāsahitāhetu-manoviññāṇadhātu tu;  
Puññāpuññavipākā hi, tadārammaṇikā siyā.
464. Āvajjanaṃ kimassāti, natthi taṃ jāyate kathaṃ;  
Bhavaṅgāvajjanānaṃ kiṃ, maggassānantarassa ca.
465. Phalassapi nirodhā ca, vuṭṭhahantassa bhikkhuno;  
Phalacittassa vā evaṃ, natthi āvajjanaṃ kira.
466. Vinā āvajjanenāpi, hoti jāyatu mānasam;  
Kimassārammaṇaṃ brūhi, yadi jānāsi paṇḍita.
467. Vinā ārammaṇeneva, na hi jāyati mānasam;  
Rūpādīsu parittesu, yaṃ kiñcārabbha jāyate.



468. Utubījanīyāmo ca, kammadhammanīyāmatā;  
Cittassa ca niyāmoti, ñeyyā pañca niyāmatā.
469. Tattha ekappahārena, phalapupphādihāraṇaṃ;  
Rukkhānaṃ pana sabbesaṃ, ayaṃ utunīyāmatā.
470. Tesāṃ tesāṃ tu bījānaṃ, taṃtaṃtulyaphalubbhavo;  
Matthake nāḷikerassa, chiddattaṃ bījajo ayaṃ.
471. Tihetukaṃ tihetuñca, duhetuñca ahetukaṃ;  
Vipākaṃ tu yato deti, ayaṃ kammanīyāmatā.
472. Jātiyaṃ bodhisattassa, medanīkampanādikaṃ;  
Visesattamanekampi, ayaṃ dhammanīyāmatā.
473. Gocarena pasādasmim, ghaṭṭite pana tenidha;  
Uppattāvajjanādīnaṃ, ayaṃ cittanīyāmatā.
474. Andhajjanānaṃ hadayandhakāraṃ,  
Viddhaṃsaṇaṃ dīpamimaṃ jalantaṃ;  
Sikkhetha dhīro satataṃ payutto,  
Mohandhakārāpagamaṃ yadiccheti.

Iti abhidhammāvatare vipākacittappavattiniddeso nāma

Sattamo paricchedo.

## 8. Aṭṭhamo paricchedo

### Pakiṇṇakaniddeso

475. Idāni pana sabbesaṃ, etesaṃ mānaṃ mayā;  
Pāṭavathāya bhikkhūnaṃ, kathīyati pakiṇṇakaṃ.
476. Panthamakkaṭako nāma, disāsu pana pañcasu;  
Tattha suttaṃ pasāretvā, jālamajjhe nipajjati.
477. Paṭhamāya disāyetha, sutte pana pasārite;  
Pāṇakena paṭaṅgena, ghaṭṭite makkhikāya vā.
478. Nīpannaṭṭhānato kiñci, calitvā uṇṇanābhi tu;  
Gantvā suttānusārena, yūsaṃ pivati tassa sā.
479. Punāgantvāna tattheva, nipajjati yathāsukhaṃ;  
Evameva karoteva, disāsu dutiyādisu.
480. Pasādā pañca daṭṭhabbā, suttaṃ pañcadisāsviva;  
Cittaṃ pana ca daṭṭhabbaṃ, majjhe makkaṭako viya.
481. Pāṇakādīhi suttassa, tassa saṅghaṭṭanā viya;  
Pasādānaṃ tu daṭṭhabbā, ghaṭṭanārammaṇena hi.

482. Calanaṃ viya taṃmajjhe, nipannāyunaṇābhīyā;  
Pasādaghaṭṭanaṃ tattha, gahetvārammaṇaṃ pana.
483. Manodhātukriyācittaṃ, bhavaṅgāvattaṇaṃ mataṃ;  
Tassā suttānusāraṃva, vīthiccittapavattanaṃ.
484. Sīse panassa vijjhivā, yūsapānaṃva cetaso;  
Ārammaṇesu daṭṭhabbaṃ, javanassa pavattanaṃ.
485. Punāgantvā yathā sutta-jālamajjhe nipajjanaṃ;  
Vatthumyeva ca nissāya, cittassa parivattanaṃ.
486. Idaṃ tu pana opammaṃ, atthaṃ dīpeti kiṃ tu hi;  
Ārammaṇena paṭhamam, pasāde ghaṭṭite pana.
487. Pasādavatthuto cittā, vatthusannissitaṃ mano;  
Tato hi paṭhamameva, jāyatīti hi dīpitaṃ.
488. Ekekārammaṇaṃ dvīsu, dvīsu dvāresu sabbaso;  
Āgacchati tenāpāthaṃ, ayamatthopi dīpito.
489. Rūpaṃ cakkhupasādamhi, ghaṭṭitvā taṅkhaṇe pana;  
Manodvāre tathāpātha-māgacchati nisamsayo.
490. Khago yathā hi rukkhagge, nilīyantova sākhino;  
Sākhamaṃ ghaṭṭeti tassīdha, chāyā pharati bhūmiyaṃ.
491. Sākhāya ghaṭṭanacchāyā, pharaṇāni ca sabbaso;  
Apubbācarimaṃ eka-kkhaṇasmimyeva jāyare.
492. Evameva ca rūpassa, pasādassa ca ghaṭṭanaṃ;  
Bhavaṅgacalanassāpi, paccayattena atthato.
493. Tatheva ca manodvāre, āpāthagamanampi ca;  
Apubbācarimaṃ eka-kkhaṇasmimyeva hotiti.
494. Tato bhavaṅgaṃ chinditvā, cakkhudvāre yathākkamaṃ;  
Āvajjane samuppanne, dassane sampatiṅcchane.
495. Santīraṇe samuppanne, tato voṭṭhabbanepi ca;  
Kusalaṃ javanaṃ cittaṃ, tathākusalameva vā.
496. Eso eva nayo sota-dvārādīsipi viññunā;  
Avisesena viññeyyo, saddādīnaṃ tu ghaṭṭane.
497. Dovārikopamādīni, etassatthassa dīpane;  
Uddharitvāna tānettha, dassetabbāni viññunā.
498. Asambhedena cakkhussa, rūpāpāthagamena ca;  
Ālokanissayenāpi, samanakkārahetunā.
499. Paccayehi panetehi, sametehi catūhipi;

- Jāyate **cakkhaviññāṇaṃ**, sampayuttehi taṃ saha.
500. Asambhedena sotassa, saddāpāthagamena ca;  
Ākāsanissayenāpi, samanakkārahetunā.
501. Paccayehi panetehi, sametehi catūhipi;  
Jāyate **sotaviññāṇaṃ**, sampayuttehi taṃ saha.
502. Asambhedena ghānassa, gandhāpāthagamena ca;  
Vāyosannissayenāpi, samanakkārahetunā.
503. Paccayehi panetehi, sametehi catūhipi;  
Jāyate **ghānaviññāṇaṃ**, sampayuttehi taṃ saha.
504. Asambhedena jivhāya, rasāpāthagamena ca;  
Āposannissayenāpi, samanakkārahetunā.
505. Paccayehi panetehi, sametehi catūhipi;  
Jāyate **jivhāviññāṇaṃ**, sampayuttehi taṃ saha.
506. Asambhedena kāyassa, phoṭṭhabbāpāthasaṅgamā;  
Pathavīnissayenāpi, samanakkārahetunā.
507. Paccayehi panetehi, sametehi catūhipi;  
Jāyate **kāyaviññāṇaṃ**, sampayuttehi taṃ saha.
508. Asambhedā manassāpi, dhammāpāthagamena ca;  
Vatthusannissayenāpi, samanakkārahetunā.
509. Paccayehi panetehi, sametehi catūhipi;  
**Manoviññāṇa**mevaṃ tu, sampayuttehi jāyate.
510. Mano bhavaṅgacittanti, veditabbaṃ vibhāvinā;  
Āvajjanakriyācittaṃ, samanakkāroti saññitaṃ.
511. Vatthusannissayenāti, nāyaṃ sabbattha gacchati;  
Bhavaṃ tu pañcavokāraṃ, sandhāya kathito pana.
512. Paṭisandhādicittāni, sabbānekūnavīsati;  
Kāme dasa ca rūpesu, pañca cattārirūpisu.
513. Kammaṃ kammanimittaṅca, tathā gatinimittakaṃ;  
Idaṃ hi tividdhaṃ tesam, ārammaṇamudīritaṃ.
514. Kāmāvacarasandhīnaṃ, parittārammaṇaṃ matam;  
Paccuppannamatītaṃ vā, hoti natthi anāgataṃ.
515. Aṭṭheva ca mahāpākā, tīṇi santīraṇāni ca;  
Ekādasavidhaṃ cittaṃ, tadārammaṇasaññitaṃ.
516. Ekādasavidhe citte, tadārammaṇasaññite;  
Dasa puññavipākāni, ekaṃ hoti apuññajaṃ.

517. Mahāpākā na jāyante, rūpārūpabhavadvaye;  
Kāme rūpe bhava ceva, hoti santīraṇattayaṃ.
518. Tadārammaṇacittāni, yāni vuttāni satthunā;  
Tesu cittaṃ panekampi, rūpārūpabhavadvaye.
519. Na tadārammaṇaṃ hutvā, pavattati kadācipi;  
Kasmā na hoti ce tattha, bījassābhāvato pana.
520. Paṭisandhibījaṃ natthettha, kāmāvacarasaññitaṃ;  
Rūpādigocare tassa, bhavyeja janakaṃ tu yaṃ.
521. Cakkhuviññāṇakādīnaṃ, natthitāpajjatīti ce;  
Nindriyānaṃ pavattānu-bhāvato cittasambhavo.
522. Ekantena yathā cetāṃ, tadārammaṇamānaṃ;  
Nappavattati sabbampi, rūpārūpabhavadvaye.
523. Akāmāvacaradhammepi, tadetaṃ nānubandhati;  
Kasmā ajanakattā hi, janakassāsamānato.
524. Janakaṃ tena tulyaṃ vā, kāmāvacarasaññitaṃ;  
Kusalākusalādiṃ tu, javanaṃ anubandhati.
525. Kāmāvacaradhammāpi, ye mahaggatagocārā;  
Hutvā vattanti te cāpi, idaṃ nevānubandhati.
526. Parittārammaṇattā ca, ekantena panassa hi;  
Tathāparicitattā ca, nānubandhati sabbadā.
527. Kiṃ tena yuttivādena, vuttaṃ **aṭṭhakathāsu** hi;  
Tadārammaṇacittāni, ekādasapi sabbaso.
528. Nāmagottaṃ panārabba, javane javitepi ca;  
Tadārammaṇaṃ na gaṇhanti, rūpārūpabhavesu vā.
529. Yadā paññattimārabba, javane javitepi vā;  
Tathā vipassanāyāpi, lakkhaṇārammaṇāya ca.
530. Tadārammaṇā na labbhanti, micchattaniyatesupi;  
Na lokuttaradhammepi, ārabba javane gate.
531. Tathā mahaggate dhamme, ārabba javane pana;  
Paṭisambhidāññāni, ārabba javitepi ca.
532. Manodvārepi sabbesaṃ, javanānāmanantaraṃ;  
Tadārammaṇacittāni, bhavanti anupubbato.
533. Na vijjati manodvāre, ghaṭṭanārammaṇassa hi;  
Kathaṃ bhavaṅgato hoti, vuṭṭhānaṃ pana cetaso.
534. Manodvārepi āpātha-māgacchanteva gocarā;

Ghaṭṭanāya vinā tasmā, cittānaṃ hoti sambhavo.

535. Dvādasāpuññacittānaṃ, vipākā sattasattati;  
Bhavanti caturāsīti, pāpapākā pavattiyaṃ.
536. Ekādasavidhānaṃ tu, hitvā uddhaccamānasam;  
Ekādasavidhā ceva, bhavanti paṭisandhiyo.
537. Kriyacittesu sabbesu, javanaṃ na ca hoti yaṃ;  
Taṃ ve karaṇamattattā, vātapupphasamaṃ mataṃ.
538. Javanattaṃ tu sampattaṃ, kiccasādhanato pana;  
Chinnamūlassa rukkhassa, pupphaṃva aphalaṃ siyā.
539. Paṭicca pana etasmā, phalameṭīti **paccayo**;  
Yo dhammo yassa dhammassa, ṭhitiyuppattiyāpi vā.
540. Upakāro hi so tassa, paccayoti pavuccati;  
Sambhavopabhavo hetu, kāraṇaṃ paccayo mato.
541. Lobhādi pana yo dhammo, mūlaṭṭhenupakārako;  
Hetūti pana so dhammo, viññātabbo vibhāvinā.
542. Lobho doso ca moho ca,  
Tathālobhādayo tayo;  
Chaleva hetuyo hontī,  
Jātito navadhā siyuṃ.
543. Dhammānaṃ kusalādīnaṃ, kusalādittasādhako;  
Mūlaṭṭhoti vadantevaṃ, eke ācariyā pana.
544. Evaṃ sante tu hetūnaṃ, taṃsamuttānarūpisu;  
Hetupaccayatā neva, sampajjati kadācipi.
545. Na hi te pana rūpānaṃ, sādheti kusalādikaṃ;  
Na tesam pana rūpānaṃ, paccayā na ca hontī te.
546. Tasmā hi kusalādīnaṃ, kusalādittasādhako;  
Mūlaṭṭhoti na gantabbo, viññunā samayaññunā.
547. Suppatiṭṭhitabhāvassa, sādhanenupakārako;  
Mūlaṭṭhoti ca hetūnaṃ, viññātabbo vibhāvinā.
548. Kusalākusalā hetū, kriyāhetū ca sabbaso;  
Dhammānaṃ sampayuttānaṃ, taṃsamuttānarūpinam.
549. Hetupaccayataṃ yātā, pañcavokārabhūmiyaṃ;  
Sampayuttānamevete, catuvokārabhūmiyaṃ.
550. Kāme vipākahetūpi, kāmāvacarabhūmiyaṃ;  
Attanā sampayuttānaṃ, paṭisandhikkhaṇe pana.

551. Kaṭattārūpajātānaṃ, tatheva ca pavattiyaṃ;  
Cittajānañca rūpānaṃ, hetupaccayataṃ gatā.
552. Rūpe vipākahetu ca, rūpāvacarabhūmiyaṃ;  
Tathā vuttappakārānaṃ, honti te hetupaccayā.
553. Hetuyo pañcavokāre, lokuttaravipākajā;  
Cittajānañca rūpānaṃ, sampayuttānameva ca.
554. Te hetupaccayā honti, catuvokārabhūmiyaṃ;  
Bhavanti sampayuttānaṃ, itare ca sabhūmiyaṃ.
555. Hetuttho hetuyo ceva, hetupaccayasambhavo;  
Evameva ca viññeyyo, sañjātasukhahetunā.
556. Chando cittañca vīriyaṃ, vīmaṃsā cāti satthunā;  
Lokādhipatinā vuttā, catudhādhipatī siyuṃ.
557. Chandaṃ tu jeṭṭhakaṃ katvā, chandaṃ katvā dhuraṃ pana;  
Cittassuppattikālasmiṃ, chandādhipati nāmaso.
558. Eseva ca nayo ñeyyo, sesesupi ca tīsupi;  
Adhippatīti niddiṭṭho, jeṭṭhaṭṭhenupakārako.
559. Sumatimativibodhanaṃ vicittaṃ,  
Kumatimatindhanapāvakaṃ padhānaṃ;  
Imamatimadhuraṃ avedi yo yo,  
Jinavacanaṃ sakalaṃ avedi so so.

Iti abhidhammāvatāre pakiṇṇakaniddeso nāma

Aṭṭhamo paricchedo.

## 9. Navamo paricchedo

### Puññavipākapaccayaniddeso

560. Bāttiṃsa pākacittāni, lokikāneva yāni hi;  
Etesaṃ pākacittānaṃ, paṭisandhipavattisu.
561. Puññāpuññādisaṅkhārā, yathā yesañca paccayā;  
Bhavādīsu tathā tepi, viññātabbā vibhāvinā.
562. Tayo bhavā catasso ca, yoniyo gatipañcakaṃ;  
Viññāṇaṭṭhitiyo satta, sattāvāsā naveritā.
563. **Kāme** puññābhisāṅkhāra-saññitā aṭṭha cetanā;  
Navannaṃ pākacittānaṃ, kāme sugatiyaṃ pana.
564. Nānākkhaṇīkammūpa-nissayapaccayehi ca;  
Dvedhā hi paccayā tesāṃ, bhavanti paṭisandhiyaṃ.

565. Upekkhāsahitāhetu-manoviññādhātuyā;  
Vinā parittapākānaṃ, honti dvedhā pavattiyāṃ.
566. Tāyeva cetanā rūpa-bhave dvedhāva paccayā;  
Pañcannaṃ pākacittānaṃ, bhavanti hi pavattiyāṃ.
567. Aṭṭhannaṃ tu parittānaṃ, kāme duggatiyaṃ tathā;  
Pavatte paccayā honti, na honti paṭisandhiyaṃ.
568. Honti vuttappakārāva, kāme sugatiyaṃ tathā;  
Soḷasannaṃ vipākānaṃ, pavatte paṭisandhiyaṃ.
569. **Rūpe** puññābhisāṅkhārā, rūpāvacarabhūmiyaṃ;  
Pañcannaṃ pākacittānaṃ, paccayā paṭisandhiyaṃ.
570. Hontimāpuññasaṅkhārā, kāme duggatiyaṃ dvidhā;  
Viññāṇassa panekassa, paccayā paṭisandhiyaṃ.
571. Channaṃ pana pavatteva, honti no paṭisandhiyaṃ;  
Sattannampi bhavanteva, pavatte paṭisandhiyaṃ.
572. Kāme sugatiyaṃ tesāṃ, sattannampi tatheva ca;  
Pavatte paccayā honti, na honti paṭisandhiyaṃ.
573. Viññāṇaṃ catunnampi, tesāṃ rūpabhave tathā;  
Pavatte paccayā honti, na honti paṭisandhiyaṃ.
574. So ca kāmabhaveniṭṭha-rūpādiupaladdhiyaṃ;  
Aniṭṭharūpādayo pana, brahmaloke na vijjare.
575. Tathēvāneñjasāṅkhāro, **arūpāvacarabhūmiyaṃ**;  
Catunnaṃ pākacittānaṃ, pavatte paṭisandhiyaṃ.
576. Evaṃ tāva bhavesvete, paṭisandhipavattisu;  
Yathā ca paccayā honti, tathā ñeyyā vibhāvinā.
577. Eseva ca nayo ñeyyo, yoniādīsu tatridaṃ;  
Ādīto pana paṭṭhāya, mukhamattanidassanaṃ.
578. Avisesena puññābhi-sāṅkhāro dvibhavesupi;  
Datvāna paṭisandhiṃ tu, sabbapākāṃ janeti so.
579. Tathā catūsu viññeyyo, aṇḍajādīsu yonisu;  
Bahudevamanussānaṃ, gatīsu dvīsu eva ca.
580. Tathā nānattakāyādi-viññāṇaṃ ṭhitīsupi;  
Tathā vuttappakārasmiṃ, sattāvāse catubbidhe.
581. Evaṃ puññābhisāṅkhāro, bhavādīsu yathārahaṃ;  
Ekavīsati-pākānaṃ, paccayo hoti ca dvidhā.
582. Kāme apuññasaṅkhāro, bhava catūsu yonisu;

Tīsu gatīsu ekissā, viññāṇaṭṭhitiyāpi ca.

- 583.** Sattāvāse panekasmiṃ,  
Uhoti so paccayo dvidhā;  
Sattannaṃ pākacittānaṃ,  
Pavatte paṭisandhiyaṃ.
- 584.** Tathevāneñjasaṅkhāro, ekārūpabhava puna;  
Ekissā yoniyā ceva, ekissā gatiyāpi ca.
- 585.** Tīsu cittaṭṭhitisveva, sattāvāse catubbidhe;  
Catunnaṃ pākacittānaṃ, dvedhā so hoti paccayo.
- 586.** Paṭisandhipavattīnaṃ, vaseneva bhavādisu;  
Vijānitabbā saṅkhārā, yathā yesaṅca paccayā.
- 587.** Na rūpārūpadhammānaṃ, saṅkanti pana vijjati;  
Saṅkantibhāve asati, paṭisandhi kathaṃ siyā.
- 588.** Natthi cittassa saṅkanti, atītabhavato idha;  
Tato hetuṃ vinā tassa, pātubhāvo na vijjati.
- 589.** Suladdhapaccayaṃ rūpā-rūpamattaṃ tu jāyati;  
Uppajjamānamevaṃ tu, labhitvā paccayaṃ pana.
- 590.** Bhavantaramupetīti, samaññāya pavuccati;  
Na ca satto na ca jīvo, na attā vāpi vijjati.
- 591.** Tayidaṃ pākaṭaṃ katvā, paṭisandhikkamaṃ pana;  
Dassayissāmahaṃ sādhu, nibodhatha sudubbudhaṃ.
- 592.** Atītasmiṃ bhava tassa, āsannamaraṇassa hi;  
Haritaṃ tālapaṇṇaṃva, pakkhittaṃ ātape pana.
- 593.** Sussamāne sarīrasmiṃ, naṭṭhe cakkhundriyādike;  
Hadayaavatthumattasmiṃ, ṭhite kāyappasādike.
- 594.** Vatthusannissitaṃ cittaṃ, hoti tasmīṃ khaṇepi ca;  
Pubbānusevitaṃ kammaṃ, puññaṃ vāpuññaṃeva vā.
- 595.** Kammaṃ kammanimittaṃ vā, ālambitvā pavattati;  
Evaṃ pavattamānaṃ taṃ, viññāṇaṃ laddhapaccayaṃ.
- 596.** Avijjāya paṭicchannā-dīnave visaye pana;  
Taṇhā nameti saṅkhārā, khipanti sahaṃ jā pana.
- 597.** Na mīyamānaṃ taṇhāya, taṃ santativasā pana;  
Orimā pana tīramhā, ālambitvāna rajjukaṃ.
- 598.** Mātikātikkomovetaṃ, purimaṃ jahati nissayaṃ;  
Aparaṃ kamma sambhūtaṃ, lambitvā vāpi nissayaṃ.



599. Taṃ panārammaṇādīhi, paccayehi pavattati;  
Purimaṃ cavanaṃ ettha, pacchimaṃ paṭisandhi tu.
600. Tadetam nāpi purimā, bhavatopi idhāgataṃ;  
Kammādiṅca vinā hetuṃ, pātubhūtaṃ na ceva taṃ.
601. Ettha cetassa cittassa, purimā bhavato pana;  
Idhānāgamaneṭṭā-bhavahetūhi sambhave.
602. Paṭighosadīpamuddādī, bhavantettha nidassanā;  
Yathā āgantvā aññatra, honti saddādihetukā.
603. Evameva ca viññāṇaṃ, veditabbaṃ vibhāvinā;  
Santānabandhato natthi, ekatā vāpi nānatā.
604. Sati santānabandhe tu, ekantekataṃ siyā;  
Khīrato dadhisambhūtaṃ, na bhavyya kadācīpi.
605. Athāpi pana ekanta-nānatā sā bhavyya ce;  
Khīrasāmī naro neva, dadhisāmī bhavyya so.
606. Tasmā ettha panekanta-ekatanānatāpi vā;  
Na ceva upagantabbā, viññunā samayaññunā.
607. Nanu evamasāṅkanti-pātubhāve tassa sati;  
Ye imasmiṃ manussatta-bhāve khandhābhisambhavā.
608. Tesam idha niruddhattā, kamma phalahetuno;  
Paratthāgamato ceva, idha tassa katassa hi.
609. Aññassa aññato ceva, kammato taṃ phalaṃ siyā;  
Tasmā na sundaraṃ etaṃ, vidhānaṃ sabbameva ca.
- Etthāha –
610. Santāne yaṃ phalaṃ etaṃ, nāññassa na ca aññato;  
Bījānaṃ abhisāṅkhāro, etassatthassa sādhamo.
611. Ekasmiṃ pana santāne, vattamānaṃ phalaṃ pana;  
Aññassātipi vā neva, aññato vā na hoti taṃ.
612. Bījānaṃ abhisāṅkhārā, etassatthassa sādhamo;  
Bījānaṃ abhisāṅkhāre, kate tu madhuādinā.
613. Tassa bījassa santāne, paṭhamaṃ laddhapaccayo;  
Madhuro phalaso tassa, hoti kālantare pana.
614. Na hi tāni hi bījāni, abhisāṅkharaṇampi vā;  
Pāpuṇanti phalaṭṭhānaṃ, evaṃ ñeyyamidampi ca.
615. Bālakāle payuttana, vijjāsipposadhādinā;  
Dīpetabbo ayaṃ vuddha-kālasmiṃ phaladāyinā.

616. Evaṃ santepi taṃ kammaṃ, vijjamānampi vā pana;  
Phalassa paccayo hoti, atha vāvijjamānakaṃ.
617. Vijjamānaṃ sace hoti, tappavattikkhaṇe pana;  
Bhavitabbaṃ vipākena, saddhimeva ca hetunā.
618. Atha vāvijjamānaṃ taṃ, niruddhaṃ paccayo bhava;  
Pavattikkhaṇato pubbe, pacchā niccaphalaṃ siyā.

Vuccate –

619. Kaṭattā paccayo kammaṃ, tasmā niccaphalaṃ na ca;  
Pāṭibhogādikaṃ kammaṃ, veditabbaṃ nidassanaṃ.
620. Kaṭattāyeva taṃ kammaṃ, phalassa pana paccayo;  
Na cassa vijjamānattaṃ, tassa vāvijjamānatā.
621. Abhidhammāvatāroyaṃ, paramatthapakāsano;  
Sotabbo pana sotūnaṃ, pītibuddhivivaḍḍhanaṃ.

Iti abhidhammāvatāre puññavipākapaccayaniddeso nāma

Navamo paricchedo.

## 10. Dasamo paricchedo

### Rūpavibhāganiddeso

622. Vuttamādimhi yaṃ rūpaṃ, cittaṅānāmanantaraṃ;  
Tassa dāni karissāmi, samāsenā vibhāvanaṃ.
623. Yaṃ ruppattī rūpanti, tathā rūpayattī vā;  
Rūpārūpabhavātīto, surūpo rūpamabravi.
624. Taṃ rūpaṃ duvidhaṃ hoti, bhūtopādāyabhedato;  
Catubbidhā mahābhūtā, upādā catuvīsati.
625. Pathavīdhātu āpo ca,  
Tejo vāyo tatheva ca;  
Cattārome mahābhūtā,  
Mahābhūtena desitā.
626. Mahantā pātubhūtāti, mahābhūtasamāti vā;  
Vañcakattā abhūtena, **mahābhūtāti** saññitā.
627. Cakkhu sotañca ghānañca, jivhā kāyo ca rūpatā;  
Saddo gandho raso itthi-purisindriyajīvitāṃ.
628. Vatthumāhāratā kāya-vacīviññattiyo duve;  
Ākāso ceva rūpassa, lahutādittayampi ca.

629. Upacayo santatirūpaṃ, jaratāniccatāpi ca;  
Upādāti pavuccanti, imāni catuvīsati.
630. Mahābhūtāni nissāya, amuñcitvā pavattito;  
Upādārūpamiccāha, nirupādānamānaso.
631. Pathavī patthaṭattā ca, vāyo vāyanato bhava;  
Tejo tejeti rūpāni, āpo āpeti pālanā.
632. Tesam dāni pavakkhāmi, rūpānaṃ lakkhaṇādikaṃ;  
Lakkhaṇādīsu ñātesu, dhammā āvi bhavanti hi.
633. Sāmaññaṃ vā sabhāvo vā, dhammānaṃ lakkhaṇaṃ matam;  
Kiccaṃ vā tassa sampatti, rasoti paridīpito.
634. Phalaṃ vā paccupaṭṭhānaṃ, upaṭṭhānanayopi vā;  
Āsannakāraṇaṃ yaṃ tu, taṃ padaṭṭhānasaññitaṃ.

Tattha kakkhaḷattalakkhaṇā pathavīdhātu, patiṭṭhānaraṣā, sampaṭicchanapaccupaṭṭhānā.  
Paggharaṇalakkhaṇā āpodhātu, upabrūhanaraṣā, saṅghapaccupaṭṭhānā. Uṇhatalakkhaṇā tejodhātu,  
paripācanaraṣā, maddavānuppādānapaccupaṭṭhānā. Vitthambhanalakkhaṇā vāyodhātu, samudīraṇaraṣā,  
abhinīhārapaccupaṭṭhānā. Ekekāya cettha sesabhūtattayapadaṭṭhānāti vedītabbā.

Cakkhatīti **cakkhu**, rūpaṃ vibhāvetīti attho.

635. Tattha cakkhu dvidhā vuttaṃ, paññāmaṃsappabhedato;  
Tattha paññāmayam cakkhu, hoti pañcavidham pana.
636. Buddhadhammasamantehi, ñāṇadibbehi nāmato;  
Yathānukkamato tesam, nānattaṃ me nibodhatha.
637. Āsayānusaye ñāṇaṃ, indriyānaṃ paropare;  
**Buddhacakkhunti** niddiṭṭhaṃ, muninā lokacakkhunā.
638. Heṭṭhāmagattaye ñāṇaṃ, **dhammacakkhunti** saññitaṃ;  
Ñeyyam **samantacakkhunti**, ñāṇaṃ sabbaññutā pana.
639. Yaṃ “cakkhuṃ udapādī”ti, āgataṃ **ñāṇacakkhu** taṃ;  
Abhiññācittajā paññā, **dibbacakkhunti** vuccati.
640. Maṃsacakkhupi duvidham, sasambhārapasādato;  
Sasambhāraṇca nāmettha, akkhikūpe patiṭṭhitaṃ.
641. Akkhikūpaṭṭhinā heṭṭhā, uddhaṇca bhamukaṭṭhinā;  
Ubhato akkhikūṭehi, matthaluṅgena antato.
642. Bahiddhā akkhilomehi, paricchinnō ca yo pana;  
Nhārusuttēna ābandho, maṃsapiṇḍo pavuccati.
643. Sakalopi ca lokoyam, kamalassa dalaṃ viya;  
Puthulaṃ vipulaṃ nīlaṃ, iti jānāti locanaṃ.

644. Cakkhu nāma na taṃ hoti, vatthu tassāti vuccati;  
Idaṃ pana **sasambhāra-cakkhanti** paridīpitaṃ.
645. Vaṇṇo gandho raso ojā,  
Catasso cāpi dhātuyo;  
Bhāvasambhavaṣaṅghānaṃ,  
Jīvitāni tatheva ca.
646. Kāyacakkhupasādāti,  
Sambhārā honti cuddasa;  
Tathā vitthārato cetam,  
Catasso cāpi dhātuyo.
647. Vaṇṇo gandho raso ojā,  
Saṅghānasambhavo tathā;  
Dasete catusamuṅghānā,  
Cattālīsa bhavanti te.
648. Cakkhu kāyappasādo ca, bhāvo jīvitameva ca;  
Cattālīsaṅca rūpāni, cattāri tu bhavanti hi.
649. Imesaṃ pana rūpānaṃ, vasena paripiṇḍitaṃ;  
Idaṃ sambhāracakkhanti, paṇḍitehi pakāsitaṃ.
650. Yo panettha sito atthi, paribandho parittako;  
Catunnaṃ pana bhūtānaṃ, pasādo kammāsambhavo.
651. Idaṃ **pasādacakkhanti**, akkhātaṃ pañcacakkhunā;  
Tadetaṃ tassa majjhe tu, sasambhārassa cakkhuno.
652. Setena maṇḍalenassa, parikkhittassa sabbaso;  
Kaṅhamaṇḍalamajjhe vā, nivīṭṭhe diṭṭhamaṇḍale.
653. Sandhāraṇādikiccāhi, dhātūhi ca catūhipi;  
Katūpakāraṃ hutvāna, utucittādīnā pana.
654. Upatthambhiyamānaṃ taṃ, āyunā katapālanam;  
Vaṇṇagandharasādīhi, rūpehi parivāritaṃ.
655. Cakkhuvīññāṇakādīnaṃ, vatthudvāraṅca sādhaṃ;  
Ūkāsirasamānena, pamāṇeneva tiṭṭhati.

Vuttaṃ hetam –

656. “Yena cakkhupasādēna, rūpānimanupassati;  
Parittaṃ sukhumam etaṃ, ūkāsirasamūpama”nti.
657. Sotādīsu ca eseva, nayo ñeyyo vibhāvinā;  
Visesamattamevettha, pavakkhāmi ito paraṃ.

Suṇātīti **sotaṃ**, taṃ tanutambalomācite aṅgulivedhakasaṅghāne padese vuttappakārāhi dhātūhi katūpakāraṃ utucittāharehi upatthambhiyamānaṃ āyunā paripāliyamānaṃ sotavīññāṇādīnaṃ

vatthudvārabhāvaṃ sādhayamānaṃ tiṭṭhati.

Ghāyatīti **ghānaṃ**, taṃ sasambhāraghānabilassa anto ajapadasaṅṭhāne padese yathāvuttappakārā hutvā tiṭṭhati.

Sāyatīti **jivhā**, jīvitamavhāyatīti vā **jivhā**, sā sasambhārajivhāmajjhassa upari uppaladalaggasaṅṭhāne padese yathāvuttappakārā hutvā tiṭṭhati.

Kucchitānaṃ malānaṃ āyoti **kāyo**. Yāvatā pana imasmiṃ kāye upādinnaṃ rūpaṃ atthi, sabbattha kāyapasādo kappāsapaṭale sneho viya yathāvuttappakāro hutvā tiṭṭhati.

Ettha panetesam lakkhaṇādīni pavakkhāmi –  
daṭṭhukāmatānidānakammasamuṭṭhānabhūtapasādalakkhaṇaṃ cakkhu, rūpesu āviñchanarasam,  
cakkhuvīññāssa ādhārabhāvapaccupaṭṭhānaṃ, daṭṭhukāmatānidānakammajabhūtapadaṭṭhānaṃ.

Sotukāmatānidānakammasamuṭṭhānabhūtapasādalakkhaṇaṃ sotaṃ, saddesu āviñchanarasam,  
sotaviññāssa ādhārabhāvapaccupaṭṭhānaṃ, sotukāmatānidānakammajabhūtapadaṭṭhānaṃ.

Ghāyitukāmatānidānakammasamuṭṭhānabhūtapasādalakkhaṇaṃ ghānaṃ, gandhesu  
āviñchanarasam, ghānaviññāssa ādhārabhāvapaccupaṭṭhānaṃ,  
ghāyitukāmatānidānakammajabhūtapadaṭṭhānaṃ.

Sāyitukāmatānidānakammasamuṭṭhānabhūtapasādalakkhaṇājivhā, rasesu āviñchanarasā,  
jivhāvīññāssa ādhārabhāvapaccupaṭṭhānā, sāyitukāmatānidānakammajabhūtapadaṭṭhānā.

Phusitukāmatānidānakammasamuṭṭhānabhūtapasādalakkhaṇo kāyo, phoṭṭhabbesu āviñchanaraso,  
kāyaviññāssa ādhārabhāvapaccupaṭṭhāno, phusitukāmatānidānakammajabhūtapadaṭṭhāno.

Keci panāhu –

**658.** Tejādhikānaṃ bhūtānaṃ, pasādo pana cakkhuti;  
Ākāsānilatoyubbiadhikānaṃ tu sesakā.

**659.** Te panevaṃ tu vattabbā, “suttaṃ āharathā” ti hi;  
Suttameva ca te addhā, na dakkhissanti kiñcipi.

**660.** Visese sati bhūtānaṃ, pasādo hi kathaṃ bhave;  
Samānānaṃ hi bhūtānaṃ, pasādo paridīpito.

**661.** Tasmā nissayabhūtānaṃ, catunnaṃ sabbaso pana;  
Pahāyeva panetesam, visesaparikkappaṇaṃ.

**662.** Ñeyyā kammavisesena, pasādānaṃ visesatā;  
Na hi bhūtavisesena, hoti tesam visesatā.

**663.** Evametesu cakkhuñca, sotaṃ apattagāhakaṃ;  
Sesaṃ tu pana ghānādittayaṃ sampattagāhakaṃ.

**Rūpanti** rūpayatīti rūpaṃ, vaṇṇavikāramāpajjamānaṃ hadayaṅgatabhāvaṃ pakāsetīti attho. Taṃ  
pana cakkhupaṭiḥananalakkhaṇaṃ, cakkhuvīññāssa visayabhāvarasaṃ, tasseva  
gocarabhāvapaccupaṭṭhānaṃ, catumahābhūtapadaṭṭhānaṃ. Yathā cetaṃ, tathā sabbānipi upādārūpānīti.

**Saddoti** saddayatīti saddo, so pana sotapaṭiḥananalakkhaṇo, sotaviññāṇassa visayabhāvaraso, tasseva gocarabhāvapaccupaṭṭhāno.

**Rasoti** rasanti tenāti raso, so jivhāpaṭiḥananalakkhaṇo, jivhāviññāṇassa visayabhāvaraso, tasseva gocarabhāvapaccupaṭṭhāno.

**Gandhoti** attānaṃ gandhayati sūcayatīti gandho, so ghānapaṭiḥananalakkhaṇo, ghānaviññāṇassa visayabhāvaraso, tasseva gocarabhāvapaccupaṭṭhāno.

### **Itthindriyanti –**

- 664.** Kammajo itthibhāvoyaṃ, paṭisandhisamuṭṭhito;  
Yañcetaṃ itthilingādi, na tu taṃ indriyaṃ siyā.
- 665.** Itthindriyaṃ paṭicceva, itthilingādayo pana;  
Pavatteyeva jāyante, na tāni paṭisandhiyaṃ.
- 666.** Na ca taṃ cakkhuviññeyaṃ, manoviññeyameva taṃ;  
Itthilingādayo cakkhuviññeyā honti vā na vā.
- 667.** Eseva ca nayo ñeyyo, sesepi **purisindriye**;  
Idaṃ paṭhamakappānaṃ, ubhayaṃ tu pavattiyaṃ.
- 668.** Samuṭṭhātīti viññeyaṃ, parato paṭisandhiyaṃ;  
Pavattepi samuṭṭhāya, pavatte parivattati.
- 669.** Mahatā pāpakammena, purisattaṃ vinassati;  
Mahatā kusaleneva, jāyate purisindriyaṃ.
- 670.** Dubbalākusaleneva, itthilingaṃ vinassati;  
Dubbaleneva puñña, itthibhāvo hi jāyate.
- 671.** Ubhatobyañjanassāpi, ekamevindriyaṃ siyā;  
Evaṃ sante abhāvo ca, dutiyabyañjanassa tu.
- 672.** Na cābhāvo siyā kasmā, na taṃ byañjanakāraṇaṃ;  
Tassa kammahāyaṃ hi, rāgacittaṃ tu kāraṇaṃ.

Ubhayassa panetassa lakkhaṇādīni vuccati. Tattha itthibhāvalakkhaṇaṃ itthindriyaṃ, ‘itthi’ ti pakāsanarasam, itthilinganimittakuttākappānaṃ kāraṇabhāvapaccupaṭṭhānaṃ.

Purisabhāvalakkhaṇaṃ purisindriyaṃ, ‘puriso’ ti pakāsanarasam, purisalinganimittakuttākappānaṃ kāraṇabhāvapaccupaṭṭhānaṃ.

### **Jīvitanti –**

- 673.** Jīvitindriyaniddese, vattabbaṃ yaṃ siyā idha;  
Arūpajīvite vutta-nayeneva ca taṃ vade.

Lakkhaṇādīni panassa evaṃ veditabbāni. Sahajarūpapariṭṭhānaṃ jīvitindriyaṃ, tesam pavattanarasam, tesameva ṭhapanapaccupaṭṭhānaṃ, yāpayitabbabhūtapadaṭṭhānanti.

**Vatthūti** hadayavatthu.

674. Yaṃ nissāya manodhātu-manoviññādhātuyo;  
Vattanti pañcavokāre, taṃ “vatthū”ti pavuccati.

Manodhātumanoviññādhātūnaṃ nissayalakkhaṇaṃ hadayavatthu, tāsāñceva dhātūnaṃ ādhāraṇasaṃ, ubbāhanapaccupaṭṭhānaṃ.

**Āhāratāti** kabaḷīkāro āhāro. Ojaṭṭhamakaṃ rūpaṃ āharatīti āhāro.

675. Yāya ojāya yāpenti, yattha yattha ca pāṇino;  
Ayaṃ tu “kabaḷīkāro, āhāro”ti pavuccati.

676. Annapānādikaṃ vatthu, aggaṃ harati kammajaṃ;  
Kevalaṃ na ca sakkoti, pāletuṃ jīvitāṃ pana.

677. Ojā sakkoti pāletuṃ, harituṃ na ca pācakaṃ;  
Haritumpi ca pāletuṃ, ubho sakkonti ekato.

Lakkhaṇādito panassa ojalakkhaṇo kabaḷīkāro āhāro, rūpāharaṇaraso, upatthambhanapaccupaṭṭhāno, kabaḷaṃ katvā ajjhoharitabbavatthupadaṭṭhānoti veditaḃbo.

**Kāyaviññattiniddese** kāyena attano bhāvaṃ viññāpentānaṃ kāyaggahaṇānusārena gahitāya etāya bhāvo viññāyatīti viññatti. Sayāṃ vā kāyaggahaṇānusārena viññāyatītipi viññatti. “Kāyena saṃvaro sādhu, sādhu vācāya saṃvaro”ti āgato copanasankhāto kāyova viññatti **kāyaviññatti**. Kāyavipphanena adhippāyaviññāpanahetuttā sayañca tathā viññeyyattā kāyena viññattītipi **kāyaviññatti**.

678. Tattha yā sahaḃātassa, cittajāniladhātuyā;  
Rūpassa calane hetu, ekākāravikārātā.

679. Kāyaviññatti nāmāyaṃ, kāyadvāranti sā matā;  
Tattha yā cetanāsiddhā, puññāpuññavasā pana.

680. Kāyakammanti niddiṭṭhā, satthunā sā hitesinā;  
Sampavatti panetissā, vacīdvārepi jāyate.

681. Labhitvā panupatthambhaṃ, ekāvajjanavīthiyaṃ;  
Heṭṭhāhi chahi cittehi, vāyodhātusamuṭṭhitaṃ.

682. Sattamena tu cittena, vāyodhātusamuṭṭhitā;  
Cāleti sahaḃaṃ rūpaṃ, viññattisahitāttanā.

**Vacīviññattiniddese** pana –

683. Paccayo cittajātāya, upādinnaḃkaghaṭṭane;  
Yo ākāravikāreko, ayaṃ pathavidhātuyā.

684. Vacīviññatti viññeyyā, saha saddavasā pana;  
Vacīdvāranti niddiṭṭhā, sāva sakyakulindunā.

**685.** Saddo na cittaḷo atthi, viṇā viṇṇattighaṭṭanaṃ;  
Dhātusaṅghaṭṭaneneva, saha saddo hi jāyati.

**686.** Sā viṇṇāpanato ceva, ayaṃ viṇṇeyyatopi ca;  
Viṇṇattīti siyā tassā, sambhavo kārakadvaye.

**687.** Na viṇṇattidvayaṃ aṭṭha, rūpāni viya cittaḷaṃ;  
Cittajānaṃ vikāraṭṭā, cittaḷanti pavuccati.

Tattha kāyaviṇṇatti adhippāyapakāsanarasā, kāyavipphandaṇahetubhāvapaccupaṭṭhānā, cittaṣaṃuṭṭhānavāyodhātupadaṭṭhānā. Tathā vacīviṇṇatti adhippāyapakāsanarasā, vacīghosassa hetubhāvapaccupaṭṭhānā, cittaṣaṃuṭṭhānapatha vīdhātupadaṭṭhānā.

**688.** Na kassaṭīti ākāso, rūpānaṃ vivaro pana;  
Yo rūpānaṃ paricchedo, svākāsoṭi pavuccati.

So rūpaparicchedalakkhaṇo, rūpapariyantaḷapakāsanaraso, rūpamariyādapaccupaṭṭhāno, asaṃphuṭṭhabhāvachiddavivarabhāvapaccupaṭṭhāno vā, paricchinnarūpapadaṭṭhāno.

#### **Rūpassa lahutādittayaniddese –**

**689.** Heṭṭhā vuttanayeneva, rūpassa lahutādisu;  
Tisso rūpavikāraṭī, viṇṇātabbā vibhāvinā.

**690.** Etāsaṃ pana tissannaṃ, kamato ca pavattiyaṃ;  
Arogī madditaṃ cammaṃ, dhantahemaṃ nidassanaṃ.

**691.** Kammaṃ kātuṃ na sakkoti, lahutādittayaṃ pana;  
Āhārādittayaṃyeva, taṃ karoti tato tijaṃ.

Tattha adandhatālakkhāṇā rūpassa lahutā, rūpānaṃ garubhāvavinodanarasā, lahaparivattitāpaccupaṭṭhānā, lahurūpapadaṭṭhānā.

Athaddhatālakkhāṇā rūpassa mudutā, rūpānaṃ thaddhabhāvavinodanarasā, sabbakiriyaṣu avirodhitāpaccupaṭṭhānā, mudurūpapadaṭṭhānā.

Sarīrakiriyaṇukūlakammaññatālakkhāṇā rūpassa kammaññatā, akammaññatā vinodanarasā, adubbalabhāvapaccupaṭṭhānā, kammaññatārūpapadaṭṭhānā. Etā pana tissopi na aññamaññaṃ vijahanti.

#### **Upacayasantatiniddese –**

**692.** Rūpānamācayo yo hi, vutto upacayoti so;  
Anuppabandhatā tesam, santatīti pavuccati.

**693.** Atthato ubhayampetaṃ, jātirūpanti dīpitaṃ;  
Vuttamākāranānattā, veneyyānaṃ vasena vā.

Lakkhāṇādito pana ācāyalakkhaṇo rūpassa upacayo, pubbantato rūpānaṃ ummuḷjāpanaraso, niyyātanapaccupaṭṭhāno, paripuṇṇabhāvapaccupaṭṭhāno vā, upacitarūpapadaṭṭhāno.

Pavattilakkhāṇā rūpassa santatī, anuppabandhanarasā, anupacchedapaccupaṭṭhānā,



anuppabandharūpapadaṭṭhānā.

**Jarāniddese jīraṇaṃ jarā.**

**694.** Duvidhāyaṃ jarā nāma, pākaṭāpākaṭāti ca;  
Pākaṭā rūpadhammesu, arūpesu apākaṭā.

Rūpassa paripākatālakkaṇā rūpassa jaratā, upanayanarasā, sabhāvānaṃ apagamepi nasabhāvāpagamapaccupaṭṭhānā vīhipurāṇabhāvo viya, paripaccamānarūpapadaṭṭhānā.

Paribhedalakkhaṇā rūpassa aniccatā, saṃsīdanarasā, khayavayapaccupaṭṭhānā, paribhijjāmānarūpapadaṭṭhānāti veditabbāti.

Evam catuvīsati upādārūpāni veditabbāni.

**695.** Bhūtarūpāni cattāri, upādā catuvīsati;  
Aṭṭhavīsati rūpāni, sabbāneva bhavanti hi.

**696.** Imesu pana rūpesu, asammohatthameva taṃ;  
Samodhānaṃ samuṭṭhānaṃ, nipphannaṃ saṅkhatampi ca.

**697.** Codanaṃ parihāraṇca, nayamekavidhādikaṃ;  
Saṅkhepena pavakkhāmi, pakiṇṇakamidaṃ suṇa.

Tattha **samodhānanti** sabbameva idaṃ rūpaṃ sabbasamodhānato pathavīdhātu āpodhātu tejodhātu vāyodhātu cakkhāyatanaṃ...pe... jaratā aniccatāti aṭṭhavīsatividhaṃ ca hoti, ito aññaṃ rūpaṃ nāma natthi. Keci pana middhavādino “middharūpaṃ nāma atthī”ti vadanti, te “addhā munīsi sambuddho, natthi nīvaraṇā tavā”ti ca “thinamiddhanīvaraṇaṃ avijjānīvaraṇaṇca nīvaraṇasampayutta”nti sampayuttavacanato ca **mahāpakaraṇapaṭṭhāne** “nīvaraṇaṃ dhammaṃ paṭicca nīvaraṇo dhammo uppajjati napurejātapaccayā”ti arūpepi “kāmacchandānīvaraṇaṃ paṭicca thinamiddhaudhaccakukkucāvijjānīvaraṇa”nti evamādīhi pālīhi virujjhanato ca arūpameva middhanti paṭikkhipitabbā.

**698.** Arūpepi panetassa, middhassuppatti pāṭhato;  
Niṭṭhametthāvagantabbā, arūpanti ca viññunā.

Apare “balarūpena saddhiṃ ekūnatiṃsa, sambhavarūpena saddhiṃ tiṃsa, jātirūpena saddhiṃ ekatiṃsa, rogarūpena saddhiṃ dvattiṃsa rūpāni”ti vadanti. Tepi tesam visuṃ visuṃ abhāvaṃ dassetvā paṭikkhipitabbā. Vāyodhātuyā gahitāya balarūpaṃ gahitameva, aññaṃ balarūpaṃ nāma natthi. Āpodhātuyā sambhavarūpaṃ, upacayasantatīti jātirūpaṃ, jaratāniccatādīhi rogarūpaṃ gahitaṃ, aññaṃ rogarūpaṃ nāma natthīti, tasmā aṭṭhavīsatividhāneva rūpānīti.

Evam samodhānato veditabbānīti.

**Samuṭṭhānanti** cattāri rūpasamuṭṭhānāni utucittāhārakammānīti.

**699.** Kammaṃ utu ca cittaṇca, āhāro rūpahetuyo;  
Eteheva ca rūpāni, jāyanti na panaññato.

**700.** Tasmā ekasamuṭṭhānā, ekādasa bhavanti hi;  
Aṭṭhindriyāni vatthuṇca, viññattidvayameva ca.

701. Aṭṭhindriyāni vatthuñca, ekanteneva kammajā;  
Cittajaṃyeva viññatti-dvayaṃ vuttaṃ mahesinā.
702. Cittena utunā ceva, saddo dvīhi samuṭṭhito;  
Utuāhāracittehi, lahutādittayaṃ kataṃ.
703. Vaṇṇo gandho raso ojā,  
Catasso cāpi dhātuyo;  
Santatyupacayākāsā,  
Ekādasa catubbhavā.
704. Ekādasekato jātā,  
Dvijekova tijā tayo;  
Catujekādasakkhātā,  
Dve na kenaci jāyare.
705. Kammena vīsati rūpā, sattarasa tu cetasā;  
Utunā dasapañceva, cuddasāhārato pana.
706. Chasaṭṭhi sabbānetāni, samuṭṭhānavibhāgato;  
Aṭṭhasaṭṭhi ca honteva, jaratāniccatāhi te.
707. Jaratāniccatā ceva, na kenaci samuṭṭhitā;  
Jātassa pākabhedattā, jāyeyyuṃ yadi tānipi.
708. Evaṃ sante tu tesampi, pākabhedā siyuṃ na hi;  
Pāko paccati bhedo vā, na ca bhijjati natthi taṃ.
709. Jātassa pākabhedattā, dvayametam na jāyati;  
Siyā katthaci buddhettha, “rūpassupacayo” ti hi.
710. Vacanena yathā “jāti, jāyatī” ti ca dīpitaṃ;  
Pākopi paccatevaṃ tu, bhedopi paribhijjatu.
711. Na ceva jāyate jāti, iti ñeyyā vibhāvinā;  
Jāyamānassa dhammassa, nibbattīti pakāsītā.
712. Tattha yathā siyā jāti, yesaṃ dhammānameva sā;  
Tappaccayattavohāraṃ, abhinibbattisammutaṃ.
713. Labhateva tathā tesam, pākabhedā labbhanti te;  
Tappaccayattavohāraṃ, abhinibbattisammutaṃ.
714. Evaṃ idaṃ dvayañcāpi, hoti kammādisambhavaṃ;  
Na pākabhedā vohāraṃ, taṃ labhanti kadācīpi.
715. Kasmā hi janakānaṃ tu, paccayānamabhāvato;  
Ānubhāvakhaṇuppāde, jātiyā pana labbhati.
716. Tappaccayattavohāraṃ, abhinibbattisammutaṃ;  
Tasmā labhati jāti ca, labhatī netaradvayaṃ.

717. Jiyyatīti na vattabbaṃ, taṃ dvayaṃ bhijjatīti vā;  
Ānubhāvakaṇe tassa, paccayānamabhāvato.
718. “Aniccaṃ saṅkhatañcetaṃ, jarāmaṇa” miccapi;  
Vuttattā jāyaticcetaṃ, atha maññasi ce tuvaṃ.
719. Evampi ca na vattabbaṃ, sā hi pariyāyadesanā;  
Aniccānaṃ tu dhammānaṃ, jarāmaṇato tathā.
720. Aniccaṃ saṅkhatañcāti, vuttaṃ viññattiyo viya;  
Yadi evaṃ tayametaṃ, ajātattā ca sabbathā.
721. Natthīti ce khaṃpupphaṃva, niccaṃ vāsaṅkhataṃ viya;  
Nobhayaṃ panidaṃ kasmā, nissayāyattavuttito.
722. Bhāve pathaviyādīnaṃ, nissayānaṃ tu bhāvato;  
Tasmā hi ca khaṃpupphaṃva, na natthi pana taṃ tayaṃ.
723. Yasmā pathaviyādīnaṃ, abhāvena ca labbhati;  
Tasmā na pana niccaṃ vā, nibbānaṃ viya taṃ tayaṃ.

#### **Nipphannanti ettha cattāro mahābhūtā**

cakkhusotaghānajivhākāyarūpasaddagandharasaitthipurisajīvitindriyakabaḷikārāhārahadayavatthūti  
aṭṭhārasa rūpāni nipphannāni nāma. Sesāni dasa anipphannāni nāma.

724. Aṭṭhārasa nipphannāni, anipphannāvasesakā;  
Yadi honti anipphannā, bhavyeyuṃ te asaṅkhata.
725. Tesameva ca rūpānaṃ, vikārattā asaṅkhata;  
Kathaṃ nāma bhavyeyuṃ te, nipphannā ceva saṅkhata.

Evaṃ nipphannasaṅkhato veditabbo.

#### **Codanāparihāranti ettha –**

726. Itthibhāvo pumattañca, jīvitaṃ sambhavopi ca;  
Tathā kāyappasādoti, sabbaṭṭhānāti vaṇṇitā.
727. Evaṃ sante tu dhammānaṃ, hoti saṅkaradosatā;  
Cakkhukāyapasādānaṃ, ekattaṃ upapajjati.
728. Aññaṃ pana ca aññasmiṃ, na catthi paramatthato;  
Tasmā kāyindriyaṃ cakkhu-pasādēna na saṅkaraṃ.
729. Aññaṃaññāvinibbhogavasena tu pavattito;  
Tesaṃ ṭhānantaraṃ vattaṃ, na sakkā samayaññunā.
730. Yāvata anupādinnaśāntānaṃ atthi tattha so;  
Atthi kāyappasādoti, tasmā evamudīritaṃ.
731. Lakkhaṇādivasenāpi, nānattaṃ samupāgataṃ;  
Dhajānaṃ pañcavaṇṇānaṃ, chāyā upamataṃ gatā.

732. Tasmā hi pana dhammānaṃ, aññaṃaññaṃ vimissatā;  
Na hotevāti viññeyyā, viññunā samayaññunā.

Evaṃ nipphannānipphannabhāvo, codanāparihāro ca veditabbo.

**Nayamekavidhādikanti** –

733. Lokikattā nahetuttā, saṅkhatattā ca sāsavā;  
Sabbamekavidhaṃ rūpaṃ, paccayāyattavuttito.

734. Ajjhattikabahiddhā ca, indriyānindriyāpi ca;  
Sukhumoḷārikā ceva, upādinnādito **dvidhā**.

735. Cakkhuāyatanādīni, pañca ajjhattikāni tu;  
Tevīsatividhaṃ sesaṃ, bāhiranti pavuccati.

736. Cakkhusotindriyādīni, indriyāni panatṭha tu;  
Sesañca tu vīsaṃ rūpaṃ, anindriyamudīritaṃ.

737. Cakkhuāyatanādīni, nava phoṭṭhabbameva ca;  
Taṃ bārasavidhaṃ rūpaṃ, oḷārikamudīritaṃ.

738. Sesāni pana rūpāni, sukhumāni tu soḷasa;  
Kammajaṃ tu upādinnaṃ, anupādinnaṃaññathā.

Evañca duvidhaṃ hoti.

Puna sanidassanasappaṭighaanidassanasappaṭigha- anidassanaappaṭighabhedato ca, kammajākammajanevakammajānākammajābhedato ca **tividhaṃ**. Tattha rūpāyatanam sanidassanasappaṭighaṃ, ekādasavidhaṃ sesoḷārikarūpaṃ anidassanasappaṭighaṃ, sesaṃ soḷasavidhaṃ sukhumarūpaṃ anidassanaappaṭighaṃ. Kammato jātaṃ kammajaṃ, atṭhindriyāni, vatthu ca kammajaṃ, tadaññappaccayā jātaṃ akammajaṃ, nakutoci jātaṃ nevakammajānākammajaṃ jaratā aniccatā ca. Evaṃ tividhaṃ hoti.

Puna diṭṭhasutamutaviññātavasena ca, dvārañceva vatthu ca, dvārameva hutvā na vatthu ca, vatthumeva hutvā na dvārañca, neva dvārañca na vatthu cāti evaṃ bhedato ca, dvārañcevindriyañca, dvāraṃyeva hutvā nevindriyañca, indriyameva hutvā na dvārañca, neva dvārañca nevindriyañcāti evaṃ bhedato ca, vatthu ceva indriyañca, indriyameva hutvā na vatthu ca, vatthumeva hutvā nevindriyañca, nevindriyaṃ na vatthu ceti evaṃ bhedato ca **catubbidhaṃ**.

Tattha diṭṭhaṃ nāma rūpāyatanam, sutam nāma saddāyatanam, mutam nāma gandharasaphoṭṭhabbāyatanattayam, viññātam nāma avasesacakkhāyatanādipañcakaṃ, soḷasavidhaṃ sukhumarūpañca. Cakkhāyatanādipañcakaṃ dvārañceva vatthu ca, viññattidvayaṃ dvārameva hoti, na vatthu, hadayavatthu vatthumeva hoti, na dvāraṃ, sesaṃ sabbaṃ rūpaṃ neva dvāraṃ na vatthu ca. Tatiyacatukke indriyameva hutvā na dvāranti itthindriyapurisindriyajīvitindriyāni. Imāni hi indriyāneva honti, na dvārāni, sesamanantaracatukke vuttanayeneva veditabbaṃ. Catutthacatukke tatiyapadaṃ hadayavatthum sandhāya vuttaṃ, sesaṃ vuttanayameva. Evaṃ catubbidhaṃ hotīti veditabbaṃ.

Puna ekajadvijatiyacatujanakutocijātabhedato, dvārindriyaṃ vatthu ca, dvārameva hutvā nevindriyaṃ na vatthu ca, vatthumeva hutvā nevindriyaṃ na dvārañca, indriyameva hutvā na vatthu na dvārañca, nevindriyaṃ na vatthu na dvārañcāti evaṃ pabhedato **pañcavidhaṃ**.

Tattha –

**739.** Aṭṭhindriyāni vatthuñca, viññattidvayameva ca;  
Ekādasavidhaṃ rūpaṃ, **ekajanti** pavuccati.

**740.** Saddo eko **dvijo** nāma, lahutādittayaṃ **tijaṃ**;  
Ekādasavidhaṃ sesaṃ, **catujanti** pakāsitaṃ.

**741.** Jaratāniccatā ceva, **nakutoci** bhava pana;  
Cakkhādipañcakaṃ dvāraṃ, indriyaṃ vatthumeva ca.

**742.** Viññattīnaṃ dvayaṃ dvāraṃ, nevindriyaṃ na vatthu ca;  
Hadaya vatthu vatthūva, na dvāraṃ nevindriyaṃ pana.

Itthipurisajīvitindriyāni indriyameva na vatthu na dvārañca, sesaṃ pana rūpaṃ nevindriyaṃ na vatthu na dvāranti. Evaṃ pañcavidhanti veditabbaṃ.

Puna kammajacittajautucittajautucittāhārajacatujanakutocijātabhedato,  
cakkhuviññeyyasotaghānajivhākāyamanoviññeyyasena **chabbidhaṃ**.

Tattha aṭṭhindriyāni vatthu ca kammajameva, viññattidvayaṃ cittajameva, saddo utucittajo,  
lahutādittayaṃ utucittāhārajameva, sesaṃ ekādasavidhaṃ catujaṃ nāma, jaratā aniccatā nakutocijātaṃ  
nāma. Dutiyachakke cakkhuviññeyyaṃ nāma cakkhuviññāṇena viññeyyaṃ rūpāyatanaṃ...pe...  
kāyaviññeyyaṃ nāma phoṭṭhabbāyatanaṃ, manoviññeyyaṃ nāma sesā pañca oḷārikā ca soḷasa  
sukhumarūpāni cāti ekavīsatividhaṃ hoti. Evaṃ chabbidhaṃ hoti.

Puna chavatthuavatthubhedato ca, cakkhuviññeyyaṃ sotaghānajivhākāyaviññeyyaṃ  
manodhātuvīññeyyaṃ manoviññāṇadhātuvīññeyyanti **sattavidhaṃ** hoti.

Tattha cakkhādipañcavatthūni hadaya vatthunā saddhiṃ cha vatthūni, sesaṃ bāvīsatividhaṃ rūpaṃ  
avatthu nāma, dutiyasattakamuttānameva. Evaṃ sattavidhaṃ hoti.

Puna sattadvārādvārabhedato **aṭṭhavidhaṃ**. Tattha cakkhudvārādīni pañca  
kāyaviññattivacīviññattidvārehi saddhiṃ satta dvārāni, sesamadvāranti evaṃ aṭṭhavidhaṃ hoti.

Puna aṭṭhindriyānindriyabhedato pana **navavidhaṃ**.

Puna navakammajākammajabhedato **dasavidhaṃ**.

Puna āyatanabhedato **ekādasavidhaṃ**.

Bhavesu rūpakalāpapavattibhedato **bahuvidhanti** veditabbaṃ.

**743.** Ito paraṃ pavakkhāmi, kāmarūpabhavadvaye;  
Uppattiṃ pana rūpānaṃ, paṭisandhipavattisu.

**744.** Bhumma vajjesu devesu, niraye nijjhāmatāṇhike;  
Yoniyo purimā tisso, na santīti viniddise.

**745.** Sese gatittaye bhumma-devesupi ca yoniyo;  
Catasso ca bhavantīti, veditabbā vibhāvinā.

746. Gabbhaseyyakasattassa, paṭisandhikkhaṇe pana;  
Tiṃsa rūpāni jāyante, sabhāvasseva dehino.
747. Abhāvagabbhaseyyānaṃ, aṇḍajānañca vīsati;  
Bhavanti pana rūpāni, kāyavattuvasena tu.
748. Gahitāgahaṇenettha, ekādasa bhavanti te;  
Eseva ca nayo ñeyyo, sabbesu dasakesupi.
749. Jīvitena yadā saddhiṃ, jāte suddhakamaṭṭhakaṃ;  
Jīvitanaṅkaṃ nāma, hotīti samudīritaṃ.
750. Jīvitanaṅkaṃ kāyapasādenekato siyā;  
Taṃ kāyadasakaṃ nāma, hotīti pariyāpuṭaṃ.
751. Eseva ca nayo ñeyyo, saddhiṃ bhāvena vatthunā;  
Cakkhādīhi ca yojetvā, dasakā satta viññunā.
752. Opaṭṭikasattānaṃ, manussesūpapattiyaṃ;  
Kāmāvacaradevānaṃ, niccaṃ rūpāni sattati.
753. Cakkhu sotañca ghānañca, jivhā kāyo ca vatthu ca;  
Bhāvo cāti hi sattannaṃ, dasakānaṃ vasā pana.
754. Brahmānaṃ rūpinaṃ cakkhu-sotavattuvasā pana;  
Dasakāni ca tīṇeva, navakaṃ jīvitassa ca.
755. Catunnaṃ tu kalāpānaṃ, vasena pana rūpinaṃ;  
Cattālīseva rūpāni, ekūnāni bhavanti hi.
756. Jīvitanaṅkaneva, asaṅṅupatti dīpitā;  
Jaccandhabadhirāghāna-rahite tu napaṃsake.
757. Vatthuno kāyajivhānaṃ, vasā tiṃsāvakaṃsato;  
Ukkāṃsassaṅkavakaṃsassa, antare anurūpato.
758. Paripuṇṇānaṃ rūpānaṃ, vasena pana pāṇinaṃ;  
Rūpānaṃ tu samuppatti, vedītabbā vibhāvinā.
759. Sattavīsati rūpāni, kāmāvacaradehino;  
Appavattanato honti, dvinnaṃ bhāvānamekato.
760. Ghānaṃ jivhā ca kāyo ca, tathā bhāvadvayampi ca;  
Brahmānaṃ pana rūpīnaṃ, pañca rūpā na vijjare.
761. Catusantati kāmasmaṃ, rūpe honti tisantati;  
Dvisantati asaṅṅesu, bahiddhā ekasantati.
762. Rūpaṃ nibbattamānaṃ tu, sabbesaṃ pana pāṇinaṃ;  
Paṭṭhamaṃ kammaṭṭoyeva, nibbattati na saṃsayo.
763. Gabbhaseyyakasattānaṃ, paṭisandhikkhaṇe pana;

Tañca kho sandhicittassa, uppādeyeva jāyare.

764. Yatheva tassa uppāde, tiṃsa rūpāni jāyare;  
Tatheva ʘhitibhaṅgesu, tiṃsa tiṃseva jāyare.
765. Sabbānetāni rūpāni, rūpakkhandhoti saññito;  
Anicco addhuvonattā, dukkhakkhandhova kevalo.
766. Rogato gaṇḍato rūpaṃ, parato ca palokato;  
Disvāna dukkhato rūpaṃ, rūpe chandaṃ virājaye.
767. Gantuṃ panicche piṭakebhidhamme,  
Yo dhammasenāpatinā samattaṃ;  
Hitatthinā tena ca bhikkhunāyaṃ,  
Sakkacca sammā pana sikkhitabbo.

Iti abhidhammāvatāre rūpavibhāgo nāma

Dasamo paricchedo.

## 11. Ekādasamo paricchedo

### Nibbānaniddeso

768. Rūpānantaramuddiṭṭhaṃ, nibbānaṃ yaṃ panādito;  
Tassidāni anuppatto, vibhāvananayakkamo.
769. Tasmāhaṃ tassa dassetuṃ, dukkarassa yathābalaṃ;  
Dubbodhassa pavakkhāmi, vibhāvanamito paraṃ.

Tattha **nibbānanti** bhavābhavaṃ vinanato vānaṃ vuccati taṇhā, vānato nikkhantattā nibbānanti ca pavuccati amataṃ asaṅkhataṃ paramaṃ sukhaṃ. Vuttaṃ hetuṃ ‘yo so sabbasaṅkhārasamatho sabbūpadhipaṭinissaggo taṇhākkhayo virāgo nirodho nibbāna’nti.

770. Yassa cādhiḡamā sabba-kilesānaṃ khayō bhavē;  
Nibbānamiti niddiṭṭhaṃ, nibbānakusalena taṃ.

Ettaṃ ca nibbānaṃ nāma tayidaṃ santilakkhaṇaṃ, accutirasam, assāsakaraṇarasam vā, animittapaccupaṭṭhānaṃ, nissaraṇapaccupaṭṭhānaṃ vāti veditabbaṃ.

Etthāha – na paramatthato nibbānaṃ nāma eko sabhāvo atthi, titthiyānaṃ attā viya, sasavisānaṃ viya ca anupalabbhanīyatoti? Na, paññācakkhunā upaparikkhiyamānānaṃ hitagavesīnaṃ yathānurūpāya paṭipattiyā upalabbhanīyato. Yaṃ hi puthujjanā nopalabbhanti, taṃ ‘natthi’nti na vattabbaṃ. Athāyasmaṭā sārīputtattherena dhammasenāpatinā ‘katamaṃ nu kho, āvuso, nibbāna’nti nibbānaṃ puṭṭhena ‘yo kho, āvuso, rāgakkhayo dosakkhayo mohakkhayo’nti rāgādīnaṃ khayova dassito, tasmā rāgādīnaṃ khayamattameva nibbānanti ce? Taṃ na. Kasmā? Arahattassāpi rāgādīnaṃ khayamattapasāṅgadosāpattito. Kathaṃ? Nibbānaṃ pucchānantarameva ‘katamaṃ nu kho, āvuso, arahatta’nti puṭṭhena ‘yo kho, āvuso, rāgakkhayo dosakkhayo mohakkhayo’nti rāgādīnaṃ khayova vutto, tasmā tava matena arahattaphalassāpi rāgādīnaṃ khayamattatā bhavēyya, na cetam yuttaṃ anuttarassa lokuttaraphalacittassa rāgānaṃ khayamattatāpajjanaṃ, tasmā mā evaṃ byañjanacchāyāya vadesi, ubhinnaṃ pana suttānaṃ attho upaparikkhitabbo.

Yassa pana dhammassādhigamena rāgādīnaṃ khayō hoti, so dhammo rāgādīnaṃ khayassa upanissayattā akkhayopi samāno “rāgādīnaṃ khayō nibbāna”nti khayopacārena vutto, “tīpusaṃ jaro guḷo semho”tiādīsu viya phalūpacārena vuttanti veditabbaṃ. Arahattaṃ pana khayante uppannattā “khayo”ti vuttaṃ. Yadi rāgādīnaṃ khayamattaṃ nibbānaṃ bhavēyya, sabbe bālaputhujjanāpi samadhigatanibbānā sacchikatanirodhā bhavēyyuṃ. Kiñca bhīyyo – nibbānassa bahuttādidōsāpattito ca. Evañhi sati rāgādikkhayaṇaṃ bahubhāvato nibbānassāpi bahubhāvo bhavēyya, saṅkhatalakkhaṇaṇca nibbānaṃ bhavēyya, saṅkhatalakkhaṇattā saṅkhatapariyāpannaṇca, saṅkhatapariyāpannattā aniccaṃ dukkhaṃ nibbānaṃ bhavēyyāti.

Kiñca bhīyyo – yadi khayō nibbānaṃ bhavēyya, gotrabhuvodānamaggaphalacittānaṃ kiṃ nu ārammaṇaṃ vadesi, vada bhadrāmukhāti? Rāgādīnaṃ khayameva vadāmīti. Kiṃ pana rāgādayo gotrabhuādīnaṃ khaṇe khīyanti, udāhu khīyissanti, atha khīṇāti? Kiṃ panettha “khīṇesveva khayaṃ vadāmī”ti. Suṭṭhu upadhāretvā vada bhadrāmukhāti, yadi khīṇesveva khayaṃ vadesi, na gotrabhucittādīnaṃ nibbānārammaṇatā sijjhatīti. Kiṃ kāraṇaṃ? Gotrabhukkhaṇe rāgādayo khīyissanti, tathā vodānakkhaṇe, maggakkhaṇe pana khīyanti, na khīṇā, phalakkhaṇe khīṇā. Evaṃ sante bhavato matena phalameva khayārammaṇaṃ, na itare, itaresaṃ pana kimārammaṇaṃ vadesīti? Addhā so ārammaṇaṃ apassanto niruttaro bhavissati. Apica kilesakkhayaṃ nāma sappurisehi karīyati, yathānurūpāya paṭipattiyā uppādīyatīti attho. Nibbānaṃ pana na kenaci karīyati na uppādīyati, tasmā nibbānamamatamasākhataṃ. Tamakataṃ jānātīti ariyasāvako “akataññū”ti pavuccati. Vuttañcetama –

771. “Asaddho akataññū ca,  
Sandhicchedo ca yo naro;  
Hatāvakāso vantāso,  
Sa ve uttamaporiso”ti.

Apica “nissaraṇa”nti bhagavatā vuttattā ca. “Nissaraṇa”nti hi nibbānassetamaṃ nāmaṃ. Yathāha “tayo khome, bhikkhave, dhammā duppaṭivijjhā. Katame tayo dhammā duppaṭivijjhā? Tisso nissaraṇadhātuyo. Kāmānametaṃ nissaraṇaṃ, yadidaṃ nekkhammaṃ. Rūpānametaṃ nissaraṇaṃ, yadidaṃ arūpaṃ. Yaṃ kho pana kiñci bhūtaṃ saṅkhataṃ paṭiccasamuppannaṃ, nirodho tassa nissaraṇa”nti hi vuttaṃ. Evaṃ vuttassa tassa nibbānassa abhāvapattidosato paṭhamajjhānākāsānañcāyatanānaṃpi abhāvo bhavēyya, tasmā ayuttaṃ akkhayassa nibbānassa khayadosāpajjananti, na tu khayō nibbānaṃ.

“Atthi nissaraṇaṃ loke, paññāya me suphūṣita”nti ca “atthi, bhikkhave, ajātaṃ abhūtaṃ akataṃ asaṅkhata”nti ca dhammasāminā tathāgatena sammāsambuddhena anekesu suttantesu paramatthavasena vuttattā “atthi nibbānaṃ nāma eko dhammo”ti niṭṭhamettha gantabbaṃ. Apica parittattike “katame dhammā appamāṇā”ti padamuddharitvā – “cattāro maggā ariyāpannā cattāri ca sāmāññaphalāni nibbānaṇca, ime dhammā appamāṇā”ti vuttattā rāgādīnaṃ khayassa appamāṇattaṃ kathaṃ yujjati, tasmā paramatthato atthiyeva nibbānaṃ nāma eko sabhāvoti. Taṃ pana pakativādīnaṃ pakati viya, tiṭṭhiyānaṃ attā viya ca sasavisāṇaṃ viya ca nāvijjamānaṃ.

Atha paññattimattaṃ nibbānanti ce, tampi ayuttaṃ. Kasmā? Nibbānārammaṇānaṃ cittacetāsikānaṃ navattabbārammaṇattā. Kathaṃ? Parittārammaṇattike ca pana “katame dhammā appamāṇārammaṇā”ti padamuddharitvā “cattāro maggā ariyāpannā cattāri ca sāmāññaphalāni, ime dhammā appamāṇārammaṇā”ti hi vuttaṃ. Yadi panetesam paññattīrammaṇaṃ siyā, appamāṇārammaṇatā na yujjeyya, navattabbārammaṇapakkhaṃ bhajeyyūṃ. “Navattabbārammaṇā pana rūpāvacarattikacatukkajjhānā kusalato ca vipākato ca kiriyato ca, catutthassa jhānassa vipāko, ākāsānañcāyatanāṃ ākiñcaññāyatanāṃ kusalato ca vipākato ca kiriyato ca, ime dhammā navattabbārammaṇā”ti hi vuttaṃ, tasmā na paññattimattaṃ nibbānaṃ. Yasmā ca paṇṇattibhāvo nibbānassa na yujjati, tasmā maggaphalānaṃ ārammaṇapaccayabhūtaṃ uppādādīnaṃ abhāvato niccaṃ, rūpasabhāvābhāvato arūpaṃ, papañcābhāvato nippapañcaṃ nibbānaṃ nāma atthīti upagantabbanti.



772. Accantamanantaṃ santaṃ, amataṃ apalokitaṃ;  
Paṇītaṃ saraṇaṃ khemaṃ, tāṇaṃ leṇaṃ parāyaṇaṃ.
773. Sivañca nipuṇaṃ saccaṃ, dukkhakkhayaṃ nāsaṃ;  
Suddhasaṃ paraṃ pāraṃ, nibbānaṃ dāsaṃ.
774. Taṇhākkhayaṃ dhuvāṃ dīpaṃ, abyāpajjhamanītikaṃ;  
Anālayamarūpañca, padamaccutamakkharaṃ.
775. Virāgañca nirodhañca, vimutti mokkhameva ca;  
Imehi pana nāmehi, nibbānaṃ tu kathīyati.
776. Evañca pana viññāya, nibbānampi ca accutaṃ;  
Tassa cādhiḡamūpāyo, kattaḡbo viññunā sadā.
777. Saddhābuddhikaraṃ tathāgatamate sammohaviddhaṃsaṃ,  
Paññāsaṃbhavasampasādanakaraṃ jānāti yo ce imaṃ;  
Atthabyañjanaṃ sālīnaṃ sumadhuraṃ sārāññuvimhāpanaṃ,  
Gambhīre nipuṇābhiddhammaṃpiṭake so yābhiniṭṭhaṃ padaṃ.

Iti abhidhammāvatāre nibbānaṃ iddheso nāma

Ekādasamo paricchedo.

## 12. Dvādasamo paricchedo

### Paññattiniddeso

Etthāha – ‘kiṃ ettakameva ñeyyaṃ, udāhu aññampi atthī’? Atthi paññatti nāmāti. Sā panesā paññapetabbato, paññāpanato ca ‘paññattī’ ti vuccati. Tenevāha – ‘yā tesāṃ tesāṃ dhammānaṃ saṅkhā samaññā paññatti vohāro nāmaṃ nāmakammaṃ nāmadheyyaṃ nirutti byañjanaṃ abhilāpo’ ti. Tattha saṅkhāyatīti **saṅkhā**, kathīyatīti attho. Kinti kathīyati? ‘Aha’ nti ‘mama’ nti ‘paro’ ti ‘parassā’ ti ‘mañco’ ti ‘pīṭha’ nti anekehi ākārehi kathīyatīti saṅkhā. Samaññāyatīti **samaññā**. Paññāpīyatīti **paññatti**. Voharīyatīti **vohāro**. Kinti voharīyati? ‘Aha’ nti ‘mama’ nti ‘paro’ ti ‘parassā’ ti ‘mañco’ ti ‘pīṭha’ nti. Evaṃ tāva **paññapetabbato paññattī** vuttā. ‘Aha’ nti hi rūpādayo dhamme upādāya paṭicca kāraṇaṃ katvā yathā te rūpādayo dhammā uppādayavanto, na evaṃvidhā, kevalaṃ lokasaṅketena siddhā yā ayaṃ ‘aha’ nti kathīyati ceva paññāpīyati ca, esā paññattīti attho.

Idāni paññāpanato paññattiṃ pakāsetuṃ ‘**nāmaṃ nāmakamma**’ ntiādīmāha. Tattha **nāmanti** taṃ taṃ dhammaṃ ‘esa itthannāmo nāmā’ ti paññāpeti, tasmā taṃ paññattīti pavuccati. **Nāmakammanti**ādīni tassā eva vevacanāni. Ayaṃ **paññāpanato paññatti** nāma.

Sā panesā tājāpaññatti upādāpaññatti upanidhāpaññattīti tividhā hoti. Tattha **tājāpaññatti** nāma cakkhusotarūpasaddapathavītejovāyotiādīnayaṃ pavattā. **Upādāpaññatti** pana samūhāsamūhavasena duvidhā hoti. Tattha **samūhapaññatti** nāma rūpārūpadhammesu ekassa vā bahūnaṃ vā nāmaṃ gahetvā samūhamevopādāya vuccati. Kathaṃ? Acchataracchaghaṭapaṭāḡadippabhedā. Ayaṃ samūhapaññatti nāma. **Asamūhapaññatti** pana disākāsakālanimittābhāvanirodhā dibhedā.

Yadā pana sā vijjānaṃ paramatthaṃ jotayati, tadā ‘**vijjānāpaññatti**’ ti pavuccati. Yadā

avijjamānaṃ samūhāsamūhabhedam nāmamattaṃ jotayati, tadā “**avijjamānapaññatti**”ti pavuccati. Duvidhāpi panesā sotadvārajavanānantaraṃ gahitapubbasaṅketamanodvārajavanaviññāṇena viññāyati. Yāya gahitapubbasaṅketena manodvārajavanaviññāṇena paññāpīyati. Yaṃ sandhāya “vijjamānapaññatti, avijjamānapaññatti, vijjamānena avijjamānapaññatti, avijjamānena vijjamānapaññatti, vijjamānena vijjamānapaññatti, avijjamānena avijjamānapaññatti”ti chakkanayo vutto. Tattha paramatthato vijjamānānaṃ rūpādīnaṃ paññāpanā **vijjamānapaññatti**. Tathā avijjamānānamitthipurisādīnaṃ paññāpanā **avijjamānapaññatti**. Ṭhapetvā pana vacanattham kenaci ākārena anupalabbhamānānaṃ pañcamasaccādīnaṃ, tithiyaparikkappitānaṃ vā pakatipurisādīnaṃ paññāpanāpi **avijjamānapaññattiveva**. “Tevijjo, chaḷabhiñño”ti evamādinayappavattā **vijjamānena avijjamānapaññatti**. “Itthisaddo, purisasaddo”ti evamādikā **avijjamānena vijjamānapaññatti**. “Cakkhuvīññāṇaṃ, sotaviññāṇa”nti evamādikā **vijjamānena vijjamānapaññatti**. “Khattiyakumāro, brāhmaṇakumāro, bhikkhukumāro”ti evamādikā **avijjamānena avijjamānapaññatti**ti evaṃ vuttā cha paññattiyopi ettheva saṅgahaṃ gacchanti. Ayaṃ upādāpaññatti nāma.

**Upanidhāpaññatti**pi etissā eva pabhedā, sā pana “dīghaṃ upanidhāya rasso, rassaṃ upanidhāya dīgho”tiādīnayappavattā “kapaṇaṃ mānusaṃ rajjaṃ dibbasukhaṃ upanidhāyā”ti evamādikā ca, tasmā paññāpetabbato ca paññāpanato ca paññattīti veditabbā. Samañña samattā.

778. Paramatthato ca paññatti, tatiyā koṭi na vijjati;  
Dvīsu ṭhānesu kusalo, paravādesu na kampati.

Iti abhidhammāvatāre paññattiniddeso nāma

Dvādasamo paricchedo.

## 13. Terasamo paricchedo

### Kārakapaṭivedhaniddeso

Etthāha – niddiṭṭhā kusalādayo nāma dhammā, na panetesam kārako attā niddiṭṭho. Tassa hi kārakassa vedakassa attano abhāve kusalākusalānaṃ dhammānaṃ abhāvo siyā, tesamabhāve tadāyattavuttīnaṃ tesam vipākānamabhāvo hoti, tasmā kusalādīnaṃ dhammānaṃ desanā niratthikāti? Atra vuccate – nāyaṃ niratthikā, sātthikāvāyaṃ desanā. Yadi kārakassābhāvā kusalādīnamabhāvo siyā, tassa parikkappitassa attanopi abhāvo siyā. Kiṃ kāraṇanti ce? Tassa attano aññassa kārakassābhāvato. Kārakābhāvepi kattā attā atthīti ce? Tathā kusalādīnampi asatīpi kattari atthitā upagantabbā, kutoyaṃ tava tathānurodho, idha virodhoti. Athāpi yathā pana loke kārakābhāvepi pathavīpatejautuādayo paṭicca ankurādīnaṃ abhinibbatti dissati, tathā etesampi kusalādīnaṃ dhammānaṃ hetupaccayasāmaggiyā abhinibbatti hotīti veditabbā.

Athāpi cettha tassā paññāya parikkappito nicco dhuvo kusalādīnaṃ kattā attā paramatthato atthīti ce? Tamupaparikkhissāma tāva, so pana tāva attā kārako vedako kiṃ sacetano vā, udāhu acetano vāti? Kiñcettha – yadi acetano siyā, pākārarupāsāṇasadiso siyā. Tassa kārakavedakattābhāvo siyā. Yadi sacetano, so cetanāya añño vā siyā, anañño vā. Athānañño, cetanāya nāse attanopi nāso siyā. Kiṃ kāraṇanti ce? Cetanāya anaññattā.

Athāpi bhavato adhippāyo evaṃ siyā, attano pana nāso na bhavati niccattā, cetanāyayeva nāso bhavattīti? Vuccate – attano anāse sati cetanāyapi nāso na bhavati. Kiṃ kāraṇanti ce? Cetanāya anaññattā. Cetanattānaṃ anaññatte sati cetanāyayeva nāso bhavati, na attanoti ayuttametaṃ. Atha cetanāyayeva vināse visesakāraṇaṃ natthi, attāva nassatu, tiṭṭhatu cetanā. Atha cetanāya nāse attano nāso na bhavattīti ce? Cetanāya attā añño siyā. Atha aññassa attassa nāse sati sayam nāso na bhavati,

evañca sati ‘‘cetanāya anañño attā’’ti tava paṭiññā hīnā. Athāpi cetanattānaṃ anaññatte sati attano anāso cetanāyapi anāso bhavatu. Atha na bhavati, paṭiññā hīnā. Atha vuttappakārato viparītaṃ vā siyā, attā nassatu, cetanā tiṭṭhatu. Atha pana evaṃ na bhavatīti ce? Anaññattapakkaṃ pariccaja. Atha pana na pariccajasi, paṭiññāhīno bhavasi.

Athāyaṃ bhavato adhippāyo siyā ‘‘nāyaṃ mama attā cetanāya anañño, aññoyevā’’ti? Tatra vuccate – idha pana aññattaṃ duvidhaṃ hoti lakkhaṇakatamaññattañca desantarakatamaññattañcāti. Tattha kiṃ tvaṃ cetanattānaṃ lakkhaṇakatamaññattaṃ vadesi, udāhu desantarakatamaññattanti? Ahaṃ lakkhaṇakatamaññattaṃ vadāmīti. Yathā hi rūparasagandhādīnamekadese vattamānānampi lakkhaṇato aññattaṃ hoti, evaṃ cetanattānamekadese vattamānānampi lakkhaṇato aññattaṃ hoti, tasmā lakkhaṇakatamaññattaṃ vadāmīti. Tatra vuccate – yathā hi jātavedassa ḍayhamāne āmakasaṅghaṭe āmakavaṇṇavināse rasādīnaṃ vināso bhavati, tatheva cetanāya vināse attanopi vināso siyā. Kiṃ kāraṇanti ce? Rūparasādīnaṃ viya ekadesattāti.

Athevaṃ bhavato mati siyā ‘‘ekadesatte satipi attano pana nāso na bhavati, cetanāyayeva vināso bhavati’’ti? Atra vuccate – attano anāse cetanāyapi anāsova hoti. Kiṃ kāraṇanti ce? Rūparasādīnaṃ viya avinibbhogato. Atha samāne ekadesatte avinibbhogabhāvepi kena hetunā cetanāya eva nāso bhavati, na pana attano. Atha viśesakāraṇaṃ natthi, tava laddhiyā attāva nassatu, tiṭṭhatu cetanā. Atha cetanāya nāse attano nāso na bhavati, ubhinnaṃ ekadesatā natthi. Evañca sati ko dosoti ce? Yaṃ pana tayā vuttaṃ, yathā rūparasagandhādīnaṃ ekadesa vattamānānampi lakkhaṇato aññattaṃ, tathā cetanattānamekadese vattamānānampi lakkhaṇato aññattanti? Tamayuttanti tava paṭiññā hīnā. Atha rūparasādīnaṃ viya samānepi ekadesatte yadi attano anāse cetanāyapi anāso na bhavati, paṭiññāhīno asi. Atha vuttappakārato viparītaṃ vā siyā, tava attā nassatu, cetanā tiṭṭhatu. Athevaṃ na bhavatīti ce? Ekadesatāva natthīti.

Atha desantarakatamaññattaṃ vadesi, cetanattānaṃ aññatte sati ghaṭapaṭasakaṭagehādīnaṃ viya aññattaṃ siyā. Cetanāya vinā anaññatā te attā na ghaṭena vinā paṭo viya añño siyā. Añño ca hi ghaṭo añño ca paṭoti? Na, evañca sati ko dosoti ce? ‘‘Acetano attā’’ti pubbe vuttadosato na parimuccatīti. Tasmā paramatthato na koci kattā vā vedako vā attā atthīti daṭṭhabbanti.

Yadi evaṃ atha kasmā bhagavatā –

779. ‘‘Asmā lokā paraṃ lokam,  
So ca sandhāvati naro;  
So ca karoti vedeti,  
Sukhadukkhaṃ sayamkata’’nti ca.

780. ‘‘Satto saṃsāramāpanno,  
Dukkhamassa mahabbhayaṃ;  
Atthi mātā atthi pitā,  
Atthi sattopapātiko’’ti ca.

781. ‘‘Bhārā have pañcakkhandhā,  
Bhārahāro ca puggalo;  
Bhārādānaṃ dukkhaṃ loke,  
Bhāranikkhepanaṃ sukha’’nti ca.

782. ‘‘Yañhi karoti puriso,  
Kāyena vācā uda cetasā;  
Tañhi tassa sakaṃ hoti,  
Tañca ādāya gacchatī’’ti ca.

783. “Ekassekena kappena,  
Puggalassaṭṭhisañcayo;  
Siyā pabbatasamo rāsi,  
Iti vuttaṃ mahesinā”’ti ca.

784. “Asaddho akataññū ca,  
Sandhicchedo ca yo naro;  
Hatāvakāso vantāso,  
Sa ve uttamaporiso”’ti ca. –

Vuttanti. Saccam evaṃ vuttaṃ bhagavatā, tañca kho sammutivasena, na paramatthato. Nanu bhagavatā idampi vuttaṃ –

785. “Kiṃ nu sattoti paccesi, māra diṭṭhigataṃ nu te;  
Suddhasaṅkhārapuñjoyaṃ, nayidha sattupalabbhatī”’ti ca.

786. “Yathāpi aṅgasambhārā,  
Hoti saddo ratho iti;  
Evaṃ khandhesu santesu,  
Hoti sattoti sammutī”’ti ca.

Tasmā na vacanamattamevāvalambitabbaṃ, na ca daḷhamūḷhagāhinā ca bhavitabbaṃ, garukulamupasevitvā suttapadānaṃ adhippāyo jānitabbo, suttapadesu abhiyogo kātabbo. Dve saccāni bhagavatā vuttāni – “sammutisaccam, paramatthasaccañcā”’ti. Tasmā dvepi sammutiparamatthasaccāni asaṅkarato ñātābāni. Evaṃ asaṅkarato ñatvā koci kārako vā vedako vā nicco dhuvo attā paramatthato natthīti upaparikkhitvā paccayasāmaggiyā dhammānaṃ pavattiṃ sallakkhetvā paṇḍitena kulaputtana atthakāmena dukkhassantakiriyāya paṭipajjitabbanti.

787. Yo imaṃ ganthaṃ accantaṃ, cinteti satatampi so;  
Kamena paramā paññā, tassa gacchati vepulaṃ.

788. Atimatikaramādhinīharaṃ,  
Vimativināsakaraṃ piyakkaraṃ;  
Paṭhati suṇati yo sadā imaṃ,  
Vikasati tassa matīdha bhikkhuno.

Iti abhidhammāvatāre kārakapaṭivedhaniddeso nāma

Terasamo paricchedo.

## 14. Cuddasamo paricchedo

### Rūpāvacarasamādhībhāvanāniddeso

789. Bhāvanānayaṃ hitānayaṃ,  
Mānayañca sugataṃ sukhānayaṃ;  
Byākaromi paraṃ ito paraṃ,  
Taṃ suṇātha madhuratthavaṇṇanaṃ.

790. Uttaraṃ tu manussānaṃ, dhammato ñāṇadassanaṃ;  
Pattukāmena kātabbaṃ, ādito sīlasodhanaṃ.

791. Saṅkassarasamācāre, dussīle sīlavajjite;  
Natthi jhānaṃ kuto maggo, tasmā sīlaṃ visodhaye.
792. Sīlaṃ cārittavārittavasena duvidhaṃ mataṃ;  
Taṃ pañācchiddamakkhaṇḍamakammāsamaninditaṃ.
793. Kattabbaṃ atthakāmena, vivekasukhamicchatā;  
Sīlañca nāma bhikkhūnaṃ, alankāro anuttaro.
794. Ratanāṃ saraṇāṃ khemaṃ, tāṇāṃ leṇāṃ parāyaṇāṃ;  
Cintāmaṇi paṇīto ca, sīlaṃ yānamanuttaraṃ.
795. Sītalaṃ salilaṃ sīlaṃ, kilesamaladhovanaṃ;  
Guṇānaṃ mūlabhūtañca, dosānaṃ balaghāti ca.
796. Tidivārohaṇaṇcetaṃ, sopānaṃ paramuttamaṃ;  
Maggo khero ca nibbānagarassa pavesane.
797. Tasmā suparisuddhaṃ taṃ, sīlaṃ duvidhalakkhaṇāṃ;  
Kattabbaṃ atthakāmena, piyasīlena bhikkhunā.
798. Kātabbo pana sīlasmiṃ, parisuddhe t̥hitenidha;  
Palibodhassupacchedo, palibodhā dasāhu ca.
799. “Āvāso ca kulaṃ lābho,  
Gaṇo kammañca pañcamaṃ;  
Addhānaṃ ñāti ābādho,  
Gan̥tho iddhīti te dasā”ti.
800. Palibodhassupacchedaṃ, katvā dasavidhassapi;  
Upasaṅkamitabbo so, kammaṭṭhānassa dāyako.
801. Piyo garu bhāvanīyo, vattā ca vacanakkhama;  
Gambhīrañca kathaṃ kattā, no caṭṭhāne niyojako.
802. Evamādiguṇopetaṃ upagantvā hitesinaṃ;  
Kalyāṇamittaṃ kālena, kammaṭṭhānassa dāyakaṃ.
803. Kammaṭṭhānaṃ gahetabbaṃ, vattaṃ katvā panassa tu;  
Tenāpi caritaṃ ñatvā, dātabbaṃ tassa bhikkhuno.
804. Caritaṃ panidaṃ rāgadosamohavasena ca;  
Saddhābuddhivittakkānaṃ, vasena chabbidhaṃ mataṃ.
805. Vomissakanayā tesāṃ, catusaṭṭhi bhavanti te;  
Tehi attho na caṭṭhīti, na mayā idha dassitā.
806. Asubhā ca dasevettha, tathā kāyagatāsati;  
Ekādasa ime rāga-caritassānukūlatā.
807. Catasso appamaññāyo, savaṇṇakasiṇā ime;  
Aṭṭheva ca sadā dosa-caritassānukūlatā.

808. Taṃ mohacaritassettha, vitakkacaritassa ca;  
Anukūlanti niddiṭṭhaṃ, ānāpānaṃ panekakaṃ.
809. Purimānussatichakkaṃ, saddhācaritadehino;  
Maraṇūpasamāyuttā, satimāhāranissitā.
810. Saññā dhātuvavatthānaṃ, buddhippakatijantuno;  
Ime pana ca cattāro, anukūlāti dīpitā.
811. Cattāropi ca āruppā, sesāni kasiṇāni ca;  
Anukūlā ime sabba-caritānanti vaṇṇitā.
812. Idaṃ sabbaṃ panekanta-vipaccanīkabhāvato;  
Atisappāyato vutta-miti ñeyyaṃ vibhāvinā.
813. Kammatṭhānāni sabbāni, cattālīsāti niddise;  
Kasiṇāni dasa ceva, asubhānussatī dasa.
814. Catasso appamaññāyo, cattāro ca arūpino;  
Catudhātuvavatthānaṃ, saññā cāhāratā iti.
815. Kammatṭhānesu etesu, upacāravahā kati;  
Ānāpānasatiṃ kāya-gataṃ hitvā panaṭṭhapi.
816. Sesānussatiyo saññā, vavatthānanti terasa;  
Upacāravahā vuttā, sesā te appanāvahā.
817. Appanāyāvahesvettha, kasiṇāni dasāpi ca;  
Ānāpānasatī ceva, catukkajjhānikā ime.
818. Asubhāni dasa cettā, tathā kāyagatāsati;  
Ekādasa ime dhammā, paṭhamajjhānikā siyuṃ.
819. Ādibrahmavihārāti, tikajjhānavahā tayo;  
Catutthāpi ca āruppā, catutthajjhānikā matā.
820. Vasenārammaṇaṅgānaṃ, duvidho samatikkamo;  
Gocarātikkamārūpe, rūpe jhānaṅgatikkamo.
821. Daseva kasiṇānettha, vaḍḍhetabbāni honti hi;  
Na ca vaḍḍhaniyā sesā, bhavanti asubhādayo.
822. Daseva kasiṇānettha, asubhāni dasāpi ca;  
Ānāpānasatī ceva, tathā kāyagatāsati.
823. Paṭibhāganimitāni, honti ārammaṇāni hi;  
Sesāneva paṭibhāga-nimittārammaṇā siyuṃ.
824. Asubhāni dasāhāra-saññā kāyagatāsati;  
Devesu nappavattanti, dvādasetāni sabbadā.
825. Tāni dvādasa cetāni, ānāpānasatīpi ca;

Teraseva panetāni, brahmaloke na vijjare.

826. Ṭhapetvā caturārūpe, natthi kiñci arūpisu;  
Manussaloke sabbāni, pavattanti na saṃsayo.
827. Catuttham kasiṇam hitvā, kasiṇā asubhāni ca;  
Diṭṭheneva gahetabbā, ime ekūnavīsati.
828. Satiyampi ca kāyamhi, diṭṭhena tacapañcakaṃ;  
Sesamettha suteneva, gahetabbanti dīpitaṃ.
829. Ānāpānasatī ettha, phuṭṭhena paridīpitā;  
Vāyokasiṇamevettha, diṭṭhaphuṭṭhena gayhati.
830. Suteneva gahetabbā, sesā aṭṭhārasāpi ca;  
Upekkhā appamaññā ca, arūpā ceva pañcime.
831. Āditova gahetabbā, na hontīti pakāsītā;  
Pañcatimsāvasesāni, gahetabbāni ādito.
832. Kammatṭhānesu hetesu, ākāsakasiṇam vinā;  
Kasiṇā nava honte ca, arūpānam tu paccayā.
833. Dasāpi kasiṇā honti, abhiññānam tu paccayā;  
Tayo brahmavihārāpi, catukkassa bhavanti tu.
834. Heṭṭhimaṃ heṭṭhimāruppaṃ, uparūparimassa hi;  
Tathā catutthamāruppaṃ, nirodhassāti dīpitaṃ.
835. Sabbāni ca panetāni, cattālīsavidhāni tu;  
Vipassanābhavasampatti-sukhānam paccayā siyuṃ.
836. Kammatṭhānam gahetvāna, ācariyassa santike;  
Vasantassa kathetabbaṃ, āgatassāgatakkhaṇe.
837. Uggahetvā panaññatra, gantukāmassa bhikkhuno;  
Nātiśāṅkhepavittthāraṃ, kathetabbaṃ tu tenapi.
838. Kammatṭhānam gahetvāna, sammatṭhānam manobhuno;  
Aṭṭhārasahi dosehi, niccaṃ pana vivajjite.
839. Anurūpe vihārasmiṃ, vihātabbaṃ tu gāmato;  
Nātidūre naccāsanne, sive pañcaṅgasamyute.
840. Khuddako palibodhopi, chinditabbo panatthi ce;  
Dīghā kesā nakhā lomā, chinditabbā vibhāvinā.
841. Cīvaraṃ rajitabbaṃ taṃ, kiliṭṭhaṃ tu sace siyā;  
Sace patte malaṃ hoti, pacitabbova suṭṭhu so.
842. Acchinnapalibodhena, pacchā tena ca bhikkhunā;  
Pavivitte panokāse, vasantena yathāsukhaṃ.

843. Vajjetvā mattikaṃ nīlaṃ, pītaṃ setaṅca lohitaṃ;  
Saṅhāyāruṇavaṇṇāya, mattikāya manoramaṃ.
844. Kattabbaṃ kasiṇajjhānaṃ, pattukāmena dhīmatā;  
Senāsane vivittasmiṃ, bahiddhā vāpi tādise.
845. Paṭicchanne panaṭṭhāne, pabbhāre vā guhantare;  
Saṃhārimaṃ vā kātabbaṃ, taṃ tatraṭṭhakameva vā.
846. Saṃhārimaṃ karontena, daṇḍakesu catūsvapi;  
Cammaṃ vā kaṭasāraṃ vā, dussapattampi vā tathā.
847. Bandhitvā tathā kātabbaṃ, mattikāya pamāṇato;  
Bhūmiyaṃ pattharivā ca, oloketabbameva taṃ.
848. Tatraṭṭhaṃ bhūmiyaṃ vaṭṭaṃ, ākoṭitvāna khāṇuke;  
Vallīhi taṃ vinandhitvā, kātabbaṃ kaṇṇikaṃ samaṃ.
849. Vitthārato pamāṇena, vidatthacaturaṅgulaṃ;  
Vaṭṭaṃ vattati taṃ kātuṃ, vivaṭṭaṃ pana micchatā.
850. Bherītalasamaṃ sādhu, katvā kasiṇamaṇḍalaṃ;  
Sammajjitvāna taṃ ṭhānaṃ, nhatvā āgamma paṇḍito.
851. Hatthapāsapamāṇasmiṃ, tamhā kasiṇamaṇḍalā;  
Padese tu supaññatte, āsanasmiṃ suatthate.
852. Ucce tattha nisīditvā, vidatthacaturaṅgule;  
Ujukāyaṃ paṇidhāya, katvā parimukhaṃ satipaṃ.
853. Kāmesvādīnavaṃ disvā, nekkhammaṃ daṭṭhu khemato;  
Paramaṃ pītipāmojjaṃ, janetvā ratanattaye.
854. “Bhāgī assamahaṃ addhā, imāya paṭipattiyā;  
Pavivekasukhassā”ti, katvā ussāhamuttamaṃ.
855. Ākārena sameneva, ummīlitvāna locanaṃ;  
Nimittaṃ gaṇhatā sādhu, bhāvetabbaṃ punappunaṃ.
856. Na vaṇṇo pekkhitabbo so, daṭṭhabbaṃ na ca lakkhaṇaṃ;  
Vaṇṇaṃ pana amuñcivā, ussadassa vasena hi.
857. Cittaṃ paṇṇattidhammasmiṃ, ṭhapetvekaggamānaso;  
“Pathavī pathavi”ccevaṃ, vatvā bhāveyya paṇḍito.
858. Pathavī medanī bhūmi, vasudhā ca vasundharā;  
Evaṃ pathavināmesu, ekaṃ vattumpi vaṭṭati.
859. Ummīlitvā nimīlitvā, āvajjeyya punappunaṃ;  
Yāvuggahanimittaṃ tu, nuppajjati ca tāva so.
860. Evaṃ bhāvayato tassa, puna ekaggacetaso;



Yadā pana nimīletvā, āvajjantassa yogino.

- 861.** Yathā ummīlitekāle, tathāpātham tu yāti ce;  
Taduggahanimittam ta-muppananti pavuccati.
- 862.** Nimitte pana sañjāte, tato pabhuti yoginā;  
Nisīditabbam no cevaṃ, tasmim ṭhāne vijānatā.
- 863.** Attano vasanaṭṭhānam, pavisitvāna dhīmatā;  
Tena tattha nisinnena, bhāvetabbam yathāsukham.
- 864.** Papañcaparihārattham, pādānam pana dhovane;  
Tassekatalikā dve ca, icchitabbā upāhanā.
- 865.** Samādhitaruṇo tassa, asappāyena kenaci;  
Sace nassati tam ṭhānam, gantvāvādāya tam pana.
- 866.** Piṭṭhe sukhanisinnena, bhāvetabbam punappunam;  
Samannāharitabbañca, kare takkāhatampi ca.
- 867.** Nimittam pana tam hitvā, cittam dhāvati ce bahi;  
Nivāretvā nimittasmim, ṭhapetabbam tu mānasam.
- 868.** Yattha yattha nisīditvā, tamicchati tapodhano;  
Tattha tattha divārattim, tassupaṭṭhāti cetaso.
- 869.** Evaṃ tassa karontassa, anupubbena yogino;  
Vikkhambhanti ca sabbāni, pañca nīvaraṇānipi.
- 870.** Samādhīyati cittampi, upacārasamādhinā;  
Paṭibhāganimittampi, uppajjati ca yogino.
- 871.** Ko panāyam viseso hi, imassa purimassa vā;  
Thavikā nīhatādāsa-maṇḍalam viya majjitam.
- 872.** Meghato viya nikkhantam, sampuṇṇacandamaṇḍalam;  
Paṭibhāganimittam tam, balākā viya toyade.
- 873.** Taduggahanimittam tam, padāletvāva niggatam;  
Tatodhikataram suddham, hutvāpaṭṭhāti tassa tam.
- 874.** Tanusaṭṭhānavantañca, vaṇṇavantaṃ na ceva tam;  
Upaṭṭhākāramattam tam, paññajam bhāvanāmayam.
- 875.** Paṭibhāge samuppanne, nimitte bhāvanāmaye;  
Honti vikkhambhitāneva, pañca nīvaraṇānipi.
- 876.** Kilesā sannisinnāva, yuttayogassa bhikkhuno;  
Cittam samāhitamyeva, upacārasamādhinā.
- 877.** Ākārehi pana dvīhi, samādhīyati mānasam;  
Upacārakkhaṇe tassa, paṭilābhe samādhino.

878. Nīvāraṇappahānena, upacārakkhaṇe tathā;  
Aṅgānaṃ pātubhāvena, paṭilābhakkhaṇe pana.
879. Dvinnāṃ pana samādhīnaṃ, kiṃ nānākaraṇaṃ pana;  
Aṅgāni thāmajātāni, upacārakkhaṇena ca.
880. Appanāya panaṅgāni, thāmajātāni jāyare;  
Tasmā taṃ appanācittaṃ, divasampi pavattati.
881. Pallāṅkena ca teneva, vaḍḍhetvā taṃ nimittakaṃ;  
Appanaṃ adhigantaṃ so, sakkoti yadi sundaraṃ.
882. No ce sakkoti so tena,  
Taṃ nimittaṃ tu yoginā;  
Cakkavattiya gabbhova,  
Ratanaṃ viya dullabhaṃ.
883. Satataṃ appamattena, rakkhitabbaṃ satīmatā;  
Nimittaṃ rakkhato laddhaṃ, parihāni na vijjati.
884. Ārakkhaṇe asantamhi, laddhaṃ laddhaṃ vinassati;  
Rakkhitabbaṃ hi tasmā taṃ, tatrāyaṃ rakkhaṇāvidhi.
885. Āvāso gocaro bhassaṃ, puggalo bhojanaṃ utu;  
Iriyāpathoti sattete, asappāye vivajjaye.
886. Sappāye satta seveyya, evaṅhi paṭipajjato;  
Na cireneva kālena, hoti bhikkhussa appanā.
887. Yassappanā na hoteva, evampi paṭipajjato;  
Appanāya ca kosallaṃ, sammā sampādaye budho.
888. Appanāya hi kosalla-midaṃ dasavidhaṃ idha;  
Ganthavithhārabhītena, mayā vissajjitanti ca.
889. Evaṅhi sampādayato, appanākosallaṃ pana;  
Paṭiladdhe nimittasmiṃ, appanā sampavattati.
890. Evampi paṭipannassa, sace sā nappavattati;  
Tathāpi na jahe yogaṃ, vāyametheva paṇḍito.
891. Cittappavattīkāraṃ, tasmā sallakkhayaṃ budho;  
Samataṃ vīriyasēva, yojayetha punappunaṃ.
892. Īsakampi layaṃ yantaṃ, paggaṇhethēva mānaṃ;  
Accāraddhaṃ nisedhetvā, samameva pavattaye.
893. Līnatuddhatabhāvehi, mocayitvāna mānaṃ;  
Paṭibhāganimittābhi-mukhaṃ taṃ paṭipādaye.
894. Evaṃ nimittābhimukhaṃ, paṭipādayato pana;  
Idānevappanā tassa, sā samijjhissatīti ca.

895. Bhavaṅgaṃ pana pacchijja, pathavīkaṣiṇaṃ tathā;  
Tadevārammaṇaṃ katvā, manodvāramhi yogino.
896. Jāyatevajjanaṃ cittaṃ, tatrevārammaṇe tato;  
Javanāni ca jāyante, tassa cattāri pañca vā.
897. Avasāne panekaṃ tu, rūpāvacarikaṃ bhava;  
Takkādayo panaññehi, bhavanti balavattarā.
898. Appanācetaso tāni, parikammopacārato;  
Vuccanti parikammāni, upacārāni cātīpi.
899. Appanāyānulomattā, anulomāni eva ca;  
Yaṃ taṃ sabbantimaṃ ettha, gotrabhūti pavuccati.
900. Gahitāgahaṇenettha, parikammappanādikaṃ;  
Dutiyaṃ upacāraṃ taṃ, tatiyaṃ anulomakaṃ.
901. Catutthaṃ gotrabhu diṭṭhaṃ, pañcamaṃ appanāmano;  
Paṭhamaṃ upacāraṃ vā, dutiyaṃ anulomakaṃ.
902. Tatiyaṃ gotrabhu diṭṭhaṃ, catutthaṃ appanāmano;  
Catutthaṃ pañcamaṃ vāti, appeti na tato paraṃ.
903. Chaṭṭhe vā sattame vāpi, appanā neva jāyati;  
Āsannattā bhavaṅgassa, javanaṃ pati tāvade.
904. Purimehāsevanaṃ laddhā, chaṭṭhaṃ vā sattamampi vā;  
Appetīti panetthāha, **godatto** ābhidhammiko.
905. Dhāvanto hi yathā koci,  
Naro chinnaṭāṃmukho;  
Ṭhātukāmo pariyante,  
Ṭhātuṃ sakkoti neva so.
906. Evameva panacchaṭṭhe, sattame vāpi mānaso;  
Na sakkotīti appetuṃ, veditabbaṃ vibhāvinā.
907. Ekacittakkhaṇāyeva, hotāyaṃ appanā pana;  
Tato bhavaṅgapātova, hotīti paridīpitaṃ.
908. Tato bhavaṅgaṃ chinditvā, paccavekkhaṇahetukaṃ;  
Āvajjanaṃ tato jhāna-paccavekkhaṇamānaṃ.
909. Kāmacchando ca byāpādo, thinamiddhañca uddhato;  
Kukkuccaṃ vicikicchā ca, pahīnā pañcime pana.
910. Vitakkena vicārena, pītiyā ca sukhena ca;  
Ekaggaṭāya saṃyuttaṃ, jhānaṃ pañcaṅgikaṃ idaṃ.
911. Nānāvisayaluddhassa, kāmacchandavasā pana;  
Ito cito bhamantassa, vane makkaṭako viya.

912. Ekasmiṃ visayeyeva, samādhāneva cetaso;  
“Samādhī kāmaccchandassa, paṭipakkho”’ti vuccati.
913. Pāmojjabhāvato ceva, sītalattā sabhāvato;  
“Byāpādassa tato pīti, paṭipakkhā”’ti bhāsītā.
914. Savipphārikabhāvena, nekkhammā dipavattito;  
“Vitakko thinamiddhassa, paṭipakkho”’ti vaṇṇito.
915. Avūpasantabhāvassa, sayañcevātisantato;  
“Sukhaṃ uddhaccakukkucca-dvayassa paṭipakkhakaṃ”’.
916. Matiyā anurūpattā, “anumajjanalakkhaṇo;  
Vicāro vicikicchāya, paṭipakkho”’ti dīpito.
917. Pañcaṅgavippayuttaṃ taṃ, jhānaṃ pañcaṅgasamūyutaṃ;  
Sivaṃ tivīdhakalyāṇaṃ, dasalakkhaṇasamūyutaṃ.
918. Evañcādhigataṃ hoti, paṭhamaṃ tena yoginā;  
Suciraṭṭhitikāmena, tassa jhānassa sabbaso.
919. Taṃ samāpajjitabbaṃ tu, visodhetvāna pāpake;  
Taṃ samāpajjato tassa, suciraṭṭhitikaṃ bhava.
920. Cittabhāvanavepullaṃ, patthayantena bhikkhunā;  
Paṭibhāganimittaṃ taṃ, vaḍḍhetabbaṃ yathākkamaṃ.
921. Vaḍḍhanābhūmiyo dve ca, upacārañca appanā;  
Upacāraṃpi vā patvā, vaḍḍhetuṃ tañca vattati.
922. Appanaṃ pana patvā vā, tatrāyaṃ vaḍḍhanakkamo;  
Kasitabbaṃ yathāṭhānaṃ, paricchindati kassako.
923. Yoginā evamevaṃpi, aṅguladvaṅgulādinā;  
Paricchijja paricchijja, vaḍḍhetabbaṃ yathicchakaṃ.
924. Pattepi paṭhame jhāne, ākārehipi pañcahi;  
Suciṇṇavasīnā tena, bhavitabbaṃ tapassīnā.
925. Āvajjanaṃ samāpatti, adhiṭṭhānesu tīsu ca;  
Vuṭṭhānapaccavekkhāsu, vasitā pañca bhāsītā.
926. Āvajjitvā adhiṭṭhitvā, samāpajja punappunaṃ;  
Vuṭṭhitvā paccavekkhitvā, vasitā pañca sādhave.
927. Paṭhame avasipatte, dutiyaṃ yo panichhati;  
Ubhato bhaṭṭhobhave yogī, paṭhamā dutiyāpi ca.
928. Kāmassahagatā saññā, manakkārā caranti ce;  
Pamādayogino jhānaṃ, hoti taṃ hānabhāgiyaṃ.
929. Sati santiṭṭhate tasmim, santā tadanudhammatā;

Mandassa yogino jhānaṃ, hoti taṃ thitibhāgiyaṃ.

930. Atakkasahitā saññā, manakkārā caranti ce;  
Appamattassa taṃ jhānaṃ, visesabhāgiyaṃ siyā.
931. Nibbidāsaṃyutā saññā, manakkārā caranti ce;  
Nibbedhabhāgiyaṃ jhānaṃ, hotīti paridīpitaṃ.
932. Tasmā pañcasu etesu, suciṇṇavasinā pana;  
Paṭhamā paguṇato jhānā, vuṭṭhāya vidhinā tato.
933. Yasmā ayaṃ samāpatti, āsannākusalārikā;  
Thūlattā takkacārānaṃ, tatoyaṃ āngadubbalā.
934. Iti ādīnavaṃ disvā, paṭhame pana yoginā;  
Dutiyāṃ santato jhānaṃ, cintayitvāna dhīmatā.
935. Nikantiṃ pariyādāya, jhānasmiṃ paṭhame puna;  
Dutiyādhigamathāya, kātabbo bhāvanakkamo.
936. Athassa paṭhamajjhānā, vuṭṭhāya vidhinā yadā;  
Satassa sampajānassa, jhānaṅgaṃ paccavekkhato.
937. Thūlato takkacārā hi, upatiṭṭhanti yogino;  
Sesamaṅgattayaṃ tassa, santamevopatiṭṭhati.
938. Thūlaṅgānaṃ pahānāya, tadā tassa ca yogino;  
Santāṅgapaṭilābhāya, nimittaṃ tu tadeva ca.
939. ‘‘Pathavī pathavi’’ ccevaṃ, karoto manasā puna;  
Idāni dutiyajjhāna-muppajjissati taṃ iti.
940. Bhavaṅgaṃ pana pacchijja, pathavīkasiṇaṃ pana;  
Tadevārammaṇaṃ katvā, manodvāramhi yogino.
941. Jāyatāvajjanaṃ cittaṃ, tasmim ārammaṇe tato;  
Javanāni hi jāyante, tassa cattāri pañca vā.
942. Avasāne panekampi, tesāṃ javanacetasaṃ;  
Rūpāvacarikaṃ hoti, dutiyajjhānamānasāṃ.
943. Sampasādanamajjhattaṃ, pītiyā ca sukkena ca;  
Ekagatāya saṃyuttaṃ, jhānaṃ hoti tivaṅgikaṃ.
944. Heṭṭhā vuttanayeneva, sesāṃ samupalakkhaye;  
Evaṃ duvaṅgahīnaṃ tu, tīhi āṅgehi saṃyutaṃ.
945. Jhānaṃ tividhakalyāṇaṃ, dasalakkhaṇasaṃyutaṃ;  
Dutiyādhigataṃ hoti, bhikkhunā bhāvanāmayāṃ.
946. Dutiyādhigate jhāne, ākārehi ca pañcahi;  
Suciṇṇavasinā hutvā, dutiyepi satīmatā.

947. Tasmā paguṇato jhānā, vuṭṭhāya dutiyā puna;  
Āsannatakkacārari, samāpatti ayaṃ iti.
948. Pītiyā piyato tassa, cetaso uppilāpanaṃ;  
Pītiyā pana thūlattā, tatoyaṃ āṅgadubbalā.
949. Tattha ādīnavaṃ disvā, tatiye santato pana;  
Nikantiṃ pariyādāya, jhānasmimṃ dutiye puna.
950. Tatiyādhigamattāya, kātabbo bhāvanakkamo;  
Athassa dutiyājjhānā, vuṭṭhāya ca yadā pana.
951. Satassa sampajānassa, jhānaṅgaṃ paccavekkhato;  
Thūlato pītupaṭṭhāti, sukhādi santato pana.
952. Thūlaṅgānaṃ pahānāya, tadā tassa ca yogino;  
Santāṅgapaṭilābhāya, nimittaṃ tu tadeva ca.
953. ‘‘Pathavī pathavi’’ccevaṃ, karoto manasā puna;  
Idāni tatiyaṃ jhāna-muppajjissati taṃ iti.
954. Bhavaṅgaṃ manupacchijja, pathavīkasiṇaṃ pana;  
Tadevārammaṇaṃ katvā, manodvāramhi yogino.
955. Jāyatāvajjanaṃ cittaṃ, tasmimṃ ārammaṇe tato;  
Javanāni ca jāyante, tassa cattāri pañca vā.
956. Avasāne panaṃ tu, tesāṃ javanacetasaṃ;  
Rūpāvacarikaṃ hoti, tatiyājjhānamānasaṃ.
957. Satiyā sampajaññaena, sampannaṃ tu sukkena ca;  
Ekaggatāya saṃyuttaṃ, duvaṅgaṃ tatiyaṃ mataṃ.
958. Heṭṭhā vuttanayeneva, sesaṃ samupalakkhaye;  
Evamekaṅgahīnaṃ tu, dvīhi aṅgehi saṃyutaṃ.
959. Jhānaṃ tividhakalyāṇaṃ, dasalakkhaṇasaṃyutaṃ;  
Tatiyādhigataṃ hoti, bhikkhunā bhāvanāmayāṃ.
960. Tatiyādhigate jhāne, ākārehi ca pañcahi;  
Suciṅṇavasinā hutvā, tasmimṃ pana satīmatā.
961. Tasmā paguṇato jhānā, vuṭṭhāya tatiyā puna;  
Āsannapītidosā hi, samāpatti ayanti ca.
962. Yadevacettha ābhogo, sukhamicceva cetaso;  
Evaṃ sukhasa thūlattā, hotāyaṃ āṅgadubbalā.
963. Iti ādīnavaṃ disvā, jhānasmimṃ tatiye puna;  
Catutthaṃ santato disvā, cetasā pana yoginā.
964. Nikantiṃ pariyādāya, jhānasmimṃ tatiye puna;

Catutthādhigamattāya, kātabbo bhāvanakkamo.

965. Athassa tatiyajjhānā, vuṭṭhāya hi yadā pana;  
Satassa sampajānassa, jhānaṅgaṃ paccavekkhato.
966. Thūlato tassupaṭṭhāti, sukhaṃ taṃ mānaṃ tato;  
Upekkhā santato tassa, cittassekaggatāpi ca.
967. Thūlaṅgassa pahānāya, santaṅgassūpaladdhiyā;  
Tadeva ca nimittaṅhi, “pathavī pathavī”ti ca.
968. Karoto manasā eva, punappunaṅca yogino;  
Catutthaṃ panidaṃ jhānaṃ, uppajjissati taṃ iti.
969. Bhavaṅgaṃ panupacchijja, pathavīkaṣiṇaṃ tathā;  
Tadevārammaṇaṃ katvā, manodvāramhi yogino.
970. Jāyatāvajjanaṃ cittaṃ, tasmim ārammaṇe tato;  
Javanāni ca jāyante, tassa cattāri pañca vā.
971. Avasāne panekaṃ tu, tesam javanacetasaṃ;  
Rūpāvacarikaṃ hoti, catutthajjhānamānaṃ.
972. Ekaṅgavippahīnaṃ tu, dvīhi aṅgehi yogato;  
Catutthaṃ panidaṃ jhānaṃ, duvaṅganti pavuccati.
973. Evaṃ tividhakalyāṇaṃ, dasalakkhaṇasaṃyutaṃ;  
Catutthādhigataṃ hoti, bhikkhunā bhāvanāmayam.
974. Yasmā sukhamupekkhāya, na hotāsevanaṃ pana;  
Upekkhāsahagatāneva, javanāni javanti ca.
975. Upekkhāsahagataṃ tasmā, catutthaṃ samudīritaṃ;  
Ayamettha viseso hi, sesaṃ vuttanayaṃ pana.
976. Yaṃ catukkanaye jhānaṃ, dutiyaṃ taṃ dvidhā pana;  
Katvāna pañcakanaye, dutiyaṃ tatiyaṃ kataṃ.
977. Tatiyaṃ taṃ catutthaṅca, catutthaṃ pañcamaṃ idha;  
Paṭhamaṃ paṭhamameva, ayamettha visesatā.
978. Evamettāvatā vuttā, nātisaṅkhepato mayā;  
Nātivitthārato cāyaṃ, rūpāvacarabhāvanā.
979. Sumadhuravarataravacano, kaṃ nu janaṃ neva rañjayati;  
Atinisitavisadabuddhi-pasādajana vedanīyoyaṃ.

Iti abhidhammāvatāre rūpāvacarasamādhībhāvanāniddeṣo

Nāma cuddasamo paricchedo.

## 15. Pannarasamo paricchedo

### Arūpāvacarasamādhībhāvanāniddeśo

980. Rūpārūpamatītena, rūpārūpādivedinā;  
Yāni cārūpapuññāni, sarūpenīritāni tu.
981. Tesam dāni pavakkhāmi, bhāvanānāyāmuttamam;  
Yogāvacarabhikkhūnam, hitatthāya samāsato.
982. “Rūpe kho vijjamānasmim, daṇḍādānādayo siyum;  
Anekāpi panābādā, cakkhurogādayo”’iti.
983. Rūpe ādīnavam disvā, rūpe nibbindamānaso;  
Tassātikamanatthāya, arūpam paṭipajjati.
984. Tamhā kasiṇarūpāpi, so nibbijja visārado;  
Apakkamitukāmo ca, sūkarābhihatova sā.
985. Catutthe pana jhānasmim, hutvā ciṇṇavasī vasī;  
Catutthajjhānato dhīmā, vuṭṭhāya vidhinā puna.
986. Karoti panidaṃ cittaṃ, rūpamārammaṇaṃ yato;  
Āsannasomanassaṇca, thūlasantavimokkhato.
987. Iti ādīnavam disvā, catutthe tattha sabbaso;  
Nikantiṃ pariyādāya, paṭhamārappaṇca santato.
988. Cakkavāḷapariyantaṃ, yattakaṃ vā panicchati;  
Tattakaṃ pattharivāna, phuṭṭhokāsaṇca tena taṃ.
989. Ākāso iti vānanto,  
Ākāso iti vā puna;  
Manasā hi karontova,  
Ugghāṭeti pavuccati.
990. Ugghāṭento hi kasiṇam, na saṃvelleti taṃ pana;  
Na cuddharati so yogī, pūvaṃ viya kapālato.
991. Kevalam pana taṃ neva, āvajjati na pekkhati;  
Nāvajjanto napekkhanto, ugghāṭeti hi nāmaso.
992. Kasiṇuggahāṭimākāsam, nimittaṃ pana taṃva so;  
Ākāso iti cittaena, āvajjati punappunaṃ.
993. Āvajjato hi tassevaṃ,  
Karoto takkāhatampī ca;  
Pañca nīvaraṇā tassa,  
Vikkhambhanti hi sabbaso.
994. Āsevati ca bhāveti, taṃ nimittaṃ punappunaṃ;



Karoto pana tasseva, santacittassa yogino.

- 995.** Tatrākāse panāpeti, paṭhamāruppamānasam;  
Idhāpi purime bhāge, tīṇi cattāri vā pana.
- 996.** Javanāni upekkhāya, sampayuttāni honti hi;  
Catuttham pañcamaṃ vāpi, hoti āruppamānasam.
- 997.** Puna bhāvetukāmena, dutiyāruppamānasam;  
Suciṇṇavasina hutvā, paṭhamāruppamānase.
- 998.** Āsannarūpāvacara-jjhānapaccatthikanti ca;  
Dutiyāruppacittamva, na ca santamidanti ca.
- 999.** Evamādīnavaṃ disvā, paṭhamāruppamānase;  
Nikantiṃ pariyādāya, dutiyaṃ santato pana.
- 1000.** Tamākāsam pharivāna, pavattamānasam pana;  
Taṅca viññānamicevaṃ, kattabbaṃ manasā bahum.
- 1001.** Āvajjanaṅca kattabbaṃ, tathā takkāhatampi ca;  
“Ananta”nti “ananta”nti, kātabbaṃ manasā nidha.
- 1002.** Tasmim pana nimittasmim, vicārentassa mānasam;  
Upacārena taṃ cittaṃ, samādhiyati yogino.
- 1003.** Āsevati ca bhāveti, taṃ nimittaṃ punappunaṃ;  
Tassa cevaṃ karontassa, satisampannacetaso.
- 1004.** Ākāsam phusaviññāṇe, dutiyāruppamānasam;  
Appeti appanā yasmim, nayo vuttanayova so.
- 1005.** Ākāsoyamanantoti, evamākāsameva taṃ;  
Pharivā pavattaviññāṇam, “viññāṅgaṅca”nti vuccati.
- 1006.** Manakkāravasenāpi, anantaṃ paridīpitaṃ;  
“Viññāṅgananta”micceva, vattabbaṃ panidaṃ siyā.
- 1007.** Atha bhāvetukāmena, tatiyāruppamānasam;  
Suciṇṇavasina hutvā, dutiyāruppamānase.
- 1008.** Āsannaṃpaṭhamārūpa-cittapaccatthikanti ca;  
Tatiyāruppacittamva, na ca santamidanti ca.
- 1009.** Evamādīnavaṃ disvā, dutiyāruppamānase;  
Nikantiṃ pariyādāya, tatiyaṃ santato pana.
- 1010.** Evaṃ manasi katvāna, kātabbo manasā puna;  
Paṭhamāruppaviññāṅga-bhāvo tasseva suññato.
- 1011.** Taṃ panākāsaviññāṇam, akatvā manasā puna;  
“Natthi natthi”ti vātena, “suññaṃ suñña”nti vā tato.

- 1012**Āvajjitabbamevañhi, kattabbaṃ manasāpi ca;  
Takkāhatañca kātabbaṃ, punappunaṃva dhīmatā.
- 1013**Tasmiṃ nimitte tassevaṃ, vicārentassa mānasam;  
Sati tiṭṭhati bhīyyopi, samādhīyati mānasam.
- 1014**Āsevati ca bhāveti, taṃ nimittaṃ punappunaṃ;  
Tassa cevaṃ karontassa, satisampannacetaso.
- 1015**Kasiṇugghāṭimākāsam, pharitvāna samantato;  
Viññāṇassa pavattassa, natthibhāve abhāvake.
- 1016**Tatīyāruppaviññāṇam,  
Taṃ panāpeti yogino;  
Appanāya nayopettha,  
Hoti vuttanayova so.
- 1017**Ākāsagataviññāṇam, dutīyāruppacakkhunā;  
Passanto viharitvāna, “natthi natthi” tiādīnā.
- 1018**Parikammamanakkāre, tasmiṃ antarahite pana;  
Tassāpagamamattaṃva, passanto vasatī ca so.
- 1019**Ṣannipātaṃ yathā koci, disvā saṅghassa katthaci;  
Gate saṅhe tu taṃ ṭhānaṃ, suññamevānupassati.
- 1020**Puna bhāvetukāmena, catutthāruppamānasam;  
Suciṇṇavasīnā hutvā, tatīyāruppamānase.
- 1021**Āsannadutīyārūpa-cittapaccatthikanti ca;  
Catutthāruppacittaṃva, na ca santamidanti ca.
- 1022**Evamādīnavaṃ disvā, tatīyāruppamānase;  
Nikantiṃ pariyādāya, catutthaṃ santato pana.
- 1023**Evam manasi katvāna, puna tattheva dhīmatā;  
Abhāvārammaṇam katvā, sampavattamidaṃ mano.
- 1024**“Santam santamidaṃ citta”-miccevaṃ taṃ punappunaṃ;  
Hoti āvajjitabbañca, kātabbaṃ manasāpi ca.
- 1025**Tasmiṃ nimitte tassevaṃ, vicārentassa mānasam;  
Sati tiṭṭhati bhīyyopi, samādhīyati mānasam.
- 1026**Āsevati ca bhāveti, taṃ nimittaṃ punappunaṃ;  
Tassa cevaṃ karontassa, satisampannacetaso.
- 1027**Tatīyāruppasāṅkhāta-khandhesu ca catūsupi;  
Catutthāruppaviññāṇam, taṃ panāpeti yogino.
- 1028**Appanāya nayopettha, heṭṭhā vuttanayūpamo;  
Apicettha visesoṃ, veditabbo vibhāvīnā.

- 1029** ‘Aho santā vatāya’nti, samāpatti padissati;  
Yā panābhāvamattampi, katvā ṭhassati gocaraṃ.
- 1030** Santārammaṇatāyeva, ‘santāya’nti vipassati;  
Santato ce manakkāro, kathaṇca samatikkamo.
- 1031** Anāpajjitukāmattā, hoteva samatikkamo;  
‘Samāpajjāmahameta’-miccābhogo na vijjati.
- 1032** Santato taṃ karonto hi, manasā sukhumaṃ paraṃ;  
Asaññaṃ pana dubbalyaṃ, pāpuṇāti mahaggataṃ.
- 1033** Nevasaññī ca nāsaññī,  
Yāya saññāya hoti so;
- Na kevalaṃ tu saññāva,  
Edisī atha kho pana.
- 1034** Evameva bhavantettha, sukhumā vedanādayo;  
Pattamakhanatena, maggasmīṃ udakena ca.
- 1035** Sāvetabbo ayaṃ attho, catutthārubbodhane;  
Paṭusaññāya kiccassa, nevakkaraṇato ayaṃ.
- 1036** ‘Nevasaññā’ti niddiṭṭhā, catutthārubbopasambhavā;  
Paṭusaññāya kiccaṃ sā, kātuṃ sakkoti neva ca.
- 1037** Yathā dahanakiccaṃ tu, tejodhātu sukhodake;  
Sā saṅkhārāvesattā, sukhumattena vijjati;  
Tasmā pana ca sā saññā, ‘nāsaññā’ti pavuccati.
- 1038** Etā hi rūpamākāsaṃ,  
Viññāṇaṃ tadabhāvakaṃ;  
Atikkamitvā kamato,  
Catasso honti āha ca.
- 1039** ‘Ārammaṇātikkamato, catassopi bhavantimā;  
Aṅgātikkamametāsaṃ, na icchanti vibhāvino.
- 1040** Supaṇītatarā honti,  
Pacchimā pacchimā idha;  
Upamā tattha viññeyyā,  
Pāsādatalasāṭikā’ti.
- 1041** Saṅkhepena mayārappa-samāpattinayo ayaṃ;  
Dassito dassito suddha-dassinā piyadassinā.
- 1042** Rūpārūpajjhānasamāpattividhānaṃ,  
Jānātimaṃ sārataṃ yo pana bhikkhu;  
Rūpārūpajjhānasamāpattisu dakkho,  
Rūpārūpaṃ yāti bhavaṃ so abhibhuyya.

Iti abhidhammāvatāre arūpāvacarasamādhībhāvanāniddeṣo nāma

Pannarasamo paricchedo.

## 16. Soḷasamo paricchedo

### Abhiññāniddeṣo

- 1043** Itto paraṃ karissāmi, paññāsuddhikaraṃ paraṃ;  
Pañcannampi abhiññānaṃ, mukhamattanidassanaṃ.
- 1044** Rūpārūpasamāpattī,  
Nibbattetvā panaṭṭhapi;  
Lokikāpi abhiññāyo,  
Bhāvetabbā vibhāvinā.
- 1045** Catutthajjhānamattepi, suciṇṇavasīnā satā;  
Anuyogamabhiññāsu, kātuṃ vattati yogino.
- 1046** Abhiññā nāma bhikkhūnaṃ, sābhiññānaṃ anuttaro;  
Alaṅkāro hi tāṇanti, satthanti ca pavuccati.
- 1047** Nibbattitāsvabhiññāsu, yogāvacarabhikkhunā;  
Samādhībhāvanā hissa, tadā niṭṭhaṅgatā siyā.
- 1048** Dibbāni cakkhusotāni, iddhicittavijānaṃ;  
Pubbenivāsañāṇanti, pañcābhiññā imā siyuṃ.
- 1049** Kasiṇānulomatādīhi, catuddasanayehi ca;  
Dametabbamabhiññāyo, pattukāmena mānaṃ.
- 1050** Dante samāhite suddhe, pariyodāte anaṅgaṇe;  
Nupaklese mudubhūte, kammaniye ṭhitācale.
- 1051** Iti aṭṭhaṅgasampanne, citte iddhividhāya ca;  
Abhinīharati ce cittaṃ, sijjhatiddhivikubbaṃ.
- 1052** Abhiññāpādakajjhānaṃ, samāpajja tato pana;  
Vuṭṭhāya hi sataṃ vāpi, sahaṃsaṃ vā yadicchatī.
- 1053** ‘‘Sataṃ homi sataṃ homī’’-ccevaṃ katvāna mānaṃ;  
Abhiññāpādakajjhānaṃ, samāpajja tato pana.
- 1054** Vuṭṭhāya punadhiṭṭhāti,  
Sahādhiṭṭhānacetasā;  
Sataṃ hoti hi so yogī,  
Sahassādīsvayaṃ nayo.
- 1055** Pādakajjhānacittaṃ tu, nimittārammaṇaṃ siyā;  
Parikammamanānettha, satārammaṇikāni tu.

**1056**Tadādhiṭṭhānacittampi, satārammaṇameva taṃ;  
Pubbe vuttappanācittaṃ, viya gotrabhunantaraṃ.

**1057**Tamekaṃ jāyate tattha, catutthajjhānikaṃ mano;  
Parikammavisesova, sesaṃ pubbasamaṃ idha.

Iddhividhaññaṃ.

**1058**Dibbasotamidaṃ tattha, bhāvetabbaṃ kathaṃ siyā;  
Abhiññāpādakajjhānaṃ, samāpajja tato puna.

**1059**Vuṭṭhāya parikammena, kāmāvacaracetasā;  
Saddo āvajjitabbova, mahanto sukhumopi ca.

**1060**Tassevaṃ pana saddassa, nimittaṃ manasi kubbato;  
Dibbasotamidānissa, uppajjissati taṃ iti.

**1061**Saddesvaññataraṃ saddaṃ, katvā ārammaṇaṃ tato;  
Uppajjitvā niruddhe tu, manodvārāvajjane puna.

**1062**Javanāni hi jāyante, tassa cattāri pañca vā;  
Purimānettha cittesu, tīṇi cattāri vā pana.

**1063**Parikammopacārānu-lomagotrabhunāmakā;  
Catutthaṃ pañcamaṃ vāpi, appanācittamīritaṃ.

**1064**Sahajātaṃ tu yaṃ ñāṇaṃ, appanāmānasena hi;  
Taṃ ñāṇaṃ dibbasotanti, vadanti sutakovidā.

**1065**Thāmajātaṃ karontena, taṃ ñāṇaṃ tena yoginā;  
“Etthantaragataṃ saddaṃ, suṇāmī”ti ca cetasā.

**1066**Aṅgulaṃ dvaṅgulaṃ bhiyyo,  
Vidatthi ratanaṃ tathā;  
Gāmo deso tato yāva,  
Cakkavāḷā tato paraṃ.

**1067**Īccevaṃ tu paricchijja, vaḍḍhetabbaṃ yathākkamaṃ;  
Eso adhigatābhiñño, pādakārammaṇena tu.

**1068**Phuṭṭhokāsagate sadde, sabbe pana suṇāti so;  
Suṇanto pāṭiyekkampi, sallakkhetuṃ pahoti so.

Dibbasotaññaṃ.

**1069**Kathaṃ panuppādetabbaṃ, cetopariyamānasam;  
Dibbacakkhuvaseva, idaṃ ñāṇaṃ panijjhati.

**1070**Ālokaṃ pana vaḍḍhetvā, tasmā dibbena cakkhunā;  
Hadayaṃ pana nissāya, vattamānaṃ tu lohitaṃ.

**1071**Disvā parassa viññeyyaṃ,

Hoti cittaṃ tu bhikkhunā;  
Somanassayute citte,  
Lohitaṃ lohitaṃ siyā.

**1072** Domanassayute citte, vattamāne tu kāḷakaṃ;  
Upekkhāsahite citte, tilatelūpamaṃ siyā.

**1073** Tasmā parassa sattassa, disvā hadaya-lohitaṃ;  
Cetopariyaññaṃ taṃ, kātabbaṃ thāmataṃ gataṃ.

**1074** Evaṃ thāmagate tasmiṃ, yathānukkamoto pana;  
Cittameva vijānāti, vinā lohita-dassanaṃ.

**1075** Kāmāvacaracittañca, rūpārūpesu mānasaṃ;  
Sabbameva vijānāti, sarāgādippabhedakaṃ.

Cetopariyaññaṃ.

**1076** Pubbenivāsaññaṇena, kattaḃbā tadanussati;  
Taṃ sampādetukāmena, ādikammikabhikkhunā;  
Jhānāni pana cattāri, samāpajjānupubbato.

**1077** Abhiññāpāda-kajjhānā, vuṭṭhāya hi tato puna;  
Bhikkhunā vajjitabbāva, nisajjā sabbapacchimā.

**1078** Tato pabhuti sabbampi, paṭilomakkamā pana;  
Sabbamāvajjitabbaṃ taṃ, divase rattiyaṃ kataṃ.

**1079** Paṭilomakkameneva, dutiye tatiyepi ca;  
Divase pakkhamāsesu, tathā saṃvaccha-supi.

**1080** Yāva asmiṃ bhava sandhi, tāva tena ca bhikkhunā;  
Katamāvajjitabbaṃ taṃ, purimasmiṃ bhavepi ca.

**1081** Cutikkhaṇepi nibbattaṃ, nāmarūpañca sādhu-kaṃ;  
Evamāvajjite tasmiṃ, nāmarūpe yadā pana.

**1082** Tadevārammaṇaṃ katvā, nāmarūpaṃ cutikkhaṇe;  
Manodvāre manakkāro, uppajjati tadā pana.

**1083** Āvajjane niruddhasmiṃ, tadevārammaṇaṃ pana;  
Katvā javanacittāni, honti cattāri pañca vā;  
Pubbe vuttanayeneva, sesaṃ ñeyyaṃ vibhāvinā.

**1084** Parikammādināmāni, purimāni bhavanti tu;  
Pacchimaṃ appanācittaṃ, rūpāvacarikaṃ bhava.

**1085** Tena cittena yaṃ ñāṇaṃ, saṃyuttaṃ tena yā pana;  
Saṃyuttā sati sā pubbe-nivāsānussatīritā.

Pubbenivāsānussatiññaṃ.

- 1086**Rūpaṃ passitukāmena, bhikkhunā dibbacakkhunā;  
Kasiṇārammaṇaṃ jhānaṃ, abhiññāpādakaṃ pana.
- 1087**Abhinīhāraḅbhamāṃ katvā, tejakasiṇameva vā;  
Odātakasiṇaṃ vāpi, ālokakasiṇampi vā.
- 1088**Īmesu katapuññehi, kasiṇesu ca tīsupi;  
Ālokakasiṇaṃ ettha, seṭṭhanti paridīpitaṃ.
- 1089**Tasmā tamitaraṃ vāpi, uppādetvā yathākkamaṃ;  
Upacārabhūmiyaṃyeva, ṭhatvā taṃ pana paṇḍito.
- 1090**Vaḅḅhetvāna ṭhapetabbaṃ, na uppādeyya appanaṃ;  
Uppādeti sace hoti, pādakajjhānanissitaṃ.
- 1091**Jhānassa vaḅḅhitassanto-gataṃ rūpaṃ tu yoginā;  
Passitabbaṃ bhava rūpaṃ, passato pana tassa taṃ.
- 1092**Parikammaṃ vāro hi, atikkamati tāvade;  
Ālokopi tato tassa, khippamantaradhāyati.
- 1093**Tasmim̄ antarahite rūpa-gatampi ca na dissati;  
Tenātha pādakajjhānaṃ, pavisitvā tato puna.
- 1094**Vuṭṭhāya pana āloko, pharitabbova bhikkhunā;  
Evaṃ anukkameneva, āloko thāmavā siyā.
- 1095**‘‘Āloko ettha hotū’’ti,  
Yattakaṃ ṭhānameva so;  
Paricchindati tattheva,  
Āloko pana tiṭṭhati.
- 1096**Divasampi nisīditvā, passato hoti dassanaṃ;  
Tiṇukkāya gato maggaṃ, purisettha nidassanaṃ.
- 1097**Uppādanakkamopissa, tatrāyaṃ dibbacakkhuno;  
Vuttappakārarūpaṃ taṃ, katvā ārammaṇaṃ pana.
- 1098**Manodvāre manakkāre, jāte yāni tadeva ca;  
Rūpaṃ ārammaṇaṃ katvā, jāyanti javanāni hi.
- 1099**Kāmāvacaracittāni, tāni cattāri pañca vā;  
Heṭṭhā vuttanayeneva, sesaṃ ñeyyaṃ vibhāvinā.
- 1100**Atthasādhakacittaṃ taṃ, catutthajjhānikaṃ mataṃ;  
Taṃcittasaṃyutaṃ ñānaṃ, dibbacakkhanti vuccati.
- 1101**Ānāgataṃsañānaṃ, yathākkammupagassa ca;  
Parikammaṃ visuṃ natthi, ijjhanti dibbacakkhunā.
- 1102**Cutūpapātāñānampi, dibbacakkhanti vā pana;  
Atthato ekamevedaṃ, byañjane pana nānatā.

Dibbacakkhuññaṃ.

**1103**Yodha suṇāti karoti ca citte,  
Ganthamimaṃ paramaṃ pana bhikkhu;  
So abhidhammamaḥaṇṇavapāraṃ,  
Yāti anena tarena taritvā.

Iti abhidhammāvatāre abhiññāniddeṣo nāma

Soḷasamo paricchedo.

## 17. Sattarasamo paricchedo

### Abhiññārammaṇaniddeṣo

**1104**Anāgataṃsaññaṇaṇca, yathākammupagampī ca;  
Pañca iddhividhādīni, sattābhiññā imā pana.

**1105**Etāsaṃ pana sattannaṃ, abhiññānamito paraṃ;  
Pavakkhāmi samāseṇa, ārammaṇavinicchayaṃ.

**1106**Ārammaṇattikā vuttā, ye cattāro mahesinā;  
Sattannamettha ñāṇaṃ, sampavattiṃ suṇātha me.

**1107**Tattha **iddhividhaññaṃ**, parittādīsu sattu;  
Ārammaṇavibhāgesu, pavattati kathaṃ pana.

**1108**Kāyenādissamāneṇa, gantukāmo yadābhavē;  
Cittasannissitaṃ katvā, kāyaṃ cittavasena taṃ.

**1109**Mahaggate ca cittasmim, samāropeti so tadā;  
Kāyārammaṇato ñāṇaṃ, parittārammaṇaṃ siyā.

**1110**Dissamāneṇa kāyena, gantukāmo yadā bhavē;  
Kāyasannissitaṃ katvā, cittaṃ kāyavasena taṃ.

**1111**Pādakajjhānacittaṃ taṃ, kāye ropeti so tadā;  
Jhānārammaṇato ñāṇaṃ, taṃ mahaggatagocaraṃ.

**1112**Anāgatamatītaṇca, karoti visayaṃ yadā;  
Atītārammaṇaṃ hoti, tadānāgatagocaraṃ.

**1113**Kāyena dissamāneṇa, gamane pana bhikkhuno;  
Paccuppanno bhavē tassa, gocaroti viniddise.

**1114**Kāyaṃ cittavasenāpi, cittaṃ kāyavasena vā;  
Pariṇāmanakālasim, ajjhattārammaṇaṃ siyā.

**1115**Bahiddhārammaṇaṃ hoti, bahiddhārūpadassane;  
Evamiddhividhaṃ ñāṇaṃ, sampavattati sattu.



- 1116Paccuppanne paritte ca, bahiddhajjhattikesupi;  
Catūsvetusu dhammesu, dibbasotaṃ pavattati.
- 1117Paccuppanno paritto ca, saddo ārammaṇaṃ yato;  
Parittārammaṇaṃ paccu-ppannārammaṇataṃ gataṃ.
- 1118Attano kucchisaddassa, savanepi parassa ca;  
Ajjhāttārammaṇañceva, bahiddhārammaṇampi ca.
- 1119Cetopariyañāṇampi, parittādīsu aṭṭhasu;  
Ārammaṇavibhāgesu, pavattati kathaṃ pana.
- 1120Parittārammaṇaṃ hoti, parittānaṃ pajānane;  
Jānane majjhimānaṃ tu, taṃ mahaggaṭṭagocaraṃ.
- 1121Jānane pana maggassa, phalassāpi pajānane;  
Tadā panassa ñāṇassa, appamāṇova gocaro.
- 1122Taṃ maggārammaṇaṃ hoti, maggacittassa jānane;  
Pariyāyenevetassa, maggārammaṇatā matā.
- 1123Atīte sattadivasa-bbhantare ca yadā pana;  
Anāgate tathā satta-divasabbhantarepi ca.
- 1124Pasesaṃ pana cittassa, jānane samudīritaṃ;  
Atītārammaṇañceva, tadānāgatagocaraṃ.
- 1125Kathañca pana taṃ paccuppannagocaratāṃ gataṃ;  
Paccuppannaṃ tidhā vuttaṃ, khaṇasantatiaddhato.
- 1126Tattha tikkhaṇasampattaṃ, paccuppannakhaṇādikaṃ;  
Ekadvesantativārapariyāpannamidaṃ pana.
- 1127Santatipaccuppannanti, āhu santatikovidā;  
Ekabbhavaparicchinnaṃ, paccuppannanti pacchimaṃ.
- 1128Khaṇādikattayaṃ paccu-ppannaṃ tamāhu kecidha;  
Cetopariyañāṇassa, hoti ārammaṇaṃ iti.
- 1129Yathā ca pupphamuṭṭhimhi, ukkhitte gagane pana;  
Avassaṃ ekamekassa, vaṇṭaṃ vaṇṭena vijjhati.
- 1130Evaṃ mahājanassāpi, citte āvajjite pana;  
Ekassa cittamekena, avassaṃ pana vijjhati.
- 1131Yenāvajjati cittaṇa, yena jānāti cetasā;  
Tesaṃ dvinnaṃ sahaṭṭhānā-bhāvato taṃ na yujjati.
- 1132Javanāvajjanānaṃ tu, nānārammaṇapattito;  
Aniṭṭhe pana hi ṭhāne, ayuttanti pakāsitaṃ.
- 1133Tasmā santatiaddhāna-paccuppannānameva tu;

Vasena paccuppannaṃ taṃ, hoti ārammaṇaṃ idaṃ.

**1134** Paccuppannampi addhākhyāṃ, idaṃ javanavārato;  
Dīpetabbanti niddiṭṭhaṃ, tatrāyaṃ dīpanānayo.

**1135** Yadā parassa cittañhi, ñātumāvajjatiddhimā;  
Āvajjanamano tassa, paccuppannakhaṇavhayāṃ.

**1136** Ārammaṇaṃ tadā katvā, tena saddhiṃ nirujjhati;  
Javanāni hi jāyante, tassa cattāri pañca vā.

**1137** Etesaṃ pacchimaṃ cittaṃ, iddhicittamudīritaṃ;  
Kāmāvacaracittāni, sesānīti viniddise.

**1138** Etesaṃ pana sabbesaṃ, niruddhaṃ tu tadeva ca;  
Cittaṃ ārammaṇaṃ hoti, tasmā sabbāni tānīpi.

**1139** Ekārammaṇataṃ yanti, na nānārammaṇāni hi;  
Addhāvasā bhava paccu-ppannārammaṇato pana.

**1140** Ekārammaṇabhāvepi, iddhimānasameva ca;  
Parassa cittaṃ jānāti, netarāni yathā pana.

**1141** Cakkhudvāre tu viññāṇaṃ, rūpaṃ passati netaraṃ;  
Evameva ca taṃ iddhi-cittameva ca jānāti.

**1142** Paracittārammaṇattā, bahiddhārammaṇaṃ siyā;  
Cetopariyañāṇampi, aṭṭhasveva pavattati.

**1143** Pubbenivāsañāṇampi, parittādīsu aṭṭhasu;  
Ārammaṇavibhāgesu, pavattati kathaṃ pana.

**1144** Kāmāvacarakhandhānaṃ, samanussaraṇe pana;  
Parittārammaṇaṃyeva, hotīti paridīpaye.

**1145** Rūpāvacarikārūppakhandhānussaraṇe pana;  
Bhavatīti hi ñātappaṃ, taṃ mahaggatagocaraṃ.

**1146** Atīte attanā maggaṃ, bhāvitaṃ tu phalampi vā;  
Samanussarato eva-ppamāñārammaṇaṃ siyā.

**1147** Samanussarato maggaṃ, maggārammaṇameva taṃ;  
Atītārammaṇaṃyeva, hoti ekantato idaṃ.

**1148** Cetopariyañāṇampi, yathākammupagampi ca;  
Atītārammaṇā honti, kiñcāpi atha kho pana.

**1149** Cetopariyañāṇassa, sattaddivasabbhantaraṃ;  
Atītaṃ cittamevassa, ārammaṇamudīritaṃ.

**1150** Atīte cetanāmattaṃ, yathākammupagassapi;  
Pubbenivāsañāṇassa, natthi kiñci agocaraṃ.

1151 Ajjhattārammaṇaṃ atta-khandhānussaraṇe siyā;  
Bahiddhārammaṇaṃ añña-khandhānussaraṇe bhava.

1152 Saraṇe nāmagottassa, taṃ navattabbagocaraṃ;  
Pubbenivāsaññaṃpi, aṭṭhasveva pavattati.

1153 Paccuppanne paritte ca, bahiddhajjhattikesupi;  
Catūsvetesu dhammesu, dibbacakkhu pavattati.

1154 **Dibbasotasamaṃ dibba-cakkhu**ārammaṇakkame;  
Rūpaṃ saddoti dvinnāṃ tu, ayameva visesatā.

1155 **Anāgataṃsaññaṃ**pi, parittādīsu aṭṭhasu;  
Ārammaṇavibhāgesu, pavattati kathaṃ pana.

1156 Nibbattissati yaṃ kāmā-vacareti pajānato;  
Parittārammaṇaṃ hoti, rūpārūpesvanāgate.

1157 Nibbattissati yañcāpi, siyā mahaggatagocaraṃ;  
Bhāvessati ayaṃ maggaṃ, phalaṃ sacchikarissati.

1158 Evaṃ pajānane appa-māñārammaṇataṃ bhava;  
Maggāṃ bhāvessaticceva, jānane maggagocaraṃ.

1159 Ekantena idaṃ ñāṇaṃ, hotānāgatagocaraṃ;  
Cetopariyaṃ tu kiñcāpi, hotānāgatagocaraṃ.

1160 Atha kho pana taṃ satta-divasabbhantaraṃ pana;  
Cittameva ca jānāti, na hi taṃ aññagocaraṃ.

1161 Anāgataṃsaññaṃssa, anāgataṃsagocaraṃ;  
“Ahaṃ devo bhavissāmi”-ccevamajjhagocaraṃ.

1162: “Tisso phusso amutrāyaṃ,  
Nibbattissatināgate”;  
Iccevāṃ jānane tassa,  
Bahiddhārammaṇaṃ siyā.

1163 Jānane nāmagottassa, yassa kassacināgate;  
Pubbenivāsaññaṃva, taṃ navattabbagocaraṃ.

1164 **Yathākammupagaññaṃ**, parittādīsu pañcasu;  
Ārammaṇavibhāgesu, pavattati kathaṃ pana.

1165 Jānane kāmakkammaṃ, parittārammaṇaṃ siyā;  
Tathā mahaggatakammaṃ, taṃ mahaggatagocaraṃ.

1166 Atītameva jānāti, tasmā cātītagocaraṃ;  
Ajjhattārammaṇaṃ hoti, attano kammajānane.

1167 Bahiddhārammaṇaṃ hoti, parakammaṃpajānane;  
Evaṃ pavatti ñātābbā, yathākammupagassapi.

**1168** Sattannampi abhiññānaṃ, vutto ārammaṇakkamo;  
Ettha vuttanayeneva, veditabbo vibhāvinā.

**1169** Vividhatthavaṇṇapadehi sampannaṃ,  
Madhuratthamatiniharaṃ ganthaṃ;  
Sotujanassa hadayaṭṭikaraṃ,  
Suṇeyya koci manujo sacetano.

Iti abhidhammāvatāre abhiññārammaṇaniddeso nāma

Sattarasamo paricchedo.

## 18. Aṭṭhārasamo paricchedo

### Diṭṭhivissuddhiniddeso

**1170** Samādhim̐ pana sābhiññānaṃ, bhāvetvā tadanantaraṃ;  
Bhāvetabbā yato paññā, bhikkhunā tena dhīmatā.

**1171** Tatohaṃ dāni vakkhāmi, paññābhāvanamuttamaṃ;  
Samāseneva bhikkhūnaṃ, paraṃ pītisukhāvahaṃ.

**1172** Kā paññā pana ko cattho,  
Kimassā lakkhaṇādikaṃ;  
Katidhā sā kathaṃ tena,  
Bhāvetabbāti vuccate. –

**1173** Paññā vipassanāpaññā, puññacittasamāyutā;  
Pajānātīti paññā sā, jānanā vā pakārato.

**1174** Saññāviññāṇapaññānaṃ, ko viseso kimantaraṃ;  
Saññāviññāṇapaññānaṃ, jānanatte samepi ca.

**1175** Yā sañjānanamattaṃva, saññā nīlādito pana;  
Lakkhaṇappaṭivedhaṃ tu, kātuṃ sakkoti neva sā.

**1176** Viññānaṃ pana jānāti, nīlapītādigocaraṃ;  
Sakkotipi aniccādilakkhaṇaṃ paṭivijjhitaṃ.

**1177** Ussakkivā na sakkoti, maggaṃ pāpetumeva taṃ;  
Paññā vuttanayaṃ kātuṃ, sakkoti tiividhampi taṃ.

**1178** Imesaṃ pana tiṇṇampi, viseso samudīrito;  
Sabbesaṃ pana dhammānaṃ, sabhāvapaṭivedhanaṃ.

**1179** Lakkhaṇaṃ pana paññāya, lakkhaṇaññūhi dīpitaṃ;  
Sammohanandhakārassa, viddhamāsanarasā matā.

**1180** Asammohapaccupaṭṭhānā, samādhāsannakāraṇā;  
Evamettha ca viññeyyā, paññāya lakkhaṇādikā.

**Katidhāti** ettha –

- 1181** Lakkhaṇenekadhā vuttā,  
Lokikālokikā **dvidhā**;  
Lokiyenettha maggena,  
Yuttā sā lokikā siyā.
- 1182** Lokuttarena maggena, yuttā lokuttarā matā;  
**Tividhā**pi siyā paññā, cintāsutamayādito.
- 1183** Tatthattanova cintāya, nipphannattāti tassa sā;  
Hoti cintāmayā paññā, bhūripaññena desitā.
- 1184** Parato pana sutvāna, laddhā paññā ayaṃ idha;  
Suteneva ca nipphannā, paññā sutamayā matā.
- 1185** Yathā vāpi tathā cettha, bhāvanāya vasena tu;  
Nipphannā appanāpattā, paññā sā bhāvanāmayā.
- 1186** Paṭisambhidācatukkassa, vasena **catudhā** siyā;  
Atthadhammaniruttisu, ñāṇaṃ ñāṇesu tīsupi.
- 1187** Yaṃ kiñci paccayuppanaṃ, vipākā ca kriyā tathā;  
Nibbānaṃ bhāsitattho ca, pañcete atthasaññitā.
- 1188** Phalanibbattako hetu, ariyamaggo ca bhāsitaṃ;  
Kusalākusalañceti, pañcete dhammasaññitā.
- 1189** Tasmim atthe ca dhamme ca, yā sabhāvanirutti tu;  
Niruttīti ca niddiṭṭhā, niruttikusalena sā.
- 1190** Ñāṇaṃ ārammaṇaṃ katvā, tividhaṃ paccavekkhato;  
Tesu ñāṇesu yaṃ ñāṇaṃ, paṭibhānanti taṃ mataṃ.
- 1191** Pariyattiparipucchāhi, savanādhigamehi ca;  
Pubbayogena gacchanti, pabhedaṃ paṭisambhidā.
- Kathaṃ bhāvetabbāti** ettha –
- 1192** Khandhādīsu hi dhammesu, bhūmibhūtesu yoginā;  
Uggahādivasenettha, katvā paricayaṃ pana.
- 1193** **Sīlaṃ cittavisuddhi**ñca, sampādetvā tato paraṃ;  
Diṭṭhisuddhādayo pañca, sampādentena suddhiyā.
- 1194** Tāya paññāya yuttana, bhītena jananādito;  
Bhāvetabbā bhavābhāvaṃ, patthayantena bhikkhunā.
- 1195** Rūpañca vedanā saññā, saṅkhārā ceva sabbaso;  
Viññāṇaṅceti pañcete, khandhā sambuddhadesitā.

- 1196 Tattha yaṃ kiñci rūpaṃ taṃ, atītānāgatādikaṃ;  
Ajjhataṃ vā bahiddhā vā, sukhumoḷārikampi vā.
- 1197 Hīnaṃ vāpi paṇītaṃ vā, yaṃ dūre yañca santike;  
Sabbhaṃ tamekato katvā, **rūpakkhandhoti** vuccati.
- 1198 Itaresupi yaṃ kiñci, taṃ vedayitalakkhaṇaṃ;  
Sabbhaṃ tamekato katvā, **vedanākkhandhatā** katā.
- 1199 Cittajaṃ pana yaṃ kiñci, taṃ sañjānanalakkhaṇaṃ;  
Sabbhaṃ tamekato katvā, **saññākkhandhoti** vuccati.
- 1200 Yaṃ kiñci cittasambhūtaṃ, abhisāṅkhāralakkhaṇaṃ;  
Sabbhaṃ tamekato katvā, **saṅkhārakkhandhatā** katā.
- 1201 Tattha cittaṃ tu yaṃ kiñci, taṃ vijānanalakkhaṇaṃ;  
Sabbhaṃ tamekato katvā, **viññāṇakkhandhatā** katā.
- 1202 Cattāro ca mahābhūtā, upādā catuvīsati;  
Aṭṭhavīsatidhā cetāṃ, rūpaṃ rūpanti gaṇhati.
- 1203 Ekāsītiyā cittena, saṃyuttā vedanādayo;  
Vedanāsaññāsaṅkhāra-viññāṇakkhandhasaññitā.
- 1204 Cattārorūpino khandhe, nāmaṃti parigaṇhati;  
Rūpakkhandho bhava rūpaṃ, nāmakkhandaṃ arūpino.
- 1205 Rūpanalakkhaṇaṃ rūpaṃ, nāmaṃ namanalakkhaṇaṃ;  
Iti saṅkhepato nāma-rūpaṃ so parigaṇhati.
- 1206 Phāleṃto viya tālassa, kandaṃ tu yamakaṃ dvidhā;  
Vavatthapeti nāmañca, rūpañcāti dvidhā pana.
- 1207 Nāmato rūpato añño,  
Satto vā puggalopi vā;  
Attā vā koci natthīti,  
Niṭṭhaṃ gacchati sabbadā.
- 1208 Evaṃ vavatthapetvā so, nāmarūpaṃ sabhāvato;  
Sattasammohaghātattaṃ, bahusuttavasenidha.
- 1209 Nāmarūpamattaññeva, natthi kocidha puggalo;  
Evamettha paṇḍito poso, vavatthapeti taṃ pana.
- Vuttaṃ hetāṃ –
- 1210 ‘Yathāpi aṅgasambhārā,  
Hoti saddo ratho iti;  
Evaṃ khandhesu santesu,  
Hoti sattoti sammutī’ ti.
- 1211 Yathāpi dāruyantampi, nijjīvañca nirīhakaṃ;

Dārurajjusamāyoge, taṃ gacchatipi tiṭṭhati.

**1212** Tathedaṃ nāmarūpampi, nijjīvañca nirīhakaṃ;  
Aññaṃaññasamāyoge, taṃ gacchatipi tiṭṭhati.

Tenāhu porāṇā –

**1213**: ‘Nāmañca rūpañca idhatthi saccato,  
Na hettha satto manujo ca vijjati;  
Suññaṃ idaṃ yantamivābhisaṅkhatam,  
Dukkassa puñjo tiṇakaṭṭhasādiso’ ti.

**1214** Aññaṃaññūpanissāya, daṇḍakesu ṭhitesu hi;  
Ekasmiṃ patamāne tu, tatheva patatītarō.

Tenāhu porāṇā –

**1215**: ‘Yamakaṃ nāmarūpañca, ubho aññoññanissitā;  
Ekasmiṃ bhijjamānasmiṃ, ubho bhijjanti paccayā’ ti.

**1216** Utinnaṃ nāmarūpānaṃ, nāmaṃ nittejamettha taṃ;  
Sakeneva hi tejena, na sakkoti pavattituṃ.

**1217** Na byāharati no seti, na tiṭṭhati na gacchati;  
Na bhedeti na coreti, na bhuñjati na khādati.

**1218** Tathā rūpampi nittejaṃ, vinā nāmañca sabbathā;  
Sakeneva hi tejena, na sakkoti pavattituṃ.

**1219** Bhuñjāmīti pivāmīti, khādāmīti tatheva ca;  
Rodāmīti hasāmīti, rūpassetaṃ na vijjati.

**1220** Nāmaṃ nissāya rūpaṃ tu, rūpaṃ nissāya nāmakaṃ;  
Pavattati sadā sabbam, pañcavokārabhūmiyaṃ.

**1221** Imassa pana atthassa, āvibhāvatthameva ca;  
Jaccandhapīṭhasappīnaṃ, vattabbā upamā idha.

**1222** Yathā hi nāvaṃ nissāya, manussā yanti aṇṇave;  
Evaṃ rūpampi nissāya, nāmakāyo pavattati.

**1223** Yathā manusse nissāya, nāvā gacchati aṇṇave;  
Evaṃ nāmampi nissāya, rūpakāyo pavattati.

**1224** Sattasaññaṃ vinodetvā, nāmarūpassa sabbathā;  
Yāthāvadassanaṃ etaṃ, “**diṭṭhisuddhī**” ti vuccati.

**1225** Parimuccitukāmo ca, dukkhato jātiādito;  
Antadvayaṃ vivajjetvā, bhāvaye pana paṇḍito.

**1226** Diṭṭhivisuddhimimaṃ parisuddhaṃ,  
Suṭṭhutamaṃ tu karoti naro yo;

Dit̥ṭhigatāni malāni asesam,  
Nāsamupenti hi tassa narassa.

Iti abhidhammāvatāre dit̥ṭhivissuddhiniddeso nāma

Aṭṭhārasamo paricchedo.

## 19. Ekūnavīsatimo paricchedo

### Kaṅkhāvitaraṇavisuddhiniddeso

- 1227 Etassa nāmarūpassa, jānitvā hetupaccaye;  
Kaṅkhā tīsu panaddhāsu, vitaritvā ṭhitam pana.
- 1228 Kaṅkhāvitaraṇam nāma, ñāṇam tam samudīritam;  
Tam sampādetukāmena, atthakāmena bhikkhunā.
- 1229 Nāmarūpassa ko hetu, konu vā paccayo bhavē;  
Āvajjitvā tamiccevam, rūpakāyassa tāvade.
- 1230 Kesā lomā nakhā dantā, taco maṃsam nahāru ca;  
Aṭṭhimiṅjaṅca vakkaṅca, hadayam yakanampi ca.
- 1231 Iccevamā dibattimsa-kotṭhāsapaccayassa hi;  
Parigaṇhāti kāyassa, manasā hetupaccaye.
- 1232 Avijjā taṇhupādānam, kammaṃ hetu catubbidho;  
Etassa rūpakāyassa, āhāro paccayo mato.
- 1233 Janako hetu akkhāto,  
Paccayo anupālako;  
Hetvaṅkurassa bījam tu,  
Paccayā pathavādayo.
- 1234 Iti me paṅca dhammā hi, hetupaccayatam gatā;  
Avijjādayo tayo tattha, mātāva upanissayā.
- 1235 Janakam pana kammaṃ tu, puttassa hi pitā viya;  
Dhātī viya kumārassa, āhāro dhārako bhavē.
- 1236 Iccevam rūpakāyassa, so paccayapariggaham;  
Katvā punapi “cakkhuṅca, rūpamālokameva ca.
- 1237 Paṭicca cakkhuvīññānam, hoti” iccevamādinā;  
Nayena nāmakāyassa, paccayam parigaṇhāti.
- 1238 So evam nāmarūpassa, vuttim disvāna paccayā;  
Yathā etarahidaṃ tu, atītepi tatthevidaṃ.
- 1239 Paccayā ca pavattittha, tathevānāgatepi ca;  
Pavattissati addhāsu, tīsvevam anupassati.



**1240** Tassevaṃ passato yā sā, pubbante pañcadhā tathā;  
Aparante siyā kaṅkhā, pañcadhā samudiritā.

**1241** Paccuppannepi addhāne, chabbidhā parikittitā;  
Sabbā cānavasesāva, yogino sā pahiyati.

**1242** Eko kammavipākānaṃ, vasenāpi ca paṇḍito;  
Etassa nāmarūpassa, paccayaṃ parigaṇhati.

**1243** Kammaṃ catubbidhaṃ diṭṭha-dhammavedaniyaṃ tathā;  
Upapajjāparāpariyā-hosikammavasā pana.

Tattha ekajavanavīthiyaṃ sattasu cittesu kusalā vā akusalā vā paṭhamajavanacetanā **diṭṭhadhammavedanīyakammaṃ** nāma. Taṃ imasmiṃyeva attabhāve vipākaṃ deti, tathā asakkontaṃ pana “ahosikammaṃ nāhosi kammavipāko, na bhavissati kammavipāko, natthi kammavipāko” ti imassa tikassa vasena ahosikammaṃ nāma hoti. Atthasādhikā pana sattamajavanacetanā **upapajjavedanīyakammaṃ** nāma. Tamanantare attabhāve vipākaṃ deti, tathā asakkontaṃ vuttanayena ahosikammaṃ nāma hoti. Ubhinnamantare pañcājanacetanā **aparāpariyavedanīyakammaṃ** nāma. Tamanāgate yadā okāsaṃ labhati, tadā vipākaṃ deti, sati saṃsārappavattiyā ahosikammaṃ nāma na hoti.

**1244** Aparaṃ catubbidhaṃ kammaṃ, garukaṃ bahulampi ca;  
Āsannañca kaṭattā ca, kammanti samudiritāṃ.

**1245** Aññaṃ catubbidhaṃ kammaṃ, janakaṃ upathambhakaṃ;  
Tathūpapīlakaṃ kamma-mupaghātakameva ca.

Tattha **janakaṃ** nāma kusalaṃ vā akusalaṃ vā kammaṃ paṭisandhiyampi pavattepi rūpārūpavipākakkhandhe janeti. **Upathambhakaṃ** pana vipākaṃ janetuṃ na sakkoti, aññaṃ kammena dinnāya paṭisandhiyā janite vipāke uppajjanakasukhadukkaṃ upathambheti, addhānaṃ pavatteti. **Upapīlakaṃ** pana aññaṃ kammena dinnāya paṭisandhiyā janite vipāke uppajjanakasukhadukkaṃ pīleti bādhati, addhānaṃ pavattituṃ na deti. **Upaghātakam** pana sayāṃ kusalampi akusalampi samānaṃ aññaṃ dubbalakammaṃ ghātetvā tassa vipākaṃ paṭibāhitvā attano vipākassa okāsaṃ karoti. Evaṃ pana kammena okāse kate taṃ vipākamuppannaṃ nāma hoti. Iti imaṃ dvādasavidhaṃ kammaṃ kammavaṭṭe pakkhipitvā evameko kammavipākavasena nāmarūpassa paccayapariggahaṃ karoti.

Iti evaṃ kammavipākavaṭṭavasena nāmarūpassa pavattiṃ disvā “yathā idaṃ etarahi, evamatītepi addhāne kammavipākavasena paccayato pavattittha, anāgatepi pavattissatī” ti iti kammañceva vipāko cāti kammavipākavasena loko pavattatīti taṃ samanupassati. Tassevaṃ samanupassato sabbā soḷasavidhā kaṅkhā pahiyati.

**1246** Hetuphalassa sambandhavaseneva pavattati;  
Kevalaṃ nāmarūpanti, sammā samanupassati.

**1247** Evaṃ kāraṇato uddhaṃ, kāraṇaṃ na ca passati;  
Pākapavattito uddhaṃ, na pākaṭivedakaṃ.

Tenāhu porāṇā –

**1248:** ‘Kammaṃ kāraṇaṃ natthi, vipākassa ca vedako;

Suddhadhammā pavattanti, evetaṃ sammadassanaṃ.

- 1249 Evaṃ kamme vipāke ca, vattamāne sahetuke;  
Bījarukkhādikānaṃva, pubbā koṭi na nāyati.
- 1250 Anāgatepi samsāre, appavatti na dissati;  
Etamatthamanaññāya, titthiyā asayaṃvasī.
- 1251 Sattasaññaṃ gahetvāna, sassatucchedadassino;  
Dvāsaṭṭhiditṭhiṃ gaṇhanti, aññaṃaññavirodhino.
- 1252 Ditṭhibandhanabaddhā te, taṇhāsotena vuyhare;  
Taṇhāsotena vuyhantā, na te dukkhā pamuccare.
- 1253 Evametam abhiññāya, bhikkhu buddhassa sāvako;  
Gambhīraṃ nipuṇaṃ suññaṃ, paccayaṃ paṭivijjhati.
- 1254 Kammaṃ natthi vipākamhi, pāko kamme na vijjati;  
Aññaṃaññaṃ ubho suñña, na ca kammaṃ vinā phalaṃ.
- 1255 Yathā na sūriye aggi, na maṇimhi na gomaye;  
Na tesam bahi so atthi, sambhārehi ca jāyati.
- 1256 Tathā na anto kammaṃ, vipāko upalabbhati;  
Bahiddhāpi na kammaṃ, na kammaṃ tattha vijjati.
- 1257 Phalena suññaṃ taṃ kammaṃ, phalaṃ kamme na vijjati;  
Kammañca kho upādāya, tato nibbattate phalaṃ.
- 1258 Na hettha devo brahmā vā,  
Saṃsārassatthi kāraṃ;  
Suddhadhammā pavattanti,  
Hetusambhārapaccayā''ti.
- 1259 Evaṃ nānappakārehi, nāmarūpassa paccayaṃ;  
Pariggahetvā addhāsu, taritvā kaṅkhamuṭṭhitaṃ.
- 1260 **Kaṅkhāvitaraṇaṃ** nāma, ñāṇaṃ taṃ samudīritaṃ;  
Dhammaṭṭhiti yathābhūtaṃ, taṃ sammādasanantipi.
- 1261 Iminā pana ñāṇena,  
Saṃyutto buddhasāsane;  
Hoti laddhapatiṭṭhova,  
Sotāpanno hi cūlako.
- 1262 Tasmā sapañño pana atthakāmo,  
Yo nāmarūpassa hetupaccayāni;  
Pariggahaṃ sādhu karoti dhīro,  
Khippaṃ sa nibbānapuraṃ upeti.

Iti abhidhammāvatāre kaṅkhāvitaraṇavisuddhiniddeso nāma

Ekūnavīsatiso paricchedo.

## 20. Vīsatiso paricchedo

### Maggāmaggañāṇadassanavisuddhiniddeso

- 1263 Kalāpasammasaneneva,  
Yogo karaṇiyo siyā;  
Maggāmagge tu ñāṇaṃ ta-  
Madhigantaṃ panichatā.
- 1264 Paccuppanna dhammassa, nibbatti udayo mato;  
Vayo vipariṇāmoti, tasseva samudhritā.
- 1265 Anupassanāpi ñāṇanti, varañāṇena desitaṃ;  
So panevaṃ pajānāti, yogāvacaramāṇavo.
- 1266 Imassa nāmarūpassa, pubbe uppattito pana;  
Nicayo rāsi vā natthi, tathā uppajjatopi ca.
- 1267 Rāsito nicayā vāpi, natthi āgamananti ca;  
Tathā nirujjhamānassa, na disāgamananti ca.
- 1268 Niruddhassāpi ekasmiṃ, tḥāne natthi cayoti ca;  
Ettha vīṇūpamā vuttā, etassatthassa dīpane.
- 1269 Udabbayamanakkāramevaṃ saṅkhepato pana;  
Kativā tasseva ñāṇassa, vibhaṅgassa vasena tu.
- 1270 ‘Avijjāsamudayā rūpasamudayo’ ti hi ādinā;  
Nayenekekakhandhassa, udayabbayadassane.
- 1271 Dasa dasāti katvāna, vuttā paññāsalakkhaṇā;  
Tesaṃ pana vasaṇāpi, dhamme samanupassati.
- 1272 Evaṃ rūpudayo hoti, evamassa vayo iti;  
Udeti evaṃ rūpampi, evaṃ rūpaṃ tu veti ca.
- 1273 Evaṃ paccayatopettha, khaṇato udayabbayaṃ;  
Passato sabbadhammā ca, pākaṭā honti tassa te.
- 1274 Udake daṇḍarājīva, āraggeriva sāsapo;  
Vijjupādāva dhammā te, parittaṭṭhāyino siyuṃ.
- 1275 Kadalīsūpinālātacakkamāyupamā ime;  
Asārā pana nissārā, hutvā khāyanti yogino.
- 1276 Evamettāvātā tena, udayabbayadassanaṃ;  
Lakkhaṇāni ca paññāsa, paṭivijjha tḥitaṃ pana.
- 1277 Ñāṇaṃ adhigataṃ hoti, taruṇaṃ paṭhamamā pana;

Yassa cādhigamā yogī, hotāraddhavipassako.

- 1278** Vipassanāya hetāya,  
Karunāyātha yogino;  
Vipassakassa jāyante,  
Upaklesā dasevime.
- 1279** Obhāso pīti passaddhi, ñāṇaṃ saddhā satī sukhaṃ;  
Upekkhā vīriyaṃ nikaṅṅīti, upaklesā dasevime.
- 1280** Sampattapaṭivedhassa, sotāpannādinopi ca;  
Tathā vipaṭṭipannassa, upaklesā na jāyare.
- 1281** Sammāva paṭipannassa, yuttayogassa bhikkhuno;  
Sadā vipassakasseva, uppajjanti kirassu te.
- 1282** Vipassanāya obhāso, **obhāsoti** pavuccati;  
Tasmiṃ pana samuppanne, yogāvacarabhikkhu so.
- 1283** Maggappatto phalappatto, ahamasmīti gaṇhāti;  
Amaggaṃyeva maggoti, tassevaṃ pana gaṇhato.
- 1284** Evaṃ vipassanāvīthi,  
Okkantā nāma hoti sā;  
Obhāsameva so bhikkhu,  
Assādentō nisīdati.
- 1285** Pīti vipassanāpīti, tassa tasmiṃ khaṇe pana;  
Tadā pañcavidhā pīti, jāyante khuddikādikā.
- 1286** Vipassanāya passaddhi, **passaddhīti** pavuccati;  
Yogino kāyacittāni, passaddhāneva honti hi.
- 1287** Lahūni ca mudūneva, kammaññāneva honti hi;  
Passaddhādīhi so bhikkhu, anuggahitamānaso.
- 1288** Amānusiṃ ratiṃ nāma,  
Anubhoti anuttaraṃ;  
Yaṃ sandhāya ca gāthāyo,  
Bhāsītā hi mahesinā.
- 1289** ‘‘Suññāgāraṃ paviṭṭhassa, santacittassa bhikkhuno;  
Amānusi rati hoti, sammā dhammaṃ vipassato.
- 1290** ‘‘Yato yato sammasati, khandhānaṃ udayabbayaṃ;  
Labhatī pītipāmojjaṃ, amataṃ taṃ vijānata’’nti.
- 1291** **Ñāṇādayo** upaklesā, ñeyyā vuttanayenidha;  
Ete dasa upaklesā, vajjanīyāva yoginā.
- 1292** Etthobhāsādayo dhammā,  
Upaklesassa vatthuto;

Upaklesāti niddiṭṭhā,  
Upaklesanikanti tu.

1293 Taṃ tamāvajjamānassa, bhāvanā parihāyati;  
Asatte sattasaññī ca, hoti appassuto naro.

1294 Sabbobhāsādayo dhamme, na maggoti vicārayaṃ;  
Maggo vipassanāñāṇaṃ, iccevaṃ pana paṇḍito.

1295 Vavatthapeti maggañca, amaggañceva cetasā;  
Tassa cevaṃ ayaṃ maggo, nāyaṃ maggoti yogino.

1296 Maggāmaggañca viññāya, ṭhitaññamidaṃ pana;  
**Maggāmaggesuññanti**, bhūriññena desitaṃ.

1297 Maggāmaggaññadassanesu kovidā,  
Sārāsāravedino samāhitāhitā;  
Maggāmaggaññadassananti taṃ idaṃ,  
Buddhā buddhasāvaka vādanti vādino.

Iti abhidhammāvatāre maggāmaggaññadassanavisuddhiniddeso

Nāma vīsatimo paricchedo.

## 21. Ekavīsatimo paricchedo

### Paṭipadāññadassanavisuddhiniddeso

1298 Aṭṭhaññavaseneva, sikhāpakkā vipassanā;  
Navamaṃ **paṭipadāññā-dassananti** pavuccati.

1299 Aṭṭha ñāṇāni nāmettha, veditabbāni viññunā;  
Upaklesavinimuttaṃ, ñāṇaṃ suvisadaṃ pana.

1300 Udayabbaye ca bhaṅge ca, bhaye ādīnave tathā;  
Nibbidāpassanāññāṇaṃ, ñāṇaṃ muccitukamyatā.

1301 Paṭisaṅkhā ca saṅkhāre, upekkhāññamaṭṭhamāṃ;  
Imāni aṭṭha ñāṇāni, navamaṃ saccānulomakaṃ.

1302 Saccānulomaññanti, anulomaṃ pavuccati;  
Taṃ sampādetukāmena, yogāvacarabhikkhunā.

1303 Udayabbayaññāṇaṃ taṃ, ādiṃ katvā panatṭhasu;  
Etesu pana ñāṇesu, yogo karaṇiyo pana.

1304 Yathānukkamato tassa, tesu ñāṇesu aṭṭhasu;  
Aniccādivaseneva, yogaṃ katvā ṭhitassa hi.

1305 Aniccaṃ dukkhamanattāti, saṅkhāre anupassato;  
Aṭṭhannaṃ pana ñāṇānaṃ, vasena pana yogino.

- 1306 Vipassanā sikhāpattā, hoti vuṭṭhānagāminī;  
Saccānulomaññaṇanti, ayameva pavuccati.
- 1307 Saṅkhārupekkhāññaṇaṃ taṃ, āsevantassa yogino;  
Idāni tassa maggo ca, samuppajjissatīti hi.
- 1308 Saṅkhārupekkhā saṅkhāre, aniccā dukkhāti vā tathā;  
Sammāsivā bhavaṅgaṃ tu, puna votarateva sā.
- 1309 Bhavaṅgānantaraṃ saṅkhāru-pekkhāgatanayena tu;  
Aniccādivaseneva, saṅkhāre pana gocaraṃ.
- 1310 Kurumānaṃ manodvāre, jāyatāvajjanaṃ tato;  
Bhavaṅgāvattaṇaṃ katvā, jātassānantaraṃ pana.
- 1311 Saṅkhāre gocaraṃ katvā, paṭhamaṃ javanamānaṃ;  
Uppajjatīti taṃ cittaṃ, **parikammanti** vuccati.
- 1312 Tadanantarevaññaṇaṃ, saṅkhārārammaṇaṃ puna;  
Dutiyaṃ javanaṃ hoti, **upacāraṇti** taṃ mataṃ.
- 1313 Tadanantaraṃ taṃ hoti, tathā saṅkhāragocaraṃ;  
Tatiyaṃ javanacittaṃ, **anulomanti** saññitaṃ.
- 1314 Purimānaṃ panaṭṭhannaṃ, ñāṇānaṃ anulomato;  
Bodhipakkhiyadhammānaṃ, uddhañca anulomato.
- 1315 Teneva taṃ hi saccānulomaññaṇaṃ pavuccati;  
Idaṃ hi pana saccānu-lomaññaṇaṃ mahesinā.
- 1316 ‘Vuṭṭhānagāminīyā hi, pariyosāna’nti bhāsitaṃ;  
Ñeyyaṃ sabbapakārena, pariyosānanti **gotrabhu**.
- 1317 Itinekehi nāmehi, kittitāyā mahesinā;  
Vuṭṭhānagāminī santā, parisuddhā vipassanā.
- 1318 Vuṭṭhātukāmo saṃsāradukkhapaṅkā mahabbhayā;  
Kareyya satataṃ tattha, yogaṃ paṇḍitajātiko.

Iti abhidhammāvātāre paṭipadāññaṇadassanavisuddhiniddeso nāma

Ekavīsatiso paricchedo.

## 22. Bāvīsatiso paricchedo

### Ñāṇadassanavisuddhiniddeso

- 1319 Ito paraṃ tu bhikkhussa, hoti gotrabhumānaṃ;  
Āvajjanīyathānattā, maggacittassa taṃ pana.
- 1320 Na cappaṭipadāññaṇa-dassanaṃ vā tattheva ca;

Ñānadassanasuddhiṃ vā, bhajate na kudācanaṃ.

**1321** Ubhinnamantarā etaṃ, abbohārikameva taṃ;  
Vipassanāya sotasmiṃ, patitattā vipassanā.

**1322** Pothujjanikagottaṃ vā, abhibhuyya pavattito;  
Gottaṃ vuccati nibbānaṃ, tato bhavati gotrabhu.

**1323** Ñānaṃ catūsu maggesu, **ñānadassanasuddhikaṃ**;  
Tattha taṃ paṭhamaṃ maggaṃ, sampādetuṃ panicchatā.

**1324** Aññaṃ kiñcīpi kātabbaṃ, bhikkhunā tena natthi taṃ;  
Yañhi tena ca kātabbaṃ, siyā taṃ katameva tu.

**1325** Anulomāvasānañhi, sūraṃ tikkhaṃ vipassanaṃ;  
Uppādentena taṃ sabbhaṃ, katameva ca yoginā.

**1326** Tassānulomañāṇassa, ante tu animittakaṃ;  
Visaṅkhāraṃ nirodhañca, nibbānaṃ amataṃ padaṃ.

**1327** Gocaraṃ kurumānaṃ taṃ, nibbānārammaṇe pana;  
Paṭhamāvajjanañceva, paṭhamābhogātāpi ca.

**1328** Maggassānantarādīhi, paccayehi panacchahi;  
Tassa paccayabhāvañca, sādhayantaṃ tato pana.

**1329** Vipassanāya muddhañhi, sikhāpattāya tāya taṃ;  
Uppajjati anāvattaṃ-rammaṇaṃ tassa gotrabhu.

**1330** Ekenāvajjaneneva, ekissāyeva vīthiyā;  
Nānārammaṇatā cānu-lomagotrabhucetasam.

**1331** Thatvā āvajjanaṭṭhāne, tamanāvajjanampi ca;  
Maggassa pana taṃ saññaṃ, datvā viya nirujjhati.

**1332** Maggopi tena taṃ dinnaṃ, amuñcivāva sañhitam;  
Taṃ ñāṇamanubandhanto, jāyate tadanantaram.

**1333** Kadācīpi anibbidhappubbaṃ maggo panesa hi;  
Lobhaṃ dosañca mohañca, viddhaṃsantova jāyati.

**1334** Na kevalamayaṃ maggo, dosanāsanameva ca;  
Karoti atha khopāyadvārānīpi pidheti ca.

**1335** Anāmataggasamāsāraṇaṃ dukkhamahodadhiṃ;  
Apāramatighorañca, soseti ca asesato.

**1336** Micchāmaggaṃ panaṭṭhaṅgaṃ, jāyamāno ca ujjiḥhati;  
Sabbaverabhayānettha, niccaṃ vūpasameti ca.

**1337** Buddhassorasaputtattaṃ, upaneti nayaṃ pana;  
Ānisaṃse anekepi, pavattayati yogino.

1338Dāyakenānisamsānaṃ, anekesamanena ca;  
Ādimaggena saṃyuttaṃ, ñāṇanti **ñāṇadassanaṃ**.

Paṭhamamaggañāṇaṃ.

1339Tassevānantaraṃ tassa, vipākā dvepi tīṇi vā;  
Phalacittāni jāyante, na jāyante tato paraṃ.

1340Keci ekañca dve tīṇi, cattārīti vadanti tu;  
Na panetaṃ gahetabbaṃ, ajānitvā vadanti te.

1341Ekassāsevanaṃ natthi, tasmā dve anulomakā;  
Tehi āsevanaṃ laddhā, tatiyaṃ hoti gotrabhu.

1342Catutthaṃ maggacittaṃ tu,  
Tasmā tīṇi phalāni hi;  
Anulomā tayo honti,  
Catutthaṃ hoti gotrabhu.

1343Pañcamaṃ maggacittañca, phalāni dve tato pana;  
Sattacittaparamāva, ekāvajjanavīthi hi.

1344Ettāvatā paneso hi, **sotāpannoti** vuccati;  
Phalassa pariyosāne, bhavaṅgottaraṇaṃ siyā.

1345Tato bhavaṅgaṃ chinditvā, maggapekkhanahetukaṃ;  
Uppajjati manodvāre, āvajjanamano pana.

1346Tasmiṃ niruddhe maggassa, paccavekkhaṇasaññitā;  
Javanāni hi jāyante, satteva paṭipāṭiyā.

1347Eseva ca nayo ñeyyo, phalādīnampi pekkhane;  
Paccavekkhaṇaññāni, bhavantekūnavīsati.

1348Maggo phalaṃ pahīnā ca, kilesā avasiṭṭhakā;  
Nibbānañceti pañcete, paccavekkhaṇabhūmiyo.

1349Evaṃ so paccavekkhitvā, sotāpannopapattiyā;  
Yogamārabhate dhīro, dutiyāya ca bhūmiyā.

1350Khandhapañcakasāṅkhātāṃ, taṃ saṅkhāragataṃ puna;  
Aniccaṃ dukkhamanattāti, ñāṇena parimajjati.

1351Tato vipassanāvīthi-mogāhati ca tāvade;  
Tassevaṃ paṭipannassa, hetṭhā vuttanayena tu.

1352Tato saṅkhārupekkhāya, avasāne tatheva ca;  
Ekāvajjanavārasmiṃ, gotrabhussa anantaraṃ.

1353Byāpādakāmarāgānaṃ, tanubhāvaṃ tu sādhaṃ;  
**Sakadāgāmimaggo**yaṃ, jāyate dutiyo pana.



## Dutiyamaggañāṇaṃ.

- 1354|massāpi ca ñāṇassa, heṭṭhā vuttanayenidha;  
Phalacittāni ñeyyāni, viññunā dvepi tīṇi vā.
- 1355Ettāvatā paneso hi, **sakadāgāmi** nāmayam;  
Sakideva imaṃ lokam, āgantvāntakaro bhava.
- 1356Heṭṭhā vuttanayeneva, pañcadhā paccavekkhaṇam;  
Evaṃ so paccavekkhitvā, sakadāgāmipattiyā.
- 1357Yogamārabhate dhīro, tatiyāya ca bhūmiyā;  
Byāpādakāmarāgānaṃ, pahānāya ca paṇḍito.
- 1358Khandhapañcakasaṅkhātāṃ, taṃ saṅkhāragataṃ pana;  
Aniccaṃ dukkhamanattāti, ñāṇena parimajjati.
- 1359Tato vipassanāvīthi-mogāhati ca tāvade;  
Tassevaṃ paṭipannassa, heṭṭhā vuttanayena tu.
- 1360Tato saṅkhārupekkhāya, avasāne tatheva ca;  
Ekāvajjanavīthimhi, gotrabhussa anantaram.
- 1361Byāpādakāmarāgānaṃ, mūlaghātāṃ tu sādhaṃ;  
Tassānāgāmiaggoyam, jāyate tatiyo pana.

## Tatiyamaggañāṇaṃ.

- 1362|massāpi ca ñāṇassa, heṭṭhā vuttanayenidha;  
Pavattī phalacittānaṃ, veditabbā vibhāvinā.
- 1363Ettāvatā panesopi, hotināgāmi nāmayam;  
Tattheva parinibbāyī, anāvattisabhāvato.
- 1364Heṭṭhā vuttanayeneva, pañcadhā paccavekkhaṇam;  
Evaṃ so paccavekkhitvā, **anāgāmi**riyasāvako.
- 1365Yogamārabhate dhīro, catutthāya ca bhūmiyā;  
Pattiyārūparāgādi-pahānāya ca paṇḍito.
- 1366Tatheva saṅkhāragataṃ, aniccādivasena so;  
Parivattati ñāṇena, tatheva parimajjati.
- 1367Tato vipassanāvīthi-mogāhati ca tāvade;  
Tassevaṃ paṭipannassa, heṭṭhā vuttanayena tu.
- 1368Tato saṅkhārupekkhāya, avasāne tatheva ca;  
Ekāvajjanavārasmiṃ, gotrabhussa anantaram.
- 1369Tassārahattamaggoyam,  
Jāyate tu tato param;  
Rūparāgādidosānaṃ,

Viddhaṃsāya karo pana.

Catutthamaggañāṇaṃ.

**1370**Imassāpi ca ñāṇassa, heṭṭhā vuttanayenidha;  
Pavatti phalacittānaṃ, veditabbā vibhāvinā.

**1371**Ettāvatā paneso hi,  
**Arahā** nāma aṭṭhamo;  
Ariyo puggalo hoti,  
Mahākhīṇāsavo ayaṃ.

**1372**Anuppattasadattho ca,  
Khīṇasaṃyojano muni;  
Sadevakassa lokassa,  
Dakkhiṇeyyo anuttaro.

**1373**Ettāvatā catassopi, **ñāṇadassanasuddhiyo**;  
Hitatthāya ca bhikkhūnaṃ, saṅkhepeneva dassitā.

**1374**Saddhena sammā pana bhāvanīyā,  
Ariyāya paññāya ca bhāvanāya;  
Visuddhikāmena tapodhanena,  
Bhavakkhayaṃ patthayatā budhena.

Iti abhidhammāvatāre ñāṇadassanavisuddhiniddeso nāma

Bāvīsatiso paricchedo.

## 23. Tevīsatiso paricchedo

### Kilesappahānakathā

**1375**Etesu yena ye dhammā, pahātabbā bhavanti hi;  
Tesaṃ dāni karissāmi, pakāsanamito paraṃ.

Imesu pana catūsu maggañāṇesu ye dhammā yena ñāṇena pahātabbā, tesaṃ pahānamevaṃ veditabbaṃ. Etāni hi yathāyogaṃ saṃyojanakilesamicchattalokadhammamacchariyavipallāsaganthāgatiāsava-oghayoganīvaraṇaparāmāsaupādānānusayamalaakusalakammapatha- akusalacittuppādasāṅkhātānaṃ pahānakarāni.

Tattha **saṃyojanānī**ti dasa saṃyojanāni. Seyyathidaṃ – rūparāgārūparāgamānauddhaccāvijjāti ime pañca uddhambhāgiyasamyojanāni nāma. Sakkāyadiṭṭhi vicikicchā sīlabbataparāmāso kāmarāgo paṭighoti ime pañca adhobhāgiyasamyojanāni nāma.

**Kilesā**ti dasa kilesā. Seyyathidaṃ – lobho doso moho māno diṭṭhi vicikicchā thinaṃ uddhaccaṃ ahirikaṃ anottappanti.

**Micchattā**ti dasa micchattā. Seyyathidaṃ – micchādiṭṭhi micchāsāṅkappo micchāvācā

micchākammanto micchāājīvo micchāvāyāmo micchāsati micchāsamādhi micchāñāṇaṃ micchāvimuttīti.

**Lokadhammāti** aṭṭha lokadhammā lābho alābho yaso ayaso nindā pasamsā sukhaṃ dukkhanti. Idha pana kāraṇūpacārena lābhādivatthukassa anunayassa, alābhādivatthukassa paṭighassa cetam lokadhammagahaṇena gahaṇaṃ katanti veditabbaṃ.

**Macchariyānīti** pañca macchariyāni āvāsamacchariyaṃ kulamacchariyaṃ lābhamacchariyaṃ dhammacchariyaṃ vaṇṇamacchariyanti. Imāni āvāsādīsu aññesaṃ sādharmaṇabhāvaṃ asahanākārena pavattāni macchariyāni.

**Vipallāsāti** aniccadukkhaanattaasubhesuyeva vatthūsu ‘‘niccaṃ sukhaṃ attā subha’’nti evaṃ pavattā saññāvipallāso cittavipallāso diṭṭhivipallāsoṭi ime tayo vipallāsā.

**Ganthāti** cattāro ganthā abhijjhākāyagantho, byāpādo, sīlabbataparāmāso, idaṃsaccābhiniveso kāyaganthoṭi.

**Agatīti** chandadosamohabhayāni. **Āsavāti** cattāro āsavā – kāmarāgabhavarāgamicchādīṭṭhiavijjāsavoti. **Oghayogānīti** tesamevādhivacanaṃ. **Nīvaraṇānīti** kāmacchandādayo. **Parāmāsoṭi** micchādīṭṭhiyā adhvācānaṃ.

**Upādānāti** cattāri upādānāni kāmuṇpādānādīnīti. **Anusayāti** satta anusayā kāmarāgānusayo paṭighamānadiṭṭhivicikicchābhavarāgāvijjānusayoti. **Malāti** tayo malā – lobho doso mohoti.

**Akusalakammāpathāti** dasa akusalakammāpathā. Seyyathidaṃ – pāṇātipāto adinnādānaṃ kāmesumicchācāro musāvādo piṣuṇavācā pharusavācā samphappalāpo abhijjhā byāpādo micchādīṭṭhīti dasa.

**Akusalacittuppādāti** lobhamūlāni aṭṭha, dosamūlāni dve, mohamūlāni dveti ime dvādasāti.

Etesaṃ saṃyojanādīnaṃ etāni yathāsambhavaṃ pahānakaṛāni. Kathaṃ? **Samyojanesu** tāva sakkāyādiṭṭhivicikicchāsīlabbataparāmāsā apāyagamanīyā kāmarāgapaṭighāti ete paṭhamamaggañāṇavajjhā, sesā kāmarāgapaṭighā oḷārikā dutiyamaggañāṇavajjhā, sukhumā tatiyamaggañāṇavajjhā, rūparāgādayo pañcapi catutthamaggañāṇavajjhā eva.

**Kilesesu** diṭṭhivicikicchā paṭhamamaggañāṇavajjhā, doso tatiyamaggañāṇavajjho, lobhamohamānathinauddhaccaahirikānottappāni catutthamaggañāṇavajjhāni.

**Micchattesu** micchādīṭṭhi musāvādo micchākammanto micchāājīvoti ime paṭhamamaggañāṇavajjhā, micchāsaṅkappo piṣuṇavācā pharusavācāti ime tatiyamaggañāṇavajjhā, cetanāyeva cetha micchāvācāti veditabbā, samphappalāpamicchāvāyāmasatisamādhivimuttīñāṇāni catutthamaggañāṇavajjhāni.

**Lokadhammesu** paṭigho tatiyamaggañāṇavajjho, anunayo catutthamaggañāṇavajjho, yase pasamsāya ca anunayo catutthamaggañāṇavajjhoti eke.

**Macchariyāni** paṭhamamaggañāṇavajjhāni eva.

**Vipallāsesu** pana anicce niccaṃ, anattani attāti ca saññācittadiṭṭhivipallāsā, dukkhe sukhaṃ, asubhe subhanti diṭṭhivipallāso cāti ime paṭhamamaggañāṇavajjhā, asubhe subhanti saññācittavipallāsā

tatiyamaggañāṇavajjhā, dukkhe sukhanti catutthamaggañāṇavajjhā.

**Ganthesu** sīlabbataparāmāsaidamsaccābhinivesakāyaganthā paṭhamamaggañāṇavajjhā, byāpādakāyagantho tatiyamaggañāṇavajjho, abhijjhākāyagantho catutthamaggañāṇavajjhova.

**Agatiyo** paṭhamamaggañāṇavajjhā.

**Āsavesu** diṭṭhāsavo paṭhamañāṇavajjho, kāmāsavo tatiyañāṇavajjho, itare dve catutthañāṇavajjhā. **Oghayogesupi** eseva nayo.

**Nīvaraṇesu** vicikicchānīvaraṇaṃ paṭhamañāṇavajjhaṃ, kāmacchando byāpādo kukkucanti tīṇi tatiyañāṇavajjhāni, thinamiddhaudhaccāni catutthañāṇavajjhāni.

**Parāmāso** paṭhamañāṇavajjho.

**Upādānesu** sabbesampi lokiyadhammānaṃ vatthukāmasena ‘‘kāmā’’ti āgatattā rūpārūpesu rāgopi kāmupādāne patati, tasmā tañca kāmupādānaṃ catutthañāṇavajjhaṃ, sesāni paṭhamañāṇavajjhāni.

**Anusayesu** diṭṭhivicikicchānusayā paṭhamañāṇavajjhā, kāmarāgapaṭighānusayā tatiyañāṇavajjhā, mānabhavarāgāvijjānusayā catutthañāṇavajjhā.

**Malesu** dosamalaṃ tatiyañāṇavajjhaṃ, itarāni catutthañāṇavajjhāneva.

**Akusalakammapathesu** pāṇātipāto adinnādānaṃ micchācāro musāvādo micchādiṭṭhīti ime paṭhamañāṇavajjhā, piṣuṇavācā pharusavācā byāpādoti tatiyañāṇavajjhā, samphappalāpo abhijjhā catutthañāṇavajjhāva.

**Akusalacittuppādesu** cattāro diṭṭhigatacittuppādā, vicikicchāsampayutto cāti pañca paṭhamañāṇavajjhā, dve paṭighasampayuttā tatiyañāṇavajjhā, sesā catutthañāṇavajjhāti.

Yañca yena vajjhaṃ, taṃ tena pahātabbaṃ nāma. Tena vuttaṃ ‘‘etesaṃ saṃyojanādīnaṃ dhammānaṃ etāni yathāyogaṃ pahānakaṛāni’’ti.

**1376**Etesu ñāṇesu ca yena yena,  
Yo yo hi dhammo samupeti ghātaṃ;  
So so asesena ca tena tena,  
Sandassito sādhu mayā panevaṃ.

Kilesapahānakkamakathāyaṃ.

**1377**Pariññādīni kiccāni, yāni vuttāni satthunā;  
Saccābhisamaye tāni, pavakkhāmi ito paraṃ.

**1378**Ekekassa panetesu,  
Ñāṇassekakkhaṇe siyā;  
Pariññā ca pahānañca,  
Sacchikiriyā ca bhāvanā.

**1379**Pariññādīni etāni, kiccānekakkhaṇe pana;  
Yathāsabhāvato tāni, jānitabbāni viññunā.

**1380** Padīpo hi yathā loke, apubbācarimaṃ idha;  
Cattāri pana kiccāni, karotekakkhaṇe pana.

**1381** Ālokañca vīdaṃseti, nāseti timirampi ca;  
Pariyādiyati telañca, vaṭṭiṃ jhāpeti ekato.

**1382** Evaṃ taṃ maggañāṇampi, apubbācarimaṃ pana;  
Cattāripi ca kiccāni, karotekakkhaṇe pana.

**1383** Pariññābhisamayeneva, dukkhaṃ abhisameti so;  
Pahānābhisamayeneva, tathā samudayampi ca.

**1384** Bhāvanāvidhināyeva, maggaṃ abhisameti taṃ;  
Āramaṇakriyāyeva, nirodhaṃ sacchikaroti so.

Vuttampi cetam “maggasamaṅgissa ñāṇaṃ dukkhepetam ñāṇaṃ, dukkhasamudayepetaṃ ñāṇaṃ, dukkhanirodhepetam ñāṇaṃ, dukkhanirodhagāminiyā paṭipadāyapetaṃ ñāṇa”nti. Tattha yathā padīpo vaṭṭiṃ jhāpeti, evaṃ maggañāṇaṃ dukkhaṃ parijānāti. Yathā andhakāraṃ nāseti, evaṃ samudayaṃ pajahati. Yathā ālokaṃ vīdaṃseti, evaṃ sahaṃjātādipaccayatāya sammāsaṅkappādimaggaṃ bhāveti. Yathā telaṃ pariyaḍiyati, evaṃ kilesapariyādānena nirodhaṃ sacchikarotīti veditabbaṃ.

**1385** Uggacchanto yathādicco, apubbācarimaṃ pana;  
Cattāri pana kiccāni, karotekakkhaṇe idha.

**1386** Obhāseti ca rūpāni, nāseti timirampi ca;  
Ālokañca vīdaṃseti, sītañca paṭihaññati.

**1387** Yathā ca mahatī nāvā, apubbācarimaṃ pana;  
Cattāri pana kiccāni, karotekakkhaṇe pana.

**1388** Jahatī orimaṃ tīraṃ, sotaṃ chindati sā pana;  
Tathā vahati bhaṇḍañca, tīramappeti pārimaṃ.

**1389** Nāvāyorimatīrassa, yathā pajahanaṃ pana;  
Tatheva maggañāṇassa, dukkhassa parijānanaṃ.

**1390** Yathā chindati taṃ sotaṃ, taṇhaṃ jahati taṃ tathā;  
Yathā vahati taṃ bhaṇḍaṃ, sahaṃjātādinā pana.

**1391** Tatheva paccayattena, maggaṃ bhāveti nāma so;  
Yathā pāraṃ pana evaṃ, nirodhārammaṇaṃ bhava.

**1392** Lokuttarena niddiṭṭhā, yā lokuttarabhāvanā;  
Sā saṅkhepanayenevaṃ, mayā sādhu pakāsītā.

**1393** Ko hi nāma naro loke,  
Lokuttarasukhāvahaṃ;  
Bhāvanaṃ pana paññāya,  
Na ca bhāveyya paṇḍito.

**1394** Imam vīditvā hitabhāvanaṃ vanam,  
Upeti yo ve sukhasaṃhitam hitam;

Vidhūya cittassa anuttamaṃ tamaṃ,  
Upeti cāviggahakampadaṃ padaṃ.

Iti abhidhammāvatāre ñāṇadassanavisuddhiniddeso nāma

Tevīsatimo paricchedo.

## 24. Catuvīsatimo paricchedo

### Paccayaniddeso

**1395** Yesaṃ paccayadhammānaṃ, vasā sappaccayā ime;  
Dhammā te paccaye cāhaṃ, dassayissāmito paraṃ.

Katame paccayāti? Vuccate – hetārammaṇādhīpatīanantarāsamanantarāsahajāta-  
aññamaññānissayūpanissayapurejātapacchājātāsevanakammavipākāhārindriya-  
jhānamaggasampayuttavippayuttaatthinatthivigatāvigatavasena catuvīsatividhā honti.

Tattha **hetupaccayoti** lobho doso moho alobho adoso amohoti ime cha dhammā hetupaccayā.  
**Ārammaṇapaccayoti** sabbalokiyalokuttaraṃ yaṃ yaṃ dhammaṃ ārabha ye ye dhammā uppajjanti  
cittacetāsikā dhammā, te te dhammā tesam tesam dhammānaṃ ārammaṇapaccayena paccayo.

**Adhipatipaccayoti** ettha sahajātādhīpatīārammaṇādhīpativasena duvidho. Tattha sahajātādhīpati  
chandacittavīriyavīmaṃsāvasena catubbidho, ārammaṇādhīpati pana  
domanassavicikicchuddhaccakiriyābyākātākusalavipāke ca anīṭṭhasammatañca rūpaṃ ṭhapetvā  
avasesaṃ. **Anantarapaccayoti** anantaraniruddhā cittacetāsikā dhammā. Tathā **samanantarapaccayopi**.

**Sahajātapaccayoti** cittacetāsikā, mahābhūtā ceva hadayavatthu ca. Tathā **aññamaññapaccayopi**.  
**Nissayapaccayoti** vatthurūpāni ceva mahābhūtā, cittacetāsikā ca. **Upanissayapaccayoti**  
ārammaṇānantarapakatūpanissayavasena tividho. Tattha ārammaṇūpanissayo ārammaṇādhīpatiyeva,  
anantarūpanissayo pana anantarapaccayova, pakatūpanissayo pana  
kāyikasukhadukkhautubhojanasenāsanapuggalā saddhāsīlasutacāgapaññārāgadosamohādayo ca.

**Purejātapaccayoti** vatthārammaṇavasena duvidho. Tattha vatthupurejāto nāma vatthurūpāni,  
ārammaṇapurejāto nāma paccuppannarūpādīneva. **Pacchājātapaccayoti** cittacetāsikā ca.  
**Āsevanapaccayoti** ṭhapetvā āvajjanadvayaṃ lokiyakusalākusalakiriyābyākatā dhammāva.

**Kammapaccayoti** sahajātānānakkhaṇīkavasena duvidho. Tattha sahajātā lokiyalokuttarā eva,  
nānakkhaṇīkā pana sāsavakusalākusalacetanā, anāsavakusalacetanā anantameva attano vipākassa  
paccayo hoti. **Vipākapaccayoti** vipākacittacetāsikā. **Āhārapaccayoti**  
kabalīkārahārapphassacetanāvīññāvasena catubbidho.

**Indriyapaccayoti** rūpasattakamanajīvitasukhadukkhāsomanassadomanassaupekkhāsaddhāvīriya-  
satisamādhīpaññānaññātāññāssāmītiindriyaaññindriyaaññātāvīndriyāññīti vīsatiindriyāni, tesu  
itthindriyapurisindriyāni vajjetvā vīsatiindriyāni honti. **Jhānapaccayoti**  
vitakkavicārapītisukhacittakaggatāvasena pañcavidho. **Maggapaccayoti**  
diṭṭhisānkappavāyāmasatisamādhivācākammantājīvamicchādiṭṭhivasena navavidho.

**Sampayuttapaccayoti** cittacetāsikāva. **Vippayuttapaccayoti** vatthupurejātāni ceva pacchājātā  
cittacetāsikā ca. **Atthipaccayoti** jīvitindriyakabalīkārahārahārammaṇapurejātāni ceva nissayapaccaye

vuttadhammāpi ca. **Natthipaccayo**ti anantarapaccayo va. Tathā **vigatapaccayo** ca. **Avigatapaccayo**ti atthipaccayo va. Evamime catuvīsati paccayā nāma.

Ettha pana katihākārehi **rūpaṃ rūpassa** paccayo hotīti? Yathārahaṃ saha jātāañña māñña nissayā hārindriyaatthiavigatavasena sattadhā paccayo hoti.

**Rūpaṃ arūpassa** yathārahaṃ ārammaṇādhipatisaha jātāañña māñña nissayūpanissayapurejātindriyavippa- yuttaatthiavigatavasena ekādasahi ākārehi paccayo hoti.

**Rūpaṃ rūpārūpassā**ti natthi.

**1396**Sattadhā rūpaṃ rūpassa, bhavatekādasahi taṃ;  
Paccayo nāmadhammassa, missakassa na kiñci tu.

**Arūpaṃ arūpassa** yathārahaṃ hetārammaṇādhipatīanantarāsamanantarāsaha jātāañña māñña nissayūpanissayā- sevanakammavipākā hārindriyājhānamaggasampayuttaatthiavigatā- vasena ekavīsati dhā paccayo hoti.

**Arūpaṃ rūpassa** yathārahaṃ hetādhipatisaha jātāañña māñña nissayapacchājātakammavipākā hārindriya- jhānamaggavippayuttaatthiavigatavasena pannarasadhā paccayo hoti.

**Arūpaṃ rūpārūpassa** yathārahaṃ hetādhipatisaha jātāañña māñña nissayakammavipākā hārindriyājhānamagga- atthiavigatavasena terasadhā paccayo hoti.

**1397**Ekavīsati dhā nāmaṃ, paccayo bhavatattano;  
Tīpañcahi taṃ rūpassa, ubhinnaṃ terasadhā pana.

**Rūpārūpaṃ rūpassa** yathārahaṃ saha jātānissayaatthiavigatavasena catudhā paccayo hoti.

**Rūpārūpaṃ arūpassa** yathārahaṃ saha jātāañña māñña nissayindriyaatthiavigatavasena chadhā paccayo hoti.

**Rūpārūpaṃ rūpassā**ti natthi.

**1398**Ubho pi rūpadhammassa, catudhā honti paccayā;  
Chabbidhā nāmadhammassa, missakassa na kiñci tu.

Etesu pana paccayesu kati rūpā, kati arūpā, katimissakāti? Purejātapaccayo eko **rūpadhammo** va, hetuanantarāsamanantarapacchājātāsevanakammavipākājhānamaggasampayuttanatthi- vigatānaṃ vasena dvādasa paccayā **arūpadhammā** va, sesā pana ekādasa paccayā **rūpārūpamissakā**ti veditabbā.

Puna kālavasena hetusaha jātāañña māñña nissayapurejātapacchājātavipākā hārindriyājhānamagga- sampayuttavippayuttaatthiavigatānaṃ vasena pannarasa paccayā **paccuppannā** va honti. Anantarāsamanantarāsevananatthiavigatapaccayā **atītā** va, kammapaccayo **atīto** vā hoti **paccuppanno** vā, ārammaṇādhipatiupanissayapaccayā pana **tikālikā** honti **kālavinimuttā** ca.

**1399**Paccuppannāva hontettha,  
 Paccayā dasa pañca ca;  
 Atītā eva pañceko,  
 Dvekālikova dassito;  
 Tayo tikālikā ceva,  
 Vinimuttāpi kālato.

Sabbe panime catuvīsati paccayā yathārahaṃ ārammaṇūpanissayakammaatthipaccayānaṃ vasena  
 catūsu paccayesu saṅghaṃ gacchantīti veditabbā.

Iti abhidhammāvatāre paccayaniddeso nāma

Catuvīsatimo paricchedo.

### Nigamanakathā

**1400**Abhidhammāvatāroyaṃ, varo paramagambhīro;  
 Icchatā nipuṇaṃ buddhiṃ, bhikkhunā pana sotabbo.

**1401**Sumatimativicārabodhano,  
 Vimativimohavināsano ayaṃ;  
 Kumatimatimahātamonāso,  
 Paṭumatibhāsakaro mato mayā.

**1402**Yato **sumatinā** mato nāmato,  
 Āyācitasammānato mānato;  
 Tato hi racito sadā tosadā,  
 Mayā hitavibhāvanā bhāvanā.

**1403**Atthato ganthato cāpi, yuttito cāpi ettha ca;  
 Ayuttaṃ vā viruddhaṃ vā, yadi dissati kiñcipi.

**1404**Pubbāparaṃ viloktvā, vicāretvā punappunaṃ;  
 Dhīmatā saṅghetabbaṃ, gahetabbaṃ na dosato.

**1405**Tividhā byappathānañhi, gatiyo dubbidhāpi ce;  
 Tasmā upaparikkhitvā, veditabbaṃ vibhāvinā.

**1406**Nikāyantaraladdhīhi, asammisso anākulo;  
 Mahāvihāravāsīnaṃ, vācanāmagganissito.

**1407**Madhurakkharasaṃyutto, attho yasmā pakāsito;  
 Tasmā hitatthakāmena, kātabbo ettha ādaro.

**1408**Saddhammaṭṭhitikāmena, karontena ca yaṃ mayā;  
 Puññamadhigataṃ tena, sukhaṃ pappontu pāṇino.

**1409**Antarāyaṃ vinā cāyaṃ, yathāsiddhimupāgato;  
 Tathā kalyāṇasaṅkappā, siddhiṃ gacchantu pāṇinaṃ.

**1410**Naranārigaṇākiṇṇe, asaṃkiṇṇakulākule;



Phīte sabbaṅgasampanne, supasannasitodake.

1411 Nānāratanasampunṇe, vividhāpaṇasaṅkaṭṭe;  
Kāverapaṭṭane ramme, nānārāmopasobhite.

1412 Kelāsasikharākārapāsādapaṭimaṇḍite;  
Kārite kaṇhadāseṇa, dassanīye manorame.

1413 Vihāre vividhākāracārupākāragopure;  
Tattha pācīnapāsāde, mayā nivasatā sadā.

1414 Asallekhamasākhalye, sīlādiguṇasobhinā;  
Ayaṃ sumatinā sādhu, yācitenā kato satā.

1415 Devā kālena vassantu, vassaṃ vassavalāhakā;  
Pālayantu mahīpālā, dhammato sakalaṃ mahiṃ.

1416 Yāva tiṭṭhati lokasmiṃ, himavā pabbatuttamo;  
Tāva tiṭṭhatu saddhammo, dhammarājassa satthunoti.

Uragapurānivasanena ācariyena bhadantabuddhadattena sīlacārasampannena kato  
abhidhammāvatāro nāmāyaṃ.

Abhidhammāvatāro niṭṭhito.

Namo tassa bhagavato arahato sammāsambuddhassa

## Nāmarūpaparicchedo

### Ganthārambhakathā

1. Sammā sammābhisambuddhaṃ, dhammaṃ dhammappakāsaṇaṃ;  
Saṃghaṃ saṃghuttamaṃ loke, vanditvā vandanārahaṃ.
2. Nāmarūpaparicchedaṃ, pavakkhāmi samāsato;  
Mahāvihāravāsīnaṃ, vaṇṇanāyananissitaṃ.

## 1. Paṭhamo paricchedo

### Nāmattayavibhāgo

3. Tattha cittaṃ cetasikaṃ, nibbānanti mataṃ tidhā;  
Nāmaṃ rūpaṃ tu duvidhaṃ, bhūtopādāyabhedato.
4. Kāmabhūmadibhedena, tattha cittaṃ catubbidhaṃ;  
Cetoyuttā dvipaṇṇāsa, dhammā cetasikā matā.
5. Cakkhusotaghānājivhā-kāyaviññāṇadhātuyo;  
Sampaṭicchana cittaṅca, tathā santīraṇadvayaṃ.

6. Somanassasahagataṃ, upekkhāsahitanti ca;  
Iccāhetukacittāni, puññapākāni aṭṭhadhā.
7. Somanassayutaṃ tatha, hitvā santīraṇaṃ tathā;  
Sattākusalapākāni, tānevāti viniddise.
8. Pañcadvāraṇodvārāvajjanaṃ hasananti ca;  
Kriyacittamudīritaṃ, tividhampi ahetukaṃ.
9. Evaṃ aṭṭhārasavidhaṃ, mānaṃ hotihetukaṃ;  
Mūlabhedenākusalaṃ, cittaṃ tu tividhaṃ mataṃ.
10. Somanassasahagataṃ, upekkhāsahitaṃ tathā;  
Diṭṭhigatasampayuttaṃ, vippayuttanti bheditaṃ.
11. Asaṅkhāraṃ asaṅkhāramiti bhinnaṃ panaṭṭhadhā;  
Lobhamūlaṃ pakāseṇti, tatthākusalamānaṃ.
12. Domanassasahagataṃ, paṭighena samāyutaṃ;  
Dosamūlamasaṅkhāraṃ, asaṅkhārantipi dvidhā.
13. Vicikicchāsahagataṃ, uddhaccasahitanti ca;  
Mohamūlaṅca duvidhaṃ, upekkhāya samāyutaṃ.
14. Dvādasākusalānevaṃ, cittānīti vibhāvaye;  
Hitvāhetukapāpāni, sobhanāni tato paraṃ.
15. Somanassasahagataṃ, upekkhāsahitaṃ tathā;  
Dvidhā ñāṇena saṃyuttaṃ, vippayuttanti bheditaṃ.
16. Asaṅkhāraṃ asaṅkhāramiti bhinnaṃ panaṭṭhadhā;  
Sahetukāmāvacara-puññapākakriyā bhava.
17. Kāme tevīsa pākāni, puññāpuññāni vīsati;  
Ekādasa kriyā ceti, catupaññāsa sabbathā.
18. Takkacārapītisukhekaggatāsahitaṃ pana;  
Paṭhamajjhānakusalaṃ, vipākaṅca kriyā tathā.
19. Dutiyāṃ takkato hīnaṃ, tatiyaṃ tu vicārato;  
Catutthaṃ pītito hīnaṃ, upekkhekaggatāyutaṃ.
20. Pañcamaṃ pañcadasadhā, rūpāvacaramīritaṃ;  
Pañcamajjhānamevekamārūpāvacaraṃ pana.
21. Ākāsaṅcāyatanaṃ, puññapākakriyā tathā;  
Viññāṅcāyatanaṅca, ākiñcaññāyatanaṃ;  
Nevaṣaṅñāsaññāyatanaṃ dvādasadhā bhava.
22. Sotāpattimaggacittaṃ, phalacittaṃ tathāparaṃ;  
Sakadāgāmānāgāmi, arahattanti aṭṭhadhā.

23. Jhānaṅgayogabhedena, katvekekaṃ tu pañcadhā;  
Vitthārānuttaraṃ cittaṃ, cattālīsavidhaṃ bhava.
24. Rūpāvacaracittāni, gayhantānuttarāni ca;  
Paṭhamādiḷḷhānabhede, āruppañcāpi pañcame.
25. Dvādasākusalānevaṃ, kusalānekavīsati;  
Chattiṃseva vipākāni, kriyacittāni vīsati.
26. Ekavīsasataṃ vātha, ekūnanavutīvidhaṃ;  
Cittaṃ taṃsampayogena, bhinnā cetasikā tathā.
27. Phasso ca vedanā saññā, cetanekaggatā tathā;  
Jīvitaṃ manasīkāro, sabbasādhāraṇā matā.
28. Takkacārādhimokkhā ca, vīriyaṃ chandapītiyo;  
Pakiṇṇakā cha akkhātā, terasaññasamānatā.
29. Pakiṇṇakā na viññāṇe, vitakko dutiyādisu;  
Vicāro tatiyādimhi, adhimokkho tu kaṅkhite.
30. Santīraṇamanodhātuttikesu vīriyaṃ tathā;  
Catutthasukhite pīti, chandohetumhi momuhe.
31. Chasatṭhi pañcapaññāsa, ekādasa ca soḷasa;  
Sattati vīsati ceva, tāni cittaṇi dīpaye.
32. Mohāhirikānottappa-muddhaccaṃ sabbapāpajaṃ;  
Issāmaccherakukkucadosā tu paṭighe tathā.
33. Lobho lobhe tu diṭṭhi ca, diṭṭhiyutte viyuttake;  
Māno ca thinamiddhaṃ tu, sasaṅkhāresu pañcasu.
34. Kaṅkhite vicikicchāti, cuddasākusalānime;  
Dvādasākusalesveva, niyamena vavatthitā.
35. Saddhā sati hirottappaṃ, alobhādosamajjhatā;  
Kāyacittānaṃ passaddhi, lahutā mudutā tathā.
36. Kammaññatā ca pāguññaujutāti yugā cha ca;  
Ekūnavīsati dhammā, aññamaññāviyogino;  
Ekūnasatṭhicittesu, sobhanesu pavattitā.
37. Sammāvācā ca kammantājīvāti viratī imā;  
Lokuttare sadā sabbā, saha kāmasubhe viṣuṃ.
38. Karuṇāmuditā nānā, rūpe pañcamavajjite;  
Kadāci kāme kusale, kriyacitte sahetuke.
39. Tihetukesu cittesu, paññā sabbattha labbhati;  
Ete saddhādayo dhammā, pañcavīsati sobhanā.

40. Issāmaccherakukkuccaviratīkaruṇādayo;  
Nānā kadāci māno ca, thinamiddhaṃ tathā saha.
41. Satta sabbattha jāyanti, cha tu dhammā yathārahaṃ;  
Cuddasākusalesveva, sobhanesveva sobhanā.
42. Dvepaññāsa panicevaṃ, dhamme saṅgayha mānase;  
Labbhamāne vibhāveyya, paccekampi vicakkhaṇo.
43. Sobhanaññasamānā ca, paṭhame viratī vinā;  
Dutiyādīsu takkañca, vicāraṃ tatiyādīsu.
44. Catutthādīsu pītiñca, karuṇādīñca pañcame;  
Hitvā neva viyojeyya, saṅkhipitvāna pañcadhā.
45. Pañcatiṃsa catuttiṃsa, tettiṃsa ca yathākkamaṃ;  
Dvattiṃsa tiṃsa evātha, jāyantīti mahaggate.
46. Gahetvā viratī sabbā, hitvāna karuṇādayo;  
Paṭhame dutiyādīhi, vitakkādīhi vinā tathā.
47. Pañcadhāva gaṇeyyevaṃ, chattīṃsā ca yathākkamaṃ;  
Pañcatiṃsa catuttiṃsa, tettiṃsadvayamuttare.
48. Sobhanaññasamānā ca, kāmesu kusale kriye;  
Hitvā viratiyo pāke, viratīkaruṇādayo.
49. Ñāṇayutte somanasse, viyutte ñāṇavajjītā;  
Upekkhake pītiñā, vippayutte dvayaṃ vinā.
50. Catudhā tividhesvevaṃ, vigaṇeyya dvayaṃ dvayaṃ;  
Na santupekkhāsahite, karuṇādīti kecana.
51. Aṭṭhatiṃsa sattatiṃsadvayaṃ chattīṃsakaṃ subhe;  
Pañcatiṃsa catuttiṃsadvayaṃ tettiṃsakaṃ kriye.
52. Tettiṃsa pāke dvattiṃsadvayekatīṃsakaṃ bhava;  
Sahetukāmāvacarapuññapākakriyāmane.
53. Mohādayo samānā ca, paṭhame lobhadiṭṭhiyā;  
Tatiye lobhamānena, jāyantekūnavīsati.
54. Aṭṭhārasa pītiñā, pañcame sattame tathā;  
Navame dosakukkuccamaccharissāhi vīsati.
55. Paṭhamādīsu vuttāva, dutiyādīsu jāyare;  
Thinamiddhenekavīsa, vīsa dvevīsaticcamā.
56. Chandapītiṃ vinuddhacce, kaṅkhite nicchayaṃ vinā;  
Pañcadaseva kaṅkhāya, asubhesu vibhāvaye.
57. Site samānā nicchandā, dvādasekādaseva tu;

Pītiṃ hitvāna voṭṭhabbe, vīriyaṃ sukhatīraṇe.

58. Dvayaṃ hitvā manodhātu, upekkhātīraṇe dasa;  
Satta sādharmaṇā eva, pañcaviññāṇasambhavā.
59. Iti cetasi sambhūtā,  
Dvepaññāsa yathārahaṃ;  
Ñeyyā cetasikā dhammā,  
Cetobhedappabhedino.
60. Suññatañcānimittaṇca, tathāpaṇihitanti ca;  
Tividhākāramīrenti, nibbānamamataṃ budhā.
61. Yaṃ ārabha pavattantaṃ, tathānuttaramānasam;  
Suññatādivimokkhoti, nāmamālambato labhe.
62. Sopādisesanibbānadhātu ceva tathāparā;  
Anupādisesā cāti, duvidhā pariyāyato.
63. Tadeṭaṃ vānanikkhantamaccantaṃ santilakkhaṇam;  
Assāsakaraṇarasam, khemabhāvena gayhati.
64. Taṃ nāmetīti nibbānam, namantīti tatopare;  
Tepaññāsāti nāmāni, catupaññāsa sabbathā.
65. Cittacetāsikayojanānayaṃ,  
Cittamuttamamidaṃ pakāsitaṃ;  
Sādhu cetasi nidhāya paṇḍitā,  
Sādhu sāsanadharā bhavanti te.
66. Buddhappavattamavagāhitabodhiññāṇa-  
Miccābhiddhammavagāhitasabbadhammaṃ;  
Ogayha nāmagatarāsimesayitvā,  
Saṅgayha sabbamidha yojitamādarena.

Iti nāmarūpaparicchede nāmatayavibhāgo nāma

Paṭhamo paricchedo.

## 2. Dutīyo paricchedo

### Lakkhaṇarasupaṭṭhānavibhāgo

67. Sabhāvo lakkhaṇam nāma, kiccasampajjanā raso;  
Gayhākāro upaṭṭhānam, padaṭṭhānam tu paccayo.
68. Attupaladdhisāṅkhātā, sampattā ca panatthato;  
Lakkhaṇarasupaṭṭhānā, vohārābhogabheditā.
69. Tepaññāsasabhāvesu, tasmā bhedaṃ yathārahaṃ;  
Lakkhaṇādippakārehi, pavakkhāmi ito paraṃ.

70. Cintetīti bhavē cittaṃ, cintanamattameva vā;  
Sampayuttātha vā tena, cintetīti ca gocaraṃ.
71. Phusatīti bhavē phasso, phusanaṃ vātha kevalaṃ;  
Sampayuttātha vā tena, phusantīti ca gocaraṃ.
72. Evaṃ kattari bhāve ca, karaṇe ca yathārahaṃ;  
Tepaññāsasabhāvesu, saddanibbacanaṃ naye.
73. Ālambaṇamaṇaṃ cittaṃ, taṃvijānanalakkhaṇaṃ;  
Sahajādhīṭṭhānaraṣaṃ, cintākappoti gayhati.
74. Ālambaṇasamodhāno,  
Phasso phusanalakkhaṇo;  
Saṅghaṭṭanaraṣo tattha,  
Sannipātoti gayhati.
75. Vedanālambaṇaraṣā, sā vedayitalakkhaṇā;  
Gocarānubhavarāṣā, anubhuttīti gayhati.
76. Ākāragahaṇaṃ saññā, sā sañjānanalakkhaṇā;  
Nimituppādanaraṣā, upalakkhāti gayhati.
77. Cetaṇā cittavipphārā, sāyaṃ byāpāralakkhaṇā;  
Kammantāyūhanaraṣā, saṃvidhānanti gayhati.
78. Ekaggatā avikkhepo, sāvisāhāralakkhaṇā;  
Sampīṇḍanaraṣā cittaṃ, samodhānanti gayhati.
79. Yāpanaṃ sahaṇātāna-manupālanalakkhaṇaṃ;  
Jīvitaṃ jīvanaraṣaṃ, āyubandhoti gayhati.
80. Sāraṇā manasīkāro, samannāhāralakkhaṇo;  
Saṃyojanaraṣo citta-paṭipattīti gayhati.
81. Saṅkappanalakkhaṇo takko, sahaṇābhiniropāno;  
Ālambāhananaraṣo, sannirujjhoti gayhati.
82. Vicāro anusandhāno, anumajjanalakkhaṇo;  
Cittānuyojanaraṣo, anupekkhāti gayhati.
83. Adhimokkho asaṃsappo, susanniṭṭhānalakkhaṇo;  
Niccālāpādanaraṣo, daḷhavuttīti gayhati.
84. Vīriyaṃ pana vāyāmo, mahussāhanalakkhaṇo;  
Kiccāsaṃsīdanaraṣo, upatthambhoti gayhati.
85. Ālambatthikatā chando, kattukāmatalakkhaṇo;  
Ālambaṇesanaṣo, hatthādānanti gayhati.
86. Sahaṇātānupharaṇā, sampiyāyanalakkhaṇā;  
Sampīnanaraṣā pīti, pāmojjamiti gayhati.

87. Cetosaddahanam saddhā, bhūtokappanalakkhaṇā;  
Hitapakhandanarasā, adhimuttīti gayhati.
88. Asammosā sabhāvesu, sati dhāraṇalakkhaṇā;  
Dhammāpilāpanarasā, appamādoti gayhati.
89. Hirī jegucchā pāpesu, sā harāyanalakkhaṇā;  
Hīlasaṃkocanarasā, pāpalajjāti gayhati.
90. Pāpasārajjamottappaṃ, ubbeguttāsalakkhaṇaṃ;  
Bhayasaṅkocanarasā, avissāsoti gayhati.
91. Alobho anabhisaṅgo, apariggahalakkhaṇo;  
Muttappavattanaraso, asaṃsaggoti gayhati.
92. Adoso cittaśākhalyaṃ, abyāpajjanalakkhaṇo;  
Saṅhappavattanaraso, sammabhāvoti gayhati.
93. Amoho khalitābhāvo, paṭivijjhanalakkhaṇo;  
Visayobhāsanaraso, paṭibodhoti gayhati.
94. Tatramajjhattatopekkhā, samīkaraṇalakkhaṇā;  
Apakkhapātanasā, samavāhoti gayhati.
95. Passaddhi kāyacittānaṃ, darathābhāvalakkhaṇā;  
Aparipphandanarasā, sītibhāvoti gayhati.
96. Lahutā kāyacittānaṃ, adandhākāralakkhaṇā;  
Avitthārarasā, sallahukavuttīti gayhati.
97. Mudutā kāyacittānaṃ, kakkhaḷābhāvalakkhaṇā;  
Kiccāvirodhanarasā, anukulyanti gayhati.
98. Kammaññatā ubhinnaṃpi, alaṃkiccassa lakkhaṇā;  
Pavattisampattirasā, yogabhāvoti gayhati.
99. Tathā pāguññatā dvinnaṃ, visadākāralakkhaṇā;  
Sukhappavattanarasā, seribhāvoti gayhati.
100. Ujutā kāyacittānaṃ, kuṭilābhāvalakkhaṇā;  
Jimhanimmadanarasā, ujuvuttīti gayhati.
101. Sammāvācā vacīsuddhi, vācāsaṃyamalakkhaṇā;  
Micchāvācoramarasā, vacīvelāti gayhati.
102. Sammākammaṃ kriyāsuddhaṃ, sammākaraṇalakkhaṇaṃ;  
Micchākammoramarasā, kriyāvelāti gayhati.
103. Sammājīvo visuddheṭṭhi, allīṭṭhājīvalakkhaṇo;  
Micchājīvoramaraso, sammāvuttīti gayhati.
104. Karuṇā dīnasattesu, dukkhāpanayalakkhaṇā;

Sotthitāpatthanarasā, anukampāti gayhati.

105. Sukhaṭṭhitesu muditā, anumodanalakkhaṇā;  
Cetovikāsanarasā, avirodhoti gayhati.
106. Cetosārajjanā lobho, apariccāgalakkhaṇo;  
Ālambagijjhanaraso, abhilaggoti gayhati.
107. Cetobyāpajjanaṃ doso, sampadussanalakkhaṇo;  
Ālambaṇaghātaraso, caṇḍikkamiti gayhati.
108. Cetosammuyhanaṃ moho,  
So sammuyhanalakkhaṇo;  
Sabhāvacchādanaraso,  
Andhabhāvoti gayhati.
109. Pāpājigucchāhiraṃ, nillajjākāralakkhaṇaṃ;  
Pāpopalāpanarasaṃ, malaggāhoti gayhati.
110. Asārajjanamanottappamanuttāsanalakkhaṇaṃ;  
Pāpapakkhandanarasaṃ, pāgabbhamiti gayhati.
111. Diṭṭhi daḷhaviṇṇāso, sā parāmāsalakkhaṇā;  
Tucchābhīnivesanarasā, micchāgāhoti gayhati.
112. ‘‘Ahasmī’’ti maññaṃāno, so samunnatilakkhaṇo;  
Ketusampaggaharaso, ahaṃkāroti gayhati.
113. Parasampattīsu issā, akkhamākāralakkhaṇā;  
Cetovikucanarasā, vimukhattanti gayhati.
114. Pariggahesu maccheraṃ, sannigūhanalakkhaṇaṃ;  
Sāmaññaśāhanarasaṃ, vevicchamiti gayhati.
115. Cetopahananaṃ thīnaṃ, taṃ saṃsīdanalakkhaṇaṃ;  
Ussāhabhañjanarasaṃ, saṃkhittattanti gayhati.
116. Vighāto sahaḷjātānaṃ, middhaṃ mōhanalakkhaṇaṃ;  
Sattisaṃbhañjanarasaṃ, āturattanti gayhati.
117. Uddhaccaṃ cittavikkhepo, avūpasamalakkhaṇaṃ;  
Cetonaṭṭhānarasaṃ, bhantattamiti gayhati.
118. Vippatīsāro kukkucamanusocanalakkhaṇaṃ;  
Attānusocanarasaṃ, pacchātāpoti gayhati.
119. Kaṅkhāyanā vicikicchā, asanniṭṭhānalakkhaṇā;  
Anekagāhanarasā, appatiṭṭhāti gayhati.
120. Iccevaṃ lakkhaṇādīhi, vibhāveyya vicakkhaṇo;  
Tepaññaśābhāvesu, sabhāvākāralakkhaṇaṃ.



121. Lakkhaṇatthakusalā salakkhaṇe,  
Lakkhaṇatthapamepi kevalaṃ;  
Lakkhaṇuggahasukhāya vaṇṇayaṃ,  
Lakkhaṇādimukhato salakkhaṇaṃ.
122. Atthaṃ tamevamanugamma mayettha vutta-  
Matthānamatthanayanatthamanekadhāpi;  
Pattheyya mettha vacanatthanayehi ñāṇa-  
Matthesu buddhavacanatthanayatthikehi.

Iti nāmarūpaparicchede lakkhaṇarasupaṭṭhānavibhāgo nāma

Dutiyo paricchedo.

### 3. Tatiyo paricchedo

#### Bhedasaṅgahavibhāgo

123. Evaṃ bhedasabhāvesu, tesveva puna saṅgahaṃ;  
Sabhāvatthavisesehi, pavakkhāmi ito paraṃ.
124. Asādhāraṇañāṇehi, sathā vatthuvivecako;  
Saṅgahetvā sabhāgehi, dhamme dassesi cakkhumā.
125. Diṭṭhibhinivesatṭhena, yathābhūtasabhāvato;  
Paramāmasaticcekā, **parāmāsoti** bhāsītā.
126. Kilesāsucibhāvena, vaṇassāvaraso viya;  
Ālimpantāva santānaṃ, savantīti pakāsītā.
127. Kāmatāṇhā bhavataṇhā, diṭṭhāvijjāti **āsava**;  
Cattāro āsavaṭṭhena, tayo dhammā sabhāvato.
128. Etevo **ghāti** vuttāva, dvārālabhābhivāhino;  
Ottharivā parābhūte, harantā paṇino bhava.
129. **Yogāti** cāhu te eva, paṇino bhavayantake;  
Dvārālabhābhisambandhā, yantabandhāva yojitā.
130. Santānamadhigaṇhantā, māluvāva mahātaruṃ;  
Gaṇhantā daḷhamālambaṃ, maṇḍūkamiva pannago.
131. Kāmatāṇhā ca diṭṭhi ca, **upādānā** catubbidhā;  
Diṭṭhi diṭṭhisīlabbata-mattavādoti bheditā.
132. Kāyena kāyaṃ ganthentā, duppamuñcānuveṭhino;  
Kathitā **kāyaganthāti**, taṇhābyāpādadiṭṭhiyo.
133. Sīlabbataparāmāso, iti diṭṭhi vibheditā;  
Idaṃsaccābhiniveso, iti cevaṃ catubbidhā.

134. Nekkhammaṃ palibodhentā, bhāvanāparipanthakā;  
Santānamaṇḍakosāva, pariyonandhakāti ca.
135. Kāmacchando ca byāpādo, thinamiddhañca saṃsayo;  
Avijjuddhaccakukkuccamiti **nīvaraṇā** matā.
136. Āgāḷhaṃ pariyādāya, oḡayhanuppavattino;  
Yopparogāva santāna-manusentīti bhāsītā.
137. Kāmarāgo bhavarāgo, paṭiḡho mānadiṭṭhiyo;  
Kaṅkhāvijjāti satteva, cha dhammā**nusayā** matā.
138. Dvārālambaṇabandhena, pāṇīnaṃ bhavamaṇḍale;  
**Samyojanāni** vuttāni, pāsabandhāva pakkhinaṃ.
139. Kāmarūpārūparāgā, paṭiḡho mohasaṃsayo;  
Diṭṭhi sīlabbatam māno, uddhaccena dasā bhava.
140. Rūpārūparāguddhaccaṃ, abhidhamme vinā puna;  
Bhavarāgiṣsa maccheraṃ, gahetvā dasadhā siyuṃ.
141. Saṃklepayanti santānaṃ, upaghātentī pāṇino;  
Sahajāteklesentīti, **kilesāti** pakāsītā.
142. Lobho doso ca moho ca,  
Diṭṭhi māno ca saṃsayo;  
Thināhirikanottappa-  
Muddhaccena siyuṃ dasa.
143. Navasaṅgahitā ettha, diṭṭhilobhā pakāsītā;  
Sattasaṅgahitāvijjā, paṭiḡho pañcasāṅgaho.
144. Catusaṅgahitā kaṅkhā, mānuddhaccā tisaṅgahā;  
Dukasāṅgahitaṃ thīnaṃ, kukkuccamekasaṅgahaṃ.
145. Dvidhāhirikanottappa-missāmacchariyaṃ tathā;  
Iccevaṃ dasadhā vuttā, **pāpakesveva saṅgahā**.
146. Parāmāsāvoghā ca, yogupādānaganthato;  
Nīvaraṇānusayato, saṃyojanakilesato.
147. Cuddaseva tu saṅkhepā, sattapaññāsa bhedato;  
Yathādhammānusārena, cittuppādesu yojaye.
148. Tatopare noparāmā-sādibheditasaṅgahā;  
Cittaṃ cetasiḡkaṃ rūpaṃ, nibbānamiti dīpaye.
149. Iccākusaladhammānaṃ, ñatvā saṅgahamuttaraṃ;  
Missakā nāma viññeyyā, yathāsambhavato kathaṃ;
150. Lobho doso ca moho ca,  
Ekantākusalā tayo;

Alobhādosāmoho ca,  
Kusalābyākatā tathā.

151. Pādapasseva mūlāni, thirabhāvāya paccayā;  
Mūlabhāvena dhammānaṃ, **hetū** dhammā cha dīpitā.
152. Vitakko ca vicāro ca, pīti cekaggatā tathā;  
Somanassaṃ domanassaṃ, upekkhāti ca vedanā.
153. Āhaccupanijjhāyantā, nijjhānaṭṭhena paccayā;  
**Jhānadharmā**ti satthāha, pañca vatthusabhāvato.
154. Sammādiṭṭhi ca saṅkappo, vāyāmo viratittayaṃ;  
Sammāsati samādhī ca, micchādiṭṭhi ca sambhavā.
155. Sammāmicchā ca nīyantā, niyyānaṭṭhena paccayā;  
**Maggaṅgā** dvādasakkhātā, nava dhammā sabhāvato.
156. Attabhāvaṃ pavattentā, ojaṭṭhamakavedanaṃ;  
Paṭisandhināmarūpa-māharantā yathākkamaṃ.
157. Kabaḷikāro āhāro,  
Phasso sañcetanā tathā;  
Viññānamiti cattāro,  
**Āhārā**ti pakāsītā.
158. Dhammānaṃ sahaḷātānaṃ, indriyaṭṭhena paccayā;  
Attānamissaraṭṭhena, anuvattāpakā tathā.
159. Saddhā ca sati paññā ca, vīriyekaggatāpi ca;  
Vedanā jīvitaṃ cittaṃ, aṭṭha rūpindriyāni ca.
160. Kathaṃ jīvitamekaṃ tu, sukhaṃ dukkhanti vedanā;  
Somanassaṃ domanassaṃ, upekkhāti ca bheditā.
161. Paññādimaggenaññāta-ññassāmīndriyaṃ bhava;  
Majjhe aññindriya**mante**, aññātāvindriyaṃ tathā.
162. Soḷaseva sabhāvena, indriyaṭṭhavibhāgato;  
**Indriyānī**ti vuttāni, bāvīsati vibhāvaye.
163. Daḷhādhiṭṭhitasantānā, vipakkhehi akampiyā;  
Balavantasabhāvena, **baladharmā** pakāsītā.
164. Saddhā sati hirottappaṃ, vīriyekaggatā tathā;  
Paññāhirikānottappa-miccevaṃ navadhā matā.
165. Jeṭṭhā pubbaṅgamaṭṭhena, puññāpuññapavattiyā;  
Paccayādhippateyyena, sahaḷānaṃ yathārahaṃ.
166. Cattāro**dhipatī** vuttā, ādhippaccasabhāvato;  
Chando cittaṅca vīriyaṃ, vīmaṃsāti ca tādinā.

167. Pañcasaṅgahitā paññā, vāyāmekaggatā pana;  
Catusaṅgahitā cittaṃ, sati ceva tisaṅgahā.
168. Saṅkappo vedanā saddhā, dukasaṅgahitā matā;  
Ekekaṅgahā sesā, aṭṭhavīsati bhāsītā;  
Iccevaṃ sattadhā bhedo, vutto **missakasaṅgaho**.
169. Hetujhānaṅgamaggaṅgā, āhārindriyato tathā;  
Balādhippatito ceva, puññāpuññādimissatā;  
Chattiṃseva sabhāvena, catusaṭṭhi pabhedato.
170. Iccevaṃ saṅgahetvāna, vibhāveyya tato paraṃ;  
Cittuppādapabhedesu, yathāsambhavato kathaṃ.
171. Sitāvajjanaviññāṇaṃ, sampaṭicchanatīraṇā;  
Aṭṭhārasāhetukāva, momūhā ekahetukā.
172. Sesā tu kusalā ñāṇaviyuttā ca dvihetukā;  
Cittuppādāpare satta-cattālīsa tihetukā.
173. Pañcaviññāṇamajjhānaṃ, dvijhānaṅgikamīritaṃ;  
Catutthapañcamajjhānaṃ, tijhānaṃ tatiyaṃ matā.
174. Catujhānaṃ tu dutiyaṃ, kāme ca sukhavajjitā;  
Pañcājhānaṃ tu paṭhamāṃ, kāme ca sukhitā matā.
175. Paṭhamānuttaraṃ jhānaṃ, aṭṭhamaggaṅgikaṃ matāṃ;  
Sattamaggaṅgikaṃ nāma, sesajhānānuttaraṃ.
176. Lokiyaṃ paṭhamāṃ jhānaṃ, tathā kāme tihetukā;  
Pañcamaggaṅgikā nāma, cittuppādā pakāsītā.
177. Sesā mahaggataṃ jhānaṃ, sampayuttā ca diṭṭhiyā;  
Ñāṇena vippayuttā ca, catumaggaṅgikā matā.
178. Paṭighuddhaccayuttā ca, vippayuttā ca diṭṭhiyā;  
Timaggaṅgaṃ dumaggaṅgaṃ, kaṅkhitaṃ samudīritaṃ.
179. Na hontāhetuke maggā, cittaṭṭhiti ca kaṅkhite;  
Viditā niyatatā ca, lokiyesu na uddhaṭā.
180. Kāmesu kabaḷikāro, anāhāro asaṅṅino;  
Cittuppādesu sabbattha, āhārattayamīritaṃ.
181. Indriyāni vibhāveyya, navadhānuttare budho;  
Aṭṭhadhā samudīreyya, lokiyesu tihetuke.
182. Sattadhā pana ñāṇena, vippayutte pakāsaye;  
Sītavoṭṭhabbanāpuññe, pañcadhā kaṅkhite pana.
183. Catudhā tividhā sese, cittuppāde samīraye;  
Tihetukā sattabalā, chabalā tu duhetukā.

184. Catubalā akusalā, kaṅkhitam tibalam matam;  
Dvibalam sitavoṭṭhabba-mabalam sesamīritam.
185. Javanedhipatīnam tu, yo koceko tihetuke;  
Dvihetuke vā kusale, vīmaṃsā nopalabbhati.
186. Lokiyesu vipākesu,  
Mohamūle ahētuke;  
Yathāsambhavavuttittā,  
Natthādhipati kocipi.
187. Sambhoti kāyaviññāṇe, puññapāke sukhindriyam;  
Dukkhindriyampi tattheva, pāpapākamhi bhāsitam.
188. Santīraṇaṇca hasanam, somanassāni soḷasa;  
Paṭhamādicatujjhānam, somanassayutam bhava.
189. Domanassayuttā dveva, cittuppādā pakāsītā;  
Tadaññe pana sabbepi, pañcapaññāsupekkhakā.
190. Vedanāsampayogaṇca, vinibbhujjevamaṭṭhadhā;  
Hetuyogādibhedehi, cittuppādā pakāsītā.
191. Tamtamviyogabhedaṇca, paccekamatha missitam;  
Yathāvuttānusārena, yathāsambhavato naye.
192. Iccevam pana yojetvā, cittuppādesu missakam;  
Tato ñeyyā visuddhā ca, bodhipakkhiyasaṅgahā.
193. Kāye ca vedanācitte, dhammesu ca yathāraham;  
Asubham dukkhamanicca-manattāti supaṭṭhitā.
194. Sammāsati paniccekā, kiccagocarabhedato;  
**Satipaṭṭhānanāmena**, cattāroti pakāsītā.
195. Uppannānuppannapāpa-pahānānuppadanāya ca;  
Anuppannuppannehi vā, nibbattiabhivuddhiyā.
196. Padahantassa vāyāmo, kiccābhogavibhāgato;  
**Sammappadhānanāmena**, cattāroti pakāsītā.
197. Iddhiyā pādabhūtattā, **iddhipādāti** bhāsītā;  
Chando cittaṇca vīriyam, vīmaṃsāti catubbidhā.
198. Pañca saddhā sati paññā, vīriyekaggatā tathā;  
**Indriyānindriyaṭṭhena**, balaṭṭhena **balāni** ca.
199. Sati dhammavicayo ca, tathā vīriyapītiyo;  
Passaddhekaggatāpekkhā, bujjhantassaṅgabhāvato.
200. **Bojjhaṅgāti** visesena, satta dhammā pakāsītā;  
Nīyyānaṭṭhena **maggāṅgā**, sammādiṭṭhādiṭṭhadhā.

201. Chasaṅgahettha vāyāmo, satipaññā samīritā;  
Pañcasaṅgahitā nāma, samādhi catusaṅgaho.
202. Saddhā dusaṅgahā vuttā, sesā ekekaṅgahā;  
Iccevaṃ sattadhā bhedo, **bodhipakkhiyasaṅgaho**.
203. Satipaṭṭhānasammappadhānato iddhipādato;  
Indriyabalabojjhaṅgā, maggabhedā ca bhāsītā.
204. Chando cittamupekkhā ca, saddhāpassaddhipītiyo;  
Sammādiṭṭhi ca saṅkappo, vāyāmo viratittayaṃ.
205. Sammāsati samādhīti, dīpitā bodhipakkhiyā;  
Cuddasā dhammato honti, sattatīṃsa pabhedato.
206. Yehi dhammehi bujjhanto, saccāni paṭivijjhati;  
Samattānuttare honti, na vā saṅkappapītiyo.
207. Pubbabhāgepi labbhanti, lokiyamhi yathārahaṃ;  
Nibbedhabhāvanākāle, chabbisuddhipavattiyaṃ.
208. Iccevaṃ tividhā bhedaṃ, vibhāveyya yathārahaṃ;  
Sabhāvabhedabhinnānaṃ, sabhāgatthehi saṅgahaṃ.
209. Bhedasaṅgahavidūhi vaṇṇitaṃ, bhedasaṅgahavimuttisāsane;  
Bhedasaṅgahanayatthamuttamaṃ, bhedasaṅgahamukhaṃ pakāsitaṃ.
210. Dhammasabhāvavibhāgabudhevaṃ, dhammadisampatisāsanadhamme;  
Dhammavibhūtivibhūsitacittā, dhammarasāmatabhāgi bhavanti.

Iti nāmarūpaparicchede bhedasaṅgahavibhāgo nāma

Tatiyo paricchedo.

## 4. Catuttho paricchedo

### Pakiṇṇakavibhāgo

211. Ito paraṃ kiccato ca, dvārālambaṇavatthuto;  
Bhūmipuggalato ṭhānā, janakā ca yathārahaṃ.
212. Saṅgaho ca pavatti ca, paṭisandhipavattisu;  
Cittupādavaseneva, saṃkhipitvāna niyyate.
213. Rūpārūpamahāpākā, mupekkhātīraṇadvayaṃ;  
Cutisandhibhavaṅgāni, cittānekūnavīsati.
214. Āvajjanaṃ tu yugaḷaṃ, dassanaṃ savanaṃ tathā;  
Ghāyanaṃ sāyanañceva, phusanaṃ sampatiṅcanaṃ.
215. Tīṇi tīraṇacittāni, ekaṃ voṭṭhabbanaṃ matamaṃ;

- Pañcadvāre manodvāre, tadāvajjananāmakam.
216. Pañcapaññāsa javanakiccānīti viniddise;  
Kriyā cāvajjanam hitvā, kusalākusalapphalam.
217. Tadālambaṇacittāni, bhavantekādaseva hi;  
Mahāvīpākacittāni, aṭṭha santīraṇattayam.
218. Pañcakiccanti bhāsanti, upekkhātīraṇadvayam;  
Catukiccā mahāpākā, tikakiccā mahaggatā.
219. Dukiccamiti voṭṭhabbam, sukhatīraṇamīritam;  
Pañcaviññāṇajavanamanodhātuttikam pana.
220. Ekakiccāti bhāsanti, aṭṭhasaṭṭhi vibhāvino;  
Icevam **kiccabhedena**, cittuppādā vavatthitā.
221. Cakkhusotaghānājivhā-kāyadhātu yathākkamam;  
Pañcadvārā bhavaṅgam tu, manodvāram pavuccati.
222. Ghānādayo tayo rūpe, pañca cakkhādayo tathā;  
Arūpe natthubhayattha, tadālambaṇamānasam.
223. Cha dvārā vīthiccittāni, satta kāmīsu rūpisu;  
Dvārattayam cha cittāni, manodvāramarūpisu.
224. Paṭisandhādibhūtā hi, avasāne cutiṭṭhitā;  
Majjhe bhavaṅgam chetvāna, paccekam vīthi jāyati.
225. Rūpādārammaṇe cakkhu-pasādādimhi ghaṭṭite;  
Āvajjanādayo honti, bhavaṅgadvicalā param.
226. Pariṇāme bhavaṅgassa, ālambe gahaṇārahe;  
Tathā vīthi manodvāre, yathāsambhavato bhave.
227. Āvajjā pañcaviññāṇam, sampaṭicchanatīraṇam;  
Voṭṭhabbakāmajavanam, tadālambaṇamānasam.
228. Sattevam vīthiccittāni, cittuppādā catuddasa;  
Catupaññāsa vitthārā, pañcadvāre yathāraham.
229. Uppādaṭṭhitibhaṅgānam, vasā cittakkhaṇam tayam;  
Rūpānam ṭhiti ekūna-paññāsaṅca duke dukam.
230. Paritteti paritte ca, mahantetimahantake;  
Voṭṭhabbamoghajavanam, tadālambanti tam kamā.
231. Āvajjanaṅca javanam, manodvāre tu gocare;  
Vibhūte tu tadālambam, vitthārā sattasaṭṭhi te.
232. Kāme javanasattāla-mbaṇānam niyame sati;  
Vibhūtetimahante ca, tadālambaṇamīritam.

233. Pañcadvāre manodhātu, paccekamhi yathākkamaṃ;  
Pañcaviññāṇayugaḷaṃ, paccekamaṃ tu pakāsitaṃ.
234. Manodvāre tu javanaṃ, mahaggatamanuttaraṃ;  
Sukhatīraṇavoṭṭhabbaṃ, parittajavanaṃ chasu.
235. Mahāvīpākacittāni, upekkhātīraṇadvayaṃ;  
Chasu dvāresu jāyanti, vīthimuttāni cekadā.
236. Sattati vīthicittāni, vipākā tu mahaggatā;  
Nava vīthivimuttā ca, duvidhāpi dasīritā.
237. Icevamaṃ **dvārabhedena**, vibhāvetvā tato paraṃ;  
Ñeyyā gocarabhedena, cittuppādā yathārahaṃ.
238. Rūpasaddagandharasaphoṭṭhabbā pañca gocarā;  
Sesañca rūpapaññattināmañca dhammagocaraṃ.
239. Pañcadvāre vattamānaṃ, pañcālambaṃ yathākkamaṃ;  
Chālambaṇaṃ manodvāre, atītānāgatampi ca.
240. Paññattātītavattantaṃ, chadvāraggahitaṃ pana;  
Chālārammaṇasaṅkhātamaṃ, yebhuyyena bhavantare.
241. Nimittagatikammānaṃ, kammamevātha gocaraṃ;  
Paṭisandhibhavaṅgānaṃ, cutiyāva yathārahaṃ.
242. Pañcālambe manodhātu, paccekamhi yathākkamaṃ;  
Pañcaviññāṇayugaḷaṃ, paccekamaṃ tu pakāsitaṃ.
243. Kāmapākāni sesāni, hasanañca parittake;  
Ñāṇahīnānipuññāni, javanāni animmale.
244. Tihetukāmapuññāni, puññābhiññā ca lokiyā;  
Sabbālambe pavattanti, aggamaggaphalaṃ vinā.
245. Kriyābhiññā ca voṭṭhabbaṃ, kriyā kāme tihetukā;  
Sabbālambe pavattanti, nibbāne nimmalā siyuṃ.
246. Dutiyāñca catutthañca, āruppesu mahaggate;  
Mahaggataññe vohāre, ayamālambane nayo.
247. Cakkhusotaghānajivhā-kāyahadayavatthunā;  
Kāmaloke chavatthūni, nissitā satta dhātuyo.
248. Pañcaviññāṇadhātū ca, tāsamaṃ pubbāparattayaṃ;  
Manodhātu tato sesā, manoviññāṇadhātu ca.
249. Catasso dhātuyo rūpe, tīṇi vatthūni nissitā;  
Arūpe tu anissāya, dhātvekāva pavattati.
250. Pañcappasāde nissāya, paccekamaṃ tu yathākkamaṃ;



Pañcaviññāṇayugaḷaṃ, bhavatīti pakāsitaṃ.

251. Kāmapākāni sesāni, maggāvajjanamādito;  
Hasanaṃ paṭighārūpā-vacaraṃ vatthunissitaṃ.
252. Dvecattālisa nissāya, anissāya ca jāyare;  
Anissāya vipākāni, āruppeti samīritaṃ.
253. Icevaṃ **vatthubhedena**, cittuppādā pakāsitā;  
Tato paraṃ vibhāveyya, bhūmibhedena paṇḍito.
254. Niraye petaloke ca, tiracchānāsura tathā;  
Pāpakammopapajjanti, pāpapākāya sandhiyā.
255. Bhūmissitesu devesu, manussesupi hīnakā;  
Ahetukāya jāyanti, puññapākāya sandhiyā.
256. Cātumahārājikā ca, tāvatimsā ca yāmakā;  
Tusitā ceva nimmānaratino vasavattino.
257. Icevaṃ chasu devesu, manussesu ca jāyare;  
Mahāvīpākāsandhīhi, kāmapuññakatā janā.
258. Brahmānaṃ pārisajjā ca, tathā brahmapurohitā;  
Mahābrahmā ca jāyanti, paṭhamajjhānasandhiyā.
259. Parittā appamāṇābhā, jāyantābhassarā tathā;  
Dutiyajjhānapākāya, tatiyāya ca sandhiyā.
260. Parittasubhappamāṇasubhā ca subhakiṇṇhakā;  
Catutthāya tu jāyanti, tatiyajjhānabhūmikā.
261. Vehapphalā asaṅṅī ca, suddhāvāsāti sattasu;  
Pañcamāya ca jāyanti, asaṅṅīcittavajjitā.
262. Avihā ca atappā ca, sudassā ca sudassino;  
Akaniṭṭhāti pañcete, suddhāvāsā pakāsitā.
263. Ākāsānañcāyatanapākādīhi yathākkamaṃ;  
Ākāsānañcāyatanabhūmikādīsū jāyare.
264. Cutisandhibhavaṅgānaṃ, vasā pākā mahaggatā;  
Kāme sahetukā pākā, tadālambaṇatopi ca.
265. Yathāvuttaniyāmena, bhūmīsvekāva jāyare;  
Cittupādesu sabbattha, na tvevāsaṅṅīno matā.
266. Ghānajivhākāyadhātu-nissitaṃ mānaṃ tathā;  
Paṭighadvayamiccevamaṭṭha honteva kāmīsu.
267. Cakkhusotañca viññāṇaṃ, manodhātu ca tīraṇaṃ;  
Kāmarūpesu jāyanti, yathāsambhavato dasa.

268. Voṭṭhabbakāmapuññāni, vippayuttāni diṭṭhiyā;  
Uddhaccasahitañceti, sabbatthetāni cuddasa.
269. Kaṅkhitam diṭṭhiyuttāni, suddhāvāsavivajjite;  
Sitañca rūpajavana-mārubbhāpāyavajjite.
270. Kāmakriyā sahetū ca, uddham lokuttarattayam;  
Catutthārubbhāpāyavajjite.
271. Sesamārubbhāpāyavajjite, hitvāpāyam yathākkamam;  
Uddhamārubbhāpāyavajjite, jāyatīti vibhāvaye.
272. Sotāpatti-phalādāni, cattārānuttarāni tu;  
Suddhāvāsamāpāyañca, hitvā sabbattha jāyare.
273. Suddhāvāsamāpāyañca, hitvārūpañca sabbathā;  
Paṭhamānuttaro maggo, sesaṭṭhānesu jāyati.
274. Sattatimsa apāyesu, kāmesīti pakāsītā;  
Pañcapaññāsa suddhesu, rūpesvekkūnasattati.
275. Chacattālīsa āruppe, uppajjanti yathārahamaṃ;  
Iccevaṃ **bhūmibhedena**, cittuppādā pakāsītā.
276. Tihetusatte sabbāni, dvihetukāhetuke pana;  
Parittāni vivajjjetvā, ñāṇapākakriyājave.
277. Puthujjanānam sambhonti, diṭṭhiyuttañca kaṅkhitam;  
Sotāpannāditiṇṇampi, phalam hoti yathāsakam.
278. Vītarāgassa javanam, kriyā cantimanuttaram;  
Puthujjanāditiṇṇampi, paṭigham samudāritam.
279. Javā puthujjanādīnam, catunnam sesa sāsavā;  
Sāsavāvajjapākāni, pañcannamapi dīpaye.
280. Puthujjanesu tesatṭhi, sotāpannādīkadavaye;  
Ekūnasatṭhi cittāni, anāgāmikapuggale.
281. Sattapaññāsa jāyanti, tepaññāsa anāsave;  
Maggaṭṭhesu sako maggo, **puggalesu ayam nayo**.
282. Tihetukāmacutiyā, sabbāpi paṭisandhiyo;  
Dvihetāhetucutiyā, kāmāvacarasandhiyo.
283. Rūpāvacaracutiyā, sahetupaṭisandhiyo;  
Āruppārubbhāpāyavajjite, heṭṭhimārubbhāpāyavajjite.
284. Paṭisandhi tathā kāme, tihetupaṭisandhiyo;  
Bhavantīti ca medhāvī, **cutisandhinayam naye**.
285. Cutiyānantaram hoti, paṭisandhi tato param;

- Bhavaṅgaṃ taṃ pana chetvā, hoti āvajjanaṃ tato.
286. Anīṭṭhe pāpapākāva, cakkhuvīññāṅakādayo;  
Iṭṭhe tu puññapākāva, yathāsambhavato siyuṃ.
287. Pubbe vuttanayeneva, vīthiccittāni yojaye;  
Pañcadvāre yathāyogaṃ, manodvāre ca paṇḍito.
288. Santīraṇatadālamba-miṭṭhālambe pavattati;  
Sukhitam iṭṭhamajjhatte, anīṭṭhe ca upekkhitam.
289. Sukhopetaṃ tadālambaṃ, upekkhākriyato paraṃ;  
Na hoti domanassamhā, somanassaṃ tu sabbadā.
290. Tathopekkhātadālambaṃ, sukhitakriyato paraṃ;  
Aññattha niyamo natthi, tadālabapavattiyā.
291. Somanassabhavaṅgassa, javane domanassite;  
Tadālambe asambhonte, upekkhātīraṇaṃ bhava.
292. Parikammopacārānu-lomagotrabhuto paraṃ;  
Pañcamaṃ vā catutthaṃ vā, javanaṃ hoti appanā.
293. Catujhānaṃ sukhopetaṃ, ñāṇayuttānanantaram;  
Upekkhāññayuttānaṃ, pañcamaṃ jāyate paraṃ.
294. Puthujjanāna sekkhānaṃ, kāmapuññatihatuto;  
Tihetukāmakriyato, vītarāgānamappanā.
295. Āvajjapañcaviññāṇa-sampañicchanatīraṇaṃ;  
Paṭisandhicuti sabbā, rūpārūpādikappanā.
296. Nirodhā vuṭṭhahantassa, upariṭṭhaphalaṃ dvayaṃ;  
Pañcābhiññā tathā maggā, ekacittakkhaṇā matā.
297. Dvikkhattuṃ hi nirodhassa, samāpattikkhaṇe pana;  
Catutthārappajavanaṃ, tadālambañca sabbathā.
298. Dvikkhattuṃ vātha tikkhattuṃ, maggassānantaram phalaṃ;  
Bhavaṅgādi ca voṭṭhabbaṃ, javanādi sakiṃ pana.
299. Tihetukāmajavanaṃ, appanāghaṭitaṃ pana;  
Tikkhattuṃ vā catukkhattuṃ, manodvāre pavattati.
300. Chadvāresu panaññattha, javanaṃ kāmadhātujaṃ;  
Pañca vāre cha vā satta, samuppajjati sambhavā.
301. Samāpattibhavaṅgesu, niyamo na samīrito;  
Vīthiccittavasāne tu, bhavaṅgaṃ cuti vā bhava.
302. Iccānantarabhedena, cittuppādaṭṭhitim cutim;  
Ñatvā gaṇeyya saṅgayha, labbhamānavasā katham?
303. Pañcadvārāvajjanato, dasa cittāni dīpaye;

Sesāvajjanato pañca-cattālīsanti bhāsitaṃ.

304. Pañcaviññāṇato pāpavipākā sampañicchanā;  
Paramekaṃ duve puñña-vipākā sampañicchanā.
305. Santīraṇadvihetumhā, pākā dvādasa jāyare;  
Tihetukāmapākamhā, ekavīsati bhāsitaṃ.
306. Rūpāvacarapākamhā, paramekūnavīsati;  
Navaṭṭhāruppapakamhā, satta cha vā yathākkamaṃ.
307. Paṭighamhā tu satteva, sitamhā terasabravum;  
Dvihetupuññāpuññamhā, ekavīsati bhāvaye.
308. Dvihetukāmakriyato, aṭṭhārasa upekkhakā;  
Sukhitamhā sattarasa, vibhāventi vicakkhaṇā.
309. Kāmapuññā tihetumhā, tettiṃseva upekkhakā;  
Sukhitamhā tipaññāsa, bhavantīti pakāsitaṃ.
310. Tihetukāmakriyato, catuvīsatiupekkhakā;  
Sukhitamhā tu dīpeyya, pañcavīsati paṇḍito.
311. Dasa rūpajavamhekādasa dvādasa terasa;  
Yathākkamaṃ pañcadasa, āruppā paridīpaye.
312. Phalamhā cuddasevāhu, maggamhā tu sakaṃ phalaṃ;  
**Param saṅgahamiccevaṃ**, vigaṇeyya visārado.
313. Pañcadasamhādyāvajja-mekavīsatitoparaṃ;  
Ekamhā pañcaviññāṇaṃ, pañcamhā sampañicchanam.
314. Sukhasantīraṇaṃ hoti, pañcavīsatito paraṃ;  
Sambhonti sattatiṃsamhā, upekkhātīraṇadvayaṃ.
315. Bhavanti cattālīsamhā, sukhapākā dvihetukā;  
Tathekacattālīsamhā, sukhapākā dvihetukā;  
Tathekacattālīsamhā, upekkhāya samāyutā.
316. Honti sattatito kāme,  
Sukhapākā tihetukā;  
Dvisattatimhā jāyanti,  
Upekkhāsahitā puna.
317. Ekūnasatṭhito rūpā, pākā pākā arūpino;  
Kamaṭṭhacattālīsamhā, tathekadvitihīnato.
318. Phaladvayaṃ catukkamhā, pañcamhāntaphaladvayaṃ;  
Tikā mahaggatā javā, maggā kāmajavā dvayā.
319. Cittuppādānamiccevaṃ, gaṇito **pubbasāṅgaho**;  
Ñeyyoyaṃ **ṭhānabhedoti**, pubbāparaniyāmito.

320. Rūpapākamahāpākā, manodhātu ca tīraṇaṃ;  
Rūpameva janentīti, vuttā ekūnavīsati.
321. Appanājavanaṃ sabbhaṃ, mahaggatamanuttaraṃ;  
Iriyāpatharūpāni, janentīti samīritaṃ.
322. Voṭṭhabbaṃ kāmajavanamabhiññā ca yathārahaṃ;  
Iriyāpathaviññattirūpānaṃ janakā siyumaṃ.
323. Pañcaviññāṇamāruppā, vipākā ca na kiñcipi;  
Sabbesaṃ paṭisandhī ca, cuti cārahato tathā.
324. Rūpādittayamiccevaṃ, samuṭṭhāpeti mānaṃ;  
Uppajjamānameveti, ñeyyo **janakasaṅgaho**.
325. Iti kiccādibhedesu, paccekasmiṃ pakāsitaṃ;  
Nayaṃ vuttānusārena, samāsetvā viyojaye.
326. Panuṇṇasammohamalassa sāsane,  
Vikiṇṇavatthūhi suganthitaṃ nayaṃ;  
Pakiṇṇamogayha paratthaninnaye,  
Vitiṇṇakaṅkhāva bhavanti paṇḍitā.
327. Bahunayavinibandhaṃ kullametaṃ gahetvā,  
Jinavacanasamuddaṃ kāmamogayha dhīrā;  
Hitasakalasaṃmatthaṃ vatthusāraṃ haritvā,  
Hadaya ratanagabbhaṃ sādhu sampūrayanti.

Iti nāmarūpaparicchede pakiṇṇakavibhāgo nāma

Catuttho paricchedo.

## 5. Pañcama paricchedo

### Kammavibhāgo

328. Vibhāgaṃ pana kammānaṃ,  
Pavakkhāmi ito paraṃ;  
Kammaṇṇakakriyābhede,  
Amohāya samāsato.
329. Kammappaccayakammanti, cetanāva samīritā;  
Tatthāpi nānakkaṇṇikā, puññāpuññāva cetanā.
330. Deti pākamadhiṭṭhāya, sampayutte yathārahaṃ;  
Kammassāyūhanaṭṭhena, pavattattā hi cetanā.
331. Klesānusayasantāne, pākadhammā hi jāyare;  
Pahīnānusayānaṃ tu, kriyāmattaṃ pavattati.
332. Mūlabhāvā ca sabbesaṃ, tathevāvajjanadvayaṃ;

Janitāni ca kammehi, vipākāni pavattare.

333. Cittuppādaseneva, kammaṃ tettiṃsadhā ṭhitam;  
Kammacatukkabhedehi, vibhāveyya vicakkhaṇo.
334. Paccuppannādikaṇhādi-janakādigarādito;  
Diṭṭhadhammādikāmādi-bhedā chadhā yathākkammaṃ.
335. Yaṃ pāpaṃ sukhavokiṇṇaṃ, akicchena karīyati;  
Paccuppannasukhaṃ kammaṃ, āyatim dukkhapākajaṃ.
336. Kicchena dukkhavokiṇṇaṃ, yadi pāpaṃ karīyati;  
Paccuppanne ca taṃ dukkhaṃ, āyatim dukkhapākajaṃ.
337. Kicchena dukkhavokiṇṇaṃ, yadi puññaṃ karīyati;  
Paccuppannamhi taṃ dukkhaṃ, āyatim sukhapākajaṃ.
338. Yaṃ puññaṃ sukhavokiṇṇaṃ, akicchena karīyati;  
Paccuppannasukhañceva, āyatim sukhapākajaṃ.
339. Visasamsaṭṭhamadhuraṃ, savisaṃ tittakaṃ tathā;  
Gomuttamadhubhesajja-miccopammaṃ yathākkammaṃ.
340. Samādāne vipāke ca, sukhadukkhappabheditaṃ;  
Kammamevaṃ catuddhāti, pakāsenti tathāgatā.
341. Ānantariyakammādi, ekantakaṭukāvahaṃ;  
Kaṇhaṃ kaṇhavipākanti, kammaṃ duggatigāmikaṃ.
342. Paṭhamajjhānakammādi, ekantena sukhāvahaṃ;  
Sukkaṃ sukkavipākanti, kammaṃ saggūpapattikaṃ.
343. Vokiṇṇakamma vokiṇṇa-sukhadukkhūpapattikaṃ;  
Kaṇhasukkaṃ kaṇhasukka-vipākanti samīritaṃ.
344. Akaṇhasukkamīrenti, akaṇhasukkapākadaṃ;  
Kammaṃ lokuttaraṃ loke, gatikammakkhayāvahaṃ.
345. Iti vaṭṭappavattamhi, klesavodānabheditaṃ;  
Kammakkhayaena saṅgayha, catudhā kammamīritaṃ.
346. Janakañcevupatthambha-mupapīlopaghātakaṃ;  
Catudhā kiccabhedena, kammamevaṃ pavuccati.
347. Janeti janakaṃ pākaṃ, taṃ chindatupapīlakaṃ;  
Taṃ pavattetupatthambhaṃ, taṃ ghātetopaghātakaṃ.
348. Karoti attano pāka-ssāvakaśanti bhāsitaṃ;  
Pākadāyakakammaṃ tu, yaṃ kiñci janakaṃ bhava.
349. Bādhamānakakammaṃ tu, taṃ pākamupapīlakaṃ;  
Upaghātakamīrenti, tadupacchedakaṃpare.

350. Garukāsannamāciṇṇaṃ, kaṭattākammunā saha;  
Kammaṃ catubbidhaṃ pāka-pariyāyappabhedato.
351. Mahaggaṭānantariyaṃ, garukammanti vuccati;  
Kataṃ cintitamāsanna-māsannamaraṇena tu.
352. Bāhullena samāciṇṇamāciṇṇanti pavuccati;  
Sesaṃ puññaṃapuññaṃca, kaṭattākammamīritaṃ.
353. Diṭṭhadhamme vedanīyamupapajjāpare tathā;  
Pariyāyavedanīyamiti cāhosikammunā.
354. Pākakālavasenātha, kālātītavasena ca;  
Catudhevampi akkhātaṃ, kammamādiccabandhunā.
355. Diṭṭhadhamme vedanīyaṃ, paṭhamaṃ javanaṃ bhava;  
Aladdhāsevanattāva, asamatthaṃ bhavantare.
356. Vedanīyaṃ tupapajjapariyosānamīritaṃ;  
Pariniṭṭhitakammattā, vipaccati anantare.
357. Sesāni vedanīyāni, pariyāyāpare pana;  
Laddhāsevanato pākaṃ, janenti sati paccaye.
358. Vuccantāhosikammāni, kālātītāni sabbathā;  
Ucchinnataṇhāmūlāni, paccayālābhato tathā.
359. Catudhā puna kāmādhūmibhedena bhāsitaṃ;  
Puññāpuññavasā dvedhā, **kāmāvacarikaṃ** bhava.
360. Apuññaṃ tattha sāvajja-maṇiṭṭhaphaladāyakaṃ;  
Taṃ kammaphassadvārehi, duvidhaṃ sampavattati.+  
361. Kāyadvāraṃ vacīdvāraṃ, manodvāranti tādina;  
Kammadvārattayaṃ vuttaṃ, phassadvārā cha dīpitā.
362. Kammadvāre manodvāre, pañcadvārā samohitā;  
Phassadvāramanodvāraṃ, kammadvārattayaṃ kataṃ.
363. Tathā hi kāyaviññattiṃ, janetvā jātacetanā;  
Kāyakammaṃ vacīkammaṃ, vacībhedapavattikā.
364. Viññattidvayasampattā, manokammanti vuccati;  
Bhedoyaṃ pariyāyena, kammānamiti dīpito.
365. Pāṇaghātādikaṃ kammaṃ, kāye bāhullavuttito;  
Kāyakammaṃ vacīkammaṃ, musāvādādikaṃ tathā.
366. Abhijjhādi manokammaṃ, tīsu dvāresu jāyati;  
Dvīsu dvāresu sesāni, bhedoyaṃ paramatthato.
367. Phassadvāramanodvāre, viññattidvayamīritaṃ;  
Pañcadvāre dvayaṃ natthi, ayamettha vinicchayo.

368. Akkhantiñña kosajjaṃ, dussilyaṃ muṭṭhasaccatā;  
Iccāsaṃvarabhedena, aṭṭhadvāresu jāyati.
369. Kammadvārattayañceva, pañcadvārā tathāpare;  
Asaṃvarānaṃ pañcannaṃ, aṭṭha dvārā pakāsītā.
370. Tattha kammaopathappattaṃ, paṭisandhiphalāvahaṃ;  
Pāṇaghātādibhedena, dasadhā sampavattati.
371. Pāṇātipāto pharusāṃ, byāpādo ca tathāparo;  
Iccevaṃ tividhaṃ kammaṃ, dosamūlehi jāyati.
372. Micchācāro abhijjhā ca, micchādittṭhi tathāparā;  
Iccevaṃ tividhaṃ kammaṃ, lobhamūlehi jāyati.
373. Theyyādānaṃ musāvādo, piṣuṇaṃ samphalāpanaṃ;  
Kammaṃ catubbidhammetaṃ, dvimūlehi pavattati.
374. Chandādosā bhayā mohā, pāpaṃ kubbanti pāṇino;  
Tasmā chandādibhedena, cattālīsavidhaṃ bhava.
375. Iccāpuññaṃ pakāsenti, caturāpāyasādhakaṃ;  
Aññatthāpi pavattamhi, vipattiphalasādhanaṃ.
376. Tividhaṃ pana puññaṃ tu, anavajjitṭhapākadaṃ;  
Dānaṃ sīlaṃ bhāvanā ca, tīsu dvāresu jāyati.
377. Mahattagāravā snehā, dayā saddhupakārato;  
Bhogajīvābhayadhammaṃ, dadato dānamīritaṃ.
378. Puññaṃacāravāritta-vattamārabbha kubbato;  
Pāpā ca viramantassa, hoti sīlamayaṃ tadā.
379. Dānasīlavinimuttaṃ, bhāvanāti pavuccati;  
Puññaṃ bhāventi santāne, yasmā tena hitāvahaṃ.
380. Janetvā kāyaviññattiṃ, yadā puññaṃ karīyati;  
Kāyakammaṃ tadā hoti, dānaṃ sīlañca bhāvanā.
381. Vacīviññattiyā saddhiṃ, yadā puññaṃ karīyati;  
Vacīkammaṃ manokammaṃ, vinā viññattiyā kataṃ.
382. Taṃtaṃdvārikamevāhu, taṃtaṃdvārikapāpato;  
Viramantassa viññattiṃ, vinā vā saha vā puna.
383. Dānaṃ sīlaṃ bhāvanā ca, veyyāvaccāpacāyanā;  
Pattānumodanā patti-dānaṃ dhammassa desanā;  
Savanaṃ diṭṭhijukamma-miccevaṃ dasadhā ṭhitaṃ.
384. Kāmapuññaṃ pakāsenti, kāme sugatisādhakaṃ;  
Aññatthāpi pavattamhi, sampattiphalasādhakaṃ.



385. Cittuppādappabhedena, kammaṃ vīsati dhā ṭhitam;  
Kāmāvacaramiccevaṃ, vibhāventi vibhāvino.
386. **Rūpāvacarikam** kamma-mappanābhāvanāmayam;  
Kasiṇādikamārabha, manodvāre pavattati.
387. Pathavāpo ca tejo ca,  
Vāyo nīlañca pītakam;  
Lohitodātamaḥkāsam,  
Ālokoti visāradā.
388. **Kasiṇāni dasīrenti**, ādikammikayogino;  
Uddhumātam vinīlañca, vipubbakam vikhāditam.
389. Vicchiddakañca vikkhittam, hatavikkhittalohitam;  
Puḷavam aṭṭhikañceti, **asubham dasadhā** ṭhitam.
390. Buddhe dhamme ca saṅge ca, sīle cāge ca attano;  
Devatopasamāyañca, vuttānussatibhāvanā.
391. Maraṇe sati nāmekā, tathā kāyagatāsati;  
Ānāpānasaticcevaṃ, **dasadhānussatīritā**.
392. Mettā karuṇā muditā, upekkhā bhāvanāti ca;  
Catubrahmavihārā ca, **appamaññāti** bhāsītā.
393. **Āhāre** tu **paṭikkūla-saññekāti** pakāsītā;  
**Catudhātuvavatthānam**, catudhātupariggaho.
394. **Cattāroruppakā** ceti, cattālīsa samāsato;  
Kammaṭṭhānāni vuttāni, samathe bhāvanānaye.
395. Ānāpānañca kasiṇam, pañcakajjhānikam tahim;  
Paṭhamajjhānikā vuttā, koṭṭhāsāsabhāvanā.
396. Mettādayo catujjhānā, upekkhā pañcamī matā;  
Āruppāruppakā sesā, upacārasamādhikā.
397. Kasiṇāsubhakoṭṭhāse,  
Ānāpāne ca jāyati;  
Paṭibhāgo tamārabha,  
Tattha vattati appanā.
398. Kammaṭṭhānesu sesesu, paṭibhāgo na vijjati;  
Tathā hi sattavohāre, appamaññā pavattare.
399. Kasiṇuggahāṭimāḥkāsam, paṭhamārappamānasam;  
Paṭhamārappakābhāva-mākiñcaññañca gocaram.
400. Āruppā sampavattanti, ālambitvā yathākkamam;  
Aññattha pana sabbattha, nappavattati appanā.

401. Parikammaṃ parikamma-samādhī ca tato paraṃ;  
Upacāraṃpanā ceti, bhāvanāyaṃ catubbidhaṃ.
402. Parikammaṃnimittaṃca, uggāho ca tato paraṃ;  
Paṭibhāgoti tīṇeva, nimittāni pakāsayuṃ.
403. Nimittaṃ gaṇhato pubba-mādikammikayogino;  
Parikammaṃnimittanti, kasiṇādīkamīritaṃ.
404. Tasmaṃ pana nimittamhi, ārabhantassa bhāvanāyaṃ;  
Paṭhamāyaṃ parikammaṃti, bhāvanāpi pavuccati.
405. Cītenuggāhite tasmaṃ, manodvāre vibhāvite;  
Taduggāhanimittaṃ tu, samuppannanti vuccati.
406. Pañcadvāraṇimuttā, tamārabha samāhitā;  
Parikammaṃsamādhīti, bhāvanā sā pakāsītā.
407. Uggāhākārasambhūtaṃ, vatthudhammavimuccitaṃ;  
Paṭibhāganimittanti, bhāvanāmayamīritaṃ.
408. Rūpādivisaṃyaṃ hitvā, tamārabha tato paraṃ;  
Bhavaṅgantariṃtaṃ hutvā, manodvāraṃ pavattati.
409. Sikhāpattasamādhāna-mupaklesavimuccitaṃ;  
Upacārasamādhīti, kāmāvacaramīritaṃ.
410. Paṭibhāganimittamhi, upacārasamādhito;  
Bhāvanābalanipphannā, samuppajjati appanā.
411. Purimaṃ purimaṃ katvā, vasībhūtaṃ tato paraṃ;  
Oḷārikaṅgamohāya, sukhumāṅgappavattiyā.
412. Appanā padahantassa, pavattati yathākkamaṃ;  
Vītakkādivinimuttā, vicārādisamāyutā.
413. Āvajjanā ca vasitā, taṃsamāpajjanā tathā;  
Vuṭṭhānādhiṭṭhānā pacca-vekkhaṇāti ca pañcadhā.
414. Vītakkaṃca vicāraṃca, sahātikkamato pana;  
Catukkajjhānamappeti, pañcakaṃca viṣuṃ viṣuṃ.
415. Appanāya ca paccekajjhānassāpi viṣuṃ viṣuṃ;  
Icchitabbā hi sabbattha, parikammādhībhāvanā.
416. Taṃ parittaṃ majjhimaṃca, paṇītaṃti vibhajjati;  
Vimokkha ca vasībhūtamabhibhāyatananti ca.
417. Parittādi parittādigocaranti catubbidhaṃ;  
Dukkāpaṭipadaṃ dandhābhiññāmiccādito tathā.
418. Taṃ chandacittavīriyavīmaṃsādhīppateyyato;

Visesaṭṭhitinibbedhahānabhāgiyatopi ca.

419. Pañcadhā jhānabhedena, catudhālambabhedato;  
Samādhībhāvanāpuññamappanāpattamīritam.
420. Iti vikkhambhitaklesam, rūpalokūpapattikam;  
Rūpāvacarakammanti, vibhāventi visāradā.
421. **Arūpāvacarakammaṃ**, catudhārūppasādhanam;  
Rūpadhammavibhāgena, bhāvitanti pavuccati.
422. Catupārisuddhisīlam, dhutaṅgaparivāritam;  
Sīlavissuddhisāṅkhātam, pūrayitvā tato param.
423. Patvā cittavisuddhiṅca, sopacārasamādhikam;  
Tathā diṭṭhivissuddhiṅca, nāmarūppariggaham.
424. Kaṅkhāvitaraṇam nāma, paccayaṭṭhitidassanam;  
Visodhetvā maggāmagga-ñāṇadassanameva ca.
425. Tato param vipassanto, visuddhīsu samāhito;  
Sampādetvā paṭipadā-ñāṇadassanamuttamam.
426. Tato pappoti medhāvī, visuddhiṃ ñāṇadassanam;  
Catumaggasamaññātam, sāmaññaphaladāyakam.
427. Chabbissuddhikamenevam, bhāvetabbam yathākkamam;  
**Kammaṃ lokuttaram** nāma, sabbadukkhakkhayāvaham.
428. Iti channam catukkānam, vasā kammaṃ vibhāvaye;  
Yena kammavisesena, santānamabhisaṅkhatam.
429. Bhūmībhavayonigatiṭṭhitivāsesu sambhavā;  
Paṭisandhādibhāvena, pākāya parivattati.
430. Sāyam kammasamaññātā, kammajāni yathārahām;  
Janeti rūpārūpāni, manosañcetanā kathām.
431. **Bhūmi** lokuttarā ceva, lokiyāti dvidhā ṭhitā;  
Parittā ca mahaggatā, appamāṇāti bheditā.
432. Ekādasa kāmabhavā, bhavā soḷasa rūpino;  
Cattārorupakā ceti, tividho **bhava** saṅgaho.
433. Asaññeko bhavo neva-  
Saññināsaññiko bhavo;  
Sabbo saññibhavo seso,  
Evampi tividho bhavo.
434. Āruppā catuvokārā, ekavokārasaññino;  
Pañcavokārako nāma, bhavo seso pavuccati.

435. Niraye hoti deve ca, yonekā opapātikā;  
Aṇḍajā jalābujā ca, saṃsedajopapātikā.
436. Petaloke tiracchāne, bhummadeve ca mānuse;  
Asure ca bhavantevaṃ, catudhā **yoni** saṅgahā.
437. **Gatiyo** nirayaṃ petā, tiracchānā ca mānavā;  
Sabbe devāti pañcāha, pañcanimmalalocano.
438. Tāvatiṃsesu devesu, vepacittāsurā gatā;  
Kālakañcāsurā nāma, gatā petesu sabbathā.
439. Sandhisaññāya nānattā, kāyassāpi ca nānato;  
Nānattakāyasaññīti, kāmasuggatiyo matā.
440. Paṭhamajjhānabhūmī ca, caturāpāyabhūmiyo;  
Nānattakāyaekatta-saññīti samudīritā.
441. Ekattakāyanānatta-saññī dutiyabhūmikā;  
Ekattakāyaekatta-saññī uparirūpino.
442. **Viññāṇaṭṭhitiyo** satta, tīhāruppehi heṭṭhato;  
Asaññettha na gaṇhanti, viññāṇābhāvato sadā.
443. Catutthāruppabhūmiñca, paṭuviññāṇahānito;  
Taṃ dvayampi gahetvāna, **sattāvāsā** naveritā.
444. Devā manussāpāyāti, tiividhā kāmādhātuyo;  
Paṭhamajjhānabhūmādi-bhedā bhūmi catubbidhā.
445. Paṭhamārūppādibhedā, catudhārūppadhātuyo;  
Sotāpannādibhedena, catudhānuttarā matā.
446. Nirayādippabhedena, bhinnā paccekato puna;  
Ekatīṃsavidhā honti, sattānaṃ jātibhūmiyo.
447. Evaṃ bhūmādibhedesu, sattā jāyanti sāsavā;  
Kammāni ca vipaccanti, yathāsambhavato kathaṃ;
448. Apāyamhā cutā sattā, kāmādhātumhi jāyare;  
Sabbatṭhānesu jāyanti, sesakāmabhavā cutā.
449. Suddhāvāsā cutā suddhā-vāsesupari jāyare;  
Asaññimhā cutā kāma-sugatimhopapajjare.
450. Sesarūpā cutā sattā, jāyantāpāyavajjite;  
Āruppatopari kāma-sugatimhi tahimpī ca.
451. Puthujjanāva jāyanti, asaññāpāyabhūmisu;  
Suddhāvāsesu jāyanti, anāgāmikapuggalā.
452. Vehapphale akaniṭṭhe, bhavagge ca patiṭṭhitā;

Na punaṅṅattha jāyanti, sabbe ariyapuggalā.

453. Brahmaloḷagatā heṭṭhā, ariyā nopapajjare;  
Dukkhamūlasamucchedā, parinibbantīnāsavā.
454. Jāyantānaṅca jātāna-miti vuttaniyāmato;  
Pavattātītakam kammaṃ, paṭisandhipavattiyam.
455. Arūpaṃ catuvokāre, rūpameva asaṅṅisu;  
Janeti rūpārūpāni, pañcavokārabhūmiyam.
456. Āruppānuttaram kammaṃ, pākameva vipaccati;  
Kaṭattārūpapākāni, kāmarūpaniyāmitam.
457. Kālopadhippayogānam, gatiyā ca yathārahaṃ;  
Sampattiṅca vipattiṅca, kammamāgamma paccati.
458. Apāye sandhimuddhacca-hīnā datvā pavattiyam;  
Sabbāpi pañcavokāre, dvādasāpuṅṅacetanā.
459. Sattākusalapākāni, vipaccanti yathārahaṃ;  
Kāmāvacarapuṅṅāni, kāmesugatiyam pana.
460. Sahetukāni pākāni, paṭisandhipavattiyam;  
Janenti pañcavokāre, ahētupi yathārahaṃ.
461. Tihetupuṅṅamukkaṭṭham, paṭisandhiṃ tihetukam;  
Datvā soḷasa pākāni, pavatte tu vipaccati.
462. Tihetukomakukkaṭṭham, dvihetu ca dvihetukam;  
Sandhiṃ deti pavatte tu, tihetukavivajjitam.
463. Dvihetukomakam puṅṅam, paṭisandhimahetukam;  
Datvāhetukapākāni, pavatte tu vipaccati.
464. Asaṅkhāram sasaṅkhāra-vipākāni na paccati;  
Sasaṅkhāramasaṅkhāra-vipākānīti kecana.
465. Parittam paṭhamajjhānam, majjhimaṅca paṇītakam;  
Bhāvetvā jāyare brahma-pārisajjādi tīsupi.
466. Tatheva dutiyajjhānam, tatiyaṅca yathākkamam;  
Bhāvetvā jāyare jhānam, parittābhādi tīsupi.
467. Tathā catuttham tividham, bhāvetvāna samāhitā;  
Parittasubhādikesu, tīsu jāyanti yogino.
468. Pañcamam pana bhāvetvā, honti vehapphalūpagā;  
Saṅṅāvirāgam bhāvetvā, asaṅṅīsūpapajjare.
469. Suddhāvāsesu jāyanti, anāgāmikapuggalā;  
Āruppāni tu bhāvetvā, āruppesu yathākkamam.

470. Evaṃ mahaggataṃ puññaṃ, yathābhūmivavatthitaṃ;  
Janeti sadisaṃ pākaṃ, paṭisandhipavattiyaṃ.
471. Lokuttarāni puññāni, uppannānantaraṃ pana;  
Samāpattikkhaṇe ceva, janenti sadisaṃ phalaṃ.
472. Mahaggatānantariyaṃ, paripakkasabhāvato;  
Anantarabhavātītaṃ, kālātītaṃ na paccati.
473. Sukhumālasabhāvā ca, sukhumattā mahaggatā;  
Santāne na vipaccanti, paṭipakkhehi dūsite.
474. Samānāsevane laddhe, vijjamāne mahabbale;  
Aladdhā tādisaṃ hetuṃ, abhiññā na vipaccati.
475. Sakaṃ bhūmimatītānaṃ, na vipaccatānuttaraṃ;  
Kammantarassadhiṭṭhānā, santānasseti dīpitaṃ.
476. Iti tettiṃsa kammāni, pākā chattiṃsa bhāsita;  
Cittuppādā kriyā sesā, kriyāmatappavattito.
477. Cittuppādavasenevamekūnanavutīvidhā;  
Tepaññāsa sabhāvena, cittacetāsikā matā.
478. Iti cittaṃ cetāsikaṃ, nibbānanti naruttaro;  
Nāmaṃ tidhā pakāsesi, cakkhumā vadataṃ varo.
479. Iti kammavipākapaṇḍitā, mitakammavipākasāsane;  
Hitakammavipākapaṇḍitā, catukammavipākamabravumaṃ.
480. Yatthāyaṃ paramatthavatthuniyame tulyena bāhulyato,  
Atthānatthavicāraṇaṃ pati jano sammohamāpādito;  
Buddho bodhitale yamāha sugato gantvāna devālayaṃ,  
Svāyaṃ kammavipākanicchayanayo saṅkhepato dīpito.

Iti nāmarūpaparicchede kammavibhāgo nāma

Pañcamo paricchedo.

## 6. Chaṭṭho paricchedo

### Rūpavibhāgo

481. Iti pañcapariccheda-paricchinnatthasaṅgahaṃ;  
Nāmadhammasesa, vibhāvetvā sabhāvato.
482. Sappabhedam pavakkhāmi, rūpadhammamito paraṃ;  
Bhūtopādāyabhedenā, duvidhampi pakāsitaṃ.
483. Uddesalakkhaṇādīhi, vibhāgajanakā tathā;  
Kalāpuppattito cāpi, yathānukkamato kathaṃ?

484. Ruppattīti bhave rūpavikārapaccayesati;  
Rūparūpaṃ tathā rūpapariyāpannatoparaṃ.
485. Bhūtarūpaṃ tu pathavī, āpo tejo tathāparo;  
Vāyo ca bhavatūpādārūpametthāti bhāsitaṃ.
486. Bhūtarūpamupādāya, pavattati na caññathā;  
Iccupādāyarūpanti, rūpaṃ sesamudīritaṃ.
487. Cakkhu sotañca ghānañca, jivhā kāyoti pañcadhā;  
Pasādarūpamakkhātaṃ, nopasādaṃ panetaraṃ.
488. Rūpasaddagandharasā, phoṭṭhabbamiti pañcadhā;  
Rūpaṃ pasādavisayaṃ, pasādo gocaraṃparaṃ.
489. Itthattaṃ purisattañca, bhāvarūpamudīritaṃ;  
Jīvitindriyarūpanti, upādinnapavattikaṃ.
490. Vatthurūpaṃ tu hadayaṃ, yaṃ dhātudvayanissayaṃ;  
Kabaḷikāramāhārarūpamiccāhu paṇḍitā.
491. Rūpadhammasabhāvattā, rūpanti paridīpitaṃ;  
Iccevamaṭṭhārasadhā, rūparūpamudīritaṃ.
492. Anipphanasabhāvattā, rūpākāropalakkhitaṃ;  
Anipphannaṃ nāma rūpaṃ, dasadhā paridīpitaṃ.
493. Rūpapparicchedaṃ rūpamiccākāso pakāsito;  
Kāyabbacīviññattikaṃ, dvayaṃ viññattirūpakaṃ.
494. Lahutā mudutā kamma-ññatā viññattiyā saha;  
Vikārarūpamiccāhu, pañcadhā ca vibhāvino.
495. Upacayo santati ca, jaratāniccatāti ca;  
Catudhā lakkhaṇarūpaṃ, rūpakaṇḍe vibhāvitaṃ.
496. Iccevamaṭṭhavīsatividhānīpi vicakkhaṇo;  
Rūpāni **lakkhaṇādīhi**, vibhāveyya yathākkamaṃ.
497. Kharatā pathavīdhātu, sāyaṃ kakkhaḷalakkhaṇā;  
Kalāpādhiṭṭhānārasā, paṭiggāhoti gayhati.
498. Ābandhanamāpodhātu, sā paggharaṇalakkhaṇā;  
Kalāpābandhanārasā, saṅgahattena gayhati.
499. Tejanattaṃ tejodhātu, sāyamuṇhattalakkhaṇā;  
Pācanārasā maddavā-nuppādananti gayhati.
500. Vāyodhātu vāyanattaṃ, sā vitthambhanalakkhaṇā;  
Samīraṇārasābhini-hārabhāvena gayhati.
501. Sabbatthāvinibhuttāpi, asammissitalakkhaṇā;

Taṃtaṃbhāvasamussannasambhāresupalakkhitā.

502. Aññaṃaññenupatthaddhā, sesarūpassa nissayā;  
Catuddhevaṃ kalāpesu, mahābhūtā pavattare.
503. Cakkhu sambhāracakkhumhi, sattakkhipaṭalocite;  
Kaṇhamaṇḍalamajjhamhi, pasādoti pavuccati.
504. Yena cakkhupasādena, rūpāni anupassati;  
Parittaṃ sukhumaṃ cetaṃ, ūkāsirasamūpamaṃ.
505. Sotaṃ sotabilassanto,  
Tambalomācite tathā;  
Aṅgulivedhanākāre,  
Pasādoti pavuccati.
506. Anto ajapadaṭṭhāne, ghānaṃ ghānabile ṭhitaṃ;  
Jivhā jivhāya majjhamhi, uppalākārasannibhe.
507. Icevaṃ pana cattāro, taṃtaṃdesavavatthitā;  
Kāyappasādo kāyamhi, upādinneti pañcadhā.
508. Kappāsapaṭalasneha-sannibhā bhūtanissitā;  
Pasādā jīvitārakkhā, rūpādi-parivāritā.
509. Dhītā rājakumārāva, kalāpantaravuttino;  
Dvārabhūtāva paccekaṃ, pañcaviññānavīthiyā.
510. Rūpādābhīghātārahābhūtānaṃ vā yathākkamaṃ;  
Daṭṭhukāmanidānādikammabhūtānameva vā.
511. Pasādālakkaṇā rūpā-dāviñjanarasā tathā;  
Pañcaviññāyugaḷaṃ, dvārabhāvena gayhare.
512. Rūpaṃ nibhāso bhūtānaṃ, saddo nigghosanaṃ tathā;  
Gandhova gandhanaṃ tattha, raso ca rasanīyatā.
513. Icevaṃ pana cattāro, gocarā bhūtanissitā;  
Bhūtattayañca phoṭṭhabbamāpodhātu-vivajjitaṃ.
514. Saddo aniyato tattha, tadañño sahavuttino;  
Taṃtaṃsabhāvabhēdena, taṃtaṃdvāropalakkhito.
515. Pañceva pañcaviññānavīthiyā visayā matā;  
Cakkhādipaṭihananalakkaṇāva yathākkamaṃ.
516. Pañcaviññāyugaḷālabhāvarasā tathā;  
Pañcaviññāyugaḷaṃ, gocarattena gayhare.
517. Itthindriyaṃ panitthattamitthibhāvoti bhāsito;  
Purisattaṃ tathā bhāvo, purisindriyanāmakko.



518. Taṃ dvayaṃ panupādinnaḱāye sabbattha labbhati;  
Kalāpantarabhinnaṅca, bhinnasantānavutti ca.
519. Vase vatteti liṅgāna-mitthipumbhāvalakkhaṇaṃ;  
Itthīti ca purisoti, pakāsanarasam tathā.
520. Itthīnaṃ purisānaṅca, liṅgassa ca yathākkamaṃ;  
Nimittakuttākappānaṃ, kāraṇattena gayhati.
521. Sattā maranti nāseṇa, yassa pāṇanti vuttiyā;  
Sajīvamatakāyānaṃ, bhedo yenopalakkhito.
522. Tadeṭaṃ kammajātāna-manupālanaḱkhaṇaṃ;  
Jīvitaṃ jīvanarasam, āyubaddhoti gayhati.
523. Manodhātuyā ca tathā, manoviññādhātuyā;  
Nissayaḱkhaṇaṃ vatthu-rūpaṃ hadayasammataṃ.
524. Samādhānaraṣaṃ tāsa-mubbāhattena gayhati;  
Yasmiṃ kuppitakālamhi, vikkhittā honti pāṇino.
525. Kāyo yassānusāreṇa, cittakkhepena khijjati;  
Yasmiṃ niruddhe viññāṇa-sotopi ca nirujjhati.
526. Yaṃ nissāya patitṭhāti, paṭisandhi bhavantare;  
Tadeṭaṃ kammaṣambhūtaṃ, pañcavokārabhūmiyaṃ.
527. Majjhe hadayakoṣaṃhi, aḱḱhapasatalohite;  
Bhūtarūpaṃmupādāya, cakkhādi viya vattati.
528. Kabaḱikāro āhāro, rūpāharaṇaḱkhaṇo;  
Kāyānuyāpanaraso, upatthambhoti gayhati.
529. Ojāya yāya yāpentī, āhārasnehasattiyā;  
Pāṇino kāmalokaṃhi, sāyamevaṃ pavuccati.
530. Ākāsadhātu rūpānaṃ, pariyoṣānaḱkhaṇā;  
Paricchedarasa rūpaṃariyādoti gayhati.
531. Saḱkhaṇaparicchinna-rūpadhammapariggahe;  
Yogīnaṃmupakārāya, yaṃ desesi dayāparo.
532. Paricchinnaṣabhāvānaṃ, kalāpānaṃ yathārahaṃ;  
Pariyaṇtānamevesa, tadākāro pavuccati.
533. Gamaṇādivaḱīghoṣapavattamaṃ yathākkamaṃ;  
Vāyopathavidhātūnaṃ, yo vikāro samatthata.
534. Saḱajopādinnaḱānaṃ, kriyāvācāpavattiyā;  
Vipphandaghaṭṭanaḱhetu, cittānupaṃrivattako.
535. Sa vikāraṃviseṣoyaṃ, viññattīti pakāṣito;

Viññāpetīti kāyena, vācāya ca vicintitaṃ.

536. Vāyopathavādhikānaṃ, bhūtānamiti kecana;  
Pavuttā tādinā kāya-pariggahasukhāya yā.
537. Kāyo yassānubhāvena,  
Sahābhogova khāyati;  
Yaṃ nirodhā parābhūto,  
Seti niccetano yathā.
538. Loke papañcā vattanti, bahudhā yāya nimmitā;  
Kappenti kāyamattānaṃ, bālā yāya ca vañcitā.
539. Sāyaṃ kāyavacīkamma-dvārabhāvena lakkhitā;  
Byāpāraghaṭṭanāhetu-vikārākāralakkhaṇā.
540. Kāyavācāadhippāya-pakāsanarasā tathā;  
Kāyavipphandaghaṭṭana-hetubhāvena gayhati.
541. Lahutā pana rūpānaṃ, adandhākāralakkhaṇā;  
Avitthānārasā salla-hukavuttīti gayhati.
542. Mudutāpi ca rūpānaṃ, kakkhaḷābhāvalakkhaṇā;  
Kiccāvirujjhanarasā, anukulyanti gayhati.
543. Kammaññatā ca rūpānaṃ, alaṃkiccassa lakkhaṇā;  
Pavattisampattirasā, yoggabhāvoti gayhati.
544. Sappāyamutumāhāraṃ, laddhā cittamanāmayam;  
Lahū mudu ca kammaññaṃ, yadā rūpaṃ pavattati.
545. Tathā pavattarūpassa, pavattākārabheditaṃ;  
Lahutādittayampetaṃ, sahavutti tadā bhava.
546. Sappāyapaṭivedhāya, paṭipattupakārikā;  
Sākārā rūpasampatti, paññattemvaṃ mahesinā.
547. Rūpassopacayo nāma, rūpassācayalakkhaṇo;  
Rūpummujjāpanaraso, pāripūrīti gayhati.
548. Pavattilakkhaṇā rūpa-santatīti pakāsītā;  
Anuppabandhanarasā, avicchedoti gayhati.
549. Rūpamācayarūpena, jāyaticcuparūpari;  
Pekkhatopacāyākārā, jāti gayhati yoginā.
550. Anuppabandhākārena, jāyatīti samekkhato;  
Tadāyaṃ santatākārā, samupaṭṭhāsī cetasi.
551. Evamābhogabhedena, jātirūpaṃ dvidhā kataṃ;  
Atthūpaladdhibhāvena, jāyantaṃ vātha kevalaṃ.

552. Rūpavivittamokāsaṃ, purakkhattena cīyati;  
Abhāvā pana bhāvāya, pavattamiti santati.
553. Evamākārabhedāpi, sabbākāraravārakaro;  
Jātirūpaṃ dvidhākāsi, jātirūpavirocano.
554. Jaratā kālaharaṇaṃ, rūpānaṃ pākalakkhaṇā;  
Navatāpāyanarasā, purāṇattanti gayhati.
555. Antimakkhaṇasampatti, paribhijjanalakkhaṇā;  
Aniccatā haraṇarasā, khayabhāvena gayhati.
556. Iti lakkhaṇarūpaṃ tu, tividhaṃ bhinnakālikam;  
Sabhāvarūpadhammesu, taṃtaṃkālopalakkhitam.
557. Yena lakkhīyati rūpaṃ, bhinnākāraṃ khaṇe khaṇe;  
Vipassanāyattathāya, tamiccāha tathāgato.
558. Icevaṃ saporicchedā, savikārā salakkhaṇā;  
Akicchā paṭivedhāya, dayāpannena tādinā.
559. Rūpadhammā sabhāvena, vijjamānāti bhāsītā;  
Ajjhattikādibhedena, bahudhā bhijjare katham;
560. Dvārabhūtā pavattenti, cittamattāti kappitam;  
Rūpamajjhattikam tasmā, pasādā bāhiraṃparaṃ.
561. Vaṇṇo gandho raso jā ca, bhūtarūpaṇca bhāsitam;  
Avinibbhogarūpaṃ tu, vinibbhogaṃ panetaram.
562. Sattaviññāṇadhātūnaṃ, nissayattā yathārahaṃ;  
Pasādā hadayañceva, vatthunā vatthu desitam.
563. Pañcaviññāṇupādinna-liṅgādi ca pavattito;  
Pasādā jīvitam bhāvā, cendriyaṃ nendriyaṃparaṃ.
564. Pañcaviññāṇakammānaṃ, pavattimukhabhāvato;  
Dvāraṃ pasādaviññatti-paramadvāramīritam.
565. Paṭihaññantaññamaññaṃ, pasādavisayā pana;  
Tasmā sappatiḅhaṃ nāma, rūpamappatiḅhaṃparaṃ.
566. Dvārālambaṇabhāvena, sabhāveneva pākāṭā;  
Te evolārikaṃ tasmā, sesaṃ sukhumamīritam.
567. Olārikasabhāvena, pariggahasukhā tahim;  
Te eva santikerūpaṃ, dūrerūpaṃ panetaram.
568. Taṇhādiṭṭhīhupetena, kammunādinnaḅhāvato;  
Kammajātamupādinnaṃ, anupādinnaḅhāvato.
569. Cakkhunā dissamānattā, sanidassananāmakaṃ;

Rūpameva tato sesa-manidassanamabravuṃ.

570. Sanidassanarūpañca, rūpaṃ sappaṭighaṃ tathā;  
Anidassanamaññaṃ tu, thūlaṃ sappaṭighaṃ mataṃ.
571. Anidassanarūpañca, sesaṃ appaṭighaṃ tathā;  
Rūpaṃ tividhamiccevaṃ, vibhajanti vicakkhaṇā.
572. Appattagocaraggāhirūpaṃ cakkhādikaṃ dvayaṃ;  
Sampattaggāhi ghānādi-ttayaṃaggāhikaṃ rūpaṃ.
573. Diṭṭhaṃ rūpaṃ suttaṃ saddo, mutaṃ gandhādikattayaṃ;  
Viññāṇeneva ñeyyattā, viññātamaparaṃ bhava.
574. Hadayaṃ vatthumevettha, dvāraṃ viññattikadvayaṃ;  
Pasādā vatthu ca dvāraṃ, aññaṃ tubhayavajjitaṃ.
575. Bheditvā rūpamiccevaṃ, tasseva puna paṇḍito;  
**Samuṭṭhānajanakehi**, vibhāveyya yathārahaṃ.
576. Kusalākusalaṃ kamma-matītaṃ kāmikaṃ tathā;  
Rūpāvacaṃmiccevaṃ, pañcaviññāṇa-pākāruppavivajjitaṃ.
577. Paṭisandhimupādāya, sañjaneti khaṇe khaṇe;  
Kāmarūpesu rūpāni, kammajāni yathārahaṃ.
578. Jāyantaṃ pañcaviññāṇa-pākāruppavivajjitaṃ;  
Bhavaṅgādimupādāya, samuppādeti mānasaṃ.
579. Sītuṇhotusamaññātā,  
Tejodhātu ṭhitikkhaṇe;  
Tathevajjhohaṭṭhāro,  
Kāme kāyappaṭiṭṭhito.
580. Ajjhataṃ pana cattāro, bāhiro tupalabbhati;  
Sabbe kāmabhava rūpe, āhāro na samīrito.
581. Pavatte honti cattāro, kammamevopapattiyāṃ;  
Jīvamānassa sabbepi, matassotu siyā na vā.
582. Kammaṃ cittotumāhāra-miccevaṃ pana paṇḍitā;  
Rūpaṇaṃ janakattena, paccayāti pakāsayuṃ.
583. Hadayindriyarūpāni, kammajāneva cittajaṃ;  
Viññattidvayaṃirenti, saddo cittotujo mato.
584. Cittotukabaḷīkāra-sambhūtā lahutādayo;  
Kammacittotukāhāra-jāni sesāni dīpaye.
585. Jāyamānādirūpaṇaṃ, sabhāvattā hi kevalaṃ;  
Lakkhaṇāni na jāyanti, kehicīti pakāsitaṃ.

586. Yadijātādayo tesa-mavassaṃ taṃsabhāvatā;  
Tesaṅca lakkhaṇānanti, anavatthā bhavissati.
587. Aṭṭhārasa pannarasa, terasa dvādasāti ca;  
Kammacittotukāhāra-jāni honti yathākkamaṃ.
588. **Kalāpāni** yathāyogaṃ, tāni saṅgayha paṇḍitā;  
Nava cha caturo dveti, ekavīsati bhāvayaṃ.
589. Jīvitañcāvinibbhoga-rūpaṅca, saḥavuttito;  
Saṅgayha cakkhudasaṃ, cakkhumādāya bhāsitaṃ.
590. Tathā sotaṅca ghānaṅca, jivhaṃ kāyaṃ yathākkamaṃ;  
Itthibhāvaṅca pumbhāvaṃ, vatthumādāya dīpaye.
591. Avinibbhogarūpena, jīvitanaṃvaṃ bhava;  
Icevaṃ **kammajā** nāma, kalāpā navadhā ṭhitā.
592. Avinibbhogarūpaṅca, suddhaṭṭhakamudīritaṃ;  
Kāyaviññattiyā saddhiṃ, navakanti pavuccati.
593. Vacīviññattisaddehi, dasakaṃ bhāsitaṃ tathā;  
Lahutādekādasakaṃ, lahutādīhi tīhipi.
594. Kāyaviññattilahutā-dīhi dvādasakaṃ mataṃ;  
Vacīviññattilahutā-dīhi terasakaṃ tathā.
595. Gahetvākārabhedaṅca, taṃtaṃkālopalakkhitaṃ;  
Iti **cittasamuṭṭhānā**, cha kalāpāti bhāsitā.
596. Suddhaṭṭhakaṃ tu paṭṭhamaṃ, saddena navakaṃ mataṃ;  
Lahutādekādasakaṃ, lahutādisamāyutaṃ.
597. Saddena lahutādīhi, tathā dvādasakaṃ bhava;  
Kalāpā **utusambhūtā**, catuddhevaṃ pakāsitā.
598. Suddhaṭṭhakaṅca lahutā-dekādasakamiccapi;  
Kalāpā**hārasambhūtā**, duvidhāva vibhāvitā.
599. Kalāpānaṃ pariccheda-lakkhaṇattā vicakkhaṇā;  
Na kalāpaṅgamiccāhu, ākāsaṃ lakkhaṇāni ca.
600. Icevaṃ catusambhūtā, kalāpā ekavīsati;  
Sabbe labbhanti ajjhattaṃ, bāhirotusamuṭṭhitā.
601. Aṭṭhakaṃ saddanaṃvaka-miti dveddhāva bhāsitā;  
Matakāyepi te eva, siyumiccāhu paṇḍitā.
602. Kāme sabbepi labbhanti, sabhāvānaṃ yathārahaṃ;  
Sampunṇāyatanānaṃ tu, pavatte catusambhavā.
603. Dasakāneva sabbāni, kammajāneva jātiyaṃ;

Cakkhusotaghānabhāva-dasakāni na vā siyuṃ.

604. Vatthukāyadasakāni, sabhāvadasakāni vā;  
Gabbhaseyyakasattānaṃ, tato sesāni sambhavā.
605. Kammaṃ rūpaṃ janetevaṃ,  
Mānasaṃ sandhito paraṃ;  
Tejodhātu ṭhitippattā,  
Āhārajjhohaṭṭo tathā.
606. Icevevaṃ catusambhūtā, rūpasantati kāmināṃ;  
Dīpajālāva sambandhā, yāvajīvaṃ pavattati.
607. Āyuno vātha kammaṃ, khayenobhinnameva vā;  
Aññaena vā marantāna-mupacchedakakammunā.
608. Sattarasacittakkhaṇamāyu rūpānamīritaṃ;  
Sattarasamacittassa, cuticittoparī tato.
609. Ṭhitikālamupādāya, kammajaṃ na paraṃ bhava;  
Tato bhijjatupādinnaṃ, cittaṃjāhārajaṃ tato.
610. Icevevaṃ matasattānaṃ, punadeva bhavantare;  
Paṭisandhimupādāya, tathā rūpaṃ pavattati.
611. Ghānajiṃvāhākāyabhāvadasakāhārajaṃ pana;  
Rūpaṃ rūpabhava natthi, paṭisandhipavattiyaṃ.
612. Tattha gandharasoṃjā ca, na labbhantīti kecana;  
Kalāpā ca gaṇetabbā, tatthetaṃ rūpavajjitā.
613. Ṭhitikkhaṇaṅca cittassa, te eva paṭisedhayuṃ;  
Cittabhaṅgakkhaṇe rūpa-samuppattiṅca vārayuṃ.
614. Cakkhusotavattusaddacittajampi asaṅṅisu;  
Arūpe pana rūpāni, sabbathāpi na labbhare.
615. Itthaṃ panettha vimalena vibhāvanatthaṃ,  
Dhammaṃ sudhammamupagamma surādhivāsaṃ;  
Rūpaṃ arūpasavibhāgasalakkhaṇaṃ taṃ,  
Vuttaṃ pavuttamabhidhammanaye mayāpi.
616. Rūpavibhāgamimaṃ suvibhattaṃ, rūpayato pana cetasi niccaṃ;  
Rūpasamiddhajineritadhamme, rūpavatī abhivaḍḍhati paṅṅā.

Iti nāmarūpaparicchede rūpavibhāgo nāma

Chaṭṭho paricchedo.

## 7. Sattamo paricchedo

### Sabbasaṅgahavibhāgo

617. Catupaññāsa dhammā hi, nāmanāmena bhāsītā;  
Aṭṭhārasavidhā vuttā, rūpadhammāti sabbathā.
618. Abhiññeyyā sabhāvena, dvāsattati samīritā;  
Saccikaṭṭhāparamatthā, vatthudhammā salakkhaṇā.
619. Tesam dāni pavakkhāmi, **sabbasaṅgāhikaṃ nayaṃ**;  
Ābhidhammikabhikkhūnaṃ, hatthasāraṇanuttaraṃ.
620. Dukā tikā ca khandhāyatanato dhātusaccato;  
Paṭiccasamuppādā ca, paccayā ca samaññato.
621. Paccayo eva nibbānamapaccayamasāṅkhatam;  
Asāṅkhāraṇanuppādam, sassatam niccalakkhaṇam.
622. Paccayā ceva saṅkhārā, saṅkhatā ca tatopare;  
Uppādavayadhammā ca, paccayaṭṭhitikā tathā.
623. Nibbānaṃ rūpadhammā ca, vippayuttāva kevalaṃ;  
Ārammaṇā eva nāma, nālambanti hi kiñcipi.
624. Ekuppādanirodhā ca, ekālambaṇavatthukā;  
Saṃsaṭṭhā sampayuttā ca, sahaṅgā yathārahaṃ.
625. Aññaṃaṇṇenupatthaddhā, sabbattha sahaṅguttino;  
Sāraṇaṇṇārammaṇā ca, cittacetāsikā matā.
626. Vipassanāya bhūmīti, tattha tebhūmakā matā;  
Lokiyā pariyāpannā, vaṭṭadhammā sauttarā.
627. Sakkāyadhammā sabhaya, tīraṃmorimanāmakam;  
Saṃyojanīyā samalā, tathā nīvaraṇīyakā.
628. Saṃklesikā parāmaṭṭhā, upādānīyasāsavā;  
Oghaṇīyā yogaṇīyā, ganthaṇīyāti bhāsītā.
629. Aññaṃ apariyāpannā, vivaṭṭā cāvīpassiyā;  
Lokuttarānuttarā ca, nosaṃyojanīyādayo.
630. Kammaṅgā upādinnā, nāma vuccanti sāsavā;  
Anupādinnakā nāma, tato sesā pavuccare.
631. Dhammā sappātibhāgāti, kusalākusalā matā;  
Appātibhāgadhammāti, tadaññaṃ paridīpaye.
632. Saraṇā ca pahātabbā, dvādasākusalā pana;  
Tadaññaṃ araṇā nāma, pahātabbā na kehici.
633. Rūpino rūpadhammā ca, nāmadhammā arūpino;  
Evamādīpabhedenā, **dvidhā bhedaṃ** vibhāvaye.

634. Bālā dhammā tapanīyā, kaṇhā ca kaṭukapphalā;  
Asevitabbā sāvajjā, dvādasākusalā matā.
635. Paṇḍitā cātapanīyā, sukkā ca sukhadāyakā;  
Sevitabbānavajjā ca, kusalā ekavīsati.
636. Kriyā vipākā rūpañca, nibbānanti catubbidhā;  
Vuttā abyākatā nāma, dhammā tabbiparītato.
637. Hīnā dhammā parittā ca, kāmāvacarabhūmikā;  
Rūpārūpā pavuccanti, majjhimā ca mahaggaṭā.
638. Appamāṇā paṇītā ca, dhammā lokuttarā matā;  
Saṃkiliṭṭhasaṃklesikā, dvādasākusalā tathā.
639. Asaṃkiliṭṭhasaṃklesikā, dhammā tebhūmakāpare;  
Asaṃkliṭṭhāsaṃklesikā, nava lokuttarā siyuṃ.
640. Vipākā te pavuccanti, vipākā catubhūmakā;  
Vipākadhammā nāmāti, kusalākusalā matā.
641. Kriyā rūpañca nibbānaṃ, na pākaṃ na tu paccati;  
Ācayagāmino dhammā, puññāpuññāva sāsavā.
642. Vuttāpacayagāmino, kusalānuttarā pana;  
Kriyā rūpañca nibbānaṃ, pākā cobhayavajjitā.
643. Paṭhamānuttaro maggo, dassanaṃ bhāvanāpare;  
Tadaññe dvayanimmuttā, sabbepi paramatthato.
644. Satta lokuttarā heṭṭhā, vuttā sekkhāti tādinā;  
Arahattaphalameva, asekkhanti pakāsitaṃ.
645. Lokiyāpi ca nibbānaṃ, bhāsītobhayavajjitā;  
Evamādippakārehi, **tivīdhāti** vibhāvaye.
646. Atītānāgataṃ rūpaṃ, paccuppannamathāparaṃ;  
Ajjhataṃ vā bahiddhā vā, sukhumoḷārikaṃ tathā.
647. Hīnaṃ paṇītaṃ yaṃ dūre, santike vā tadekato;  
Sabbāṃ rūpaṃ samodhāya, **rūpakkhandhoti** vuccati.
648. Tatheva **vedanākkhandho**, nāma yā kāci vedanā;  
**Saññākkhandhoti** saññā ca, rāsibhāvena bhāsītā.
649. Vaṭṭadhammesu assādaṃ, tadassādopasevanaṃ;  
Vinibhujja nidassetuṃ, khandhadvayamudāhaṭaṃ.
650. Vivādamūlasaṃsāra-kamahetunidassanaṃ;  
Sandhāya vedanā saññā, katā nānāti kecana.
651. Cittasaṃsaṭṭhadhammānaṃ, cetanāmukhato pana;



**Saṅkhārakkhandhanāmena, dhammā cetasikā matā.**

652. Sabbabhedam tathā cittaṃ, **viññāṇakkhandha** sammataṃ;  
Bhedābhāvena nibbānaṃ, khandhasaṅghanissaṭaṃ.
653. Ālambanīyabhāvena, upādānopakārato;  
**Pañcupādānakkhandhāti**, lokuttaravivajjitā.
654. Yathā thūlaṃ hitatthāya, pariggāhakayoginaṃ;  
Dhammā tebhūmakā eka-bhūmibhāvāya desitā.
655. Bhājanaṃ bhojanaṃ tassa, byañjanaṃ bhojako tathā;  
Bhuñjitā cāti pañcete, upamenti yathākkamaṃ.
656. Gilānasālā gelaññaṃ, asappāyopasevanā;  
Samuṭṭhānaṃ gilānoti, upamenti ca paṇḍitā.
657. Cārako kāraṇaṃ tattha, aparādho ca kārako;  
Aparādhakato coro, iti copamitā puna.
658. Niccādhipīlanaṭṭhena, bhārāti paridīpitā;  
Klesadukkhamakhenete, khādakā ca nirantaraṃ.
659. Anattābhāvaṃ niccamukkhittāsikaverino;  
Maccumārābhidheyattā, vadhakāti ca bhāsītā.
660. Vimaddāsahanaṃ rūpaṃ, pheṇapiṇḍaṃva dubbalaṃ;  
Muhuttaramaṇīyattā, vedanā bubbuḷūpamā.
661. Marīcikūpamā saññā, vipallāsakabhāvato;  
Saṅkhārāpi ca nissārā, kadalikkhandhasādisā.
662. Nānappakāraṃ cintentaṃ, nānāklesavimohitaṃ;  
Palambhatīti viññāṇaṃ, māyāsamamudīritaṃ.
663. Iccevaṃ pañcupādānakkhandhā khandhā ca kevalaṃ;  
**Pañcakkhandhāti** nāmena, desitāti vibhāvaye.
664. Ajjhatañca bahiddhā ca, viññāṇuppattikāraṇaṃ;  
Dvārālambaṇabhedenā, dvedhāyatanaṃmīritaṃ.
665. Cakkhādajjhattikaṃ tattha, chadvārāyatanaṃ bhava;  
Bāhirāyatanaṃ nāma, tathā rūpādigocaraṃ.
666. Iti vīthippavattānaṃ, dvārālambaṇasaṅgaho;  
Āgame abhidhamme tu, sabbathāpi yathārahaṃ.
667. Tathāhanantarātīto, jāyamānassa pacchato;  
Mano sabbopi sabbassa, manassāyatanaṃ **bhave**.
668. Tathā pubbaṅgamaṭṭhena, saha jānamarūpinaṃ;  
Dvārābhāvena viññāṇaṃ, sabbamāyatanaṃ matam.

669. Manāyatanamiccevaṃ, pasādāyatanam tathā;  
Pañcaviññāṇadhammānaṃ, iti chaddhā vibhāvaye.
670. Pañcappasādavisayā, pañcāyatanasammata;  
Sesaṃ rūpaṇca nibbānaṃ, sabbe cetasikāti ca.
671. Ekūnasatṭhidhammānaṃ, dhammāyatanasaṅgaho;  
Iti chaddhā pakāseṇti, bāhirāyatanam budhā.
672. Suññagāmo va daṭṭhabba-majjhaticcāro;  
Gāmaghātakacorāva, taṃ hanantaṃ va bāhiraṃ.
673. Nāmapavattimulhānaṃ, taduppattikakāraṇaṃ;  
**Dvādasāyatanāni**, vuttamitthaṃ mahesinā.
674. Samattā bhāvamattena, dhārentīti salakkhaṇaṃ;  
Dvārāmbataduppanna-pariyāyena bheditā.
675. Manāyatanametthāha, satta viññāṇadhātuyo;  
Ekādasa yathāvuttā, iccaṭṭhārasa dhātuyo.
676. Antādikā manodhātu, manoviññāṇadhātuyā;  
Pavesāpagame dvāra-pariyāyena tiṭṭhati.
677. Bherītaladaṇḍaghosa-samaṃ chakkaṃ yathākkamaṃ;  
Kaṭṭhāraṇipāvākādi-samaṇca tividhaṃ bhava.
678. Dukkhaṃ samudayo ceva, nirodho ca tathāparo;  
Maggo cāti catuddhāha, saccaṃ saccaparakkamo.
679. Bhāro ca bhāradānaṇca, bhāranikkhepanaṃ tathā;  
Bhāranikkhepanūpāyo, iccopammaṃ yathākkamaṃ.
680. Rogo roganidānaṇca, rogavūpasamo tathā;  
Rogabhesajjamiceva-mupamāhi ca dīpitaṃ.
681. Visarukkho rukkhamūlaṃ, rukkhachedo tathāparo;  
Rukkhachedakasatthanti, catudhopamitaṃ tathā.
682. Tīramorimasāṅkhātaṃ, mahogho pārimaṃ tathā;  
Tadatikkamupāyoti, upamenti ca taṃ budhā.
683. Sacchikatvāna paccakka-miccopammaṃ yathākkamaṃ;  
Samācikkhi vimokkhāya, saccaṃ tacchaniyāmato.
684. Tathā hi dukkhaṃ nābādhaṃ, nāññaṃ dukkhā ca bādhaṃ;  
Bādhaṃ kattanīyāmena, dukkhasaccamīrittaṃ.
685. Taṃ vinā nāññato dukkhaṃ, na hoti na ca taṃ tato;  
Dukkhaṃ hetunīyāmena, saccamāha visattikaṃ.
686. Nāññā nibbānato santi, na ca santaṃ na taṃ yato;

Santabhāvaniyāmena, nibbānaṃ saccamuttamaṃ.

687. Nāññaṃ maggāca niyyānaṃ, aniyyāno na cāpi so;  
Tasmā niyyānabhāvena, maggo saccanti sammato.
688. Iti tacchāvipallāsa-bhūtabhāvo catūsupi;  
Saccaṭṭhoti viniddiṭṭho, dukkhādīsavavisesato.
689. Pīḷanaṭṭho saṅkhataṭṭho, santāpaṭṭho ca bhāsito;  
Viparīṇāmaṭṭho cāti, dukkhassevaṃ catubbidhā.
690. Āyūhanā nidānā ca, saṃyogā palibodhato;  
Dukkhasamudayassāpi, catudhatthā pakāsītā.
691. Nissāraṇā vivekā cā-saṅkhatāmatato tathā;  
Atthā dukkhanirodhassa, catudhāva samīritā.
692. Niyyānato hetuto ca,  
Dassanādhipateyyato;  
Maggassāpi catuddheva-  
Miti soḷasadhā ṭhitā.
693. Saccikaṭṭhaparamatthaṃ, tacchābhisamayaṭṭhato;  
Tathatthamapi saccaṭṭhaṃ, paṭṭhapentettha paṇḍitā.
694. Tadetam paṭivijjhanti, ariyāva catubbidham;  
Vuttamariyasaccanti, tasmā nāthena tam katham;
695. Jāti jarā ca maraṇam, soko ca paridevanā;  
Dukkhañca domanassañca, upāyāso tathāparo.
696. Appiyehi ca saṃyogo, vippayogo piyehi ca;  
Yampi na labhaticchanto, tampi dukkhamidaṃ mataṃ.
697. Apāyesupapajjantā, cavantā devalokato;  
Manussesu ca jīrantā, nānābyasanapīḷitā.
698. Socantā paridevantā, vedentā dukkhavedanaṃ;  
Domanassehi santattā, upāyāsavighātino.
699. Aniṭṭhehi akantehi, appiyehi samāyutā;  
Saṅkhārehi ca sattehi, nānānatthavidhāyibhi.
700. Iṭṭhehi piyakantehi, manāpehi viyojitā;  
Saṅkhārehi ca sattehi, nānāsampattidāyibhi.
701. Dukkhāpagamamicchantā, patthayantā sukhāgamaṃ;  
Alabbhaneyyadhammesu, pipāsāturamānasā.
702. Kicchādhippannā kapaṇā, vipphandantā rudammukhā;  
Taṇhādāsā parābhūtā, bhavasamsārasaṃkaṭe.

703. Yaṃ tebhūmakanissandaṃ, kaṭukaṃ gāḷhavedanaṃ;  
Vedenti saṃsāraphalaṃ, taṃjātādiṃ vinā kuto.
704. Tasmā jātādibhedehi, bādhamānā bhayāvahā;  
Dukkhā ca dukkhavatthu ca, bahudhāpi papañcitā.
705. Te sabbe pañcupādāna-kkhandhā eva samāsato;  
Dukkhadhiṭṭhānabhāvena, dukkhatāya niyāmitā.
706. Tasmā tebhūmakā dhammā, sabbe taṇhāvivajjitā;  
**Dukkhasaccanti** desesi, desanākusalo muni.
707. Virāgatejālābhena, taṇhāsnehasinehitā;  
Visarukkova jātādinānānatthaphalodayaṃ.
708. Nandirāgānubandhena, santānamavakaḍḍhitā;  
Punabbhavābhiniḅattibhāvena parivattati.
709. Patiṭṭhitañca tatthetamattasnehānusevanaṃ;  
Gocarānunayābaddhaṃ, rāgamucchāsamohitaṃ.
710. Klesarāsiparikliṭṭhaṃ, byasanopaddavāhataṃ;  
Dukkhasallasamāviddhaṃ, vihaññati nirantaraṃ.
711. Have virāgatejena, vicchinne sati sabbathā;  
Kena bandhena santāna-mānessati bhavantaraṃ.
712. Bhavantaramasampatte, santānamhi vivaṭṭite;  
Kimadhiṭṭhāya jātādidukkhadhammā pavattare.
713. Tasmā mokkhavipakkhena, taṇhādukkhavidhāyini;  
**Dukkhasamudayo** nāma, saccamiccāha nāyako.
714. Sabbadukkhavinimuttaṃ, sabbaklesavinissaṭaṃ;  
**Dukkhanirodhanā**mena, saccaṃ vuccati accutaṃ.
715. Dukkhañca pariḷānanto, pajahaṃ dukkhasambhavaṃ;  
Nibbānaṃ padamārabba, bhāvanāvīthimosāṭo.
716. Niyyānaṭṭhaṅgiko **maggo**, sabbadukkhavimuttiyā;  
Dukkhanirodhagāmīti, saccaṃ tasmā tamīritaṃ.
717. Catusaccavinimuttā, sesā lokuttarā matā;  
Maggaṅgasampayuttā ca, phaladhammā ca sabbathā.
718. Itthaṃ sahetukaṃ dukkhaṃ, sopāyāmatanibbutiṃ;  
Paṭipattihitattāya, vibhāveti vināyako.
719. Sappāṭihāriyaṃ dhammaṃ, desetvāna anuttaro;  
Catudhāriyasaccāni, vibhajīti vibhāvaye.
720. Tabbhāvabhāvibhāvena, paccayākāralakkhitaṃ;

Tiyaddham dvādasāṅgañca, vīsātākārasaṅgahaṃ.

721. Tisandhi catusaṅkhepaṃ, tivatṭaṅca tilakkhaṇaṃ;  
Tebhūmakamaṃ dvimūlañca, catukkanayamaṇḍitaṃ.
722. Paccekamaṃ catugambhīra-manupubbavavatthitaṃ;  
Avijjākūṭasaṅkhātamaṃ, bandhāvicchedamaṇḍalaṃ.
723. Sokādīnatthanissandaṃ, kevalamaṃ dukkhapiṇḍitaṃ;  
**Paṭiccasamuppādoti**, bhavacakkaṃ pavuccati.
724. Paṭividdhāya vijjāya, bhaṅgāvijjāya sabbathā;  
Vivatṭatānupubbena, hetubhaṅgā yathākathaṃ.
725. Asmiṃ sati idaṃ hoti, assuppādā idaṃ bhava;  
Asatāsmiṃ na taṃ hoti, tassa bhaṅgāva bhijjati.
726. Etamatthaṃ purakkhatvā, paccayaṭṭhiti dassitā;  
Paṭiccasamuppādassa, idappaccayatā naye.
727. Tathā hi jātiyāpāha, paccayattaṃ mahāmuni;  
Jarāmarañadhammānaṃ, mattābhedeṇi vatthuto.
728. Āhaccapaccayaṭṭhamhi, nedisī paccayaṭṭhiti;  
Tattha dhammantarasseva, paccayaṭṭho vibhāvito.
729. Vuttamācariyenetaṃ, paṭṭhānanayasaṅgahe;  
Labbhamānanayaṃ tāva, dassanatthaṃ papañcito.
730. Ettha tasmānupekkhitvā, āhacca niyamaṃ budho;  
Tabbhāvabhāvimattena, paccayatthaṃ vibhāvaye.
731. Tatthāvijjā ca saṅkhārā, **addhātītoti** bhāsītā;  
Viññāṇaṃ nāmarūpañca, saḷāyatanasaññitaṃ.
732. Phasso ca vedanā taṇhā, upādānaṃ bhavoti ca;  
**Paccuppanno** bhava **addhā**, bhava **addhā anāgato**.
733. Jāti jarā maraṇanti, dvedhā hoti ca sabbathā;  
Kālattayavavatthānaṃ, **tiyaddhamiti** dīpaye.
734. Tatthāvijjāti aññāṇaṃ, catusaccesu bhāsitaṃ;  
Pubbante cāparante ca, paccayaṭṭhitiyaṃ tathā.
735. Apuññātisaṅkhāroti, vuttā dvādasa cetanā;  
Tathā puññābhisaṅkhāro, kāmarūpesu bhāsito.
736. Āneñjātisaṅkhāroti, vuttārappā catubbidhā;  
Kāyabbacīmanodvāraṃ, patvā tāyeva cetanā.
737. Vuttā kāyavacīcittasaṅkhārāti mahesinā;  
**Saṅkhārāti** vibhattevamekūnatimsa cetanā.

738. Ekūnavīsatividhaṃ, paṭisandhikkhaṇe tathā;  
Pavatte dvattiṃsavidhaṃ, **viññāṇaṃ** pākamānaṃ.
739. Tividhaṃ vedanā saññā, saṅkhārāti vibheditaṃ;  
**Nāmarūpaṃ** tu duvidhaṃ, bhūtopādāyabhedato.
740. **Salāyatana**saṅkhātā, cakkhādajjhattikaṃ matā;  
Cakkhusamphassādibhedā, **phasso** chadhā pakāsito.
741. Sukhā dukkhā upekkhāti, **vedanā** tividhā bhava;  
Kāme bhava ca vibhave, **taṇhāti** tividhā matā.
742. Kāmupādānādibhedā, **upādānā** catubbidhā;  
Kammopapattibhedena, **bhavo** nāma dvidhā mato.
743. Attabhāvābhiniḃbatti, **jāti** nāma **jarā** pana;  
Purāṇabhāvo **maraṇaṃ**, pariyoṣānamīritaṃ.
744. **Dvādaśaṅgappabhedena**, vibhattevaṃ mahesiṇā;  
Paṭiccasamuppādoti, paccayā eva kevalā.
745. Paṭicca phalabhāvena, sāpekkhaṃ ṭhitamattani;  
Apaccakkhāya saṅgantvā, uppādentīti paccayā.
746. Avijjāsaṅkhārānaṃ tu, gahaṇe gahitāva te;  
Taṇhupādānabhavāpi, iti pañcettha hetuyo.
747. Taṇhupādānabhavānaṃ, gahaṇe gahitā puna;  
Avijjā saṅkhārā cāti, pañcevetthāpi hetuyo.
748. Viññāṇādisarūpena, dassitaṃ phalapañcakaṃ;  
Jātijjarāmarāṇena, tadeva gahitaṃ puna.
749. Atīte hetavo pañca, idāni phalapañcakaṃ;  
Idāni hetavo pañca, āyatiṃ phalapañcakaṃ.
750. Itthaṃ bhedena saṅgayha, dvādaśaṅgaṃ vicakkhaṇā;  
Atthāpattivisesena, **vīsataḱāramīrayuṃ**.
751. Hetuphalaṃ phalahetu, puna hetuphalanti ca;  
**Tisandhi catusaṅkhepaṃ**, tamevāhu vibhāvino.
752. Avijjātaṇhupādānā, klesavaṭṭanti bhāsītā;  
Bhavekadeso saṅkhārā, kammavaṭṭaṃ tatoparaṃ.
753. Vipākavaṭṭamiccevaṃ, vivaṭṭenāvivaṭṭitaṃ;  
**Tivaṭṭavaṭṭitaṃ** hutvā, vaṭṭameṭaṃ pavattati.
754. Aniccaṅca khayaṭṭhena, dukkhametaṃ bhayaṭṭhato;  
Anattāsāraḱaṭṭhena, vaṭṭamevaṃ **tilakkhaṇaṃ**.
755. Saṃsārasseva vuttāyaṃ, paccayānaṃ paramparā;

Paṭiccasamuppādoti, tato **tebhūmako** mato.

756. Bandhāvijjāṇḍakosena, vijjādibhedavajjitā;  
Vimuttīrasamappattā, bhavataṇhāpipāsītā.
757. Abhisāṅkhārabhāvena, paṭibandhati santati;  
Tathābhisāṅkhatā pāka-bhāvāya parivattati.
758. Vipākā puna kammāni, pākāni puna kammato;  
Iccevaṃ pariyāyena, saṃsāroyaṃ pavattati.
759. Iccāvijjābhavataṇhā, vaṭṭopatthambhakā matā;  
Sampayuttānusayitā, tasmā vaṭṭaṃ **dvimūlakam**.
760. Paccayapaccayuppanna-santānabhedato pana;  
Nānābhūtānamekantaṃ, bījarukkhādayo viya.
761. Tathāpi tesam dhammānaṃ, vatthulakkhaṇabhedato;  
Dīpavaṭṭisikhānaṃva, natthi ekantamekatā.
762. Hetuhetusamuppannā, ihābhogavivajjitā;  
Paccayāya ca paccetumabyāpārā tato matā.
763. Avijjādīnamevātha, sambhave sambhavanti ca;  
Saṅkhārādisabhāvāti, ṭhitevaṃdhammatāya te.
764. Itthamekattanānattā, abyāpāro tathāparo;  
Etthevaṃdhammatā ceti, **nayā** vuttā catubbidhā.
765. Phalānaṃ paccayuppatti, paccayattho ca hetusu;  
Sabhāvapaṭivedho ca, desanā cittatāti ca.
766. Atthadhammapaṭivedha-desanānaṃ yathākkamaṃ;  
Atigambhīrabhāvena, **catugambhīramīritaṃ**.
767. Padhānakāraṇattā hi, avijjādīparamparā;  
Kamena saṅkhārādīnaṃ, paccayāti **vavatthitā**.
768. Tathā hi jātiyā eva, jarāmarāṇasambhavo;  
Ajātānaṃ jarā vātha, marāṇaṃ vā kuto bhavo.
769. Sāvopapattisaṅkhātā, jāti kammabhavoditā;  
Aṅkuro viya bījamhā, tattha tathopalabbhati.
770. Sampayogānusayato, upādānappatiṭṭhitā;  
Āyūhanti ca kammāni, ākaḍḍhantopapattikaṃ.
771. Upādāniyadhammesu, taṇhāsnehapipāsītā;  
Daḷhī kubbantupādānaṃ, piyarūpābhinandino.
772. Vedanīyesu dhammesu, assādamanupassato;  
Vedanāpaccayā taṇhā, samuṭṭhāya pavaḍḍhati.

773. Itthānīṭṭhañca majjhataṃ, phusantā pana gocaraṃ;  
Vedenti vedanaṃ nāma, nāphusantā kudācanaṃ.
774. Phusatālambaṇaṅceso, saḷāyatanasambhāve;  
Dvārābhāve kuto tassa, samuppatti bhavissati.
775. Saḷāyatanametañca, nāmarūpūpanissitaṃ;  
Chaphassadvārābhāvena, pavattati yathārahaṃ.
776. Pubbaṅgamādhiṭṭhānena, viññāṇena paṭiṭṭhahe;  
Nāmarūpaṃ upatthaddhaṃ, paṭisandhipavattiyaṃ.
777. Saṅkhārajanitaṃ hutvā, paṭiṭṭhāti bhavantare;  
Viññāṇaṃ janakābhāve, tassuppatti kathaṃ bhāve.
778. Avijjāyānusayite, paṭivedhavirodhite;  
Vaṭṭānugatasantāne, paṭisandhiphalāvahe.
779. Pākadhammā sabhāvena, pavattanti hi cetanā;  
Avijjāpaccayā honti, saṅkhārāti tato matā.
780. Paṭividdhesu saccesu, paccayānaṃ paramparā;  
Viḡhātīyati sabbāpi, tato vaṭṭaṃ vivaṭṭati.
781. Iccāvijjāvirodhena, tassā vaṭṭappavattiyā;  
Saṅghātanikābhāvena, avijjā kūṭasammata.
782. Jarāmarāṇasaṅghāṭa-paṭipīlitacetasaṃ;  
Klesamucchāparetānaṃ, sā cāvijjā pavaḍḍhati.
783. Iccābaddhamavicchedaṃ, idappaccayamaṇḍalaṃ;  
Cakkanemisamāvaṭṭaṃ, kamena parivattati.
784. Vaṭṭassa dvādasaṅgassa, tassa tebhūmakassa tu;  
Dukkakkhandhassa dassesi, nissandena nidassanaṃ.
785. Sokañca paridevañca, tathā dukkhañca kāyikaṃ;  
Domanassamupāyāsaṃ, nānābyasanasambhavaṃ.
786. Iccāturamaniccantaṃ, mahopaddavasānkulaṃ;  
Bahupaklesupassaṭṭhaṃ, dukkhametanti piṇḍitaṃ.
787. Icevaṃ pañcupādāna-kkhandhabheditasaṅgaho;  
Attabhāvabhavaratho, hatthamuttaṃva yantakaṃ.
788. Gatiṭṭhitinivāsesu, saṃsaranto nirantaraṃ;  
Cakkenetena yātīti, bhavacakkamidaṃ matam.
789. Avijjāṇḍaṃ padāletvā, paṭivedhappavattiyā;  
Paccayappaccayuppannā, supaṭṭhanti sabhāvato.
790. Aniccā dukkhanattā ca, bhāṅgavanto bhayāvahā;



Sādīnavāti saṅkhāya, vivaṭṭamabhitiṭṭhati.

791. Tato sānusaṃyā taṇhā, nirujjhati punabbhave;  
Santānaratīyābhāvā, na pakkhandati sandhiyaṃ.
792. Avirulhikabhāvena, tattha vaṭṭavirodhite;  
Abhisāṅkhārahābhāvena, na pavattanti cetanā.
793. Paṭisandhipavattīpi, na janenti bhavantare;  
Iccāvijjānirodhena, niruddhā kammacetanā.
794. Paccayatthanīrodhena, saṅkhārānaṃ nirodhato;  
Viññānaṃ janakābhāvā, niruddhamiti vuccati.
795. Viññānādinīrodhā ca, nāmarūpādikaṃ tathā;  
Dukkakkhandhassimassevaṃ, nirodhoti pavuccati.
796. Iti vaṭṭavivaṭṭānaṃ, vasā dvedhā vibhāvito;  
**Paṭiccasamuppādoti**, desitoyaṃ mahesinā.
797. Sabbasaṅkhatadhammānaṃ, sabbe dhammāpi paccayā;  
Janakā cevupatthambhā, saṃvibhattā yathārahaṃ.
798. Āhacca paccayaṭṭhena, catuvīsatiḍḍhā ṭhitā;  
Hetūlambaṇḍhipatānantarasamanantarā.
799. Sahajātaaññaṃāñña-nissayā copanissayo;  
Purejātā pacchājātā-sevanā kammameva ca.
800. Pākāhārindriyajjhāna-maggaṅgasampayuttakā;  
Vipayuttatthi natthi ca, vigatāvīgatanti ca.
801. Pañcātītāva kammaṃ tu, vattamānañca īritāṃ;  
Sabbathāpi tayo vuttā, vattamānā tatopare.
802. Chadhā nāmaṃ tu nāmassa, pañcadhā nāmarūpinaṃ;  
Ekadhā puna rūpassa, rūpaṃ nāmassa cekadhā.
803. Paññattināmarūpāni, nāmassa duvidhā dvayaṃ;  
Dvayassa navadhā ceti, chabbidhā paccayā kathaṃ.
804. Niruddhānantarā eva, jāyantānāmanantaraṃ;  
Nāmadhammāva nāmānaṃ, janakattopakārakā.
805. Nirantarappavattiyā, anurūpamanantarā;  
**Anantarapaccayena**, paccayoti pakāsītā.
806. Samanantarabhāvena, tesāṃ te eva paccayā;  
**Samanantaranāmena**, paccayoti pakāsītā.
807. Atthibhāvāya dhammānaṃ, natthitāyopakārakā;  
**Natthipaccayanāmena**, vuttā te eva tādinā.

808. Okāsadānabhāvena, vigatāvopakārakā;  
Dhammā te eva vuccanti, **vigatappaccayoti** ca.
809. Javā paguṇabhāvāya, javānamupakārakā;  
**Āsevanapaccayoti**, niruddhānantarā matā.
810. Saṃsaṭṭhasahajātānaṃ, sampayogena paccayā;  
**Sampayuttapaccayoti**, nāmā nāmānamīritā.
811. Icceko vattamāno ca, pañcātītā yathārahaṃ;  
**Arūpānamarūpā** ca, **paccayā chabbidhā** matā.
812. Pavatte cittajātānaṃ, kammajānañca sandhiyaṃ;  
Rūpānaṃ sahajātāna-marūpānañca tādina.
813. Hetubhūtā cha dhammāpi, mūlaṭṭhenopakārakā;  
**Hetupaccayabhāvena**, paccayoti pakāsītā.
814. Tathā nijjhāyanaṭṭhena, tesamevopakārakā;  
**Jhānapaccayanāmena**, jhānadhammā vibhāvitā.
815. Tatheva niyyānaṭṭhena, paccayāti pakāsītā;  
**Maggapaccayanāmena**, maggaṅgā ca mahesinā.
816. Tesameva ca dhammānaṃ, sahajātāti cetanā;  
Kammabyāpārābhāvena, vattamānā ca paccayā.
817. Kaṭattārūpapākānaṃ, nānakkhaṇikacetanā;  
Abhisankhārābhāvena, janakappaccayā matā.
818. Icevaṃ duvidhā bheda, vipphāraṭṭhena cetanā;  
**Kammappaccayanāmena**, paccayoti pakāsītā.
819. Rūpānaṃ sahajātānaṃ, aññamaññamarūpināṃ;  
Paccayā santabhāvena, **vipākā** samudīritā.
820. Ekotītopi cattāro, vattamānāti **pañcadhā**;  
**Paccayā nāmadhammāva**, **nāmarūpānamīritā**.
821. Imassa rūpakāyassa, pacchājātopakārako;  
**Pacchājātapaccayoti**, **nāmaṃ rūpānamekadhā**.
822. Sattaviññāṇadhātūnaṃ, cha vatthūni pavattiyaṃ;  
Pañcaviññāṇavīthiyā, pañcālambā yathākkamaṃ.
823. Purejātavisesena, nāmānamupakārakā;  
**Purejātapaccayoti**, **rūpaṃ nāmassa cekadhā**.
824. Cittacetāsikā dhammā, yaṃ yamārabba jāyare;  
**Ālambaṇapaccayoti**, sabbametāṃ pavuccati.
825. Yamālambaṃ garuṃ katvā, nāmadhammā pavattare;

Svāyamevālambaṇūpa-nissayoti pakāsito.

826. Anantarapaccayena, ye dhammā paccayā matā;  
Te eva vānantarūpa-nissayoti pakāsito.
827. Rāgasaddhādayo dhammā, ajjhattamanuvāsītā;  
Sattasāṅkhāradhammā ca, bahiddhopenisevitā.
828. Rāgasaddhādidhammānaṃ, kammaṃ pākānamiccayaṃ;  
Pakatūpanissayoti, paṭṭhapesi tathāgato.
829. Icevevaṃ balavaṭṭhena, nissayenopakārakā;  
**Upanissayanāmena**, paccayoyaṃ tidhā mato.
830. Rūpārūpaṃ paniccevaṃ, tekālikamakālikā;  
**Paññatti ceva nāmānaṃ, paccayo duvidho** mato.
831. Ālambādhippatibhūtaṃ, nāmānaṃ garugocaraṃ;  
Sahajādhippatīdhammā, sahajānaṃ yathārahaṃ.
832. Nāmarūpānamicceva-mādhippaccena paccayo;  
**Adhippatipaccayoti**, duvidhā paridīpito.
833. Sahajā nāmarūpānaṃ, mahābhūtā ca rūpinaṃ;  
Paṭisandhikkhaṇe vatthu, nāmānamiti sabbathā.
834. Sahajātavisesena, dhammānamupakārakā;  
**Sahajātapaccayoti**, tividhevaṃ vibhāvītā.
835. Arūpino catukkhandhā, mahābhūtā catubbidhā;  
Sandhiyaṃ vatthunāmāni, sahajānīti sabbathā.
836. Upakārapavattā ca, aññamaññassa tādīnā;  
**Aññamaññapaccayoti**, vibhattā tividhā matā.
837. Sattaviññāṇadhātūnaṃ, bhūtopādāyarūpinaṃ;  
Sahajātanāmarūpa-dhammānañca yathākkamaṃ.
838. Vatthu bhūtā catukkhandhā, nissayenopakārakā;  
**Nissayappaccayo** nāma, paccayoti mato tidhā.
839. Kabaḷīkaro āhāro, rūpakāyassa paccayo;  
Arūpino panāhārā, sahajānaṃ yathārahaṃ.
840. Nāmarūpānamiccevaṃ, yāpanaṭṭhena paccayā;  
**Āhārapaccayoteva**, duvidhevaṃ pakāsito.
841. Pasādajīvitārūpi-ndriyadhammā yathākkamaṃ;  
Pañcaviññāṇupādīnna-rūpānaṃ nāmarūpinaṃ.
842. Sahajātanamicceva-missaraṭṭhena paccayā;  
**Indriyappaccayoteva**, tividhā samudāhaṭo.

843. Sattaviññānadhātūnaṃ, cha vatthūni yathārahaṃ;  
Pacchājātā ca kāyassa, cittacetāsikā tathā.
844. Arūpā sahajātānaṃ, rūpānanti matā tidhā;  
**Vippayuttapaccayoti**, vippayogopakārakā.
845. Sahajātaṃ purejātaṃ, pacchājātañca sabbathā;  
Kabaḷīkāro āhāro, rūpajīvitamiccayānaṃ.
846. **Atthipaccayasaṅkhāto**, paccayo pañcadhā mato;  
Vijjāmanāsabhāvena, paccayaṭṭhā yathārahaṃ.
847. Te evāvigatā hutvā, vattamānopakārakā;  
**Avigatapaccayoti**, sugatena vavatthitā.
848. Aṭṭhevaṃ vattamānāni, nāmarūpāni paccayā;  
Sabbatthādhīppatī cāti, **navadhā nāmarūpinānaṃ**.
849. Itthamuddiṭṭhaniddiṭṭhā, **paṭṭhānanayasaṅgahā**;  
Kusalākusalādīhi, suvibhattā mahesinā.
850. Paññattināmarūpānaṃ, vasena tividhā ṭhitā;  
Paccayāti pakāsentī, catuvīsati paṇḍitā.
851. Paññatti paññapīyattā, paññāpetīti ca dvidhā;  
Nāmarūpavinimuttā, paññattā tādinā kathaṃ.
852. Bhūtapariṇāmākāramupādāya tathā tathā;  
Bhūmipabbatapaśāṇaṭṭharukkhalatādayo.
853. Sambhārākāramārabha, sannivesavisesitā;  
Yānagāmanuyyānakaṭṭhasārapaṭṭhādayo.
854. Kāravēdakākāraṃ, viññattindriyalakkhitānaṃ;  
Khandhapañcakamāhacca, maccāsurasurādayo.
855. Candādāvaṭṭanādīhi, disākālādisammūti;  
Pārampariyakādīhi, jātigottakulādayo.
856. Taṃtaṃkriyādibhedehi, paññattā kathinādayo;  
Taṃtaṃkalāpāsamphuṭṭhā, kūpākāsaguhādayo.
857. Taṃ taṃ nimittamārabha, cintayantassupaṭṭhitā;  
Kasiṇādīkavohārā, bhāvanāmayagocarā.
858. Pubbopālabbhābhāvena, kasiṇugghāṭimādayo;  
Nirodhā ca samāpatti, viśesābhāvalakkhitā.
859. Iti taṃ tamupādāya, samaññātā tathā tathā;  
Saṅkhā samaññā paññatti, vohārotī pakāsitā.
860. Ālambāṇaṭṭhākārena, santābhāvepi vatthuto;

Cintāvohāranipphannā, atthacchāyāva bhāsinī.

- 861. Paññāpiyattā paññatti, nāmāyamiti bhāsītā;**  
Upādāya ca paññatti, sā evopanidhāya ca.
- 862.** Paññatti paññāpanato, paṇḍitehi pakāsītā;  
Avijjamānā paññatti, vijjamānātipi dvidhā.
- 863.** Lokavohārikaṭṭhena, paññattaṃ paramatthato;  
Avijjamānametāya, paññāpentī yadā tadā.
- 864.** Avijjamānapaññatti, vijjamānaṃ yadā puna;  
Paññāpentī tadā esā, vijjamānanti vuccati.
- 865.** Itthaṃ paññattidhammañca, sammatatthavisesato;  
Bhāvadhammañca rūpādi-salakkhaṇavisesato.
- 866. Paññāpetīti paññatti, nāmāyamiti bhāsītā;**  
Yā nāmaṃ nāmakammādināmena samudīritā.
- 867.** Sā evāvijjamānena-vijjamānādibheditā;  
Itthisaddo chaḷābhiñño, rājaputto tu bhāsītā.
- 868.** Kriyānimittatthayoga-ruḷhijātopacārikā;  
Sambandhopacayāvattā, saṅghānāpekkhitā tathā.
- 869.** Devadattotha medhāvī, vedanā candimā tathā;  
Khattiyo narasīho ca, bhātā lohitaṃ yuvā.
- 870.** Kuṇḍalaṃ dussamiccevamādibheditasaṅgahā;  
Sammataṭṭhasabhāvesu, vohārākāralakkhitā.
- 871.** Sāyaṃ yādicchakānvatthasaṅketakkhaṇasambhavā;  
Vohāratthavisesena, ñeyyākārānusārīnī.
- 872.** Vacīghosānusārena, sotaviññānavīthiyā;  
Pavattānantaruppanna-manodvārassa gocarā.
- 873.** Atthā yassānusārena, viññāyanti tato paraṃ;  
Sammata ca sabhāvā ca, pubbasāṅketabhāgino.
- 874.** Yāyaṃ vālambaṇākāravisesa paṭidissati;  
Vedanādivacīghosaṃ, sabhāvānugacetaso.
- 875.** Sāyaṃ paññatti viññeyyā, lokasaṅketanimmitā;  
Vacīviññattisahito, saddo evāti kecana.
- 876.** Itthaṃ paññattidhammāti, vuttaṃ paññattikadvayaṃ;  
Tathādhivacanā dhammā, niruttīti ca tādīnā.
- 877.** Avisamvādakaṭṭhena, lokavohārasādhakaṃ;  
Samaññāsaccamiccevaṃ, ācikkhanti vicakkhaṇā.

878. Sathā yaṃ paramatthamuttamaṃ nāmañca rūpanti ca,  
Dvedhākāsi sabhāvadhammakusalo nibbijjha dhammantaram;  
Vohāratthavisesaṇeyyamaparam byākāsi paññattito,  
Āraddhaṃ kamato mayevamakhilaṃ taṃ suṭṭhu niṭṭhāpitaṃ.
879. Yaṃ dhammaṃ dhammarājā niratikamabhisambodhi maggena buddhā,  
Katvā kaṇḍambamūle paramamanupamaṃ pāṭihīraṃ khaṇena;  
Pātvākā tattha patvā puravaragaṇamullāpalāvaṇṇaramsi,  
Tatthādāyatthasāraṃ kathitamaticiraṃ ṭhātu pāṭhānukūlaṃ.

Iti nāmarūpaparicchede sabbasāṅgahavibhāgo nāma

Sattamo paricchedo.

Niṭṭhito ca nāmarūpaparicchede sabbathāpi

Abhidhammaparamatthavibhāgo.

## 8. Aṭṭhāmo paricchedo

### Kasiṇāsūbhavibhāgo

880. Ito paraṃ pavakkhāmi, bhāvanāyāmuttamam;  
Nāmarūpaṃ pariggayha, paṭipajjitumīhato.
881. Bhāvanā duvidhā tattha, samatho ca vipassanā;  
Samatho duvidho tattha, paritto ca mahaggato.
882. Upacāramanupatto, parittoti pavuccati;  
Mahaggatappanāpato, samatho lokiyo mato.
883. Kasiṇāni dasāsūbhā, dasadhānussatī tathā;  
Appamaññā ca saññā ca, vavatthārūppakāni ca.
884. Kammatṭhānāni tathāhu, cattālīsa vicakkhaṇā;  
Yatthānuyogaṃ kubbantā, bhāventi samathadvayaṃ.
885. Taṃ payogavisuddhena, patvānopāyasampadam;  
Ajjhāsayam visodhetvā, bhāvetabbanti bhāsitaṃ.
886. Kathaṃ karonto cārittaṃ, vārittañca vivajjiya;  
Pātimokkhaṃ samādāya, saddhāya paripūraye.
887. Paṭisaṅkhāya sodhetvā, chadvāresu malāsavaṃ;  
Chalindriyāni medhāvī, satārakkhena gopaye.
888. Pāpakājīvanissaṅgo, kuhakācāranissaṭo;  
Ājīvaṃ parisodheyya, pahitatteṭṭhisuddhiyā.
889. Idamatthitamārabba, paṭisaṅkhāya yoniso;  
Paññavā sampajaññena, paribhuñjeyya paccaye.

890. Saṃvaram pātimokkhe ca, sīlamindriyasamvaram;  
Ājīvapārisuddhiṅca, tathā paccayanissitaṃ.
891. Samādāya catuddheva-madhiṭṭheyya tato param;  
Tasseva parivārāya, dhutaṅgāni yathārahaṃ.
892. Paṃsukūlikamaṅgaṃ ti-cīvaram cīvarāyugaṃ;  
Piṇḍapātikamaṅgaṅca, sapadānikamuttamaṃ.
893. Khalupacchābhattikaṅgaṃ, dhutaṅgaṃ pattapiṇḍikaṃ;  
Ekāsanikamiccevaṃ, pañcadhā bhojane ṭhitaṃ.
894. Āraññikaṃ yathāsantha-  
Tikaṅgaṃ rukkhamaṅgikaṃ;  
Abbhokāsikasosāni-  
Kaṅgā nesajjikaṃ tathā.
895. Cha senāsanamārabhha, **dhutaṅgānīti terasa**;  
Kappiyepi ca loluppa-samācāravimuttiyā.
896. Sāmīcipaṭipattīti, katvā sallekhavuttiyā;  
Paccayattayamāhacca, paññattāni mahesinā.
897. Catupārisuddhisīlam, dhutaṅgaparivāritaṃ;  
Pūretvāna visuddhevaṃ, payogaparisuddhiyā.
898. Tato paṇidhisampanno, bhāvanāya visārado;  
Upāyaṃ paṭipādeyya, pavivekarato kathaṃ?
899. Āvāso ca kulaṃ lābho,  
Gaṇo kammaṅca pañcamaṃ;  
Addhānaṃ ñāti ābādho,  
Gantho iddhīti te dasa.
900. Chetvāna nipako yogī,  
Palibodhe yathārahaṃ;  
Nirālayo nirārambho,  
Papañcopasame rato.
901. Piyam garum bhāvaniyam, vattāram vacanakkhamaṃ;  
Kattāramatigambhīrakathaṃ ṭhānaniyojakaṃ.
902. Bahussutaṃ guṇavanta-māgammācariyam budho;  
Khamo padakkhiṇaggāhī, niyyātattuju bhadrako.
903. Ārādhettvāna gaṇheyya, taṃ kammaṭṭhānadāyakaṃ;  
Kammaṭṭhānaṃ parikkhitvā, cariyārahamattano.
904. Rāgo doso ca moho ca,  
Cariyā tīhi paṇḍitā;  
Saddhābuddhivitaṅkehi,  
Chabbidhā ca vibhāvayum.

905. Rāgussannassa sappāyā, koṭṭhāsāsubhabhāvanā;  
Dosussannassappamaññā, nīlādi ca catubbidhā.
906. Vitakkaṃ mohussannānaṃ, ānāpānaṃ pakāsitaṃ;  
Cha saddhācaritassāhu, buddhānussatiādayo.
907. Maraṇopasamāsaññāvavatthānāni buddhino;  
Sesāni pana sabbesaṃ, tatthāpi kasiṇaṃ budhā.
908. Vitakkapakatikassa, parittaṃ mohacāriṇo;  
Mahantamiti sappāyaṃ, gahetvāna tato paraṃ.
909. Mahāvāsaṃ navaṃ jīṇṇaṃ, panthasoṇḍikasantikāṃ;  
Paṇṇapupphaphalākiṇṇaṃ, bahusammānapatthitaṃ.
910. Sīmantaḍārunagara-kkhettapaccantanissitaṃ;  
Visabhāgamasappāyaṃ, paṭṭanaṃ mittadullabhaṃ.
911. **Thānāniṭṭhārasētāni**, parivajjeyya paṇḍito;  
Seveyya bhāvanāyoggaṃ, senāsanamatandito.
912. Nātidūraṃ nāccāsannaṃ, appasaddamanākulaṃ;  
Gamaṇāgamanasampannaṃ, appaḍaṃsānupaddavaṃ.
913. Akicchapaccayuppādaṃ, lajjībhikkhugaṇocitaṃ;  
Vivekaṭṭhānabahulaṃ, bahussutanisevitaṃ.
914. Appabhayaṃ nirāsaṅkaṃ, appadosaṃ mahāguṇaṃ;  
Vihāraṃmanusevanto, tattha nissaṅgacetasā.
915. Tato kesanakhaccheda-rajanādimasesato;  
Khuddakaṃ palibodhañca, chinditvāna yathārahaṃ.
916. Āvāsaṃ gocaraṃ bhassaṃ, puggalaṃ bhojanaṃ tathā;  
Vajjentotumasappāyaṃ, iriyāpathamattano.
917. Sevanto satta sappāye, te evāti padhānavā;  
Bhāvanūpāyasampanno, vūpakaṭṭho rahogato.
918. Kāmesvādīnavaṃ disvā, nekkhammaṃ daṭṭhu khemato;  
Pariyuṭṭhānanibbindo, sodheyyajjhāsayaṃ kathaṃ.
919. Appassādā mahādukkhā, **kāmā** hi kaṭukapphalā;  
Dussaṃhārā durārakkhā, bahvādīnavasaṇṭhitā.
920. Aṭṭhikā khajjamānāva, vighātāya pabhijjitā;  
Gayhantattavadhāyete, maṃsapesīva pakkhibhi.
921. Paṭivāte tiṇukkāva, pariggāhakadāhino;  
Aṅgārakāsusaṅkāsā, sabbaṅgaparītāsakā.
922. Supine paribhuttāva, nālaṃ kassaci tittiyā;



Na tu kassaci accantā, alaṅkārāva yācitā.

- 923.** Chajjantā phalarukkhāva, paṭipannapabhaṅgino;  
Asisūnūpamā nicca-madhikoṭṭenti pāṇino.
- 924.** Sattisūlūpamā dalhaṃ, taṇhāsallānuvedhino;  
Ghorānatthavisākiṇṇā, kaṇhasappasirūpamā.
- 925.** Sabbāsavaparikliṭṭhā, sabbāsaṃklesavatthukā;  
Gammā ca capalā nīcā, puthujjanamamāyitā.
- 926.** Bhusādhāraṇā cete, sapattajanapatthitā;  
Mahopaddavupayaṭṭhā, bahvāyāsā bhayāvahā.
- 927.** Mahārambhasamāraddhā, khippākāravidhaṃsino;  
Sokasallaṃ pavesentā, vigacchanti suve suve.
- 928.** Nālaṃ kassaci tāṇāya, nālamassāsanāya ca;  
Avisāsaniyāvassaṃ, kitavā māraṅkārā.
- 929.** Sattānamupaghātāya, madhurākāranimmitā;  
Rakkhasī viya santāna-māvisanti manoharā.
- 930.** Āviṭṭhā yehi dummedhā, byasanāhitasambhavā;  
Vipallāsaparābhūtā, byāpajjantā vihaṅṅhare.
- 931.** Cetosaṅkapparacitā, nandirāgopasevanā;  
Madhulittāsīdhārāva, byāpārenopasevitā.
- 932.** Manoramasubhākārā, piyarūpopalambhino;  
Mittamukhaṃ sapattāva, vaṅcayanti mahājanaṃ.
- 933.** Vaṅcitā yehi dummedhā, sabbasampattidhaṃsitā;  
Khemamaggā paribbhaṭṭhā, dhārenti vadhamattano.
- 934.** Virūparūpākārena, nimmathentā palobhino;  
Abhāvitānaṃ bālānaṃ, mānasāṃ nihanantime.
- 935.** Yattha rāgasallavidhā, salleneva vane migā;  
Tattha tatthānudhāvāntā, vipphandanti nirantaraṃ.
- 936.** Mamaṅkārena vuḍḍhantā, ghoramāsīvisaṃ yathā;  
Vissaṭṭhā bhogadhammesu, assādentī aviddasu.
- 937.** Anayabyasanāyete, vasī kubbanti pāṇino;  
Vicittākārasaṅṭhānā, pisācanagaraṃ yathā.
- 938.** Anattāhāvhitā bālā, vāguraṃ nāvabujjhare;  
Tattheva paṭivamanti, yathā haṅṅanti mucchitā.
- 939.** Sīghavāhī mahoghoyaṃ, klesavaṭṭaṃ mahabbhaya;  
Sakaṅṭakaṅca gahaṇaṃ, paṅkova duratikkamo.

940. Cetosaṃmohanaṭṭhānaṃ, pamādapatisandhitāṃ;  
Ohāri sithilaṃ cetāṃ, duppamuñcañca bandhanaṃ.
941. Jālaṃva vitthataṃ loke,  
Mārapāso samoḍḍito;  
Pañjaraṃ cāraḷo ceso,  
Sattānāmanayāvaho.
942. Yatthānurāgasambaddhā, paliguṇṭhitasāyino;  
Makkaṭālepabaddhāva, nitthunanti vighātino.
943. Baḷisaṃvāmisacchannaṃ, savisaṃ viya bhojanaṃ;  
Migaluddanivāpova, vināsāya samoḍḍitā.
944. Mīnakā vaṅkagiddhāva, ye gilitvā puthujjanā;  
Ghoraṃ maccumukhaṃ patvā, socantāpāyabhāgino.
945. Pāpakkhettamidaṃ ṭhānaṃ, micchālobhanisevanaṃ;  
Duccarītaṅkurārohaṃ, apāyaphalapūraṇaṃ.
946. Ajjhositā panettha ca, lobhamucchāvidāhino;  
Kodhūpanāhajalitā, issāmaccheradhūpitā.
947. Sārambhāyudhasannaddhā, vipphurantā manorathā;  
Ābandhicchā mahākacchā, ṭhanti lokavipattiyā.
948. Avajjaṃ natthi etesa-makattabbaṃ na vijjati;  
Sammuṭṭhasaccatā tesu, na patiṭṭhāti sādhutā.
949. Paropaghātābhiratā, dayādhammaparammukhā;  
Sabbasattesvavissāsī, sabbattha parisāṅkitā.
950. Bhayasantāsabahulā, sabbānatthānusārino;  
Sādhentā caturāpāyaṃ, pāpakammaṇṇurakkhakā.
951. Mahāsaṅkaṭupabyulhā, palibodhāparipphuṭā;  
Haññanti dukkhadhammehi, kāme bālā bhavepare.
952. Tato maccunirāsaṅkā, khiḍḍārativimohitā;  
Kimpakkamiva bhakkhantā, rammakāravirodhino.
953. Gāmasūkarapotāva, kāmasucipariplutā;  
Camarīkatakammantā, asmiṃ loke palobhitā.
954. Khajjamānā kilesehi, kimīhiva nirantaraṃ;  
Parihāniṃ panaññāya, parivārenti mucchitā.
955. Tato jarāhi santattaṃ, yobbanañcopamuyhati;  
Kāmā ca parihāyanti, jīvitañcoparujjhati.
956. Paraṃ pamādābhivaṭṭhā, pāpaklesamahodakā;  
Tato taṇhānadī pūrā, pāpetāpāyasāgaram.

957. Idhalokapariccattā, paralokatthadhamṣitā;  
Gaṅgākuṇapākākāva, senti sokaparāyaṇā.
958. Iccattatthaṃ paratthaṇca, sattā kāmanibandhanā;  
Viddhamsetvā vinassanti, idha ceva parattha ca.
959. **Iti sādīnavā** kāmā, ghorā sālasiḷūpamā;  
Yattha bālā visīdanti, natthi saṅgo vijānatam.
960. Ittham kāmabhayaṭṭānaṃ, sikkhattayamanuttaram;  
Samācikkhi vimokkhāya, nekkhammamiti cakkhumā.
961. Sabbāsavavighātāya, paṭipatti anuttarā;  
Antadvayamanāgamma, majjhimāyaṃ pakāsitā.
962. Sabbadukkkhasamugghātī, visuddhi paramuttamā;  
Vijjācaraṇasampatti, sabbasampattisādhikā.
963. Puññakkhetamidam ṭhānaṃ, tapokammanisevanam;  
Saddhāsīlankurāroham, sampattiphalapūraṇam.
964. Klesacārakamokkhāya, dvārametamanuttaram;  
Mahoghuttaraṇam kullam, sotthi pārimapāpakaṃ.
965. Pāpacoravighātāya, khemamaggo anuttaro;  
Akaṇṭako agahano, uju sabbhi pavedito.
966. Mahābandhanamokkhāya,  
Abbhuto jinaghosito;  
Palibodhapariccāgo,  
Abbhokāso alepano.
967. Saṅgapaṅkasamuttāro, ganthānaṃ viniveṭhanaṃ;  
Taṇhādāsabyanittāro, seribhāvo sukhāvaho.
968. Sabbayogavisamyo, sabbasokanirundhano;  
Sabbālayavisaṅkhāro, sabbadukkhaviniggamo.
969. Mārapāsasamucchedī, pattametamanuttaram;  
Mohandhakāraviddhamṣī, vijjālokavirocano.
970. Abyāpajjamidam ṭhāna-mabhayaṃ nirupaddavaṃ;  
Tapokammānamokāso, māracakkhuvimohano.
971. Sabbasantāpaharaṇamidam sītamva candanaṃ;  
Nimmalaṃ dhammasalilaṃ, saṃklesamalasodhanaṃ.
972. Saṃsāraṣetu suhatā, bodhipakkhiyapatthatā;  
Sokasallasamuddhārī, yantaṃ sukatayojitaṃ.
973. Cittātaṅkasamuddhamṣī, paribhogasukhosadham;  
Lokāmisānaṃ vamaṇam, cetodosavirecanaṃ.

974. Accantatittikāraṇamīrenti dhammabhojanaṃ;  
Pipāsaharaṇaṃ pānaṃ, vimuttirasapesalaṃ.
975. Vaṇṇakittisugandhāya, guṇamālā suganthitā;  
Pāpakopīnavasanaṃ, hirottappavicittitaṃ.
976. Accantaparissuddho ca, saddhammaratanāvali;  
Ariyānamalaṅkāro, anupāyi siriṅkaro.
977. Cintānaṃ dunnimittānamidaṃ santikaraṃ paraṃ;  
Vipattiṭṭighātāya, parittamidamuttamaṃ.
978. Antarāyavināsāya, maṅgalaṃ jinadesitaṃ;  
Micchāgāhavimokkhāya, sotthi sambuddhabhāsītā.
979. Anivatti ca paccakkhamāvenikamabhāriyaṃ;  
Amatosadhamaccantamajarāmarasādhanam.
980. Yametaṃ samadhiṭṭhāya, sambodhittayamuttamaṃ;  
Papponti sabbasampattiḡuṇapāramipūritaṃ.
981. Sabbākāravaropeta-metaṃ nekkhammasammaṃ;  
Sīlagambhīraparikkhaṃ, dhutaṅgoditoraṇaṃ.
982. Samādhivīthivitthinnaṃ, satipākāragopuraṃ;  
Saddhāsamiddhisamphullaṃ, paññāpāsādasobhitaṃ.
983. Sammājīvadhaṃ rammaṃ, hirottappapaṭicchadaṃ;  
Vimuttāmatasambhogaṃ, veneyyajanasevitaṃ.
984. Abhejjaṃ pāpaverīhi, puraṃ sugatamāpitaṃ;  
Anīṭimanupasaggaṃ, paṭipannā mahesayo.
985. Paramassāsasampattā, paripuṇṇamanorathā;  
Sabbasaṅgamatikkamma, nikkhantā akuto bhayā.
986. Sammadatthamabhiññāya, maccudheyyapahāyino;  
Sabbadukkhoghānattiṇṇā, pāraṃ gacchanti paṇḍitā.
987. Iti sabbaṅgasampannaṃ, mahesigaṇasevitaṃ;  
Nekkhammaṃ kāmanikkhantaṃ, saddhammapathamuttamaṃ.
988. Virādhenti parābhūtā, mucchitā yena dujjanā;  
Taṃ pāpasamudācāraṃ, pariyaṭṭhānamabravum.
989. Cetonīvaraṇaṃ cetam, paññācakkhunirodhanaṃ;  
Sīlopaghātakaraṇaṃ, cittavikkhepasāṅgamo.
990. Ayasānaṃ padaṭṭhānaṃ, guṇatejavināsaṇaṃ;  
Sabbasampattidhanaṃ, caturāpāyasādhaṃ.
991. Sabbāsavamalopeto, sabbopaklesasañcayo;

Pāpayakkhasamo ceso, dosāsīvisasaṅgamo.

- 992.** Pamādapathamakkantaṃ, amittagaṇasaṅgamaṃ;  
Mahabbhayasamuṭṭhānaṃ, mahābyasanasāṅkaraṃ.
- 993.** Apāyadukkhamāruḷhaṃ, ahitāvahitaṃ padaṃ;  
Sabbānatthakaraṃ ghoraṃ, sabbadukkhaveḍḍhāyakaṃ.
- 994.** Dhiratthu pāpadhammānaṃ, sabbakalyāṇahāyinaṃ;  
Laddhāpi khaṇasampatti, dullabhā yehi nāsitā.
- 995.** Tesam hi samudācāro, dullabhaṃ buddhasāsaṇaṃ;  
Samuddhamseti asani, yathā ratanapabbataṃ.
- 996.** Saddhammadhanacorā te, nekkhammapatibandhakā;  
Paṭipattiṃ vilumpantā, palibundhanti pāṇino.
- 997.** Vissāsivadhakāpete, vissatṭhāvassaghātino;  
Yehi bālāhatā senti, nissayejinasāsane.
- 998.** Tepi vāsenti dummedhā, nissāṅkā mohapārutā;  
Antomanasi ucchaṅke, ghoramāsīvisaṃ yathā.
- 999.** Attano ca vināsāya, nissaṭaṃ klesapañjare;  
Cinantā nāvabujjhanti, vipattipathayāyino.
- 1000.** Halāhalaṃva khādantā, āliṅgantāva pāpakaṃ;  
Avassamupahaññanti, pāpadhammopalāḷino.
- 1001.** Pāpacintā paribyuḷhā, vitakkamathitā janā;  
Lokadvayāpi dhamṣenti, atthadvayavināsino.
- 1002.** Kodhūpanāhi vigacchā, issāmaccheradūsitā;  
Makkhī palāsī sārāmbhī, appatissā agāravā.
- 1003.** Mānātimānabahulā, mudhāmukharacaṇḍikā;  
Uddhatā ca pamattā ca, dabbitā ketugāhino.
- 1004.** Cetokhilakhilabhūtā, vinibandhānuveṭṭhitā;  
Mahogho viya sassāni, vināsenti tapogūṇaṃ.
- 1005.** Visayassādavikkhittā, vikiṇṇā pākatindriyā;  
Muṭṭhassatī kusitā ca, jīvanti moghajīvitaṃ.
- 1006.** Mahagghasā bāhulikā, duppaññā kāyadaḷhikā;  
Ganthanīvaraṇābaddhā, icchālobhavasikatā.
- 1007.** Malaggahitasantānā, tiracchānakathāratā;  
Vinayopasamāpetā, visamācāragocarā.
- 1008.** Dubbharatā ca dupposā, sukumārasukhālayā;  
Asantuṭṭhā mahicchā ca, loluppācāralakkhitā.

- 1009 Duggandheneva sunakhā, āmagandhena mucchitā;  
Tattha tathābhīdhāvāntā, na patiṭṭhanti sāsane.
- 1010 Nillajjā vītasārajjā, lokadhammesu mucchitā;  
Pāpicchā kuhanacchannā, micchājīvapalobhitā.
- 1011 Saṭṭhā pagabbhā māyāvī, antopūti avassutā;  
Sānkassarasamācārā, kasambu sithilā jaḷā.
- 1012 Singāracapalācittā, pūtikāyānurāgino;  
Sīdantā palimāpannā, na viruḷhanti sāsane.
- 1013 Pāpapuggalasaṃsaṭṭhā, pāpadiṭṭhiparāgatā;  
Asaddhā dhammanicchinnā, duṭṭhā dubbacaniṭṭhurā.
- 1014 Sāmaññaṃ paridhamṣentā, dūsentā jinasāsaṇaṃ;  
Atikkamma jinovādaṃ, bālā duggatibhāgino.
- 1015 Kāmagiddhā durācārā, dussīlā mohapārūtā;  
Khajjantā kaddamībhūtā, jinasāsaṇakaṇṭakā.
- 1016 Hitāhitamañāntā, anurodhavirodhino;  
Cetopahatasantānā, vipallāsapalambhitā.
- 1017 Vipannākulakammantā, pāpakārī parājītā;  
Socanti dīghamaddhānaṃ, apāyamhi samappitā.
- 1018 Itthaṃ hitasamucchedī, kumaggoyaṃ rajāpatho;  
Pāpadhammappavattīti, viditvā puna paṇḍito.
- 1019 Pariyuṭṭhānaṃklesaṃ, vippharantaṃ visārado;  
Paṭisaṅkhāya rundheyya, manteneva mahāvisaṃ.
- 1020 Khippamādittacelova, pāpapāvakamuṭṭhitaṃ;  
Bhāvanājalasekena, nibbāpeyya nirantaraṃ.
- 1021 Appamādena medhāvī, nāgeneva mahānadim;  
Pāpoghaṃ paṭibandhanto, pidaheyya khaṇe khaṇe.
- 1022 Sabhayaṃ viya kantāraṃ, ghoramāsīvisaṃ yathā;  
Pāpātamiva gambhīraṃ, miḷhaṃ viya ca paṇḍito.
- 1023 Pahāya pariyuṭṭhānaṃ, nekkhammādhimuccati;  
Kalyāṇamitto vajjesu, bhayadassāvi subbato.
- 1024 Kāmarāgavisaṃyutto, bhogadhananirālayo;  
Icchālobhavinimutto, amamo apariggaho.
- 1025 Sorato sakhilo saṇho, mettāyānto dayāparo;  
Anāhaṭamano dhīro, santacitto khamāparo.
- 1026 Hitesī sabbapāṇīnaṃ,

Issāmaccheramuccito;  
Kodhohanāhabyāpāda  
Virodhopasame rato.

- 1027** Anolīnamano yogī, niccāraddhaparakkamo;  
Susamāhitasāṅkappo, vip̄pasanno anāvilo.
- 1028** Okappento vimuccanto, paññāvā paṭipattiyam;  
Pihayanto mamāyanto, sammāsambuddhasāsanam.
- 1029** Īti nīvaraṇāpeto, ñāṇālokajutindharo;  
Pūjeti sammāsambuddham, saddhammapaṭipattiyā.
- 1030** Hirottappaguṇopeto,  
Kalyāṇācāragocaro;  
Makkhappalāsarahito,  
Sappatisso sagāravo.
- 1031** Ajjavācāracāritto, māyāsāṭṭheyyanissaṭo;  
Thambhasārambhanissaṅgo, maddavācārapesalo.
- 1032** Mānātimānavimukho, saddhammagarusādaro;  
Parappamādanimmaddī, saṃvegabahulo sadā.
- 1033** Vodātacittasāṅkappo, pāpicchāmalavajjito;  
Micchādiṭṭhimatikkanto, saddhammesu paṭiṭṭhito.
- 1034** Cetokhilasamucchedī, vinibandhaviveṭhako;  
Mānasam sampahamseti, saṃkilesavimuttiyā.
- 1035** Pavivitto asaṃsaṭṭho, santo appicchatārato;  
Ariyāvamsālaṅkāro, supposo subharo sukhī.
- 1036** Sallekhavutti dhutavā, pāpāpacayatapparo;  
Pāsādikasamācāro, pasādabahulo muni.
- 1037** Anuddhato acapalo,  
Danto gutto yatindriyo;  
Cetosamādhigaruko,  
Sampajāno satīyuto.
- 1038** Ussāhajāto saddhamme, chandajāto nirantaram;  
Sātaccakārī svākāro, paṭipattiparāyaṇo.
- 1039** Cetokālakāpagato, bhāvanārasamuttamam;  
Raṅgam niddhotavatthamva, sādhuṅgam paṭiṅgaṇhati.
- 1040** Īti sampāditākāro, parisuddhamanoratho;  
Nirādīnavasañcāro, sotthipatto niraṅgaṇo.
- 1041** Pāpagāhavinimutto, rāhumuttova candimā;  
Guṇaraṃsiparikkhitto, sobheti jinasāsanam.

- 1042 Iccālobhamadosañca, mohābhāvamathāparam;  
Nekkhammaṃ pavivekañca, tathā nissaraṇaṃ budho.
- 1043 Samārabha visodhento, ajjhāsayamasesato;  
Dhīro sampaṭipādeti, bhāvanāsukhamuttamaṃ.
- 1044 Tato paṇītādhimutti, palibodhavinissaṭo;  
Paripanthavinimutto, vigatāvaraṇālayo.
- 1045 Bhāvanāninnasantāno, kallacitto visārado;  
Kasiṇādikamārabha, bhāveyya samathaṃ kathaṃ.
- 1046 Pathavīkasiṇaṃ tāva, vidatthacaturaṅgulaṃ;  
Katvānāruṇavaṇṇāya, mattikāya sumaṇḍalaṃ.
- 1047 Yugamate ṭhapetvāna, ṭhāne sukhanisinnako;  
Pathavīti samaññāya, katvābhogaṃ tu bhāvaye.
- 1048 Akatepi khalādimhi, akiccheneva maṇḍale;  
Nimittaṃ jāyaticcāhu, pubbayogavato pana.
- 1049 Āpomaṇḍalamuggaṇhe, bhājanādigate jale;  
Tejamaṃ tejakasiṇaṃ, paṭacchiddādisaṃgate.
- 1050 Sassaggādimhi kammante, vāyokasiṇamaṇḍalaṃ;  
Paṭibhāgasamācāro, phuṭṭhaṭṭhāneva jāyati.
- 1051 Nīlādikasiṇaṃ vatthe, pupphe vā vaṇṇadhātuyaṃ;  
Ākāsamaṇḍalaṃ bhitti-chiddādimhi upaṭṭhitaṃ.
- 1052 Chiddappaṭiṭṭhamālokaṃ, uggaṇheyya paṭiṭṭhitaṃ;  
Sūriyālokādibhedamaṃ, bhūmiyaṃ vātha bhittiyaṃ.
- 1053 Dasadhā kasiṇesvevaṃ, yattha katthaci yogino;  
Parikkammaṃ karontassa, uggaho nāma jāyati.
- 1054 Cittassupaṭṭhite tasmaṃ, passantasseva cakkhunā;  
Uggahamaṃ nimittamaṃ, paṭipādeyya bhāvanaṃ.
- 1055 Vikkhepaṃ vinivārento, paripante virājayaṃ;  
Nimittābhimukheneva, mānasaṃ paṭipādaye.
- 1056 Āsevantassa tassevaṃ, cittaṃ hoti samāhitaṃ;  
Saṃklesā sannisīdanti, paṭibhāgo ca jāyati.
- 1057 Tattha paṇṇattisaṅkhāte, nimitte bhāvanāmāyā;  
Tattheva paṭibhāgamhi, tato yuñjeyya bhāvanaṃ.
- 1058 Tatthādhimutto satimā, nimittavidhikovidō;  
Indriyāni samānento, sappāyamupalakkhayaṃ.
- 1059 Niggayha uddhataṃ cittaṃ, paggayha līnamānasaṃ;



Ūhataṃ sampahaṃsento, upekkhanto samāhitam.

- 1060**Reṇumhi uppaladale, sutte nāvāya nāḷiyā;  
Yathā madhukarādīnaṃ, pavatti samma vaṇṇitā.
- 1061**Cittapavattiākāraṃ, sādhukaṃ lakkhayaṃ budho;  
Tathā samenākārena, pahitatto parakkame.
- 1062**Samappavattamākāraṃ, sallakkhetvā nirantaraṃ;  
Padahantassa tassevaṃ, appanā nāma jāyati.
- 1063**Paṭibhāganimittaṃ tu, vaḍḍheyya kasiṇaṃ puna;  
Upacārabhūmiyaṃ vā, appanāyaṃ va katthaci.
- 1064**Ekaṅguladvaṅgulādi-vaseneva yathākkamaṃ;  
Pharanto manasāyeva, nipuṇo yāvadicchakaṃ.
- 1065**Tatthevaṃ paṭhamajjhānaṃ, patvāna paguṇaṃ tato;  
Katvā ciṅṇavasībhūtā, tamhā vuṭṭhāya paṇḍito.
- 1066**Vitakkādikathūlaṅgaṃ, pahānāya yathākkamaṃ;  
Tattheva paṭipajjanto, pappoti dutiyādayo.
- 1067**Dasadhā kasiṇānevaṃ, bhāvetvā pana yogino;  
Catukkapañcakajjhānaṃ, katvā vikkhepanissaṭṭhā.
- 1068**Supakkhālitupaklesā, santacittā samāhitā;  
Pavivekarasassādaṃ, anubhonti yathāsukhaṃ.
- 1069**Asubhaṃ pana bhāvento, nimittaṃ yattha katthaci;  
Uddhumātādibhedamhi, uggaṇheyyāsubhe kathaṃ?
- 1070**Ekāhādimatikkantaṃ, uddhumātakamīritaṃ;  
Vigatacchavi bībhacchaṃ, nīlākāraṃ vinīlakaṃ.
- 1071**Vikiṇṇapubbakudhitaṃ, paribhinnaṃ vipubbakaṃ;  
Viccheditaṅgapaccaṅgaṃ, vicchiddakaṃ kaḷevaraṃ.
- 1072**Vividhākārapāṇehi, khajjamānaṃ vikhāditam;  
Vināsitaṅgapaccaṅgaṃ, vikkhittanti pavuccati.
- 1073**Pādādibhaṅgavikkhittaṃ, hatavikkhittakaṃ mataṃ;  
Lohitaṃ lohitākiṇṇaṃ, puḷavaṃ kimisaṅkulaṃ.
- 1074**Aṭṭhisāṅkhalikāmattaṃ, aṭṭhikanti ca sabbathā;  
Saṅṭhānākārabhedena, dasadhāsubhadesanā.
- 1075**Tatthevaṃ dasadhā bhede, nijjīvakuṇapāsubhe;  
Ujjhite bhūmibhāgasmim, matakāye kaḷevare.
- 1076**Labhamānakamākāraṃ, oloketvā salakkhaṇaṃ;  
Uggahetvāna cittena, taṃtaṃnāmena bhāvaye.

- 1077 Paṭikūlañca jegucchaṃ, duggandhañca virūpakaṃ;  
Harāyitamajaññañca, hīlitaṃ vikkhitāsivaṃ.
- 1078 Iccevamasubhākāre,  
Kativābhogaṃ tu yogino;  
Bhāventassupacāro ca,  
Paṭibhāgo ca jāyati.
- 1079 Paṭibhāganimittaṃ tu, upacārena sevato;  
Appeti paṭhamajjhāna-metthevaṃ samathe nayo.
- 1080 Vinā saddhammaṃ panidaṃ, sarīraṃ bālananditaṃ;  
Vipattipariyosānaṃ, avassaṃ bhedagāmikaṃ.
- 1081 Yathā idaṃ tathā etaṃ, yathā etaṃ tathā idaṃ;  
Jīvamānañca nijjīvameva dhammaparāyaṇaṃ.
- 1082 Sabhāvo sopi dehassa,  
Sabbassāpi ca sabbathā;  
Vicitabbā dhirenāpi,  
Esāyaṃ niyatā gati.
- 1083 Aniccaṃ khayadhammañca, dukkhameva bhayāvahaṃ;  
Anattā ca parābhūtā, vibbhijjati khaṇe khaṇe.
- 1084 Vināsamānassākāraṃ, tatthevaṃ pana passato;  
Vipassanābhāvanāti, tamīrenti tathāgatā.
- 1085 Bhāvanaṃ duvidhampetaṃ, bhāventi puna paṇḍitā;  
Jīvamānepi kāyamhi, taṃtadākārasambhave.
- 1086 Jīvamānopi kāyoyaṃ,  
Kuṇapova sabhāvato;  
Tamalaṅkārapaṭicchanno,  
Bālānaṃ na pakāsati.
- 1087 Bahi maṭṭhamupaṭṭhāti, anto kuṇapapūritaṃ;  
Uggharantaṃ paggharantaṃ, navadvāramalassavaṃ.
- 1088 Sarīraṃ niccaduggandhaṃ, nānākimisaṃmākulam;  
Tacamaṃsapaṭicchannaṃ, aṭṭhipañjarasaṅgataṃ.
- 1089 Vaccakūpamidaṃ nāma, dvattiṃsāsucipūritaṃ;  
Narānukkārabhūmīva, nekavassagaṇocitā.
- 1090 Susānagamanosānaṃ, bahusādhāraṇāsubhaṃ;  
Gaṇḍabhūtaṃ sallabhūtaṃ, bahudukkhanibandhanaṃ.
- 1091 Nānābyādhisaṃmākiṇṇaṃ, nānopaddavaṃmākulam;  
Nānānatthasamodhānaṃ, nānāsaṃklesavatthukaṃ.
- 1092 Positampi ciraṃ kālaṃ, mamaṃkāramamāyitaṃ;

Lahudujjanamittova, pīlitaṃ sampadussati.

**1093** Parihāyati nissāraṃ, jaratāpi taṃ yobbaṇaṃ;  
Maccubhajjitamaccanta-masesaṃ paribhijjati.

**1094** Tathāpi jālasantāno, bahusambhārasaṅkhato;  
Vatthālankārasaṅchanno, mālāgandhādisobhito.

**1095** Saviññattivikārehi, vicittākāramaṇḍito;  
Kāyo līlavilāsehi, palambheti mahājanaṃ.

**1096** Vañcitā yena dummedhā, kāmaklesamalīmayā;  
Pūrenti caturāpāyaṃ, mārādheyyānusārino.

**1097** Evamādīnavaṃ ñatvā, pūtikāye vicakkhaṇā;  
Asubhādikamākāra-mārabbha chandupaṭṭhahaṃ.

**1098** Yasmiṃ patanti kuṇape viparītasaññā,  
Saṃklesapāpavasagā visamaṃ carantā;  
Taṃ passathetamasubhampi vināsadhammaṃ,  
Icevamāha sugato dasadhā vibhāgaṃ.

**1099** Satthārā kasiṇaṅca yaṃ dasavidhaṃ vikkhepavikkhambhanaṃ,  
Kāmaklesavināsaṇaṃ dasavidhaṃ yañcāsubhaṃ bhāsitaṃ;  
Dibbabrahmasukhāvahaṃ samapadaṃ vijjodayaṃ yoginā,  
Kammaṭṭhānamalaṃ tamuttamaḡuṇenāseviṭaṃ seviṭaṃ.

Iti nāmarūpaparicchede kasiṇāsubhavibhāgo nāma

Aṭṭhamaṃ paricchedo.

## 9. Navamo paricchedo

### Dasānussativibhāgo

**1100** Saddhāpabbajito yogī, bhāventonussatiṃ pana;  
Dasānussatibhedesu, bhāveyyaññataraṃ kathaṃ.

**1101** Arahaṃ sugato loke, bhagavā lokapāragū;  
Vijjācaraṇasampanno, vimuttiṃ parināyako.

**1102** Jeṭṭho sammābhisambuddho, seṭṭho purisaśārathī;  
Satthā devamanussānaṃ, buddho appaṭipuggalo.

**1103** Sabbalokahito bandhu, samattaratanālayo;  
Sattānamanukampāya, jāto nātho sivaṃkaro.

**1104** Cakkhumā titthakusalo, dhammassāmī tathāgato;  
Maccudheyyavimokkhāya, paṭipādayi pāṇino.

**1105** Satthavāho mahāyoggo, maggāmaggayudhandharo;

Sirisatthamadhiggayha, vicarittha mahāpathaṃ,

- 1106 Anomo asamo dhīro,  
Lokahītaparakkamo;  
Sabbākāraropeto,  
Accherabbhutapuggalo.
- 1107 Atthabhūto dhammabhūto,  
Brahmabhūto mahāyaso;  
Ñāṇālokaparicchinna-  
Ñeyyāsesapariggaho.
- 1108 Ānubhāvavasippatto, āsabhaṇḍānaniccalo;  
Mahantamariyādo yamanantagatigocaro.
- 1109 Sabbā bhiññābalappatto, vesārajjavīsārado;  
Sabbasampattiniṭṭhāno, guṇapāramipūrako.
- 1110 Appameyyo mahānāgo, mahāvīro mahāmuni;  
Mahesī mahitācāro, mahāmaho mahiddhiko.
- 1111 Sabbatthasiddhisācāro, mahesīgaṇapūjito;  
Rājādhirājamahito, devabrahmābhivandito.
- 1112 Abhibhūya tayo loke, ādiccova nabhantare;  
Virotati mahātejo, andhakāre pabhaṅkaro.
- 1113 Byāmapabhāparikkhitto, ketumālāhalāṅkato;  
Dvattiṃsalakkhaṇāsītianubyañjanasobhito.
- 1114 Chabbaṇṇaramsilalito, ratanagghiyasannibho;  
Samiddhirūpasobhaggo, dassaneyyaṃva piṇḍitaṃ.
- 1115 Phullaṃ padumasaṇḍaṃva, kapparukkhovaṅkato;  
Nabhaṃva tārakākiṇṇaṃ, uttamo paṭidissati.
- 1116 Satthukappamahāvīraputtehi parivārito;  
Sabbalokamahiddhāya, dhammarājā sayamaṃvasī.
- 1117 Niddhotamalacandova, nakkhattaparivārito;  
Khattasaṅghaparibyuḷho, cakkavattīva sobhati.
- 1118 Iccānantaguṇākiṇṇamasesamalanissaṭaṃ;  
Sabbasampattidātāraṃ, vipattivinibandhakaṃ.
- 1119 Dayāparamahorattaṃ, bhagavantamanussaraṃ;  
Bhāveti pañṇavā yogī, **buddhānussatibhāvanaṃ.**
- 1120 Svākhāto tena saddhammo, sambuddhena satīmatā;  
Paccattaṭṭhavedhena, passitabbo yathārahaṃ.
- 1121 Taṇhādaliddanāsāya, manorathasamiddhiyā;

Kālantaramanāgamma, paccakkhaphaladāyako.

- 1122 Upanissayavantānaṃ, “‘ehi passā’”ti dassiyo;  
Paccattameva viññūhi, vedītabbo sabhāvato.
- 1123 Sabbāsavasamuggahātī, suddho sovattthiko sivo;  
Pihitāpāyakummaggo, maggo nibbānapattiyā.
- 1124 Klesasaṃkaṭṭaduggamhā, dukkhakkhandhamahabbhayā;  
Khemantabhūmiṃ niyyāti, accantamanupaddavaṃ.
- 1125 Puññatitthamidaṃ nāma, maṅgalañca sivaṅkaraṃ;  
Hitodayasukhādhāna-mamatahāramuttamaṃ.
- 1126 Avijjāpaṭaluddhāravijjānettosadhaṃ varaṃ;  
Paññādhāramidaṃ satthaṃ, klesagaṇḍappabhedakaṃ.
- 1127 Caturghanimuggānaṃ, setubandho samuggato;  
Bhavaacārakaruddhānaṃ, mahādvāro apāruto.
- 1128 Sokopāyāsavidhānaṃ, paridevasamaṅginaṃ;  
Sallaṇharaṇopāyo, accantasukhamīrito.
- 1129 Byasanopaddavāpeto, saṃklesamalanissaṭṭo;  
Ujusammattaniyato, paṭipattivissuddhiyā.
- 1130 Suddhasīlaparikkhāro, samādhimayapañjaro;  
Sammāsaṅkappacakkaṅgo, sammāvāyāmaṅvāhano.
- 1131 Satisārathisaṃyutto, sammādiṭṭhipurejavo;  
Esa dhammaratho yāti, yogakkhemassa pattiyā.
- 1132 Vipattipaṭibhāyā, sabbasampattisiddhiyā;  
Sabbakhandhavimokkhāyā, dhammaṃ desesi cakkhumā.
- 1133 Hitesī sabbapāṇīnaṃ, dayāpanno mahāmuni;  
Dhammālokaṃ pakāsesi, cakkhumantānamuttamo.
- 1134 Yaṃ dhammaṃ sammadaññāya, khemamaggapattitṭhitā;  
Pāpakāpagatā dhīrā, passaddhidarathāsaya.
- 1135 Bhavayogā vinimuttā, pahīnabhayabheravā;  
Accantasukhamedhenti, sotthipattā mahesayo.
- 1136 Tamevamuttamaṃ dhammaṃ, cintento pana paṇḍito;  
Bhāvetīti pakāseti, **dhammānussatibhāvanam.**
- 1137 Cattāro ca paṭipannā, cattāro ca phale tṭhitā;  
Esa saṅgho ujubhūto, paññāsīlasamāhito.
- 1138 Palāpāpagato suddho, paṭipattipattitṭhito;  
Pariggahitasaddhammo, samiddhiguṇasobhito.

- 1139 Pahīnāpāyagamano, pāpaklesavinissaṭo;  
Paripanthasamucchedī, bhavacārakabhedako.
- 1140 Uttamadamathappatto, suvinīto mahesinā;  
Vijjāvimuttivodāto, ājānīyapathe ṭhito.
- 1141 Sugatorasi sambhūto, sucidhammasirindharo;  
Paṭipāditasampatto, dhammasāsanasevito.
- 1142 Bhayabheravanissaṅgo, jinatejānupālito;  
Moneyyapathasañcāro, sugatovādabhājano.
- 1143 Appamādaparittāṇo, sīlālānkārabhūsito;  
Cetosamādhisannaddho, paññāyudhasamujjalo.
- 1144 Ujumaggamadhiṭṭhāya, mārakāyappadālano;  
Aparājitasāṅgāmo, lalitodātavikkamo.
- 1145 Maccudheyamatikkanto, bodhidhammappatiṭṭhito;  
Chalābhiññābalappatto, samārādhitasāsano.
- 1146 Anubodhimanuppatto, pabhinnapaṭisambhido;  
Sāmaññapāramippatto, toseti jinamānasam.
- 1147 Nekākārarūpeto, nānāsampattiphullito;  
Vipattipathanittiṇṇo, abhibuddhiparāyaṇo.
- 1148 Āhuneyyo pāhuneyyo,  
Dakkhiṇeyyo sudullabho;  
Sadevakassa lokassa,  
Puññakkhettamanuttaram.
- 1149 Yattha suddhimhi niddose, saddhābījaṃ patiṭṭhitam;  
Accantam paripāceti, sampattiphalamuttamam.
- 1150 Yaṃ phalam paribhuñjantā, vimuttirasasevanam;  
Accantasukhitā dhīrā, bhavanti ajarāmarā.
- 1151 Tam phalam patthayantena, **saṅghānussatibhāvanā**;  
Bhāvetabbā panicevamiti bhāsanti paṇḍitā.
- 1152 Pañcasīlam dasasīlam, pātimokkhamuposatham;  
Cātupārisuddhisīlam, dhutaṅgaparivāritam.
- 1153 Evametesu yaṃ kiñci, samādāya rahogato;  
Tamānisaṃsam gūṇato, phalato ca vicintaye.
- 1154 Ādi cetam patiṭṭhā ca, mukham pamukhamuttamam;  
Mūlam kusaladhammānam, pabhavam paṭipattiyā.
- 1155 Sāsanotaraṇadvāram, tittham saddhammavāpiyā;  
Pārisuddhipadaṭṭhānam, maggo khemantapāpako.

- 1156 Sādhu sikkhāsamādānaṃ, bāhusaccavibhūsaṃ;  
Ariyācārācāritta-mavaṇṇamalavajjanaṃ.
- 1157 Kūlaputtaalāṅkāro, pāpajallapavāhanaṃ;  
Anapāyi sugandhañca, mahāpurisasevitaṃ.
- 1158 Pacchānutāpaharaṇaṃ, pītipāmojjavaḍḍhanaṃ;  
Nekkhamaḥāvanopetaṃ, pabbajjāvesasobhanaṃ.
- 1159 Sopānaṃ saggalokassa, dalhāpāyavidhānaṃ;  
Anupaddavasampatti, samatthagūṇasūdanī.
- 1160 Klesapañjaravicchedi, vipattipathavāraṇaṃ;  
Soṭṭhikammaṣaṃmuṭṭhānaṃ, asādhāraṇamaṅgalaṃ.
- 1161: ‘Suladdhā vata me laddhā, saddhā sugatasāsane;  
Sīlaṃ me yassa kalyāṇaṃ, parisuddhamakhaṇḍitaṃ.
- 1162: ‘Dullabho vata me laddho,  
Mahālābho anappako;  
Yohamakkhalitācāro,  
Upaghātavivajjito.
- 1163: ‘Dhammaṅkuritasantāno, mūlajātosmi sāsane;  
Ujumaggaṃ samāruḷho, pihitā sabhayā disā.
- 1164: ‘Avañcā vata me jāti, āradhā khaṇasampadā;  
Paṭiṭṭhitomhi saddhamme, saphalaṃ mama jīvitaṃ’.
- 1165 Itthaṃ nānappakārena, cintento guṇamattano;  
Sīlakkhandhassa bhāveti, **sīlānussatibhāvanaṃ**.
- 1166 Saddhāya sīlavantesu, datvā dānaṃ yathārahaṃ;  
Niddhotamalamacchero, vivitto tamanussare.
- 1167 Dānaṃ nidhānāmanugaṃ, asādhāraṇamuttamaṃ;  
Avināsasukhādānaṃ, accantaṃ sabbakāmaḍaṃ.
- 1168 Kopaḍāhopasamaṇaṃ, maccheramalasodhanaṃ;  
Pamādaniddāvūṭṭhānaṃ, lobhapāsavimocanaṃ.
- 1169 Cetovikāradamaṇaṃ, micchāmagganivāraṇaṃ;  
Vittilābhasukhassādo, vibhavodayamaṅgalaṃ.
- 1170 Saddhādiguṇavodānaṃ, ajjhāsayaṅkāsanaṃ;  
Satācāraparikkhāro, tanucetovibhūsaṇaṃ.
- 1171 Appamaññāpadaṭṭhānaṃ, appameyyena vaṇṇitaṃ;  
Mahāpurisacārittaṃ, sapadānaṃ mahesinā.
- 1172 Dhammādhigatabhogānaṃ, sārādānāmanuttaraṃ;  
Mahattādhigamūpāyaṃ, lokasantatikāraṇaṃ.

- 1173 Atthakārī ca sammāhaṃ, pariccāgasamāyuto;  
Attano ca paresañca, hitāya paṭipannakā.
- 1174 Ujumaddavacittosmi, kālussiyavinissaṭo;  
Pāpasamklesavimukho, paṇabhūtānukampako.
- 1175 Sīlavantapatiṭṭhosmi, kapaṇānaṃ parāyaṇo;  
Buddhasāsanupaṭṭhāko, ñātimittopajīviko.
- 1176 Dānavossaggasammukho,  
Saṃvibhāgarato sukhī;  
Kapparukkhova phalito,  
Jāto lokābhivaḍḍhiyā.
- 1177 Pihitāpāyamaggosmi, maggadvāramapārutaṃ;  
Sampattā sabbasampatti, daliddassa manāpikaṃ.
- 1178 ‘Samsāraddhānapātheyyaṃ, sabbadukkhavinodanaṃ;  
Subandhaṃ mama sabbattha, gahito ca kaṭaggaho’.
- 1179 Evaṃ dānagaṇaṃ nānappakārena vicintayaṃ;  
Bhāveti dāyakoyogī, **cāgānussatibhāvanaṃ**.
- 1180 Saddhaṃ sīlaṃ sutamaṃ cāgaṃ, paññaṃ paṇḍitajātiko;  
Sampādayitvā saddhamme, devatāyo anussare.
- 1181 Cātumahārājikā ca, tāvatimsā ca yāmakā;  
Tusitā ceva nimmānaratino vasavattino.
- 1182 Taduttariñca ye devā, dibbakāyamadhiṭṭhitā;  
Tepi saddhādiddhammesu, cirakālaṃ patiṭṭhitā.
- 1183 Susamāhitasānkappā, dānasīladhurandharā;  
Dhammaggamadhiṭṭhāya, hirottappapurakkhatā.
- 1184 Taṃ lokamupapannāse, sassirīkaṃ parāyaṇaṃ;  
Iddhimanto jutimanto, vaṇṇavanto yasassino.
- 1185 Dibbasampattisampattā, nānābhogasamappitā;  
Pāleno dīghamaddhānaṃ, anubhonti mahāsukhaṃ.
- 1186 Te sabbepi ca mayhampi, vijjanti anupāyino;  
Saddhādīkusalā dhammā, devadhammāti vissutā.
- 1187 Saddhammaguṇasampatti-dātā maṅgalaṇāyikā;  
Dullabhāpi ca me laddhā, saddhā sugatasāsane.
- 1188 Vajjopavādarahito, pāpakammaparammukho;  
Parisuddhasamācāro, pasannāmalacetano.
- 1189 Niccamohitasotosmi,  
Tathāgatasubhāsīte;



Sutabhājanabhūto ca,  
Satimā susamāhito.

- 1190 Maccheramalanittiṇṇo, lobhakkhandhavimuccito;  
Opānabhūto lokasmiṃ, vissaṭṭhasukhayācano.
- 1191 Vatthuttayamahatte ca, hitāhitavinicchaye;  
Paññā vatthusabhāve ca, tikhiṇā mama vattati.
- 1192 Samārādhitasaddhammo, katapuññamahussavo;  
Devadhammasamiddhosmi, kalyāṇacaritākaro.
- 1193 Devatāhi samānohaṃ, guṇālaṅkārabhūsito;  
Hatthapatā ca deviddhi, nipphannā dibbasampadā.
- 1194 Devasāmañña miccevaṃ, cintento guṇamattano;  
Bhāveti guṇasampanno, **devatānussatiṃ** paraṃ.
- 1195 Jātidhammā jarābyādhisokopāyāsabhañjite;  
Anicce dukkhenatte ca, nibbinnopadhisambhave.
- 1196 Virāgo ca nirodho ca, cāgo mutti anālayo;  
Yoyamādānanissaggo, nibbānamiti vuccati.
- 1197 Upasantamidaṃ tñānamiti cinteti paṇḍito;  
Anupādānaṃ kliṭṭhamasaṅkhāramanāsavaṃ.
- 1198 Appamāṇaṃ paṇītañca, sivaṃ paramamaccutaṃ;  
Anantaḡuṇamaccanta-mavikāramanāmayaṃ.
- 1199 Khemaṃ taṃ pārimatīra-mahāyanakaraṃ paraṃ;  
Tāṇaṃ leṇaṅca dīpañca, patiṭṭhānaṃ parāyaṇaṃ.
- 1200 Vaṭṭānubandhavicchedo, bhavataṅghāvisosaṇaṃ;  
Sabbūpadhisamugghāto, dukkhanibbāpanaṃ sukhaṃ.
- 1201 Sabbapāpavināsoyaṃ, sabbaklesavisodhanaṃ;  
Sokopāyāsasantāpabhayaḡheravamocanaṃ.
- 1202 Palibodhasamucchedo, papañcaviniveṭhanaṃ;  
Sabbasaṅkhārasamatho, sabbalokavinissaṭo.
- 1203 Pārisuddhikarā dhātu, bhavanissaraṇaṃ padaṃ;  
Uttamāriyasampatti, anomamamataṃ padaṃ.
- 1204 Sabbathā bhaddamatulaṃ, nibbānamiti passato;  
**Upasamānussati**ti, bhāvanāyaṃ pavuccati.
- 1205 Sattānussatimiccevaṃ, bhāvento pana paṇḍito;  
Pāmojjabahulo hoti, pasanno buddhasāsane.
- 1206 Paṭipassaddhadaratha-mupacārasamādhinā;

Samādhiyati cittañca, parisuddhamanāmayam.

**1207**Bhāvanāmayametañca, katvā puññamanappakam;  
Vāsanāgatisampatti-bhogabhāgīti vuccati.

**1208**Upanissayasampanno, patvā nibbedhamuttamam;  
Diṭṭheva dhamme dukkhaggiṃ, nibbāpeti anāsavo.

**1209**Lokappavatti cintetvā, marañānussatiṃ pana;  
Bhāveyya sakamaccantaṃ, cintento marañam katham.

**1210**Animittamanaññātaṃ, maccānamidha jīvitam;  
Kasirañca parittañca, tañca dukkhena saṃyutaṃ.

**1211**Appodakamhi maccheva, bandhamāne rudammukhe;  
Maccu gacchati ādāya, pekkhamāne mahājane.

**1212**Purakkhatvāva marañam, jāyanti paṭisandhiyam;  
Jātā puna marissanti, evaṃdhammā hi pāṇino.

**1213**Yamekarattiṃ paṭhamam, gabbhe vasati mānavo;  
Abbhutṭhitova so yāti, sa gaccham na nivattati.

**1214**Sattā maranti gabbhepi, jāyamānā ca dārakā;  
Kumārā yobbanappattā, balappattā mahattarā.

**1215**Athāvassam maranteva, jiṇṇā daṇḍaparāyaṇā;  
Sūrā puññabalatthāmā, nānābyādhiniṭṭhitā.

**1216**Ajja suveti marañam, pariyesati pāṇino;  
Senā yuddhapayātāva, sabbe maccubhayākulā.

**1217**Sattāratanaṅkārā, caturiddhisamuggatā;  
Cakkavattī mahātejā, rājamaṇḍalasobhino.

**1218**Kappuṭṭhānamahāvātā, pātītāva mahāsīlā;  
Patanti maccuvikkhittā, paro cetāna mānavā.

**1219**Yepi dīghāyukā devā, vaṇṇavantā mahiddhikā;  
Ānubhāvabalappattā, mahābhogasukhedhino.

**1220**Tepi maccusamuddhattā, bhavanti bhayasamkulā;  
Verambhakkhittapakkhīva, mādisesu kathāva kā.

**1221**Accantarāyabahulo, marañāhitasambhavo;  
Niccamaṃ cakkasamāruḷho, lokoyam parivattati.

**1222**Etthantare marañassa, vemajjhe mama vattato;  
Assāsepi avissatṭhe, jīvikā ce kathāva kā.

**1223**Accheram vata lokasmiṃ, khaṇamattampi jīvitam;  
Nissitopaddavaṭṭhāne, mahābyasanapīṭite.

1224 Addhuvam jīvitam nicca-maccantaṃ maraṇaṃ mama;  
Sabhāvo maraṇanteva, viseso pana jīvitam.

1225 Atthamārabbha gacchanto, ādiccova nabhantare;  
Maraṇāyābhidhāvanto, vihāyāmi suve suve.

1226 Vajjhappatto mahācoro,  
Niyyātāghātaṇaṃ yathā;  
Maraṇāya payātohaṃ,  
Tathevamanivattiyo.

1227 Ambujova vaṅkaghasto, tāṇaleṇavivajjito;  
Niccaṃ maccuvasaṃ yanto, vissaṭṭho kimahaṃ care.

1228 Ko me hāso kimānando,  
Kimahaṃ mohapāruto;  
Madappamādavikkhitto,  
Vicarāmi niraṅkuso?

1229 Handāhamārabhissāmi, sammāsambuddhasāsane;  
Ātāpī pahitatto ca, hirottappasamāhito.

1230 Paṭipattiparo hutvā, pāpadhammaniraṅkato;  
Nibbāpayāmi accantaṃ, sabbadukkhahutāvahaṃ.

1231 Itthaṃ panattano yogī, maraṇaṃ paṭicintayaṃ;  
**Maraṇānussatiṃ** nāma, bhāvetīti pavuccati.

1232 Tadetam pana bhāvetvā, upacārasamāhito;  
Nibbedabahulo hoti, appamādadhurandharo.

1233 Micchādhammaṃ virājetvā, nandirāganirālayo;  
Sabbāsavaparikkhīṇo, pappoti amataṃ padaṃ.

1234 Gahetvā pana medhāvī, dvattiṃsākārahāvanam;  
Kareyya tāva pacchā ve, anupubbamabhiṇhaso.

1235 Kesā lomā nakhā dantā, taco maṃsaṃ nahāru ca;  
Aṭṭhi ca miṅja vakkaṃ ca, hadayaṃ yakanam tathā.

1236 Kilomaṃ pihaka papphāsaṃ, antaṃ guṇamudariyaṃ;  
Matthaluṅgaṃ karisaṅca, pittaṃ semhamathāparaṃ.

1237 Pubbo ca lohitaṃ sedo,  
Medo assu vasātha vā;  
Kheḷo siṅghāṇikā ceva,  
Lasikā muttamiccapi.

1238 Ghanabandhasubhākāra-vipallāsānusāriṇaṃ;  
Yathābhūtāvabodhāya, vibhattāva mahesinā.

1239 Kāye bāttiṃsa koṭṭhāsā,

Kuṇapāva samussitā;  
Sāragayhūpagāpetā,  
Dhikkatā dhīrahīlitā.

- 1240 Asubhāva paṭikkūlā, jegucchā sucivajjitā;  
Ninditā cakkhumantehi, andhabālopalālitā.
- 1241 Vicittachavisañchannā, tacabhattasamohitā;  
Parissavaparikliṭṭhā, kuthitā pūtigandhitā.
- 1242 Dhoviyantāpi satataṃ, ajahantā malassavaṃ;  
Sugandhānuvilittāpi, duggandhaparīṇāmino.
- 1243 Ahaṃkāramamattena, vissaṭṭhasukhasaṅgahā;  
Saṅghāṭṭhānasambaddhā, sammohenti mahājanāṃ.
- 1244 Chandarāgasamūpetā, yattha muḷhā puthujjanā;  
Sevanti visamaṃ ghorāṃ, caturāpāyabhāgino.
- 1245 Tattha cittaṃ virājetuṃ, paṭipanno yathākkamaṃ;  
Cetovibhāvanattāya, koṭṭhāsesu vicakkhaṇo.
- 1246 Vacasā manasā ceva, yathāvuttānusārato;  
Anulomapaṭilomaṃ, sajjhāyitvā tato paraṃ.
- 1247 Vaṇṇasaṅghānadisato, vavatthapeyya paṇḍito;  
Tatokāsaparicchedā, paccekaṃ tu yathākkamaṃ.
- 1248 Vaṇṇasaṅghānagandhā ca,  
Āsayokāsato tato;  
Vibhāveyyāsubhākāra-  
Mekekasmīṃ tu pañcadhā.
- 1249 Dasadhābhogamiccevaṃ, katvā bhāvayato pana;  
Santibhūtā pakāsentī, rathacakkārasādisā.
- 1250 Hitvā appaguṇe tattha, gaṇhaṃ suppaguṇaṃ budho;  
Appanaṃ paṭibhāgañca, pappotekekavatthusu.
- 1251 Asubhākāramārabha, bhāvanā ce pavattati;  
Kammaṭṭhānaṃ paṭikkūlaṃ, paṭhamajjhānikaṃ siyā.
- 1252 Nīlādivaṇṇamārabha, paṭibhāgo yadā tadā;  
Nīlādikaṣiṇaṃ hutvā, pañcakajjhānikaṃ bhava.
- 1253 I akkhaṇākāramārabha, cintanā ce pavattati;  
Vipassanākammaṭṭhāna-mitī bhāsanti paṇḍitā.
- 1254 Tidhā pabhedamiccevaṃ, bhāvento puna buddhimā;  
**Kāyagatāsatiṃ** nāma, bhāvetīti pavuccati.
- 1255 Soyamajjhattaṃ nibbinno, bahiddhā ca nirālayo;

Ubbegabahulo yogī, pamādamativattati.

1256 Kāmabandhavinimutto, pāpā medhāvi nissaṭṭo;  
Sacchikatvāna sāmāññaṃ, amatam paribhuñjati.

1257 Ānāpānassatiṃ nāma, sammāsambuddhavaṇṇitam;  
Kammaṭṭhānādhirājānaṃ, bhāvento pana paṇḍito.

1258 Appanañcopacārañca, samathañca vipassanaṃ;  
Lokuttaram lokiyañca, sukhenevādhigacchati.

1259 Sukhumā nipuṇā tikkhā, paripakkā bale ṭhitā;  
Bodhipakkhiyadhammā ca, vodāyanti visesato.

1260 Kammaṭṭhāne tathā hettha, gaṇanā anubandhanā;  
Phusanā ṭhapanā ceva, sallakkhaṇavivaṭṭanā.

1261 Pārisuddhi tato pacchā, tesañca paṭipassanā;  
Iccevamaṭṭhadhā bheda, mātikāyaṃ pakāsītā.

1262 Vibhattā satipaṭṭhāna-vasā soḷasadhā tato;  
Ānāpānappabhedena, bhinnā dvattiṃsadhā puna.

1263 Tameva pariyādāya, samathañca vipassanaṃ;  
Mahattavepullagataṃ, bhāveyya satimā katham.

1264 Ānāpānaṃ pariggayha, pavivitto rahogato;  
Gaṇeyya paṭhamaṃ tāva, nisinno sukhamāsane.

1265 Pañcannaṃ na ṭhapetabbaṃ, heṭṭhā na dasatopari;  
Netabbamanupubbena, gaṇetabbamakhaṇḍitam.

1266 Anto bahi ca vikkhepa-makatvāna punappunaṃ;  
Phuṭṭhaṭṭhānamhi satimā, anubandheyya mānasaṃ.

1267 Nāsikaggottaroṭṭhe ca, katvābhogaṃ tatoparam;  
Satatassāsamphassaṃ, āvajjantassa yogino.

1268 Puthulaṃ vātha dīghaṃ vā, maṇḍalaṃ vātha vitthatam;  
Tārakādisamākāraṃ, nimittaṃ tattha jāyati.

1269 Cittaṃ samāhitam hoti, upacārasamādhinā;  
Upaklesā pahiyanti, paṭibhāge samuṭṭhite.

1270 Nimitte ṭhayaṃ cittaṃ, tato pāpeti appanaṃ;  
Pañcājjhānavasenāyaṃ, samathe bhāvanānayo.

1271 Ārabhitvābhinivesa-mānāpāne punāparo;  
Ajjhatañca bahiddhā ca, tato tadanusārato.

1272 Bhūmidhamme yathābhūtam, vipassitvā visārado;  
Appetānuttarajjhāna-mayaṃ suddhivipassanā.

- 1273 Ānāpānasamāpattiṃ, katvā pādakamuttaram;  
Bhāventassa vasenāhu, nayaṃ soḷasadhā katham.
- 1274 Dīghamassāpassāsā, rassaṃ vātha tathā dvayaṃ;  
Satimā matisampanno, paṭhamam parigaṇhati.
- 1275 Ādimajjhāvasānaṃ tu, karonto viditaṃ tathā;  
Samāhito sabbakāya-paṭisaṃvedi sikkhati.
- 1276 Tato te eva saṅkhāre, passambhento parūpari;  
Vutto passambhayaṃ kāyasaṅkhāraṃ sikkhatīti ca.
- 1277 Ānāpānasaticcevaṃ, kāyasaṅkhāranissitā;  
Kāyānupassanā nāma, catudhāpi ca bhāsītā.
- 1278 Sampayuttēna ñāṇēna, pītimālambaṇēna ca;  
Vipassanāya samathe, kubbanto pākaṭam sukham.
- 1279 Vedanāsaññāsaṅkhāte, cittasaṅkhārake tathā;  
Pītādipaṭisaṃvedī, sikkhatīti pavuccati.
- 1280 Thūle te eva saṅkhāre, sametaṃ paribhāvayaṃ;  
Vutto ‘‘passambhayaṃ cittaṃ, saṅkhāraṃ sikkhatī’’ti ca.
- 1281 Tassā taṃtaṃmukhenettha, sampajjanavisesato;  
Vedanānupassanāya, catudhā samudīritā.
- 1282 Appento paccavekkhanto, bujjhanto ca pakāsitaṃ;  
Karonto mānasam citta-paṭisaṃvedi sikkhati.
- 1283 Tamevābhippamodento, sappītikasamādhinā;  
‘‘Abhippamodayaṃ cittaṃ, sikkhatī’’ti pavuccati.
- 1284 Appanāyopacārena, tamevātha samādahaṃ;  
Yogī ‘‘samādahaṃ cittaṃ, sikkhatī’’ti pakāsito.
- 1285 Paccanīkehi vikkhambha-samucchedehi mocayaṃ;  
Tathā ‘‘vimocayaṃ cittaṃ, sikkhatī’’tipi bhāsito.
- 1286 Ānāpānaṃ pabhedāya, kammaṭṭhānaṃ yathārahaṃ;  
Cittānupassanā nāma, pavattāyaṃ catubbidhā.
- 1287 Vipassanāyaniccānu-gatattā hi visesato;  
Vipassanto aniccānu-passī sikkhati paṇḍito.
- 1288 Tato virāgānupassī, nibbinditvā virājayaṃ;  
Tathā nirodhānupassī, bhūmidhamme nirodhayaṃ.
- 1289 Pakkhandanapariccāgapaṭinissaggato pana;  
Paṭinissaggānupassī, sikkhatīti pavuccati.
- 1290 Ānāpānamukheneva, bhūmidhammavipassanā;

Dhammānupassanā nāma, bhāsītevaṃ catubbidhā.

**1291** Iti soḷasadhākāraṃ, sikkhattayapatiṭṭhitam;  
Catubbidhampi pūreti, satipaṭṭhānabhāvanam.

**1292** Pariggayha satīñceva-mussāhanto vipassanam;  
Dvattiṃsākārabhedehi, satokārīti vuccati.

**1293** Itthañca gaṇanādīhi, bhāvetvā samatham tato;  
Vipassanādhivacanam, katvā sallakkhaṇam puna.

**1294** Patvā vivaṭṭanāmaggaṃ, pārisuddhiphale ṭhito;  
Paccavekkhaṇasaṅkhātam, pappoti satipassanam.

**1295** Ānāpānasaticcevamasesam paripūritā;  
Sākāram sappabhedañca, bhāvitāti pavuccati.

**1296** Ānāpānasamādhimetamatulam buddhāpadānuttamam,  
Pāpaklesarajoharam sukhamukham dukkhagginibbāpanam;  
Bhāvetvā satisampajaññavipulā vikkhepaviddhamśakā,  
Pappontuttaramuttamāmatapadam bodhittayabyāpakam.

**1297** Buddhaṃ dhammañca saṅgham puthunanamahitam suddhasīlam sudānam,  
Dhammaṭṭhā devatāyopasamatha maraṇam kāyamānañcapānam;  
Paññattārabbhayāyam satisamavahitā bodhimaggodayāya,  
Sāyam saddhammanettī sahitasivaguṇā sevitabbādarena.

Iti nāmarūpaparicchede dasānussativibhāgo nāma

Navamo paricchedo.

## 10. Dasamo paricchedo

### Sesakammaṭṭhānavibhāgo

**1298** Byāpādādīnavam disvā, khemabhāvañca khantiyam;  
Appamaññā tu bhāvento, vineyya paṭigham katham.

**1299** Cetosantāpano kodho,  
Sampasādavikopano;  
Virūpabībhacchakaro,  
Mukhavaṇṇappadhamsano.

**1300** Sīlakālussiyuppādo, cittavikkhepasambhavo;  
Paññāpajjotaviddhamśī, paṭipattivibandhako.

**1301** Apāyekāyano maggo, pāpakaṇṭakabandhako;  
Dhammaggasamucchedī, maggadvārapidhānako.

**1302** Yasovaṇṇavisāṅkhāro, guṇamūlappabhañjako;  
Dukkhadhammasamodhāno, byasanopaddavākaro.

- 1303Dunnimittamidaṃ jātaṃ, sabbasampattidhamṣanaṃ;  
Dhūmaketusamuppādo, sabbalokavināsako.
- 1304Sabbakalyāṇadharmānaṃ, avamaṅgalamuṭṭhitaṃ;  
Hitārambhasamugghātī, antarāyasamāgamo.
- 1305Sabbākārapaṭikkūlaṃ, sabbaviddesakāraṇaṃ;  
Vipattimukhamuppannaṃ, amittajanapatthitaṃ.
- 1306Sapattakaraṇaṃ ghoraṃ, sabbānatthavidhāyakaṃ;  
Bhayamantarato jātaṃ, taṃ jano nāvabujjhati.
- 1307Khuradhāraṃ lihantāva, gilantāva hutāsaṇaṃ;  
Tittalābumva khādantā, gaṇhantādittamāyudhaṃ.
- 1308Byāpādamattasambhava-mattaghaññāya kevalaṃ;  
Upalāḷenti dummedhā, ghoramāsīvisaṃ yathā.
- 1309Dosatejena rukkhova, susirāruḷhapāvako;  
Antonudayhamānāpi, vipphandanti vighātino.
- 1310Nāvabujjhanti dummedhā, cetosaṅkappavāyūnā;  
Ukkāmukhāmivāditta-mujjalantā punappunaṃ.
- 1311Bhayamaggasamāruḷhā, khemamaggavirodhino;  
Byāpannā kibbisākiṇṇā, atthadvayavirodhino.
- 1312Anāthā sallakāviddhā, visaṭṭā anusocino;  
Andhā viya migāraññe, bhamanti hatacakkhukā.
- 1313Asaṃvihitakammantā, bālā kodhavasānugā;  
Khippaṃ lakkhiṃ pariccattā, yasobhogehi dhamṣare.
- 1314Duppaṭippāditārambhā, kodhasaṅkhobhamohitā;  
Dhammāmatarasassādaṃ, na vindanti aviddasu.
- 1315Bahvādīnavamicceva-manto byādhimivuṭṭhitaṃ;  
Jātānalāmivucchaṅge, ajjupekkhanti dujjanā.
- 1316Codayamānā dukkhehi, klesāciṇṇamalīmahā;  
Pāpakammehi pūrentā, senti maccupathe ciraṃ.
- 1317Tamevaṃ paṭisaṅkhāya, paṭighaṃ pana yoniso;  
Vālamigaṃva dhāvantaṃ, āvisantaṃva rakkhasaṃ.
- 1318Pāvakaṃva paribyuḷhaṃ, bhāyamānassa yogino;  
Soṭṭhibhāvāya khemanta-mupaññattaṃ mahesinā.
- 1319Mātā kalyāṇadharmānaṃ, khamā nāma mahiddhikā;  
Samappavatti sattesu, sabbasampattisādhikā.
- 1320Kodhānalajalāseko,



Sokopāyāsanāsanam;  
 Āghātasallaniddhārī,  
 Upanāhavimocanam.

- 1321** Vaṇṇakittisamuṭṭhānam, guṇamūlābhisevanam;  
 Apārutamukhaṃveta-matthadvayasamiddhiyā.
- 1322** Vighātapariyādāna-māsavānamasesato;  
 Paṭipassambhanaṃ ceto-pītikaraṇacandanam.
- 1323** Sabbadukkhasamugghāti, sukhupaṭṭhānamuttamam;  
 Byasanodayavicchedo, bhayabheravaniggamo.
- 1324** Cetopasādasandhāno, pāsādikaphalāvaho;  
 Pavaro bodhisambhāro, narānanisevito.
- 1325** Pāpakantāranitthāro, caturāpāyaro dhako;  
 Dvārāvāpuraṇaṇcetaṃ, devalokūpapattiyā.
- 1326** Paññāsīlasamādhānam, paṭipattivisodhano;  
 Piyaṅkaro sammabhāvo, dullabho bahupaṭṭhito.
- 1327** Klesasaṅkhobhavikkhepa-vipphandapaṭibandhanam;  
 Titikkhāguṇamakkhāta-mārakkhavidhimattano.
- 1328** Vihiṃsāratisārambha-paṭirodhavimocanam;  
 Verikkibbisaviddhamāsī, lokānuggahakāraṇam.
- 1329** Dhammapajjotakaraṇam, saṃyogamalasodhanam;  
 Sammohatimiruddhārī, sampattipaṭipādanam.
- 1330** Icattattham paratthaṅca, sampādetvā khamāparo;  
 Sādheti sabbasampatti-midha ceva parattha ca.
- 1331** Titikkhāguṇasampanno, paṇabhūtānukampako;  
 Anākulitakammanto, sorato sakhilo suci.
- 1332** Nivāto samitācāro, subhago piyadassano;  
 Paṭisaṅkhābalappatto, dhitimā matipāṭavo.
- 1333** Akkhobho adhivāsento,  
 Sabbānatthe parissaye;  
 Bhīmasaṅgāmāvacaro,  
 Hatthināgova sobhati.
- 1334** Ittham samantato bhaddam, titikkham paccavekkhato;  
 Passambheti samuṭṭhāya, khamā byāpādasambhamam.
- 1335** Dibbosadhamivātānkaṃ, meghajjavam hutāsanam;  
 Khippamantaradhāpeti, titikkhā kodhamattano.
- 1336** Tatonekaguṇopetaṃ, nekadosappabhañjanam;

Khantidhammamadhiṭṭhāya, pasannadhīramānaso.

1337 Bhāveyya paṭhamam tāva, **mettābhāvanamuttamaṃ**;  
Attānamupamaṃ katvā, sattesu hitavuḍḍhiyā.

1338 Sabbe sattā ca pāṇā ca, bhūtā jīvā ca puggalā;  
Abyāpajjā tathāverā, anīghā ca sukhedhino.

1339 Vijjāsampattibhogehi, pavaḍḍhantu yasassino;  
Parivārabalappattā, bhayopaddavavajjitā.

1340 Sakhilā sukhasambhāsā, aññamaññāvirodhino;  
Modantu suhitā sabbe, mā kiñci pāpamāgamā.

1341 Saddhāpāmojjabahulā, dānasīlamahussavā;  
Guṇabhūsitasantānā, āyuṃ pālentanaṃmayam.

1342 Sammādiṭṭhiṃ purodhāya, saddhammapaṭipattiyā;  
Ārādhentu hitopāya-maccantaṃ sukhasādhanam.

1343 Iti nānappakārena, sattesu hitamānasam;  
Mātāva piyaputtamhi, pavatteyya nirantaram.

1344 Sineham parivajjento, byāpādañca vināsayam;  
Parisuddhena cittena, hitakāmo va kevalam.

1345 Mettāya mitte majjhatte, verike ca yathākkamaṃ;  
Karonto sīmasambhedam, attani ca samam phare.

1346 Āsevantassa tassevam, hitābhogasamāhitam;  
Sattapaññattimārabha, samādhīyati mānasam.

1347 Tato anīgho ekaggo, upasantamanoratho;  
Jhānattikam catukkam vā, mettācetovimuttiyā.

1348 Bhūmidesadisāsatta-bhedabhinnesu odhiso;  
Yathāsambhavamappeti, sabbasattesvanodhiso.

1349 Tadevamekasattamhi, paricchedanīyāmato;  
Bahukesu ca sattesu, sabbesu ca pavattati.

1350 Tathāsevitasantāno,  
Mettācetovimuttiyā;  
**Karuṇābhāvanā**yoga-  
Mārabheyya tato param.

1351 Sattānam dukkhitākāra-māvajjitvāna yoniso;  
“Aho dukkhā vimuccantu, sabbe sattā”ti cintayam.

1352 Katham māṇavakoyañca, bhayabheravakampito;  
Byasanopaddavāviddho, vipphandati vighātavā.

- 1353Tathā hete vimosāya, paṭipannā virodhino;  
Sabyāpajjā vihaññanti, cetodukkhasamappitā.
- 1354Athaññe paridevanti, vipattivinipātikā;  
Padhupāyikasaṅkappā, sokopāyāsabhāgino.
- 1355Athāpare parābhūtā, kāmaklesavasīkatā;  
Mohandhakārapakkhantā, sattā gacchanti duggatiṃ.
- 1356Te tatha kaṭukaṃ ghoramanubhontā sakaṃ phalaṃ;  
Dukkhasūlasamāviddhā, bhāhā paggayha kandare.
- 1357Dīgharattādhimuttāya, devalokasamiddhiyā;  
Devakāyā vihāyanti, akāmā parivattino.
- 1358Cirakālaṃ jalitvāna, sūriyova nabhantare;  
Brahmānopi patanteva, brahmalokāparāyaṇā.
- 1359Khandhapañcakamiccevaṃ, dukkhāgāraṃ samubbahaṃ;  
Nānāgatīsu vikkhittaṃ, pāñajātaṃ vihaññati.
- 1360Anāthamanayāpannaṃ, parihānibhayākulaṃ;  
Vātamaṇḍalikakkhittapakkhīva parivattati.
- 1361Iti disvāna sutvā vā, sambhāvetvāna vā puna;  
Dukkhāpagamamicchanto, dukkhāpagama patthayaṃ.
- 1362Sukhitesu ca medhāvī, dukkhākāraṃanussaraṃ;  
Pavatteyya dayāpanno, karuṇābhāvanappaṇaṃ.
- 1363:‘Aho sattā vimuccantu, dukkhadhammehi sabbathā;  
Sādhu samentupāyāsā, sokā ca paridevanā.
- 1364:‘Khīyantu pāpadhammā ca, passambhentāmayā tathā;  
Saṃklesā palibodhā ca, samucchiḥjantu pāṇinaṃ.
- 1365:‘Byāpādā ca vihāyantu, vinivattantupaddavā;  
Byasanāni vinassantu, vigacchantu vipattiyo.
- 1366:‘Vihesā ca vighātā ca, khīyantu bhayabheravā;  
Paṭikkamantu vissaṭṭhā, sotthiṃ passantu pāṇino’.
- 1367Iccevamanukampanto, sabbasattepi sabbathā;  
Sabbadukkhasamugghātaṃ, patthento karuṇāyati.
- 1368Sokuppattaṃ nivārento, vihiṃsaṃ dūrato haram;  
Mettāyamiva pāpeti, karuṇājhānamappaṇaṃ.
- 1369Karuṇānantaraṃ yogī, bhāveyya **muditaṃ** tato;  
Sattānaṃ sukhitākāraṃāvajjetvāna yoniso.
- 1370Kathaṃ cirāya brahmāno, mahātejā mahiddhikā;

Pītibhakkhā subhaṭṭhāyī, pamodanti nirāmayā.

**1371** Devakāyā mahābhogā,  
Mahesakkhā yasassino;  
Accharāparivārehi,  
Paricārenti nandane.

**1372** Rājābhisekasampattā, chattacāmarabhūsitā;  
Ādhippaccamadhiṭṭhāya, sukhitā rājabhogino.

**1373** Yathopaṭṭhitabhogehi, tadaññepi ca pāṇino;  
Yathākāmitanipphannā, modanti sukhapītikā.

**1374** Caturāpāyikā sattā, pāpakamma-parikkhayā;  
Tato cutābhinandanti, sukhaṭṭhāne patiṭṭhitā.

**1375** Sabbālayasamugghātaṃ, patvā lokuttaraṃ padaṃ;  
Paṭipassaddhadarathā, sukhaṃ modantanappakaṃ.

**1376** Īti disvāna sutvā vā, sambhāvetvā punappunaṃ;  
Sattānamadhivāsento, sukhākāraṃ pamodati.

**1377** ‘Aho sādhu aho suṭṭhu,  
Modanti vata pāṇino;  
Aho suladdhaṃ sattānaṃ,  
Samiddhimabhipatthitaṃ.

**1378** ‘Pasannamukhavaṇṇā ca, paripuṇṇamanorathā;  
Pītipāmojjabahulā, ciraṃ jīvantunāmayā.

**1379** ‘Bhaya-maggamatikkantā, dukkhasaṅghāṇanissaṭṭā;  
Khemamaggamanuppattā, pītisampattiphullitā.

**1380** ‘Samaggā suhitā cete, paṭisandhānapesalā;  
Sampattimabhivedenti, kalyāṇaguṇabhūsitā’.

**1381** Īti sammā pihāyanto, sukhādhigamasampadaṃ;  
Sattānamabhīrocento, muditāya samaṃ pharaṃ.

**1382** Hitvā palāsābhisaṅgaṃ, issāratiniraṅkato;  
Mettāyamiva pāpeti, muditājhānamappaṇaṃ.

**1383** Muditaṃ pana bhāvetvā, bhāveyyupēkkhamuttamaṃ;  
Virodhānunayaṃ hitvā, hutvā majjhattamānaso.

**1384** Sabhāvabhūta lokassa,  
Lābhālābhaṃ yasāyaṃ;  
Nindāpasamsaṃ passanto,  
Sukhaṃ dukkhañca kevalaṃ.

**1385** Kathaṃ kamma-sakatattāyaṃ lokānuparivattati;  
Lokadhamme parābhūto, attādheyyavivajjito.

- 1386 Kim nāmatthi samatthettha, pavattetuṃ yathārucci;  
Kassa vā ruciyaṃ honti, sukhitā vātha dukkhitā.
- 1387 Yathāpaccayasambhūtā, sukhadukkhā hi paṇino;  
Na sakkā parivattetuṃ, aññaena puna kenaci.
- 1388 Micchāmaggaṃ madhiṭṭhāya, vipajjanti ca mānavā;  
Sammāmaggaṃ purodhāya, sampajjanti punattanā.
- 1389 Tattha kāyavasene, parivattanti aññathā;  
Yathāruccitakammantā, paccekavasavattino.
- 1390 Niratthakavihesāyaṃ, mañña lokavicāraṇā;  
Santametāṃ paṇītaṇca, yadidaṃ tatrapekkhanaṃ.
- 1391 Ahaṃ ko nāma ke cete, kimaṭṭhānabudhantaro;  
Paresupari pekkhanto, vihaññaṃ mīti attano.
- 1392 Sukhitā hontu vā mā vā, dukkhā muccantu vā na vā;  
Samiddhā vā daliddā vā, kā mamettha vicāraṇā.
- 1393 Attānaṃ parihāraṇtu, yathākāmaṃ tu paṇino;  
Palibodho papaṇco vā, byāpādo vā na me tahiṃ.
- 1394 Iti saṅkhāyapekkhanto, hitakāmopi paṇinaṃ;  
Apakkhapātupekkhāya, samaṃ pharati yoniso.
- 1395 Aññaṇupekkhā nikkhanto, anurodhaṃ virājiya;  
Mettāyamiva pāpeti, pañcamajjhānamappaṇaṃ.
- 1396 Appamaññaṃ catasseva-mācikkhi vadataṃ varo;  
Mahāpurisadhoraṃ, hitakāmo mahāmuni.
- 1397 Na liṅgavisabhāgamhi, ādikammikayoginā;  
Bhāvetabbā matasatte, mettameva na sabbathā.
- 1398 Paṭṭabbasampadākāraṃ, dukkhākāraṇca paṇisu;  
Āvajjaṃ muditākāraṇaṃ tathā.
- 1399 Attani duggate mitte, majjhatteti yathākkamaṃ;  
Paṭṭhamaṃ bhāvanāyogamārabhitvā tato paraṃ.
- 1400 Attani mitte majjhatte, veriketi catūsopi;  
Karonto sīmasambhedaṃ, sabbattha samamānaso.
- 1401 Bhūmikādippabhedehi, paricchijjodhisso tathā;  
Aparicchijja vā cetā, bhāvetabbāti bhāsita.
- 1402 Asaṅkhotitasantānā, tāhi bhūtānukampakā;  
Vihārantuttamā brahmavihārāti tato matā.
- 1403 Appamaññā lambaṇattā, tathā suppaṭipattiyā;

Sattesu appamāṇattā, appamaññāti sammatā.

1404 Asampattahitā sattā, dukkhitā laddhasampadā;  
Kammassakāti cintetvā, tato tesu yathākkamaṃ.

1405 ‘‘Sampattīhi samijjhantu,  
Dukkhā muccantu pāṇino;  
Aho sattā sukhappattā,  
Hontu sattā yathā tathā’’.

1406 Icchābhivuddhimicchanto, dukkhāpagamaṇaṃ tathā;  
Samiddhe anumodanto, upekkhanto ca pīṇite.

1407 Mātāva dahare putte, gilāne yobbane ṭhite;  
Sakiccapasute ceva, catudhā sampavattati.

1408 Itthaṃ catudhā sattesu, sammā cittapavattanā;  
Sabbathāpi catuddhāva, tato vuttā mahesinā.

1409 Icchetā pana bhāvento, pasannamukhamānaso;  
Sukhaṃ supati suttopi, pāpaṃ kiñci na passati.

1410 Paṭibujjhatanutrāso, jāgarova pamodati;  
Cetaso ca samādhānaṃ, khippamevādhigacchati.

1411 Parissayā pahīyanti, vigacchanti cupaddavā;  
Devatāpi ca rakkhanti, amuyhantaṃ anākulamaṃ.

1412 Phullaṃva kamalaṃ kāle, candaṃva vimalaṃ jano;  
Sommakomaladhammehi, piyacakkhūhi passati.

1413 Asaṃhīro asaṃkuppo, sabbāvatthāsu paṇḍito;  
Samaṃ pavattitārambho, lokamesonugaṇhati.

1414 Khaṇamattopacārekā, pavattekamhi puggale;  
Appamāṇa phalitveva, vaṇṇayanti mahesino.

1415 Pageva sabbasattesu, appanāpattabhāvanā;  
Catassopi samībhūtā, vasībhūtā nirantaraṃ.

1416 Puññadhārābhisandantā, paripūrenti paṇḍitaṃ;  
Appameyyamahoghova, sāgaraṃ vīcimāliṇamaṃ.

1417 Appamaññāmayānaṃ hi, puññānaṃ soḷasiṃ kamaṃ;  
Sabbopadhikapuññāni, nāgghantīti pakāsitaṃ.

1418 Avañjhā tassa pabbajjā, yassa hetāsu gāravo;  
Sukhumodayabahulo, tisso sikkhā susikkhati.

1419 Amoghaṃ raṭṭhapiṇḍaṇca, bhuñjateso visesato;  
Tampi mahapphalaṃ hoti, saddhādeyyaṃ patitṭhitaṃ.

- 1420 Saddhādikusalā dhammā, pavaḍḍhanti akhaṇḍitā;  
Sambuddhicariyānañca, mahattaṃ tassa pākaṭaṃ.
- 1421 Akicchapaṭivedhāya, pādakajjhānamuttamaṃ;  
Uju cekāyano maggo, brahmalokūpapattiyā.
- 1422 Vāsanābhāgiyā cetā, bodhisambhārakūlikā;  
Sovaggikā sukhāhārā, lokārakkhā niruttarā.
- 1423 Appameyyānisamsevaṃ, appameyyaguṇodayā;  
Appamaññā tato tāsu, na pamajjeyya paṇḍito.
- 1424 Paṭikkūlaṃ panāhāre, bhāvento saññamuttamaṃ;  
Kabaḷikāramāhāra-mannaṇānādisaṅgahaṃ.
- 1425 Asitaṃ khāyitaṃ pītaṃ, sāyitañca rahogato;  
Paṭikkūlanti cinteyya, gamaṇādivasā kathaṃ.
- 1426 Tapovanamidaṃ hitvā, ramaṇīyamaṇākulaṃ;  
Āhārahetu gantabbo, gāmo gāmajanākulo.
- 1427 Tatthāsuciparikliṭṭhe, dujjanāvārasaṅkare;  
Dīnamesayatuttiṭṭhaṃ, gehe gehe tu bhojanaṃ.
- 1428 Taṃ kheḷamalasaṃkliṭṭhaṃ, jivhaggaparivattitaṃ;  
Dantacuṇṇitasambhinnaṃ, vaṇṇagandhaṃ vilissati.
- 1429 Pittasemhaparibyuḷhaṃ, pubbalohitamissitaṃ;  
Pavisantaṃ paṭikkūlaṃ, jegucchaṃ dhikkatāsivaṃ.
- 1430 Kucchiyaṃ kuṇapākiṇṇe, duggandhaparibhāvite;  
Suvānavamathākāraṃ, vantaṃva svānadoṇiyaṃ.
- 1431 Tattacandanikāyaṃva, nānākimisamākule;  
Tattha bubbuḷakacchannaṃ, kuthitaṃ paripaccati.
- 1432 Saṃpaccantaṃ panetañca, sabhāvañca visevitaṃ;  
Vaḍḍheti kesalomādiṃ, nānākuṇapasañcayaṃ.
- 1433 Vipaccantamathopetamanekopaddavāvahaṃ;  
Kuṭṭhagaṇḍakilāsādimaḥābyādhisatodayaṃ.
- 1434 Pūtibhūtañca taṃ pakka-manekadvārasañcitaṃ;  
Medapiṇḍaṃva kuthitaṃ, parissavati santataṃ.
- 1435 Yena pūtigato kāyo, niccaṃ duggandhavāyiko;  
Dhoviyantopi satataṃ, sucibhāvaṃ na gacchati.
- 1436 Kucchito soyamāhāro,  
Kāyāsucinisevano;  
Nissandamalaniṭṭhāno,  
Upaklesaphalāvaho.

- 1437 Kāmarāgasamuṭṭhānaṃ, rogajātinibandhanaṃ;  
Madappamādādhīṭṭhānaṃ, pāpakammamahāpatho.
- 1438 Ahitodayamaggoyaṃ, bhayabheravasambhavo;  
Byasanāgamanadvāraṃ, apāyāvahitaṃ mukhaṃ.
- 1439 Carantattasamattāva, yatthodariyamucchitā;  
Kliṭṭhakammāni dummedhā, karontā dukkhabhāgino.
- 1440 Tattha cittavirāgāya, kiṃ pakkaphalasannibhe;  
Rasassādapiyākāre, ghorādīnavasañcite.
- 1441 Bhāventassa paṭikkūla-saññamevaṃ vibhāvino;  
Upacārapathaṃ patvā, cittaṃ hoti samāhitaṃ.
- 1442 Soyaṃ passambhitāhāra-  
Visado so vicakkhaṇo;  
Madappamādanikkhanto,  
Rasassādanirālayo.
- 1443 Limpento viya bhesajja-makkharabbhañjako yathā;  
Puttamaṃsaṃva khādanto, āhāraṃ paribhuñjati.
- 1444 Ariyavaṃsānupajāto,  
Appicchādiguṇodito;  
Kāmajālaṃ padāletvā,  
Soṭṭhiṃ pappoti paṇḍito.
- 1445 Catudhātuvavatthānaṃ, bhāvento pana pañcadhā;  
Dhātuyo parigaṇheyya, catassopi sabhāvato.
- 1446 Saṅkhepena ca vitthārā, sambhārā ca salakkhaṇā;  
Ajjhatañca bahiddhā ca, catudhā vibhaje kathaṃ.
- 1447 Yaṃ kiñci kesalomādi, kakkhaḷattaṃ pavuccati;  
Ajjhattaṃ pathavīdhātu, bahiddhā tu tatoparā.
- 1448 Yūsabhūtanti yaṃ kiñci,  
Āpova paripācakaṃ;  
Tejo vāyoti gaṇheyya,  
Vitthambhakamasesato.
- 1449 Vitthāratopi sambhārā, kesalomādi vīsati;  
Pathavīdhātu pittādi, dvādasāpoti bhāvaye.
- 1450 Tejena yena kāyoyaṃ, santappati jirīyati;  
Paridayhati sammā ca, paccanti asitādayo.
- 1451 Tadetaṃ catukoṭṭhāsaṃ, kāyasambhavamattano;  
Tejodhātūti gaṇheyya, vāyodhātūtīcāparaṃ.
- 1452 Uddhañcādhogamāvātā, kucchikoṭṭhāsaya tathā;



Aṅgamaṅgānusārī ca, chadhānāpānamiccapi.

**1453**Taṃ taṃ lakkhaṇamārabha, niddhāretvā salakkhaṇaṃ;  
Parigaṇheyya sabbattha, catudhā dhātusaṅgahaṃ.

**1454**Iccevaṃ catukoṭṭhāso,  
Dhātumatto kaḷevaro;  
Niccetano ca nissatto,  
Nissāro parabhojano.

**1455**Ritto tuccho ca suñño ca,  
Vivitto ca pavajjito;  
Attā vā attanīyaṃ vā,  
Natthevettha kathañicipi.

**1456**Kevalaṃ cetanāviddho, kāyoyaṃ parivattati;  
Kampito yāya yantaṃva, sādhippāyova khāyati.

**1457**Āyu usmā ca viññāṇaṃ, yadā kāyaṃ jahantimaṃ;  
Aparaiddho tadā seti, niratthaṃva kaliṅgamaṃ.

**1458**Viparītaṃ papañcentā, bahudhā mohapārutā;  
Yattha micchāvīpallāsaparābhūtā puthujjanā.

**1459**Ṣaṃsāraddhānakantāraṃ, caturāpāyasaṅkamaṃ;  
Byasanekāyanopāyaṃ, nātivattanti dujjanā.

**1460**Soyamevaṃ catuddhāti,  
Dhātubhedena passato;  
Tassopacāriko nāma,  
Samatho hoti cetasi.

**1461**Itthaṃ dhātuvavatthānaṃ, katvā tadanusārato;  
Upādārūpadhamme ca, nāmadhamme ca sabbathā.

**1462**Bhūmibhūte pariggayha, passanto paccayaṭṭhitim;  
Ajjhattañca bahiddhā ca, vipassantodayabbayaṃ.

**1463**Yathābhūtamabhiññāya, nibbindanto virajjati;  
Virāgā ca vimuccitvā, pāragūti pavuccati.

**1464**Āruppaṃ pana bhāvento, kammaṭṭhānāmanāvilaṃ;  
Catukkapañcakajjhānaṃ, patvā kasiṇamaṅḍale.

**1465**Pariciṇṇavasībhūtā, jhānā vuṭṭhāya pañcamā;  
Cinteti daṇḍādānādirūpadosaṃbhīṇhaso.

**1466**Nibbindanto tato rūpe, tadākāre ca gocare;  
Tadālambaṇadhamme ca, patthento samatikkamaṃ.

**1467**Pattharivāna yaṃ kiñci, ākāsakasiṇaṃ vinā;  
Ugghāṭeti tamevātha, kasiṇaṃ dhitimā sato.

- 1468 Na taṃ manasi karoti, nāvajjati na pekkhati;  
Cintābhogavinimutto, kasiṇaṃ pati sabbathā.
- 1469 Tadappāyasamaññātamākāsaṃ pati mānaṃ;  
Sādhukaṃ paṭipādeti, yoniso paṭicintayaṃ.
- 1470 Tassāvajjanasampannaṃ, upāyapaṭipāditāṃ;  
Kasiṇāpagamākāsaṃ, cintanārabbha vattati.
- 1471 Itthamantaradhāpetvā, kasiṇaṃ tu tato paraṃ;  
Sabbāvantamanantaraṃ, pharataḥkāśagocaraṃ.
- 1472 Tattha vuttanayeneva, bhāventassopacārato;  
**Paṭhamārūppamappeti**, ākāśānantagocare.
- 1473 Tato tamhā vasībhūtā, vuṭṭhahitvā vicintayaṃ;  
“Āsannarūpāvacaṃrajjhānapaccatthika”nti taṃ.
- 1474 Nikantiṃ pariyādāya, tamhā ākāśagocārā;  
Appetuṃ dutiyārūppa-matisantanti gacchati.
- 1475 Paṭhamārūppaviññāṇa-manantaṃ pharato tato;  
**Dutiyārūppamappeti**, viññāṇānantagocare.
- 1476 Paṭhamārūppaviññāṇa-mabhāvento tato paraṃ;  
Appeti **tatīyārūppa**-mākiñcaññaṃhi gocare.
- 1477 Tato ca tatīyārūppaṃ, “santameta”nti passato;  
**Catutthārūppamappeti**, tatīyārūppagocare.
- 1478 Gūthamhi maṇḍape laggo, eko tannissitoparo;  
Eko bahi anissāya, taṃ taṃ nissāya cāparo.
- 1479 Thito catūhi etehi, purisehi yathākkamaṃ;  
Samānatāya ñātābbā, catassopi vibhāvinā.
- 1480 Icchālambaṇabhedehi, catudhārūppabhāvanā;  
Aṅgabhedāṃ panetāsaṃ, na kathenti tathāpi ca.
- 1481 Suppaṇṭitarā honti, uddhamuddhaṃ yathākkamaṃ;  
Cātumahārājikādidibbasampattiyo yathā.
- 1482 Āneñjamiti bhāvetvā, samāpattiṃ catubbidhaṃ;  
Susamāhitasaṅkappo, sampannācalamānaso.
- 1483 Vipassanto yathābhūtaṃ, sacchikatvā phaluttamaṃ;  
Ubhatobhāgavimutto, arahāti pavuccati.
- 1484 Kammatṭhānavidhiṃ ñatvā, cattālīsavidhaṃ tato;  
**Abhiññāyopi** viññeyyā, samathe bhāvanānaye.
- 1485 Iddhividhā dibbasotā, cetopariyajānanā;

Pubbenivāsānussati, dibbacakkhu tathāparā.

**1486** Cetosamādhinissaṭṭhā, pañcābhiññā pakāsitā;  
Rūpāvacaradhammāva, pañcamajjhānabhūmikā.

**1487** Bahubhāvādidhiṭṭhānaṃ, komārādivikubbanā;  
Manomayābhinnimmānamiccevaṃ tividhi**ddhiyo**.

**1488** Dibbe ca mānuse sadde,  
Tathā dūre ca santike;  
Suṇanti yāya sā **dibbā**,  
**Sotadhātūti** bhāsītā.

**1489** Cetopariyaññanti, parapuggalacetaso;  
Sarāgavītarāgādiparicchedakamīritam.

**1490** Pubbenivutthakhandhānussaraṇe ñāṇamīritam;  
**Pubbenivāsānussatiñāṇa** nāmena tādīnā.

**1491** Cavamāne ca jāyante, satte rūpamarūpakam;  
Tathā mānusakam rūpam, thūlam sukhumā santikam.

**1492** Dūre pakāsam channañca, yena passanti yogino;  
Cutūpapātāññam tam, **dibbacakkhūti** vuccati.

**1493** Anāgataṃsaññāñca, yathākammupagam tathā;  
Tannissittatā gacchanti, dibbacakkhumhi saṅgham.

**1494** Iti pañcavidham pattumabhiññam pana paṇḍito;  
Katvāna pañcamajjhāne, pañcadhā vasitam cidam.

**1495** Tathā samāhite citte, parisuddhe niraṅgaṇe;  
Mudubhūte kammaniye, āneñjamhi patiṭṭhite.

**1496** Abhiññāpādakajjhānā, tato vuṭṭhāya pañcamā;  
Abhiññāparikkammāya, ninnāmeyyātha mānasam.

**1497** Adhiṭṭheyyādikam tam tamāvajjitvā yathāraham;  
Parikkammam karitvāna, samāpajjeyya pādakam.

**1498** Punadeva ca vuṭṭhāya, parikkammam yathā pure;  
Karontassa panappeti, abhiññāṇena pañcamam.

**1499** Adhiṭṭhantam vikubbantam, nimminantam yathāraham;  
Sadde suṇantam sattānam, pariṇāṇaṇca mānasam.

**1500** Samam pubbenivāsañca, passam sugatiduggatim;  
Yathākammam vipākañca, pajānantamanāgataṃ.

**1501** Yathāsambhavamiccavamupāyakusalo muni;  
Upanissayasampanno, abhiññamadhigacchati.

- 1502 Pattābhiñño mahāyogī, pariyodātamānaso;  
Paripakkena ñāṇena, vipassitvā tilakkhaṇaṃ.
- 1503 Laddhāsavakkhayaṃ ñāṇaṃ, chadhābhiññamanuttaraṃ;  
Mahākhīṇāsavo nāma, chaḷabhiñño pavuccati.
- 1504 Cattālisavidhaṃ panitthamamalocetomalakkhālanāṃ,  
Kammaṭṭhānanayaṃ yamāha sugato sammā samādhānakaṃ;  
Saṃkhittaṃ kathitaṃ tamettha sakalaṃ sābhiññamettāvata,  
Kattabbā muninettha sādhumatinā sambhāvanā sabbathā.
- 1505 Varaguṇagaṇabhūsitānusiṭṭhaṃ,  
Iti samathamimaṃ tu bhāvayitvā;  
Paramamanupamaṃ bhajanti dhīrā,  
Hitasukhamukhamuttamānubuddhaṃ.

Iti nāmarūpaparicchede sesakammaṭṭhānavibhāgo nāma

Dasamo paricchedo.

Niṭṭhito ca nāmarūpaparicchede sabbathāpi

Samathabhāvanāvibhāgo.

## 11. Ekādasamo paricchedo

### Vipassanāvibhāgo

- 1506 Dvidhā samuṭṭhānadhurā, tividhā bhūmiyo matā;  
Tividhābhinivesā ca, sarīraṃ tu catubbidhaṃ.
- 1507 Tividhā bhāvanā tattha, saṅkhāresu yathārahaṃ;  
Duvindhākāramārabha, nijjhāyati tilakkhaṇaṃ.
- 1508 Aṭṭhārasākārabhinnā, dasāvattā vibhāvītā;  
Tidhā vibhāgā sādheti, vimokkhattayamuttamaṃ.
- 1509 Catusaccapaṭivedhā, sattaṭṭhāriyapuggalā;  
Klesahānī yathāyogaṃ, catasso paṭisambhidā.
- 1510 Tividhā ca samāpatti, nirodhā ca tathāparā;  
Nissandaphalamiccāhu, tassā sāsanakovidā.
- 1511 Vipassanābhāvanāya-miti bhāsanti paṇḍitā;  
Tamidāni pavakkhāmi, yathānukkamato kathaṃ.
- 1512 Bhūmidhamme pariggayha, vicinantassa yogino;  
Satiyā samathā vātha, **samuṭṭhāti** vipassanā.
- 1513 Sabhāvapaṭivedhe ca, saddhammapaṭipattiyāṃ;  
Paññāsaddhāvayaṃ tassā, **dhuramāhu** dhurandharā.

- 1514 Tebhūmakasabhāvānaṃ, sappaccayapariggaho;  
Nātapariññā nāmāyaṃ, bhūmīti paṭhamā matā.
- 1515 Kalāpato sammasaṇaṃ, udayabbayadassanaṃ;  
Pariññātīraṇā nāma, dutiyā bhūmi bhāsītā.
- 1516 Pahānapariññā bhūmi, tatiyāhu tatoparaṃ;  
Bhaṅgādiñṇāmiccevaṃ, tividhā **bhūmiyo** matā.
- 1517 Khaṇasantatiaddhāna-vasenettha samīritā;  
Aniccā dukkhānattāti, tividhā **bhinivesanā**.
- 1518 Diṭṭhikaṅkhāvitarāṇā, maggāmaggaṭṭippadā;  
Visuddhiyo catassopi, **sarīranti** nidassītā.
- 1519 Salakkhaṇavavatthānaṃ, paccayākāraṇicchayo;  
Kummaggaṭṭiparīhāro ca, tilakkhaṇavipassanā.
- 1520 Iti lakkhaṇabhinnattā, labbhantekakkhaṇepi ca;  
Desitā hetubhūtena, kamenevaṃ visuddhiyo.
- 1521 Sīlabbisuddhiādīnaṃ, tathā sāva paramparā;  
Cittabbisuddhiādīnamatthāyāti pakāsītā.
- 1522 Dissamānasabhāvānaṃ, passanto paccayaṭṭhiti;  
Paripanthavimutto hi, ṭṭipādeti bhāvanaṃ.
- 1523 Tathāpi ca visesena, ṭṭipannassa yogino;  
Tattha tattha vibhūtatā, ṭṭhānato bheditā kathaṃ.
- 1524 Rūpapubbaṅgamaṃ vātha, nāmapubbaṅgamaṃ tathā;  
Ajjhattaṃ vā bahiddhā vā, yathāpākaṭṭadhammato.
- 1525 Nāmarūpādibhedena, bhūmidhammapariggaho;  
Vuttā diṭṭhivisuddhīti, attadiṭṭhipahānato.
- 1526 Āhacca paccayuppannā, tathā tabbhāvabhāvino;  
Pavattantīti saṅkhāre, passato pana yoniso.
- 1527 Paccayaggāhinī paññā, nāmarūpappavattiyā;  
Kaṅkhā taranti tāyāti, kaṅkhāvitarāṇā matā.
- 1528 Aniccā dukkhānattāti, paccayāyattavuttito;  
Saṅkhipitvā kalāpena, sammasīyanti saṅkhatā.
- 1529 Uppādavayabhāvopi, lakkhaṇattayasādhako;  
Paccayākāramārabba, lakkhīyati visesato.
- 1530 Tasmā sammasaṇāṇaṃ, udayabbayadassanaṃ;  
Kaṅkhāvitarāṇāyaṃ tu, saṅgayhati visuddhiyaṃ.
- 1531 Tattha saṅklesavikkhepaṃ, kummaggaṃ parivajjato;

Maggāmaggavisuddhīti, ñāṇadassanamīritam.

- 1532 Tato kathenti akliṭṭhamudayabbayadassanam;  
Ādiṃ katvā paṭipadāñāṇadassanasuddhiyam.
- 1533 Paccayapaccayuppanne, yathāvattuvavatthite;  
Pahātumīhamānānam, niyyānapaṭipattito.
- 1534 Upaklesavisuddho hi, punadevodayabbayam;  
Adhiṭṭhahitvā bhaṅgādi-ñāṇehi paṭipajjati.
- 1535 Tathā cābhinavuppanne, bhijjamāne vipassato;  
Saṃvegakadḍhitam ñāṇam, bhaṅgādimanutiṭṭhati.
- 1536 Tato pubbe pavattā hi, saṃklesāpāyasambhavā;  
Paṭipattivissuddhīti, na saṅgayhati bhāvanā.
- 1537 Sampādentō paniccetā, catassopi visuddhiyo;  
Aniccā dukkhānattāti, bhāveyya tividhā katham.
- 1538 Paccayapaccayuppannā, jātānantarabhedino;  
Aniccā ca pabhaṅgū ca, palujjanti cavanti ca.
- 1539 Addhuvā ca asārā ca, vibhavā ca vināsino;  
Sañkhatā vipariṇāma-dhammā ittarakālikā.
- 1540 Khayadhammā vayadhammā, lahukālapavattino;  
Tāvakālikadhammā ca, parittaṭṭhitikā tathā.
- 1541 Khaṇattayaparicchinnā, pubbāparavicittakā;  
Purakkhatā nirodhassa, sassatā na kudācanam.
- 1542 Jāyanti parihānāya, na tu jāyanti vuddhiyā;  
Jiyyamānāva tiṭṭhanti, jiṇṇā bhaṅgaparāyaṇā.
- 1543 Ahutvāyevuppajjanti, na kutocipi āgatā;  
Hutvā antaradhāyanti, na tu katthaci sañcitā.
- 1544 Tam tam paccayasāmaggi-mattalābhāya nissitā;  
Nirodhadhammā jāyanti, jātā byanti bhavanti te.
- 1545 Yathā nadī pabbateyyā, yathā dīpasikhā tathā;  
Sīghasīgham pavattantā, uppajjanti vayanti ca.
- 1546 Jātā jātā nirujjhanti, aññe aññe tu jāyare;  
Avīci anusambandhā, na jānanti visesato.
- 1547 Iti nānappakārena, vipassanto vicakkhaṇo;  
**Aniccabhāvanam** dhīro, paripāceti sādhuḥkam.
- 1548 Dukkā ca dukkhavatthū ca, abhiṇhaparipīlitā;  
Rogā gaṇḍā ca sallā ca, aghato ca upaddavā.

- 1549 Bhayopasaggāghamūlā,  
Sāsavādīnavītītā;  
Aleṇāsaraṇātāṇā,  
Vadhakā mārakāmisā.
- 1550 Jātidhammā jarābyādhi-  
Sokopāyāsabhāgino;  
Paridevasabhāvā ca,  
Saṃklesā dukkhabhāgino.
- 1551 Jegucchā paṭikūlā ca, bībhacchā ca virūpino;  
Ajaññā capalā hīnā, duggandhā bālasevitā.
- 1552 Sokantarikatāniccaṃ, taṇhāya kaḍḍhitā bhusaṃ;  
Kapaṇā duggatā dīnā, vipannā ca vighātino.
- 1553 Attalābhaṃ gavesanti, taṃtaṃpaccayanissitā;  
Dukkhadhiṭṭhānamaccantaṃ, jātā puna vihaññare.
- 1554 Aggikūpe nimuggāva, klesasantāpabhāgino;  
Oviddhā viya sattīhi, saṅkhārā niccadukkhitā.
- 1555 Jāyamānā ca jīyantā, miyyantā ca khaṇe khaṇe;  
Pasukā viya niccammā, haññanti serikāturā.
- 1556 Tilāni tilayanteva, ucchuyanteva ucchuyo;  
Udayabbayāvassaṃ te, pīlayanti abhiṇhaso.
- 1557 Manoramanavākārā, vipallāsaparikkhatā;  
Iriyāpathasañchannā, nopatiṭṭhanti dukkhato.
- 1558 Saṅkhāresu panetesu, vedanāssādarodhino;  
Sāva sandulasambaddhā, sammohaparivāritā.
- 1559 ‘‘Aduṃ dukkhamidaṃ dukkha’’-miti saṃsāracārino;  
Dukkahetumajānantā, sambhamanti aviddasu.
- 1560 Sukhākāramapassantā, dukkhabhāranipīlitā;  
Patthenti dukkhamevaññaṃ, bālā byasanabhāgino.
- 1561 Cavantā upapajjantā, rukkhasākhaṃva makkato;  
Dukkhamekaṃ vimuccanti, tato gaṇhanti cāparaṃ.
- 1562 Te dīgharattaṃ socanti, taṇhāsallasamappitā;  
Dīṭṭhipāsasamupetā, mānatthambhānusāyino.
- 1563 Tamākāraṃ paniccevaṃ, vipassanto visārado;  
**Dukkhānupassanaṃ** nāma, paripāceti bhāvanaṃ.
- 1564 Dhammaṭṭhitiniyāmā hi, khandhāyatanadhātuyo;  
Anattāsassatantā ca, īhābhogavivajjitā.

- 1565 Payojanamadhiṭṭhāya, na tu byāpārayanti ca;  
Paccayapaccayuppannā, janetuṃ vātha jāyituṃ.
- 1566 Tathāpi hetusāmaggi-sambhave sambhavanti te;  
Tabbhāvabhāvibhāvena, aññamaññapavattitā.
- 1567 Ajāyituṃ na sakkonti, sati paccayasambhave;  
Paccayānamalābhe tu, na jāyanti kudācanaṃ.
- 1568 Na kiñcetha apekkhitvā, samaggā honti paccayā;  
Na janetuṃ na sakkonti, samaggā ca kudācanaṃ.
- 1569 Yathāpaccayalābhena, pavattanti yathā tathā;  
Rakkhitā vā vidhātā vā, natthi assāmikā tathā.
- 1570 ‘‘Ahaṃ mama’’nti gaṇhantā, pariṇāmenti aññathā;  
Vissasantā harantete, parābhūtā palambhino.
- 1571 Rittā tucchā ca suññā ca, vivittā sāravajjitā;  
Salakkhaṇaparicchinnā, dhammā natthettha puggalo.
- 1572 Jāyamānā ca jiyyantā, miyyamānā ca saṅkhatā;  
Vivasā parivattanti, vaso tesam na katthaci.
- 1573 Na tesu kassacisseraṃ, na tesañcatthi katthaci;  
Na cattanīti saṅkhārā, ādhipaccavivajjitā.
- 1574 Kadalīpattavaṭṭīva, aññamaññapatiṭṭhitā;  
Sahajātagghanībhūtā, nopaṭṭhanti anattato.
- 1575 Arūpanissitaṃ rūpaṃ, arūpaṃ rūpanissitaṃ;  
Jaccandhapīṭhasappīva, aññamaññavavattitaṃ.
- 1576 Yantasuttēna yantaṃva, kāyayantaṃ pavattati;  
Nāmāvakaḍḍhitaṃ tattha, natthi attā sayamaṃvasī.
- 1577 Cetovipphāranipphannā, vāyodhātusamuṭṭhitā;  
Iriyāpathaviññattivikārā pālakā matā.
- 1578 Oviddhavedanāsallavikārapariṇāmato;  
Bālānaṃ cittanipphannā, attāti parikappanā.
- 1579 Suddhasaṅkhārapuñjayaṃ, nettha sattopalabbhati;  
Taṃ taṃ paccayamāgamma, dukkhakkhandhova jāyati.
- 1580 Evamādippakārehi, vipassanto anattato;  
**Anattabhāvanam** nāma, bhāvetīti pavuccati.
- 1581 Bhāvento tividhampetaṃ, **nijjhāyati tilakkhaṇaṃ**;  
Nimittañca pavattañca, samārabba yathākkamaṃ.
- 1582 Attalābhanimittañca, taṃtaṃpaccayanissitā;



Tabbhāvabhāvibhāvena, lakkhīyanti nimittato.

1583Jāyamānā ca jīyantā, miyyamānā ca saṅkhatā;  
Taṃ taṃ bhāvamattikkamma, pavattanti khaṇe khaṇe.

1584Hetunissayanākāro, **nimittanti** tato mato;  
**Pavattaṃ** vattanākāro, khaṇasantatiaddhato.

1585Apubbābhīnavuppatti, uppādoti pakāsito;  
Pubbāpariyasandhānaṃ, paṭisandhīti bhāsītā.

1586Āyūhantīti vuccanti, tadatthaṃ pana vāvaṭā;  
Iccādiariyāyehi, bahvākārāpi saṅkhatā.

1587Nimitte ca pavatte ca, vatthuto yanti saṅgahaṃ;  
Taṃ **dvayākāram**ārabha, paṭiṭṭhāti tilakkhaṇaṃ.

1588Paccayādhiṇadhammānaṃ, uppādavayalakkhitā;  
Aniccatānimittaṭṭhā, pavattesu na pākaṭā.

1589Pubbāparavicittānamasamatthānamattani;  
Sannissayena nipphanno, bhāvadubbalyasādhako.

1590Hetusaṅkhātābhāvo hi, saṅkhārānamaniccatā;  
Pavattamānā dasseti, taṃ sabhāvaṃ panattano.

1591Niccā dhuvā ce saṅkhārā, kasmā pekkhanti paccaye;  
Ahutvā yadi nissāya, jātā kā tattha niccatā;

1592Attalābhaṃ labhitvāna, hetusāmaggilābhato;  
Yāpessanti tamaññatra, kathaṃ nāmattadubbala.

1593Paccaye anapekkhitvā, yadi natthi samatthatā;  
Attalābhūpalābhāya, kiṃ samatthānupālāne;

1594Janakā paccayānañhi, tadāyūhanato paraṃ;  
Parihāritumāraddhā, jiyā khittasaro yathā.

1595Accīva vaṭṭinikkhantā, meghamuttāva vijjutā;  
Paccayuddhaṭavissaṭṭhā, dhammā bhaṅgaparāyaṇā.

1596Tasmā **nimittamākāraṃ**, passanto sa vipassako;  
“Vinassanti avassa”nti, saddahanto vimuccati.

1597Aniccato tathā hevaṃ, vipassantassa yogino;  
Saddhāvimokkha bhāhulyaṃ, bhavātīti pakāsitaṃ.

1598Iti saṅkhārādhamesu, nimittākāranicchitaṃ;  
Aniccalakkhaṇaṃ dhīro, nijjhāyati niyāmato.

1599Bādhakattabhayākārā, pavatte dukkhitā viya;  
Pavattamānā piḷenti, saṅkhārā ca bhayāvahā.

- 1600 Uppādābhīnavākāraṃ, atikkamma tato paraṃ;  
Jarājaccarītā hutvā, bhañjamānā katham sukhā.
- 1601 Tasmā pavattamākāraṃ, nijjhāyanto nirantaraṃ;  
Saṅkhāre dukkhato disvā, hitvāna paṇidhiṃ taḥiṃ.
- 1602 Tadāyūhananissaṅgo, passaddhadaratho sukhī;  
Samādhībahulo yogī, vūpasantoti vuccati.
- 1603 Byāpārasitākāraṃ, saṅkhārānaṃ vipassato;  
Nimitte ca pavatte ca, upaṭṭhāti anattato.
- 1604 Anattādhīnanipphannā, vasātī tappavattino;  
Bhāvadubbalyanissārā, kathamattā bhavissare.
- 1605 Tamevaṃ paṭivijjhanto, maññatānattalakkhaṇaṃ;  
Vipassanārasassādī, saṃvegabahulo bhava.
- 1606 Īccāhacca pavattānaṃ, lakkhaṇānaṃ sabhāvato;  
Vavatthito tattha tattha, taṃtaṃ lakkhaṇanicchayo.
- 1607 Tathāpipākaṭaṭṭhāne, hetubhūte ca yoniso;  
Vavatthapeti saṅkhāya, lakkhaṇāni vicakkhaṇo.
- 1608 Uppādavayabhāvena, dissamānā hi saṅkhatā;  
Pubbāparavivekena, dassenti tadanīccataṃ.
- 1609 Tathā ca vipariṇāmaṃ, vipassanto visārado;  
Nimittaphalanipphannaṃ, tamatthamadhīmuccati.
- 1610 Dukkappavattīhetuttā, nimittamapi paṇḍito;  
Bhayaṅvahanīyāmena, bādhanāteva passati.
- 1611 Tathā hi paccayārabba, saṅkhārā nissayanti ce;  
Tatovassaṃ bhavissanti, mahabbhaya samohitā.
- 1612 Nirodhadhammā jāyanti, sallaviddhāva dukkhitā;  
Jarāturā vipajjantā, bhijjantāva vighātino.
- 1613 Tenevāniccato diṭṭhā, dukkhabhāvena khāyare;  
Saṅkhatattā sabhāvo hi, dukkhāya parivattati.
- 1614 Aniccā puna saṅkhārā, dukkhāti ca vavatthitā;  
Anattataniyāmena, nidassenti salakkhaṇaṃ.
- 1615 Kathaṃ attaparādhīnā, paccayuppannabhaṅgurā;  
Vipattiniyatā vātha, bādhamānā bhayaṅvahā.
- 1616 Āhaccākārabhedena, tivīdhā hi vipassanā;  
Aniccā dukkhānattāti, ayamettha vinīccayo.
- 1617 Tidhābhūtā paṇīccetā, pahānākārabheditā;

Mahāvīpassanā nāma, **aṭṭhārasavidhā** kathaṃ.

- 1618** Hetusāmagginipphannamaniccanti tilakkhaṇaṃ;  
Aniccataṃ vipassanto, niccasaññaṃ vimuṅcati.
- 1619** Aniccatāyādhiṭṭhānanimittaṃ pana passato;  
Animitte vimuccantī, animittānupassanā.
- 1620** Nirujjhamānadhammānaṃ, byantibhāvaṃ vipassato;  
Samudayaṃ pajahantī, nirodhānupassanā.
- 1621** Sīthilā jātu nissārā, dubbalā lahughātino;  
Khayadhammāti saṅkhāya, ghanasaññaṃ vimuṅcati.
- 1622** Attalābhamatikkamma, vayanṭīti vicintayaṃ;  
Jahatāyūhanaṃ tattha, putte sūtipajā viya.
- 1623** Anavattitabhāvānaṃ, aññathattaṃ vipassato;  
Vikārapariṇāmesu, dhuvasañña virajjati.
- 1624** Ālambaṅca tadālamba-ñāṇabhaṅgaṅca bhāvayaṃ;  
Sārādānābhinivesaṃ, adhipaññaṃ muccati.
- 1625** Icchāniccānimittā ca, nirodhā ca khayā vayā;  
Viparīṇāmādhisañña, dhammānupassanāti ca.
- 1626** Sattānupassanābhedamaniccākāradassanaṃ;  
Niccasaññādibhaṅgāya, paridīpenti paṇḍitā.
- 1627** Taṃ tamākāramārabba, tathā bāhulyavuttito;  
Taṃlakkhaṇānugatā ca, bhedaṃ tasseva sattadhā.
- 1628** Sukhasaññaṃ nissajjantī, vuttā dukkhānupassanā;  
Nibbinā nibbidāññaṃ, virāgā rāgavajjitā.
- 1629** Jātāppaṇihitā nāma, muṅcantī paṇidhiṃ tathā;  
Nirālayābhinivesā, ādīnavānupassanā.
- 1630** Pañcānupassanābhedaṃ, tadidaṃ dukkhadassanaṃ;  
Sukhasaññādibhaṅgāya, pavattanti pakāsitaṃ.
- 1631** Anattato vipassanto, attasañña vimuccati;  
Jahatattābhinivesaṃ, jhāyanto puna suññato.
- 1632** Dvayānupassanābhedamanattākāradassanaṃ;  
Attasaññābhinivesaṃ, vimokkhāya vibhāvitaṃ.
- 1633** Paṇinissaggato disvā, saṅkhāresu tilakkhaṇaṃ;  
Jahanto saṅkhatādānaṃ, pakkhandati asaṅkhate.
- 1634** Yathābhūtena ñāṇena, vipassanto vimuccati;  
Sammohābhinivesamhā, avipallatthadassano.

1635 Mohatābhogavimuttā, paṭisaṅkhānupassanā;  
Jahantappaṭisaṅkhaṃ tu, paṭisaṅkhāya lakkhaṇaṃ.

1636 Diṭṭhisāṅkhādosattā, vibhāvento vivaṭṭato;  
Saṃyogābhinivesamhā, paṭilīno vimuccati.

1637 Muccitukamyatāññaṇaṃ, paṭinissaggasammaṃ;  
Yathā bhūtaṃ tathā ññaṇaṃ, paccayākāranissitaṃ.

1638 Saṅkhārupekkhāññaṇaṃ tu, paṭisaṅkhānupassanā;  
Vuṭṭhānagāminī nāma, vivaṭṭanti pavuccati.

1639 Catassopi paniccetā, ādānādippabhañjitā;  
Lakkhaṇattayamāhacca, pavattanti yathā tathā.

1640 Nimittamārabha tathā pavattaṃ,  
Tilakkhaṇaṃ jhāyati yāya yogī;  
Tamtthamaṭṭhārasabhedabhinnaṃ,  
Vipassanābhāvanamāhu dhīrā.

1641 Vipassanāyamimamuttamaṃ subhaṃ,  
Nidassitaṃ jīnavacanānusārato;  
Vibhāvayaṃ manasi hitāvahaṃ paraṃ,  
Nirāmayam padamanupāpuṇissati.

Iti nāmarūpaparicchede vipassanāvibhāgo nāma

Ekādasamo paricchedo.

## 12. Dvādasamo paricchedo

### Dasāvathāvibhāgo

1642 Iccaṭṭhārasadhā bhinnā, paṭipakkhappahānato;  
Lakkhaṇākārabhedena, tividhāpi ca bhāvanā.

1643 Kalāpato sammasanaṃ, udayabbayadassanaṃ;  
Bhaṅge ññaṇaṃ bhaye ññaṇaṃ, ññaṇamādīnavepi ca.

1644 Tatheva nibbidāññaṇaṃ, ññaṇaṃ muccitukamyatā;  
Paṭisaṅkhā ca saṅkhāru-pekkaññaññānūlomakaṃ.

1645 Iccāvathāpabhedena, dasadhāpi vibhāvītā;  
Sabhāgatthavisesena, **tidhā saṅgahitā** puna.

1646 Yathābhūtaṃ nāma ññaṇattayaṃ sammasanādikaṃ;  
Bhayaḍiññaṇaṃ tividhaṃ, nibbidāti pavuccati.

1647 Tathā muccitukāmādi, virāgo va catubbidhaṃ;  
Lakkhaṇattayanijjhānavasena puna vuṭṭhitā.

- 1648 Suññatañcānimittañca, tathāppaṇihitanti ca;  
Sādheti maggasañkhātāṃ, **vimokkhattaya**muttamāṃ.
- 1649 Īti bhāvetukāmassa, vibhāveti yathākkamaṃ;  
Dasāvattāvibhāgena, samādāya yathā kathaṃ.
- 1650 Visuddho paṭhamaṃ tāva, sādhu **sīlavisuddhiyā**;  
Upacārappanāyañca, ṭhatvā **cittavisuddhiyaṃ**.
- 1651 Sappaccayaṃ pariggayha, nāmarūpaṃ sabhāvato;  
**Diṭṭhikañkhāvitaraṇaṃ**, patvā suddhiṃ tato paraṃ.
- 1652 Atītānāgate khandhe, paccuppanne ca sāsave;  
Kalāpato sammasitvā, sammaseyya tilakkhaṇaṃ.
- 1653 Ādānanikkhepanato,  
Vayovuddhatthagāmito;  
Āhāratopi ututo,  
Kammato cāpi cittato.
- 1654 Dhammatārūpato cāpi, **rūpasattakato** naye;  
Kalāpato yamakato, khaṇikā paṭipāṭito.
- 1655 Diṭṭhimugghāṭayaṃ ca, mānamugghāṭayaṃ tathā;  
Nikantipariyādāno, **nāmasattakato** naye.
- 1656 Niccā ce na nirujjheyyaṃ, na bādheyyaṃ sukhā yadi;  
Vase vatteyyumattā ce, tadabhāvā na tādisā.
- 1657 Sambhavanti hi sañkhārā, sati paccayasambhave;  
Tato paccayanipphannā, avassaṃ bhedaḡāmino.
- 1658 Tadaniccā khayaṭṭhena, dukkhā nāma bhayaṭṭhato;  
Anattāsāraḡaṭṭhena, sañkhārāti vibhāvayaṃ.
- 1659 Kālena sammase rūpaṃ, nāmaṃ kālena sammase;  
Ajjhattañca bahiddhā ca, samāsabyāsato tato.
- 1660 Yathopaṭṭhitabhedena, sammasanto samūhato;  
Kalāpato **sammasanamiti** bhāveti paṇḡito.
- 1661 Tassevaṃ sammasantassa, kammaññaṃ hoti mānaṃ;  
Sūpaṭṭhanti ca sañkhārā, vodāyati ca bhāvanā.
- 1662 Tato paraṃ vipassanto, pariggaṇhāti paṇḡito;  
Paccuppannasabhāvānaṃ, khandhānamudayabbayaṃ.
- 1663 Taṇhāsammohakammehi,  
Khandhapañcakasabhāvo;  
Rūpamāhārato hoti,  
Phassato vedanādayo.

- 1664 Viññāṇaṃ nāmarūpamhā, sambhotīti ca passato;  
Tassa paccayato hoti, khandhesudayadassanaṃ.
- 1665 Taṇhādīnaṃ nirodhā ca,  
Nirodho hoti passato;  
Tathā vīsatidhā hoti,  
Tattheva vāyadassanaṃ.
- 1666 Nibbattivipariṇāmalakkhaṇaṃ pana passato;  
Khaṇato dasadhā nesamudayabbayadassanaṃ.
- 1667 Itthaṃ paññāsadhā bhedo,  
Khandhānamudayabbayo;  
Āyatanādibhedopi,  
Yojetabbo yathārahaṃ.
- 1668 Tadevamanupassanto, khandhāyatanadhātuyo;  
Aniccā dukkhānattāti, bhāveti bahudhā budho.
- 1669 Bhāvanāpasutassevaṃ, passato bodhipakkhiyā;  
Pātubhūtā pavattanti, vīsesena vīsaradā.
- 1670 Saḷakkhaṇaparicchinne, tilakkhaṇavavatthite;  
Chando sāsavasāṅkhāre, sāradaṃ pariyesati.
- 1671 Tattha pubbaṅgamaṃ hutvā, saṃpakkhandati mānaṃ;  
Saṅkappobhīniropeti, āharanto punappunaṃ.
- 1672 Yathāvattusabhāvena, tato saddhādhimuccati;  
Sati sūpaṭṭhitā hoti, pariggayha sabhāvato.
- 1673 Paññā sampaṭivijjhantī, samāhacca vipassati;  
Paggahetvāna vāyāmo, paṭipādeti bhāvanaṃ.
- 1674 Tato pītimano hoti, nipphāditamanoratho;  
Pāmojjabahulo hutvā, passaddhadaratho pana.
- 1675 Vikkhepuddhaccanittiṇṇo, samādhiyati niccalo;  
Upekkhā bhāvanāvīthiṃ, adhiṭṭhāti tato paraṃ.
- 1676 Āruḷhayoggācariyo, ājānīyaratho viya;  
Vātābhāve padīpova, pasannekamukhaṭṭhitā.
- 1677 Sukhumā nipuṇākārā, khuradhārāgatā viya;  
Gaṇhantī bhāvanāgabbhaṃ, pavaḍḍhati vipassanā.
- 1678 Sampattapaṭivedhassa,  
Tassevaṃ taṃ vipassato;  
Jāyateko upakleso,  
Dasopaklesavatthukā.
- 1679 Obhāso pīti passaddhi, adhimokkho ca paggaho;

Sukhaṃ ñāṇamupaṭṭhānamupekkhā ca nikanti ca.

- 1680 Jātesvetesu yaṃ kiñci, uḷāraṃ jātavimhaya;  
Disvā vipassanāmaggā, vakkamitvā tato paraṃ.
- 1681 Tamahaṃkāravikkhitto, assādentō mamāyati;  
Hotādhimāniko vātha, maññanto tamanuttaraṃ.
- 1682 Siyā cevamupakliṭṭhā, patitā vātha bhāvanā;  
Tatthevaṃ paṭisaṅkhāya, paṭivijjhati paṇḍito.
- 1683 Na taṇhādiṭṭhimānehi, pariyogāhahetuto;  
Lakkhaṇālambaṇattā ca, lokiyāyaṃ vipassanā.
- 1684 Diṭṭhimānanikantī ca, kummaggā paripanthakā;  
Maggo visuddhiyā nāma, visuddhā ca vipassanā.
- 1685 Sārathīva rathaṃ bhantamiti saṅkhāya sādhukaṃ;  
Paviṭṭhamaggaṃ vikkhittaṃ, sampādeti yathā pure.
- 1686 Itthaṃ magge amagge ca, yāthāvapaṭivedhakaṃ;  
**Maggāmaggavisuddhī**, ñāṇadassanamīritaṃ.
- 1687 Cetopavattanākāramiti sallakkhayaṃ budho;  
Sādhukaṃ paṭivijjhanto, sukhumaṃ nipuṇaṃ tato.
- 1688 Paripantho vimocetvā, bodhetvā bodhipakkiye;  
Bhāvanaṃ paṭipādentō, punadevodayabbayaṃ.
- 1689 Samadhiṭṭhāya medhāvī, vipassati tilakkhaṇaṃ;  
**Udayabbayañāṇanti**, tamīrenti tato paraṃ.
- 1690 Saṅkhārānaṃ vibhūtattā, sākārānaṃ visesato;  
Tilakkhaṇānaṃ diṭṭhattā, saṅkhāresu sabhāvato.
- 1691 Paripanthā vimuttassa, maggāmaggavisuddhiyā;  
Yathāvithippavattassa, paṭipattivissuddhiyā.
- 1692 Indriyānaṃ sutikkhattā, paripakkā vipassanā;  
Udayamhā vimuccitvā, bhaṅge ṭhāti yathā kathaṃ.
- 1693 Uppādo paccayāyatto, dhammānamiti nicchite;  
Nirodhānugatā jāti, siddhāvassaṃ niyāmato.
- 1694 Tatodayāva paṭṭhāya, atthāya sūriyo viya;  
Vināsāya pavattantā, vayantevāti pekkhati.
- 1695 Udayābhogamohāya, vayanticceva sabbathā;  
Bhedassabhāvamārabbha, dhammesu sati tiṭṭhati.
- 1696 Atītā ca niruddhāva, nirujjhissantināgatā;  
Nirujjhanteva vattantā, iccevamanupassato.

- 1697Nijjarova giraggamhi, vāriṇatapakkhare;  
Padīpo viya jhāyanto, āraggeriva sāsapo.
- 1698Ātape viya ussāvo, parissāve jalaṃ viya;  
Madditaṃ pheṇapiṇḍaṃva, loṇapiṇḍamivodake.
- 1699Udake daṇḍarājīva, vijjutāva valāhake;  
Jalaṃ tattakapāleva, salile viya bubbuḷaṃ.
- 1700Vātabbhāhatatūlaṃva, tīraṃ pattāva vīciyo;  
Phalaṃ bandhanamuttaṃva, tiṇānīva hutāvahe.
- 1701Jāyantāpi ca jiyantā, miyyantā ca nirantaraṃ;  
Nirodhāyābhidhāvantā, bhaṅgābhimukhapātino.
- 1702Vigacchantāva dissanti, khīyantantaradhāyino;  
Viddhaṃsayantā saṅkhārā, patantā ca vināsino.
- 1703**Bhaṅgañāṇaṃ** tamakkhātāṃ, yena ñāṇena passato;  
Aniccantānudhāvanti, tividhāpi vipassanā.
- 1704Udayabbayabhaṅgesu, pākaṭā hi aniccatā;  
Bhayaḍḍīnavanibbede, dukkhatānattatā tato.
- 1705Itthaṃ bhaṅgamadhiṭṭhāya, passantassa tilakkhaṇaṃ;  
Saṅkhārā sabhayā hutvā, samupaṭṭhanti yogino.
- 1706Vālamigānubaddhāva, nimmujjantā viyaṇṇave;  
Amanussagahitāva, parikkhittāva verihi.
- 1707Kaṇhasappasamālīḷhā, caṇḍahatthisamuṭṭhitā;  
Papātāvāṭapakkhantā, patantāva hutāvahe.
- 1708Vajjhappattā mahācorā, chijjantā viya sīsato;  
Sūlamāropiyantāva, pabbatenotthaṭā viya.
- 1709Jāṭisaṅkaṭapakkhantā, jarābyādhinipīḷitā;  
Maraṇāsānisammaddā, mahābyasanabhāgino.
- 1710Maccunabbhāhatā niccaṃ, dukkhabhārasamotthaṭā;  
Sokopāyāsanissandā, paridevaparāyaṇā.
- 1711Taṇhādiṭṭhimamattena, sattā etthādhimucchitā;  
Baddhā bhayena baddhāva, muttāva bhayamuttakā.
- 1712Iti saṅkhāradhammesu, bhayuppattimudikkhato;  
**Bhayañāṇanti** bhāsanti, bhayamuttā mahesayo.
- 1713Sabhayā puna saṅkhārā, sandissanti samantato;  
Ahitāvahitāniccamādīnavāṃ nirantaraṃ.
- 1714Gūthakūpaṃva kuthitaṃ, bhasmacchannova pāvako;



Sarakkhasamva salilam, savisam viya bhojanam.

1715 Vanam vālamigākiṇṇam, maggo coramahabbhayo;  
Bhijjamānā mahānāvā, phalantā asanī yathā.

1716 Āvudhākulasannaddhā, yuddhabhūmipatiṭṭhitā;  
Saṅgatāva mahāsenā, ghorānatthaniyāmitā.

1717 Ratham cakkasamāruḷham, vuyhantam vaḷavāmukham;  
Kappuṭṭhānamahārambham, kappo pattantaro yathā.

1718 Tathā lokā tayopete,  
Mahopaddavasānkulā;  
Dayhantekādasaggīhi,  
Paripphandaparāyaṇā.

1719 Mahāraññamivādittam, bhavayonigatiṭṭhiti-  
Sattāvāsā samībhūtā, jalitaṅgārakāsukā.

1720 Āsīvisā mahābhūtā, vadhakā khandhapañcakā;  
Cakkhādayo suññā gāmā, gocarā gāmaghātakā.

1721 Iccānayasamākiṇṇam, bhavasāgaramaṇḍalam;  
Leṇam tāṇam patiṭṭhā vā, saraṇam vā na vijjati.

1722 Etthābhirodhino bālā, vānkaghastāva mīnakā;  
Mahāsakaṭupabbuḷhā, mahabbhayapatiṭṭhitā.

1723 Jāyamānāva jiyyantā, nānābyasanapīlitā;  
Vipattāvattapatitā, maraṇābaddhanicchayā.

1724 Mohandhakārapihitā, caturoghasamotthaṭā;  
Vītunnā dukkhasallena, vihaññanti vighātino.

1725 Itthañca visapupphamva, nānānatthaphalāvaham;  
Dukkhānubandhasambādham, ābādhamva samuṭṭhitam.

1726 Āsīvisamva kupitam, ghoram bhayanibandhanam;  
Asisūnamva sārāmbham, dukkhāyūhanakam padam.

1727 Savidāhāparipphandapakbandhamivodakam;  
Uppādañca pavattañca, nimittāyūhanam tathā.

1728 Paṭisandhiñca passantam, **ñāṇamādīnavam** matam;  
Tebhūmakesu tenāyamavuddhim paṭivijjhati.

1729 Bhayabheravapakkhante, bahvādīnavapaccaye;  
Saṅkhāre samavekkhanto, nibbindati nirālayo.

1730 Visam jīvitukāmovā, verike viya bhīruko;  
Supaṇṇam nāgarājāva, coram viya mahaddhano.

- 1731Dukkhānusayasambādhe, bādhamāne vibhāvayaṃ;  
Saṃvejeti nirānande, paripanthabhayākule.
- 1732Suddho muttakarīsaṃva, suhito vamiṭṭha viya;  
Suvillitova duggandhaṃ, sunhāto aṅgaṇaṃ viya.
- 1733Rāgadosaparikliṭṭhe, caturāsavapūṭike;  
Hīnalokāmisāsāre, saṃklesavisadūsite.
- 1734Saṅkhārepi jigucchanto, nābhinandati paṇḍito;  
Tassetṭhaṃ nandinissaṭṭhaṃ, **nibbidāñāṇa**mabravuṃ.
- 1735Sabhayādīnave disvā, saṅkhāre puna paṇḍito;  
Nibbindanto tato tehi, parimuccitumicchati.
- 1736Mīnāva kumīne baddhā, pañjare viya pakkhino;  
Coro cārakabaddhova, peḷāyantova pannago.
- 1737Paṅke sanno mahānāgo, cando rāhumukhaṃ gato;  
Migo yathā pāsagato, tathā saṃsāracārake.
- 1738Avijjāpariyonaddhe, khandhapañcakasanthare;  
Diṭṭhijālapaṭicchane, vipallāsaparikkhite.
- 1739Pañcanīvaraṇābaddhe, mānatthambhasamussaye;  
Icchāpapātagambhīre, vipattivinipātane.
- 1740Jarābyādhisamuppāde, dhūmaketupapattike;  
Kodhūpanāhadahane, sokopāyāsadhūpate.
- 1741Madappamādāvarodhe, bhavataṇhāvakaḍḍhane;  
Vippayogasamuttāse, niccāpāyabhayākule.
- 1742Chālambābhigate niccaṃ, phassadvārādhikuṭṭane;  
Sañcetanākāraṇike, vedanākammakāraṇe.
- 1743Anatthālāpanigghose, klesarakkhasalālite;  
Maraṇārambhaniṭṭhāne, baddho muttiṃ gavesati.
- 1744Aggiṃ viya ca samphuṭṭha-masuciṃ gahitaṃ viya;  
Petāṃ khādītukāmaṃva, vikkantentamivāvudhaṃ.
- 1745Mahābyasanupassaṭṭhe, saṅkhāre mottumicchato;  
**Muccitukamyatāñāṇa**muppananti pavuccati.
- 1746Dujjahe palibajjhante, ganthānusayasāṅgame;  
Taṇhupādānagahaṇe, nandirāgānubandhane.
- 1747Diṭṭhimānamadatthaddhe, lobhapāsanirantare;  
Saṃyojanamahādugge, cirakālappapañcite.
- 1748Saṅkhāre muñcataccantaṃ, āvijjhivāva pannagaṃ;

Lakkhaṇānupanijjhāya, sukkhamaṃ pana yoniso.

- 1749Majjhataḡaḡaḡo tasmā, nirapekkhaviṃuttiyā;  
Vaggulīvāphalaṃ rukkhaṃ, vīmaṃsati viṃesato.
- 1750Vihataṃ viya kappāsaṃ, vihananto punappunaṃ;  
Gandhaṃ viya ca pisento, pisitaṃyeva sādhuḡaṃ.
- 1751Aniccā dukkhānattāti, satimā susamāhito;  
Āhacca paṭivijjhanto, lakkhaṇāni vipassati.
- 1752Vipassantassa tassevaṃ, **paṭisaṅkhānupassanā-**  
**Ñāṇa**miccāhu nipuṇaṃ, vicinantaṃ viṃsāradā.
- 1753Īti sammā vipassanto, sacchikatvā tilakkhaṇaṃ;  
Yathābhūtasabhāvena, tatthevamanupassati.
- 1754Aniccā vata saṅkhārā, niccāti gahitā pure;  
Dukkhāva sukhato diṭṭhā, anattāva panattato.
- 1755Aniccā dukkhānattā ca, saṅkhatā puna sabbathā;  
Alabbhaneyyadhammā ca, tathevākāmakāriyā.
- 1756Dhātumattā parādhīnā, attādheyyavivajjitā;  
Maccudheyyavasānītā, upadhihatagocarā.
- 1757Ahaṃ mamanti vohāro, paro vātha parassa vā;  
Attā vā attanīyaṃ vā, vatthuto natthi katthaci.
- 1758Yathāpi aṅgasambhārā, hoti saddo ratho iti;  
Evaṃ khandhesu santesu, hoti sattoti sammuti.
- 1759Tattha kappenti attānaṃ, bālā dummedhino janā;  
Ajjhattaṃ vā bahiddhā vā, passato natthi kiṅcanaṃ.
- 1760Sukhito dukkhito vātha, puggalo nāma katthaci;  
Vatthuto natthi sabbattha, saṅkhārā taṃsabhāvino.
- 1761Jāyamānā ca jīyyantā, miyyamānā ca saṅkhatā;  
Attāva dukkhitā hete, na tu dukkhāya kassaci.
- 1762Dukkhameva hi sambhoti, dukkhaṃ tiṭṭhati veti ca;  
Nāññatra dukkhā sambhoti, nāññaṃ dukkhā nirujjhati.
- 1763Ettha gayhūpagaṃ natthi, palāsetaṃ papañcitaṃ;  
Niruddhassa samāyūhā, niratthakasamubbhavā.
- 1764Aniccā hontu saṅkhārā, dukkhitā vā mamettha kiṃ;  
Anattā vāti? **Saṅkhārupekkhāññaṃ** pavattati.
- 1765Īti disvā yathābhūtaṃ, yāva bhaṅgā tato paraṃ;  
Gaṇhantī bhāvanāgabbhaṃ, paripakkā vipassanā.

- 1766 Avassaṃ bhaṅganiṭṭhāne, bhayādīnavanicchite;  
Nibbinditvā virajjanto, paṭisaṅkhāyupekkhati.
- 1767 Tattha muttakarīsaṃva, khelaṇḍaṃva ujjhitam;  
Vissaṭṭhaparaputtaṃva, vissaṭṭhabhariyaṃ viya.
- 1768 Pavattañca nimittañca, paṭisaṅkhāyupekkhato;  
Sabbasaṅkhāraddhammesu, gatiyonibhavesu vā.
- 1769 Vāri pokkharapatteva, sūcikaḅgeva sāsapo;  
Khittam kukkuṭapattaṃva, daddulaṃva hutāvahe.
- 1770 Na pasārīyatī cittaṃ, na tu sajjati bajjhati;  
Ālayā patilīyanti, parivattati vaṭṭato.
- 1771 Sītaṃ ghammābhitattova,  
Chātajjhattova bhojanaṃ;  
Pipāsitova pānīyaṃ,  
Byādhitova mahosadhaṃ.
- 1772 Bhīto khemantabhūmiṃva, duggatova mahānidhiṃ;  
Añjasaṃ maggamuḷhova, dīpaṃ viya ca aṇṇave.
- 1773 Ajarāmarāmaṃcantaṃ, asaṅkhāraṃaṇāsavaṃ;  
Sabbadukkhaḅkayaṃ ṭhānaṃ, nibbānaṃabhikaṅkhati.
- 1774 Vuṭṭhānaḅāminī cāyaṃ, sikhappattā vipassanā;  
Sakuṇī tīradassīva, **sānulomā** pavattati.
- 1775 Appavattamaṇimittaṃ, passanto pana santato;  
Pakkhīva nipphalaṃ rukkhaṃ, hitvā vuṭṭhāti saṅkhatā.
- 1776 Upacārasamādhīti, kāmaṃvacarabhāvanā;  
Muttoyaṃ lokiyo maggo, pubbaḅhāḅavipassanā.
- 1777 Paripakkā kamenevaṃ, paribhāvitabhāvanā;  
Pariccajantī saṅkhāre, pakkhandantī asaṅkhate.
- 1778 Janetānuttaraṃ magga-māsevanavisesato;  
Kaṭṭhasaṅghaṭṭanā jātā, accidhūmāva bhāsuram.
- 1779 Uggacchati yathādicco, purakkhatvāruṇaṃ tathā;  
Vipassanaṃ purakkhatvā, maggaḅhammo pavattati.
- 1780 Tathā pavattamāno ca, nibbānapadaḅcaro;  
Vimokkhattayanāmena, yathārahamaṃsesato.
- 1781 Klesadūsitasantāne, abhihantvā vigacchati;  
Ekacittakkaṇuppaḅdo, asanī viya pabbataṃ.
- 1782 Pubbe vuttanayeneva, appanānayaṃmīraye;  
Pādaḅajjhānabhedenā, jhānaḅḅaniyamo bhava.

- 1783 Parikammopacārānu-lomasāṅkhātagocarā;  
Yaṃ kiñci lakkhaṇākāraṃ, vipassantā pavattare.
- 1784 Tato gotrabhu nibbāna-mālambitvāna jāyati;  
Bahiddhā khandhato tasmā, vuṭṭhānanti pavuccati.
- 1785 Tato **maggo** kilesamhā, vimuccanto pavattati;  
Vuṭṭhānaṃ ubhato tasmā, khandhato ca kilesato.
- 1786 Dve tathā tīṇi vā honti, **phalāni** ca tato paraṃ;  
Bhavaṅgapāto taṃ chetvā, jāyate paccavekkhaṇā.
- 1787 Maggaṃ phalaṅca nibbānaṃ, paccavekkhati paṇḍito;  
Hīne kilese sese ca, paccavekkhati vā na vā.
- 1788 Bhāvetvā paṭhamaṃ magga-mitthamādiphale ṭhito;  
Tato paraṃ pariggayha, nāmarūpaṃ yathā pure.
- 1789 Kāmena ca vipassanto, punadeva yathārahaṃ;  
Yathānukkamamappeti, sakadāgāmiādayo.
- 1790 Itthaṃ vibhattaparipākavibhāvanāyaṃ,  
Buddhānubuddhaparibhāvitabhāvanāyaṃ;  
Paccuddhareti bhavasāgarapāragāmī,  
Maggo mahesi guṇasāgarapāragāmī.
- 1791 Icceṭaṃ dasavidha bhāvanāvibhāgaṃ,  
Bhāvetvā paramahitāvahaṃ kāmena;  
Papponti padamajarāmaraṃ cirāya,  
Saṃklesaṃ sakalamavassajanti dhīrā.

Iti nāmarūpaparicchede dasāvattāhāvibhāgo nāma

Dvādasamo paricchedo.

### 13. Terasamo paricchedo

#### Nissandaphalavibhāgo

- 1792 Vipassanāya nissandamiti vuttamito paraṃ;  
Saccānaṃ paṭivedhādīṃ, pavakkhāmi yathākkamaṃ.
- 1793 Pariññā ca pahānaṅca, sacchikiriyā ca bhāvanā;  
Iti dukkhādisaccesu, **kiccamaṃ** hu catubbidhaṃ.
- 1794 Taṃ sabbamaṃ maggakālamhi, karissati tato paraṃ;  
Paṭipassaddhakiccattā, kataṃ hoti phale kathaṃ.
- 1795 Chinnatālo phalasseva, chinnānusayamūlakā;  
Khandhā nālamadhiṭṭhānaṃ, vipallāsapavattiyā.

- 1796 Accantapaṭipakkhattā, catumaggapavattiyā;  
Param klesā na jāyanti, daḍḍhabījankuraṃ yathā.
- 1797 Niyyānaṭṭhaviseseṇa, aññaṃaññaṃ paccayo;  
Maggova maggaṃ bhāveti, jāyamānotha vā puna.
- 1798 Maggappavattisantāne, bhāvanāti pavuccati;  
Vattamāneṇa taṃ kiccaṃ, nipphāditamaseso.
- 1799 Iti tīṇipi saccāni, kiccato paṭivijjhati;  
Nibbānaṃ sacchikubbanto, maggo ekakkhaṇe saha.
- 1800 Kiccappavattito cettha, paṭivedhoti vuccati;  
Taṅca sādheti maggoyaṃ, niyyanto santigocaro.
- 1801 Pariccajitvā saṅkhāre, maggassārabba nibbutiṃ,  
Niyyānameva saccesu, kiccāsādhanaṃ mīritaṃ.
- 1802 Maggo eva hi niyyāti, sesā tassopakāraḅā;  
Appentā jhānadhama ca, bujjhantā bodhipakkhiyā.
- 1803 Tasmā tasseva vuṭṭhānaṃ, pakāseṇi viṣeso;  
Khandhehi ca kilesehi, vimokkhattayato kathaṃ.
- 1804 Katvānābhiniṣesaṃ tu, yattha tattha yathā tathā;  
Bhūmidhammaṃ pariggayha, vipassitvā tato paraṃ.
- 1805 Yato kutoci vuṭṭhānaṃ, yadi hoti aniccato;  
Hutvādhimokkhabahulo, saddhindriyaviṣeso.
- 1806 Animittavimokkheṇa, niyyanto sattapuggalo;  
Saddhānusārī paṭhame, majjhe saddhāvimuttako.
- 1807 Ante paññāvimuttoti, tamīreṇi tathāgatā;  
Saṅkhāre dukkhato disvā, vuṭṭhahanto sa puggalo.
- 1808 Passaddhibahulo hutvā, samādhindriyalābhato;  
Tathevappaṇihiteṇa, niyyanto tividho bhavo.
- 1809 Anattato vuṭṭhahitvā, vedabāhulyayogato;  
Suññatenātha niyyanto, paññindriyaviṣeso.
- 1810 Dhammānusārī paṭhame, diṭṭhippatto tato paraṃ;  
Ante paññāvimuttoti, tampi dīpeṇi paṇḍitā.
- 1811 Āneṅjapādaḅāna-nāmakāyaviṣeso;  
Sacchikatvāna nibbānaṃ, majjhe cha kāyasakkhino.
- 1812 Ārūpaṇo ca maggena, āneṅjēna ca rūpaṇo;  
Vimutto ubhatobhāga-vimutto arahā bhavo.
- 1813 Tivimokkhamukhībhūtā, iti vuṭṭhānasādhikā;

**Sattapuggalabhedañca**, sampādeti vipassanā.

- 1814** Adhimuccati saddhā ca, yathāvatthusabhāvato;  
Ñeyyadhammesu sabbattha, paññā ca paṭivijjhati.
- 1815** Tasmā saddhā ca paññā ca, vatthunicchayalakkhaṇā;  
Vatthuppaṭiṭṭhitā cāyaṃ, tilakkhaṇavipassanā.
- 1816** Tasmā saddhādhuro yogī, disvoḷārikalakkhaṇaṃ;  
Tato paramanattāti, sukhume adhimuccati.
- 1817** Tassevamadhimuttassa, saddhā vā pana kevalā;  
Samādhindriyādhikā ca, vuṭṭhānaghaṭikā bhava.
- 1818** Thūlalakkhaṇamohāya, paññādhure vipassato;  
Dhammasabhāvamāhacca, sukhumaṃ paṭivijjhati.
- 1819** Tasmā saddhādhurasseva, vuṭṭhānavayamādito;  
Ante saddhānugatassa, paññā suparipūrati.
- 1820** Paññādhurassa sesanti, keci ācariyā pana;  
Dhurasamsandanam nāma, vuṭṭhānesu vibhāvayum.
- 1821** Sattakkhattuparamo ca,  
Kolaṃkolo tathāparo;  
Ekabījīti tividho,  
**Sotāpanno** pavuccati.
- 1822** Sakiṃdeva imaṃ lokaṃ, āgantvā puna puggalo;  
**Sakadāgāminā**mena, dutiyopi pakāsito.
- 1823** Antarāparinibbāyī, upahaccāparo tathā;  
Asaṅkhāraṃ sasaṅkhāraṃ, uddhamṣototi pañcadhā.
- 1824** Anāgāmī ca tatiyo, catuttho arahāti ca;  
Itthaṃ phalaṭṭhā cattāro, **maggatṭhā** ca tatopare.
- 1825** Bhāvanāpariyāyena, paṭivedhānurūpato;  
Cattāro ca yugā honti, **aṭṭha cāriyapuggalā**.
- 1826** Diṭṭhikaṅkhā pahīyanti, ādimaggena sabbathā;  
Apāyagamanīyampi, pāpamaññaṃ pahīyati.
- 1827** Sakadāgāmimaggena, khīyantoḷārikā tathā;  
Anāgāmikamaggena, kāmadosāva sabbathā.
- 1828** Arahattena sabbepi, klesā khīyanti sabbathā;  
**Klesahāni** yathāyoga-miti ñeyyā vibhāvinā.
- 1829** Paṭisambhidā catasso, atthe dhamme niruttiyaṃ;  
Paṭibhāne ca bhāsanti, ñāṇaṃ bhedagataṃ budhā.

- 1830 Hetupphalañca nibbānaṃ, bhāsitattho tathāparo;  
Pākākrīyāti pañcete, **atthanā**mena bhāsītā.
- 1831 Hetu cāriyamaggo ca, bhāsitañca tathāparaṃ;  
Kusalākusalañceti, pañca **dhammo** pakāsito.
- 1832 Tatthevaṃ dasadhā bhede, atthadhamme yathārahaṃ;  
Yo vohāro sabhāvena, sā **nirutthi**ti sammatā.
- 1833 Taṃtaṃgocarakiccādi-bhedabhinnaṃ taḥiṃ taḥiṃ;  
Pavattamānaṃ yaṃ ñāṇaṃ, **paṭibhānaṃ** tamīritaṃ.
- 1834 Pubbayogo bāhussaccaṃ,  
Desabhāsā tathāgamo;  
Paripucchā cādhigamo,  
Nissayo mittasampadā.
- 1835 Iccūpanissayaṃ laddhā, bhijjati paṭisambhidā;  
Asekkhabhūmiyaṃ vātha, sekkhabhūmiyameva vā.
- 1836 Sarassato āgamato, tathālambaṇatopi ca;  
Nāmuppattiṃ pakāsenti, phalassa tividhaṃ budhā.
- 1837 Tidhā tato **samāpatti**, sotāpatti phalādikā;  
Suññatā cānimittā ca, tathāppaṇihitāti ca.
- 1838 Tañca vuttanayeneva, samāpajjitumicchato;  
Vipassantassa saṅkhāre, phalamappeti attano.
- 1839 Nirodhaṃ tu samāpattiṃ, rūpārūpassa lābhako;  
Samāpajjatānāgāmī, arahā ca yathā tathā.
- 1840 Rūpārūpasamāpattiṃ, samāpajja yathākkamaṃ;  
Vuṭṭhahitvā vipassanto, tattha tattheva saṅkhate.
- 1841 Yuganandhaṃ pavattetvā, samathañca vipassanaṃ;  
Yāvākiñcaññāyatana-mitthaṃ patvā tato paraṃ.
- 1842 Adhiṭṭheyyamadhiṭṭhāya, katvābhogaṃ yathārahaṃ;  
Maggārūpasamāpattiṃ, samāpajjati paṇḍito.
- 1843 Tato nirodhaṃ phusati, cittuppādadvayā paraṃ;  
Tassevaṃ manasābhāvo, **nirodhoti** pavuccati.
- 1844 Phalacittasamuppādā, vuṭṭhānaṃ tassa dīpitaṃ;  
Tato bhavaṅgaṃ chetvāna, paccavekkhati buddhimā.
- 1845 Iccānekaguṇādhāraṃ, paññābhāvanamuttamaṃ;  
Bhāveyya matimā yogī, patthento hitamattano.
- 1846 Itthaṃ susampāditasīlacitta-  
Paññāvisuddhī paṭipādayantā;



Patvāna sambodhimapetasokā,  
Pālenṭi sotthiṃ paramaṃ cirāya.

**1847**Te pattipattā paramappatītā,  
Pakkhālitaklesamalā mahesī;

Accantavodātaguṇoditattā,  
Lokassa hontuttamadakkhiṇeyyā.

Iti nāmarūpaparicchede nissandaphalavibhāgo nāma

Terasamo paricchedo.

Niṭṭhito ca sabbathāpi vipassanāvibhāgo.

### Nigamanakathā

**1848**Ettāvataṃ paṭiññāto, pavakkhāmīti ādito;  
**Nāmarūpaparicchedo**, pariniṭṭhāpito mayā.

**1849**Teraseva paricchedā, vibhattā satta sādhiḱā;  
Nāmarūpaparicchede, bhāṇavārā pakāsītā.

**1850**Abhidhammaparamatthā, samatho ca vipassanā;  
Visuṃ visuṃ vibhattāti, vibhāgettha tidhā matā.

**1851**Soyaṃ vijjāvimokkhā ca, hadayesu vibhāvināṃ;  
Vallabhattamadhiṭṭhāya, sāsaneṭṭha gavesināṃ.

**1852**Manogatatamuddhaṃsī, raviraṃsīva paṇḍito;  
Dassetu ciramālokaṃ, saddhammaratanālaye.

**1853**Paṇḍiccaṃ paramatthesu, pāṭavaṃ paṭipattiyāṃ;  
Patthayanteṇa bhikkhūna-mitthaṃ sugatasāsane.

**1854**Nāmarūpapariccheda-masaṃkiṇṇamanākulāṃ;  
Kubbatā hitakāmena, sukatena katena me.

**1855**Mahāmerunibhaṃ gehaṃ, mahācetiyaḱhūsitaṃ;  
Mahāvihāramāruḱha-mahābodhimahussavaṃ.

**1856**Alaṅkātuṃ pahontālaṃ, cirakālaṃ tapodhanā;  
Laṅkādiṭṭhapaṇḍitaṃ, kalāṅkāpagatālayaṃ.

**1857**Nāmarūpaparicchedo,  
Antarāyaṃ vinā yathā;  
Niṭṭhitoyaṃ tathā loke,  
Niṭṭhantajjhāsayaṃ subhā.

Iti anuruddhācariyena viracitaṃ

Nāmarūpaparicchedapakaraṇaṃ niṭṭhitam.

Namo tassa bhagavato arahato sammāsambuddhassa

## Paramatthavinicchayo

### Ganthārambhakathā

1. Vanditvā vandaneyyānaṃ, uttamaṃ ratanattayaṃ;  
Pavakkhāmi samāseṇa, paramatthavinicchayaṃ.

### Paṭhamo paricchedo

#### 1. Cittavibhāgo

##### 1. Sarūpasāṅgahakathā

2. Cittaṃ cetasiṅgaṃ rūpaṃ, nibbānanti niruttaro;  
Catudhā desayī dhamme, catusaccappakāsano.
3. Cittamekūnanavutividaṃ tattha vibhāvaye;  
Ekanavutividaṃ vā, ekavīsasatampi vā.
4. Dvepaññāsa sarūpeṇa, dhammā cetasiṅga matā;  
Cittuppādasasā bhinnā, sampayogānusārato.
5. Aṭṭhavīsavidhaṃ rūpaṃ, bhūtopādāyabhedato;  
Duvidhaṃ rūparūpaṃ tu, aṭṭhārasavidhaṃ bhava.
6. Nibbānaṃ pana dīpenti, asaṅkhatamanuttaraṃ;  
Atthanāmasasā dvedhā, paññattīti pavuccati.
7. Tesāṃ dāni pavakkhāmi, vibhāgaṃ tu yathākkamaṃ;  
Catudhā paramatthānaṃ, dvidhā paññattiyā kathaṃ.
8. Kusalādivibhāgena, tattha cittaṃ catubbidhaṃ;  
Tathā bhūmivibhāgena, kāmabhūmādito kathaṃ.
9. Somanassasahagataṃ, upekkhāsahitaṃ tathā;  
Ñāṇena sampayuttaṅca, vippayuttanti bheditaṃ.
10. Asaṅkhāraṃ sasaṅkhāramiti bhinnaṃ punaṭṭhadhā;  
**Kāmāvacarakusalaṃ**, kāme sugatisādhakaṃ.
11. Takkacārapītisukha-cittassekaggatāyutaṃ;  
Paṭhamajjhānakusalaṃ, pañcaṅgikamudāhaṭaṃ.
12. Vitakkahīnaṃ dutiyaṃ, jhānaṃ tu caturaṅgikaṃ;  
Vicārahīnaṃ tatiyaṃ, jhānaṃ pana tivaṅgikaṃ.

13. Pītihiṇaṃ catutthañca, upekkhekaggatāyutaṃ;  
Pañcamañca pakāsentī, ubhayampi duvaṅgikaṃ.
14. Evaṃ jhānaṅgabhedena, cittaṃ pañcavidhaṃ bhava;  
**Rūpāvacarakusalaṃ**, rūpabhūmipavattakaṃ.
15. Ākāśānañcāyatanaṃ, kusalaṃ paṭhamaṃ bhava;  
Viññāṇañcāyatananti, dutiyaṃ tatiyaṃ tathā.
16. Ākiñcaññāyatanaṃ tu, catutthaṃ pana mānaṃ;  
Nevaśāññānañcāyatananti, tanañceti catubbidhaṃ.
17. **Āruppakusalaṃ** nāma, upekkhekaggatāyutaṃ;  
Duvaṅgikamidaṃ sabbaṃ, āruppabhavasādhakaṃ.
18. Sotāpattimaggacittaṃ, paṭhamānuttaraṃ tathā;  
Sakadāgāmi anāgāmi, arahattanti sabbathā.
19. Catudhā maggabhedena, jhānabhedena pañcadhā;  
Vīsatā**pariyāpannakusalaṃ** dvayamissitaṃ.
20. Itthaṃ bhūmivibhāgena, **kusalaṃ** tu catubbidhaṃ;  
Ekavīsāpi bāvīsaṃ, sattatiṃsavidhampi vā.
21. Somanassasahagataṃ, upekkhāsahitaṃ tathā;  
Diṭṭhigatasampayuttaṃ, vippayuttanti bheditaṃ.
22. Asaṅkhāraṃ sasaṅkhāramiti bhinnaṃ punaṭṭhadhā;  
**Lobhamūlaṃ** pakāsentī, lobhamohadvihetukaṃ.
23. Domanassasahagataṃ, paṭighena samāyutaṃ;  
Asaṅkhāraṃ sasaṅkhāramiti bhinnaṃ dvidhā pana.
24. **Dosamūlaṃ** pakāsentī, dosamohadvihetukaṃ;  
Vicikicchāsahagataṃ, uddhaccasahitanti ca.
25. Upekkhāvedanāyuttaṃ, momūhaṃ duvidhaṃ pana;  
**Mohamūlaṃ** pakāsentī, mohenevekahetukaṃ.
26. **Dvādasākusalā** nāma, caturāpāyasādhakā;  
Ete sugatiyañcāpi, vipattiphaladāyakā.
27. Cakkhusotaghānajivhā-kāyaviññāṇanāmākā;  
Pañcaviññāṇayugaḷā, yugaḷaṃ sampañcchanaṃ.
28. Santīraṇadvayañceva, upekkhāsahitaṃ tathā;  
Puññāpuññavaseneva, vipākā duvidhā ṭhitā.
29. Upekkhāsahitā tattha, mānasā dvādaseritā;  
Kāyaviññāṇayugaḷaṃ, sukhadukkhayutaṃ kamā.
30. Somanassasahagataṃ, yaṃ santīraṇamānaṃ;

Taṃ **puññapākamevāhu, pāpapākam** na vijjati.

31. Pañcadvāraṇodvāra-vasena duvidhaṃ pana;  
Upekkhāvedanāyuttaṃ, kriyāvajjananāmakam.
32. Somanassasahagataṃ, hasituppādamānasam;  
Kriyājavanamiccevaṃ, tividhā**hetukakriyā**.
33. Aṭṭheva puññapākāni, pāpapākāni sattadhā;  
Kriyacittāni tīṇīti, **aṭṭhārasa ahetakā**.
34. Sapuññehi samānā ca, mahāpākamahākriyā;  
Mahaggatakriyā pākā, phalacittāni ca kamā.
35. Itthamekūnanavuti-vidhaṃ cittaṃ bhava tathā;  
Ekanavutividhaṃ vā, ekavīsasatampi vā.
36. Takkacārapītisukhacittassekaggatāyutaṃ;  
Sotāpattimaggaṅgacittaṃ, paṭhamajjhānikam matam.
37. Dutiyam takkato hīnam, tatiyam tu vicārato;  
Catuttham pītito hīnam, upekkhekaggatāyutaṃ.
38. Pañcamanti ca pañcete, paṭhamānuttarā matā;  
Diṭṭhikañkhāsīlabbataparāmāsappahāyino.
39. Tatheva sakadāgāmimaggaṅgacittaṃ pañcadhā;  
Rāgadosamohattayatanuttakaramīritam.
40. Kāmadosasamugghātakaram niravasesato;  
Tatiyānuttarāñcāpi, kusalam pañcadhā tathā.
41. Rūparāgārūparāgamānuddhaccāpi cāparā;  
Avijjā ceti pañcuddhambhāgiyānamasesato.
42. Saṃyojanānam sesānam, samugghātakaram param;  
Catutthānuttaram maggaṅgacittaṃ pañcavidhanti ca.
43. Cattāri pañcakāneva, maggesu ca phalesu ca;  
Sesāni cekāsītīti, ekavīsasatam bhava.
44. Lokuttarānam aṭṭhannaṃ, iccevaṃ pañcadhā puna;  
Jhānaṅgamaggabojjhaṅga-vibhāgāya yathārahaṃ.
45. Pādakajjhānamāmaṭṭhahānam ajjhāsayo tathā;  
Vuṭṭhānagāminī ceva, niyāmeti vipassanāti.

Iti cittavibhāge sarūpasāṅgahakathā niṭṭhitā.

Paṭhamo paricchedo.

## Dutiyo paricchedo

### 2. Pakiṇṇakakathā

46. Kusalānekavīseva, dvādasākusalāni ca;  
Chattiṃsati vipākāni, kriyācittāni vīsati.
47. Kāmesu catupaññāsa, rūpesu dasa pañca ca;  
Dvādasārūppacittāni, aṭṭhānuttaramānasā.
48. Kāme tevīsa pākāni, puññāpuññāni vīsati;  
Ekādasa kriyā ceti, catupaññāsa sabbathā.
49. Puññāpākakriyābhedā, tayo rūpesu pañcakā;  
Āruppeti catukkāni, sattavīsa mahaggatā.
50. Catumaggaphalānaṃ tu, vasenaṭṭhapi jhānato;  
Dasobhayampi missetvā, tālīsānuttarā siyuṃ.
51. Puññāpākakriyāpāpā, santi kāme mahaggate;  
Pāpaṃ natthi kriyāpāpā, na vijjanti anuttare.
52. Pāpāhetukamuttāni, anavajjāni sabbathā;  
Ekūnasatṭhi cittāni, puññāpākakriyāvasā.
53. Kammacittāni tettiṃsa, puññāpuññāni sabbathā;  
Chattiṃsa tesam pākāni, kriyā vīsa na cobhayaṃ.
54. Cakkhuvīññādhātādi, pañcaviññāṇanāmakā;  
Pañcadvārāvajjanañca, duvidhaṃ sampaṭicchanaṃ.
55. Manodhātuttayaṃ nāma, chasattati tato pare;  
Manovīññādhātūti, sattadhā dhātubhedato.
56. Manovīññādhātuñca, manodhātuttayaṃ tathā;  
Katvā manovīññāṇanti, cha viññāṇā pakittitā.
57. Āvajjanaṃ dassanañca, savanaṃ ghāyanaṃ tathā;  
Sāyanaṃ phusanañceva, sampaṭicchanaṭīraṇaṃ.
58. Voṭṭhabbanañca javanaṃ, tadārammaṇanāmakaṃ;  
Bhavaṅgaṃ cuti sandhīti, cittaṃ cuddasadhā ṭhitam.
59. Āvajjanādayo dve dve, yugā satta yathākkamaṃ;  
Tīṇi ṭīraṇacittāni, ekaṃ voṭṭhabbanaṃ mataṃ.
60. Kusalākusalā sabbe, phalā cāvajjanaṃ vinā;  
Kriyā ca pañcapaññāsa, javananti pavuccare.
61. Santīraṇamahāpākā, tadārammaṇanāmakā;  
Ekādasa pavattanti, javanārammaṇe yato.

62. Mahaggatamahāpākā, upekkhātīraṇadvayaṃ;  
Cutisandhibhavaṅgāni, cittānekūnavīsati.
63. Javanāvajjanādīni, voṭṭhabbasukhatīraṇā;  
Mahaggatamahāpākā, upekkhātīraṇāti ca.
64. Aṭṭhasaṭṭhi tathā dve ca, navaṭṭha dve yathākkamaṃ;  
Ekadviticatuppañcakkiccatṭhānāni niddise.
65. Rūpapākā mahāpākā, manodhātu ca tīraṇaṃ;  
Rūpaṃ janenti ekūnavīsati netaradvayaṃ.
66. Abhiññāvajjitā sabbe, appanājavanā pana;  
Rūpaṃ janenti chabbīsa, paṇāmentiriyāpathaṃ.
67. Abhiññādvayavoṭṭhabbaparittajavanā pana;  
Dvattiṃsa rūpaviññattiiriyāpathasādhakā.
68. Pañcaviññāṇamārūppa-vipākā sabbasandhiyo;  
Cutī khīṇāsavasseti, soḷasete na kiñcīpi.
69. Rūpaṃ janenti cittāni, sattasattati sabbathā;  
Aṭṭhapaññāsa cittāni, paṇāmentiriyāpathaṃ.
70. Dvattiṃsa catuviññattim, samuṭṭhāpentī mānasā;  
Na janenti tassampekaṃ, yathāvuttāni soḷasa.
71. Somanassasahagatā, parittajavanā pana;  
Hasanampi janentīti, catukiccāni terasa.
72. Sabbampi pañcavokāre, kiccamaṃ pakāsitaṃ;  
Āruppe pana sabbampi, rūpāyattaṃ na vijjati.
73. Asaññīnaṃ tu sabbāni, cittāneva na labbhare;  
Rūpakkhandhova tesam tu, attabhāvoti vuccati.
74. Pāṇātipātathēyyādivasenopacitaṃ pana;  
Uddhaccarahitāpuññaṃ, caturāpāyabhūmiyaṃ.
75. Datvā sandhiṃ pavatte tu, pañcavokārabhūmiyaṃ;  
Uddhaccasahitañcāpi, satta pākāni paccati.
76. Dānasīlādibhedena, pavattaṃ kusalaṃ pana;  
Kāme mānasamukkaṭṭhaṃ, catukkaṃ tu tihetukaṃ.
77. Datvā tihetukaṃ sandhiṃ, kāme sugatiyaṃ pana;  
Soḷasa puññapākāni, pavatte tu vipaccati.
78. Tihetukomaṃ puññaṃ, ukkaṭṭhañca dvihetukaṃ;  
Datvā dvihetukaṃ sandhiṃ, kāme sugatiyaṃ tathā.
79. Pavatte pana ñāṇena, sampayuttaṃ vivajjiya;

Dvādasa puññapākāni, vipaccati yathārahaṃ.

80. Dvīhetukomaḥ puññaṃ, paṭisandhimahetukaṃ;  
Deti mānusaḥ ceva, vinipātāsura tathā.
81. Aṭṭhāhetukapākāni, pavatte tu vipaccare;  
Cattāripi catukkāni, pañcavokārabhūmiyaṃ.
82. Bhāvanāmayapuññaṃ tu, mahaggatamanuttaraṃ;  
Yathābhūminiyāmena, deti pākaṃ yathāsakaṃ.
83. Kaṭattārūpapākāni, pañcavokārabhūmiyaṃ;  
Āruppānuttare pākaṃ, tathā rūpamasaññisu.
84. Puññāpuññāni kammāni, tettiṃsāpi ca yabbathā;  
Sañjanenti yathāyogaṃ, paṭisandhipavattiyaṃ.

Iti cittavibhāge pakiṇṇakakathā niṭṭhitā.

Dutiyo paricchedo.

## Tatiyo paricchedo

### 3. Vīthisaṅgahakathā

85. Cakkhusotaghānajiṃhā-kāyāyatana pañcadhā;  
Pasādā hadayañceti, cha vatthūni viniddise.
86. Cakkhusotaghānajiṃhā-kāyadvārā ca pañcadhā;  
Manodvāraṃ bhavaṅganti, cha dvārā cittavīthiyā.
87. Rūpasaddagandharasa-phoṭṭhabbā pañca gocarā;  
Dhammārammaṇapaññatti, cha dvārārammaṇakkamā.
88. Nimittagatikammāni, kammamevātha gocarā;  
Paṭisandhibhavaṅgānaṃ, cutiyā ca yathārahaṃ.
89. Maraṇāsannasattassa, yathopaṭṭhitagocaraṃ;  
Chadvāresu tamārabba, paṭisandhi bhavantare.
90. Ekacittakkhaṇā hoti, yāvajīvaṃ tato paraṃ;  
Bhavaṅgaṃ pariyoṣāne, cuti cekakkhaṇā bhava.
91. Duhetāhetucutiyā, kāmāvacarasandhiyo;  
Tīhetukāmacutiyā, sabbāpi paṭisandhiyo.
92. Rūpāvacaracutiyā, sahetupaṭisandhiyo;  
Āruppatopari kāme, tattha vāpi tīhetukā.
93. Paṭisandhi bhavaṅgañca, ekamevekajātiyaṃ;  
Cuti cārammaṇañcassa, evameva yathārahaṃ.

94. Rūpādārammaṇe cakkhu-ppasādādīdimhi ghaṭṭite;  
Majjhe bhavaṅgaṃ chinditvā, vīthi nāma pavattati.
95. Āvajjapañcaviññāṇasampañcchanatīraṇā;  
Voṭṭhabbakāmajavanatadārammaṇanāmakā.
96. Satteva tḥānasaṅkhepā, pañcadvārikamānasā;  
Catupaññāsa sabbepi, vitthārena sarūpato.
97. Āvajjasabbajavanatadārammaṇanāmakā;  
Sattasaṭṭhi sarūpena, manodvārikamānasā.
98. Iṭṭhe ārammaṇe honti, puññapākāni sabbathā;  
Aniṭṭhe pāpapākāni, niyamoyaṃ pakāsito.
99. Tatthāpi atiiṭṭhamhi, tadārammaṇatīraṇaṃ;  
Somanassayutaṃ iṭṭhamajjhataṃ upekkhitaṃ.
100. Gocaretiparittamhi, atiappāyuke pana;  
Bhavaṅgameva calati, moghavāroti so kato.
101. Voṭṭhabbanam parittamhi, dvattikkhattuṃ pavattati;  
Tato bhavaṅgapātova, sopi moghoti vuccati.
102. Javanañca mahantamhi, javitvāna tato param;  
Na sambhoti tadālambaṃ, sopi moghoti vuccati.
103. Gocaretimahantamhi, atidīghāyuke pana;  
Sambhoti ca tadālambaṃ, sampuñnoti pavuccati.
104. Gocaretimahantamhi, tadārammaṇasambhavo;  
Pañcadvāre manodvāre, vibhūte pana gocare.
105. Kāmāvacarasattānaṃ, kāmāvacaragocare;  
Parittajavanesveva, tadārammaṇamuddise.
106. Nātittikkhe nātisīghe, nātitejussade jave;  
Samamandappavattamhi, tadārammaṇamicchitaṃ.
107. Sukhopetaṃ tadālambaṃ, upekkhākriyato param;  
Na hotupekkhāsahitaṃ, sukhitakriyato tathā.
108. Na hoti domanassamhā, somanassikamānasam;  
Tadārammaṇamaññañca, bhavaṅgaṃ cuti vā tathā.
109. Rajjanādivasenettha, javanākusalaṃ bhava;  
Kusalaṃ pana sambhoti, saddhāpaññādisambhave.
110. Tadeva vītarāgānaṃ, kriyā nāma pavuccati;  
Avipākatamāpannaṃ, vaṭṭamūlaparikkhayā.
111. Appanājavanaṃ sesaṃ, mahaggatamanuttaraṃ;



Chabbīsati yathāyogaṃ, appanāvīthiyaṃ bhava.

112. Parikammaṃ karontassa, kasiṇādikagocare;  
Susamāhitacittassa, upacārasamādhinā.
113. Parikammopacārānulomagotrabhuto paraṃ;  
Pañcamaṃ vā catutthaṃ vā, javanaṃ hoti appanā.
114. Puthujjanāna sekkhānaṃ, kāmapuññatihateto;  
Tihetukāmakriyato, vītarāgānamappanā.
115. Tatrāpi sukhitajavaṃ, sukhitadvayato paraṃ;  
Upekkhitamhā sambhoti, upekkhekaggatāyutaṃ.
116. Pañca vāre cha vā satta, parittajavanaṃ bhava;  
Sakiṃ dve vā tadālamaṃ, sakimāvajjanādayo.
117. Appanājavanañcekaṃ, paṭhamuppattiyaṃ pana;  
Tato paraṃ vasībhūtaṃ, ahorattaṃ pavattati.
118. Sakiṃ dve vā nirodhassa, samāpattikkhaṇe pana;  
Catutthārappajavanaṃ, tato cittaṃ nirujjhati.
119. Nirodhā vuṭṭhahantassa, upariṭṭhaphaladvayaṃ;  
Pañcābhiññā tathā maggā, ekacittakkhaṇā matā.
120. Phalamekadvayaṃ tathā, tisso vā maggavīthiyaṃ;  
Samāpattikkhaṇe tampi, ahorattaṃ pavattati.
121. Pañcadvāre na labbhanti, lokuttaramahaggatā;  
Vīthimuttamanodhātu, pañca cittāni antime.
122. Parittāneva sabbāni, pañcadvāresu sambhavā;  
Manodvāramhi voṭṭhabba-tadālabajavā siyuṃ.
123. Ghānajivhākāyavīthi, tadārammaṇameva ca;  
Rūpe natthi tathārūpe, cakkhusotāpi vīthiyo.
124. Sabbāpi vīthiyo kāme,  
Rūpe tisso pakāsītā;  
Ekā vīthi panārūpe,  
Natthāsaññīsu kācīpi.
125. Sattāpi vīthiccittāni, kāme rūpe cha sambhavā;  
Arūpe dve manodvārā-vajjanaṃ javananti cāti.

Iti cittavibhāge vīthisaṅgahakathā niṭṭhitā.

Tatiyo paricchedo.

## Catuttho paricchedo

#### 4. Vīthiparikammakathā

126. Paṭhamāvajjanam pañca-dasannaṃ parato bhava;  
Dutiyāvajjanam hoti, ekavīsati param.
127. Ekamhā pañcaviññāṇam, pañcamhā sampañicchanam;  
Sukhasantīraṇam hoti, pañcavīsati param.
128. Sattatimsatito hoti, upekkhātīraṇadvayaṃ;  
Voṭṭhabbanasarūpānaṃ, dvinnaṃ kāmajavā param.
129. Maggābhiññā param dvinnaṃ, tiṇṇannaṃ lokiyappaṇā;  
Phalā catunnaṃ pañcannaṃ, upariṭṭhaphaladvayaṃ.
130. Bhavanti cattālīsamhā, sukhapākā dvihetukā;  
Tathekacattālīsamhā, upekkhāya samāyutā.
131. Honti sattatito kāme, sukhapākā tihetukā;  
Dvāsattatimhā jāyanti, upekkhāsahitā pana.
132. Ekūnasatṭhito rūpa-pākā pākā arūpino;  
Kamaṭṭhacattālīsamhā, tathekadvitihīnato.
133. Pubbaṅgahamiccevaṃ, vigaṇetvā vicakkhaṇo;  
Parasaṅgahasankhyādimaṃ, vibhāveyya visārado.
134. Pañcadvārāvajjanato, dasa cittāni dīpaye;  
Sesāvajjanato pañcacattālīsanti bhāsitaṃ.
135. Pañcaviññāṇato pāpavipākā sampañicchanā;  
Paramekaṃ dvayaṃ puññavipākā sampañicchanā.
136. Santīraṇā dvihetumhā, pākā dvādasa jāyare;  
Tihetukāmapākamhā, ekavīsati labbhare.
137. Rūpāvacarapākamhā, paramekūnavīsati;  
Navaṭṭhārūpapākamhā, satta chāpi yathākkamaṃ.
138. Paṭighamhā tu satteva, sitamhā teraseritā;  
Pāpapuññadvihetumhā, ekavīsati bhāvaye.
139. Dvihetukāmakriyato, aṭṭhārasa upekkhakā;  
Sattarasa sukhopetā, vibhāveyya vicakkhaṇo.
140. Kāmapuññatihetumhā, tettiṃseva upekkhakā;  
Tepaññāsa sukhopetā, bhavantīti pakāsitaṃ.
141. Tihetukāmakriyato, catuvīsatiupekkhakā;  
Sukhitamhā tu dīpeyya, pañcavīsati paṇḍito.
142. Dasarūpajavamhekā-dasadvādasa terasa;  
Yathākkamaṃ pañcadasa, āruppā paridīpaye.

143. Phalamhā cuddasevāhu, maggamhā tu sakam phalam;  
Param saṅghamiccevaṃ, vigaṇeyya visārado.
144. Pubbāparasamodhāna-miti ñatvā tato param;  
Vatthuvīthisamodhānaṃ, yathāsambhavamuddise.
145. Pañca vatthūni nissāya, kamato pañcamānasā;  
Tettiṃsa pana nissāya, hadayaṃ mānasā siyuṃ.
146. Kāmapākamanodhātu-hasituppādamānasā;  
Dosamūlāni maggo ca, rūpajjhānāva sabbathā.
147. Dasāvasesāpuññāni, kāmapuññamahākriyā;  
Voṭṭhabbārūpajavanam, satta lokuttarāni ca.
148. Dvecattālīsa cittāni, pañcavokārabhūmiyaṃ;  
Nissāya hadayaṃ honti, arūpe nissayaṃ vinā.
149. Āruppapākā cattāro, anissāyeti sabbathā;  
Vitthārenaṭṭhadhā bhinnam, saṅkhepā tividham bhava.
150. Tecattālīsa nissāya, anissāya catubbidham;  
Nissitānissitā sesā, dvecattālīsa mānasā.
151. Pañca cittappanā honti, kamenekekavīthiyaṃ;  
Manodhātuttikaṃ nāma, pañcadvārikamīritam.
152. Sukhatīraṇavoṭṭhabba-parittajavanā pana;  
Ekatīṃsāpi jāyante, chasu vīthīsu sambhavā.
153. Mahāpākā panaṭṭhāpi, upekkhātīraṇadvayaṃ;  
Chasu dvāresu jāyanti, dasa muttā ca vīthiyā.
154. Cutisandhibhavaṅgānaṃ, vasā pākā mahaggatā;  
Nava vīthivimuttāti, dasadhā vīthisaṅgaho.
155. Ekadvārikacittāni, pañcachadvārikā tathā;  
Chadvārikavimuttā ca, vimuttāti ca sabbathā.
156. Chattīṃsa tayekatīṃsa, dasa ceva naveti ca;  
Ñatvā vīthisamodhānaṃ, gocaraṅca samuddise.
157. Kamato pañcaviññāṇā, lokuttaramahaggatā;  
Abhiññāvajjitā sabbā, pañcatālīsa mānasā.
158. Yathāsambhavato honti, rūpādekekagocarā;  
Pañcagocaramīrenti, manodhātuttikaṃ pana.
159. Santīraṇamahāpākā, parittajavanāni ca;  
Voṭṭhabbanamabhiññā ca, tecattālīsa sambhavā.
160. Chārammaṇesu hontīti, aṭṭhadhā tividhā puna;

Ekārammaṇacittāni, pañcachārammaṇāni ca.

161. Saṅkhepā mānasā pañca-cattālīsa tayo tathā;  
Tecattālīsa ceveti, sattadhāpi siyuṃ katham.
162. Kāmapākamanodhātu-hasituppādamānasā;  
Pañcavīsa yathāyogaṃ, parittārammaṇā matā.
163. Kasiṇugghāṭimākāsaṃ, paṭhamāruppamānasam;  
Tasseva natthibhāvaṃ tu, tatiyāruppakaṃ tathā.
164. Ālambitvā pavattanti, āruppā kamato tato;  
Dutiyañca catutthañca, cha mahaggaṭagocarā.
165. Appamāṇasamaññā te, nibbāne pana gocare;  
Aṭṭha lokuttarā dhammā, niyamena vavatthitā.
166. Kasiṇāsuhakoṭṭhāse,  
Ānāpāne ca yogino;  
Paṭibhāganimittamhi,  
Appamaññānuyuñjato.
167. Sattapaṇṇattiyañceva, rūpajjhānaṃ pavattati;  
Yathāvuttanimittamhi, sesamāruppakanti ca.
168. Abhiññāvajjitā ekavīsa mahaggaṭā sabbā;  
Sabbe paṇṇattisaṅkhāte, navattabbe pavattare.
169. Jāyantākusalā ñāṇavippayuttajavā tathā;  
Appamāṇaṃ vinā vīsa, parittādīsu tīsupi.
170. Tihetukāmapuññāni, puññābhiññā ca pañcime;  
Catūsupi pavattanti, arahattadvayaṃ vinā.
171. Kriyābhiññā ca voṭṭhabbaṃ, kriyākāme tihetukā;  
Cha sabbathāpi hontīti, sattadhā mānasā ṭhitā.
172. Ekaticcatukoṭṭhāsagocarā tividhā pana;  
Samasaṭṭhi tathā vīsa, kamenekādaseti ca.
173. Pañcadvāresu pañcāpi, paccuppannāva gocarā;  
Tekālikā navattabbā, manodvāre yathārahaṃ.
174. Ajjhattā ca bahiddhā ca, pañcadvāresu gocarā;  
Manodvāre navattabbo, natthibhāvopi labbhati.
175. Pañcadvāresu pañcanna-mekameko ca gocaro;  
Chāpi ārammaṇā hontī, manodvāramhi sabbathā.
176. Pañcadvāresu gahitaṃ, tadaññampi ca gocaraṃ;  
Manodvāre vavatthānaṃ, gacchatīti hi desitaṃ.

177. Atītā vattamānā ca, sambhavā kāmasandhiyā;  
Chadvāragahitā honti, tividhā tepi gocarā.
178. Kammanimittamevekaṃ, manodvāre upaṭṭhitam;  
Navattabbamatītañca, dhammārammaṇasaṅgahaṃ.
179. Ālambitvā yathāyogaṃ, paṭisandhimahaggatā;  
Ante cuti bhava majjhe, bhavaṅgampi pavattatīti.

Iti cittavibhāge vīthiparikammakathā niṭṭhitā.

Catuttho paricchedo.

## Pañcama paricchedo

### 5. Bhūmipuggalakathā

180. Ito paraṃ pavakkhāmi, bhūmipuggalabhedato;  
Cittānaṃ pana sabbesaṃ, kamato saṅgahaṃ kathaṃ.
181. Nirayañca tiracchānayoṇi peṭāsura tathā;  
Caturāpāyabhūmiti, kāme duggatiyo matā.
182. Cātumahārājikā ca, tāvatimsā ca yāmakā;  
Tusitā ceva nimmānaratino vasavattino.
183. Chaḷete devalokā ca, mānavāti ca sattadhā;  
Kāmasugatiyo cekādasadhā **kāmabhūmiyo**.
184. Brahmānaṃ pārisajjā ca, tathā brahmapurohitā;  
Mahābrahmā ca tividhā, **paṭhamajjhānabhūmiyo**.
185. Parittābhāppamāṇābhā, tathevābhassarāti ca;  
**Dutiyajjhānabhūmi** ca, tividhāva pakāsītā.
186. Parittasubhāppamāṇāsubhā ca subhakiṇhakā;  
Tividhāpi pavuccanti, **tatiyajjhānabhūmiyo**.
187. Vehapphalā asaṅṅī ca, suddhāvāsā ca pañcadhā;  
Iccetā pana sattāpi, **catutthajjhānabhūmiyo**.
188. Avihā ca atappā ca, sudassā ca sudassino;  
Akaniṭṭhāti pañcete, **suddhāvāsā** pakāsītā.
189. Iti soḷasadhā bhinnā, brahmalokā pavuccare;  
Rūpibrahmānamāvāsā, **rūpāvacarabhūmiyo**.
190. Ākāsānañcāyatanaṃmādīhi pakāsītā;  
Arūpibrahmalokā ca, catudhārūpabhūmiyo.
191. Sotāpannādibhedena, catudhānuttarā matā;

Pañcatim̄sa panicevaṃ, sabbathāpi ca bhūmiyo.

192. Jāyanti caturāpāye, pāpapākāya sandhiyā;  
Kāmāvacaradevesu, mahāpākehi jāyare.
193. Ahetukā puññapākāhetukena tu jāyare;  
Bhummadevamanussesu, mahāpākehi cetare.
194. Vipākaṃ paṭhamajjhānaṃ, paṭhamajjhānabhūmiyaṃ;  
Dutiyaṃ tatiyañceva, dutiyajjhānabhūmiyaṃ.
195. Tatiyamhi catuttham̄ tu, catutthamhi ca pañcamam̄;  
Āruppā ca kameneva, āruppe honti sandhiyo.
196. Kāyavācāmanodvāre, kammaṃ pāṇavadhādikaṃ;  
Katvā pāpakacittehi, jāyantāpāyabhūmiyaṃ.
197. Kāyavācāmanodvāre, dānaṃ sīlañca bhāvanaṃ;  
Kāmapuññehi katvāna, kāmasugatiyaṃ siyuṃ.
198. Parittaṃ majjhimam̄ jhānaṃ, pañitañca yathākkamaṃ;  
Bhāvetvā tividhā honti, tīsu bhūmīsu yogino.
199. Vehapphalesu jāyanti, bhāvetvā pañcamam̄ tathā;  
Saññāvirāgatañceva, bhāvetvāsaññibhūmiyaṃ.
200. Suddhāvāsesu jāyanti, anāgāmikapuggalā;  
Āruppāni ca bhāvetvā, arūpesu yathākkamaṃ.
201. Lokuttaram̄ tu bhāvetvā, yathāsakamanantaram̄;  
Samāpattikkhaṇe ceva, appeti phalamānaṃ.
202. Apāyamhā cutā sattā, kāmadhātumhi jāyare;  
Sabbatthānesu jāyanti, kāmasugatito cutā.
203. Cutā jāyanti rūpamhā, sabbatthāpāyavajjite;  
Kāmasugatiyaṃ honti, arūpāsaññato cutā.
204. Tathārūpacutā honti, tatthevoparimeva ca;  
Vaṭṭamūlasamucchedā, nibbāyanti anāsavā.
205. Suddhāvāsesvanāgāmi-puggalāvopapajjare;  
Kāmadhātumhi jāyanti, anāgāmivivajjitā.
206. Heṭṭhupapattibrahmānaṃ, ariyānaṃ na katthaci;  
Asaññasattāpāyesu, natthevāriyapuggalā.
207. Vehapphale akaniṭṭhe, bhavagge ca patiṭṭhitā;  
Na punāññattha jāyanti, sabbe ariyapuggalā.
208. Chasu devesvanāgāmī, vītarāgā na tiṭṭhare;  
Na ciraṭṭhāyino tatha, lokiyāpi ca yogino.

209. Gihiliṅge na tiṭṭhanti, manussesu anāsavā;  
Pabbajjāyañca bhumme ca, brahmattepi ca tiṭṭhare.
210. Yāni paññāsa vassāni,  
Manussānaṃ sa piṇḍito;  
Eko rattidivo tena,  
Māseko tiṃsa rattiyo.
211. Dvādasamāsiyo vasso, tena pañcasataṃ bhava;  
**Cātumahārājikānaṃ**, pamāṇamidamāyuno.
212. Taṃ navutivassasata-sahassaṃ pana piṇḍitaṃ;  
Gaṇanāya manussānaṃ, catubhāgūparūpari.
213. Yaṃ manussavassasataṃ, tadeko divaso kato;  
Tena vassasahassāyu, tāvatimṣesu desito.
214. Koṭittayaṃ saṭṭhisatasahassañcādhikaṃ bhava;  
Gaṇanāya manussānaṃ, **tāvatiṃsesu** piṇḍitaṃ.
215. Āyupamāṇamiccevaṃ, devānamuparūpari;  
Dvikkhattuṃ dviguṇaṃ katvā, catubhāgamudāhaṭaṃ.
216. Gaṇanāya manussānaṃ, tattha cuddasa koṭiyo;  
Cattālīsatasahasassādhiḥkā **yāmbhūmiyaṃ**.
217. **Tusitānaṃ** pakāsentī, sattapaññāsa koṭiyo;  
Saṭṭhisatasahassāni, vassāni adhikāni ca.
218. **Nimmānaratidevānaṃ**, dvisataṃ tiṃsa koṭiyo;  
Cattālīsavassasatasahassāni ca sabbathā.
219. Navakoṭisatañcekavīsativassakoṭiyo;  
Saṭṭhivassasatasahasassādhiḥkā **vasavattisu**.
220. Kappassa tatiyo bhāgo, upaḍḍhañca yathākkamaṃ;  
Kappeko dve ca cattāro, aṭṭha kappā ca soḷasa.
221. Dvattiṃsa catusaṭṭhī ca, navasu **brahmabhūmisu**;  
Vehapphalā asaṅṅī ca, pañcakappasatāyukā.
222. Kappasahassaṃ dve cattāri, aṭṭha soḷasa cakkamā;  
Sahassāni ca kappānaṃ, **suddhāvāsānamuddise**.
223. Vīsakappasahassāni, cattālīsañca saṭṭhi ca;  
Caturāsītisahassā, kappā cā**ruppake** kamā.
224. Āyupamāṇaniyamo, natthi bhumme ca mānave;  
Vassānaṃ gaṇanā natthi, caturāpāyabhūmiyaṃ.
225. Puthujjanāriyā ceti, duvidhā honti puggalā;  
Tihetukādibhedena, tividhā ca puthujjanā.

226. Maggaṭṭhā ca phalaṭṭhā ca,  
Aṭṭhevāriyapuggalā;  
Ādito satta sekkhā ca,  
Asekkho cārahāparo.
227. Ahetukāva labbhanti, sattā duggatīyaṃ pana;  
Tihetukāva labbhanti, rūpārūpe sacittakā.
228. Kāmāvacaradevesu, ahetikavivajjitā;  
Vinipātāsura ceva, mānava ca tayopi ca.
229. Ariyā nāma labbhanti, asaṅṅāpāyavajjite;  
Puthujjanā tu labbhanti, suddhāvāsavivajjite.
230. Suddhāvāsamaṃpāyaṅca, hitvāsaṅṅibhavaṃ tidhā;  
Sotāpannādayo dvepi, sesaṭṭhānesu labbhare.
231. Iti sabbappabhedena, bhūmipuggalasaṅgahaṃ;  
Ñatvā viññū vibhāveyya, tattha cittāni sambhavāti.

Iti cittavibhāge bhūmipuggalakathā niṭṭhitā.

Pañcama paricchedo.

## Chaṭṭho paricchedo

### 6. Bhūmipuggalacittappavattikathā

232. Kāmasugatīyaṃ honti, mahāpākā yathārahaṃ;  
Mahaggatavipākā ca, yathāsandhivavatthitā.
233. Voṭṭhabbakāmapuññāni, viyuttāni ca diṭṭhiyā;  
Uddhaccasahitañceti, honti sabbattha cuddasa.
234. Santīraṇamanodhātu-cakkhusotamanā pana;  
Dasa cittāni jāyanti, sabbatthārūpavajjite.
235. Diṭṭhigatasampayuttā, vicikicchāyutā tathā;  
Pañca sabbattha jāyanti, suddhāvāsavivajjite.
236. Dosamūladvayañceva, ghānādittayamānasā;  
Aṭṭha sabbattha jāyanti, mahaggatavivajjite.
237. Catutthārūppajavanaṃ, anāgāmiṃphalādayo;  
Mahākriyā ca jāyanti, terasāpāyavajjite.
238. Heṭṭhārūppajavā dve dve, chāpāyuparivajjite;  
Sitarūppajavā honti, arūpāpāyavajjite.
239. Sotāpattīphalādīni, suddhāpāyavivajjite;  
Paṭṭhamānuttaraṃ suddhā-pāyārūpavivajjite.



240. Avatthābhūmibhūtattā, na gayhanti anuttarā;  
Ekavokārabhūmi ca, rūpamattā na gayhati.
241. Sabhummā sabbabhummā ca, ekadvittayavajjitā;  
Tathārūpasuddhāvāsa-brahmāpāyavasāti ca.
242. Mānasā pañca koṭṭhāsā, sattarasa catuddasa;  
Chattiṃsatekavīsā ca, ekañceva yathākkamaṃ.
243. Aṭṭhārasāpi hontete, navadhāpi punekadhā;  
Catudhā tividhā ceva, ekadhāti ca bhedato.
244. Terasāpi ca koṭṭhāsā, bhavantekatibhūmakā;  
Chasattekādasasatta-rasabhūmakamānasā.
245. Ekadvayaticatukkapañcakādhikavīsajā;  
Chabbīsatiṃsajā ceti, yathānukkamato bhava.
246. Cattāri puna cattāri, ekamaṭṭhaṭṭha cekakaṃ;  
Cattārekādasa dve dve, satta tevīsa cuddasa.
247. Kriyājavamahāpākā, lokuttaramahaggatā;  
Dvepaññāsa na labbhanti, caturāpāyabhūmiyaṃ.
248. Kāmāvacaradevesu, chasu bhumme ca mānave;  
Kāmasugatiyaṃ natthi, nava pākā mahaggatā.
249. Dosamūlamahāpākā, ghānādittayamānasā;  
Natthārūpavipākā ca, vīsati rūpabhūmiyaṃ.
250. Kañkhādittiyutā pañcārūpapākā catubbidhā;  
Pañcādonuttarā ceva, suddhāvāse na labbhare.
251. Ādāvajjanamaggā ca, paṭighārūpamānasā;  
Kāmapākā sitārūpe, tecattālīsa natthi te.
252. Sattatiṃsa parittā ca, labbhantāpāyabhūmiyaṃ;  
Mānasāsīti labbhanti, kāmasugatiyaṃ pana.
253. Ekūnasattati rūpe, suddhe paññāsa pañca ca;  
Chacattālīsa āruppe, natthāsaññīsu kiñcipi.
254. Itthamekadviticatupañcabhummāni soḷasa;  
Dasa pañcadasevātha, catuttiṃsa catuddasa.
255. Apāyāhetukānaṃ tu, mahāpākakriyājave;  
Hitvā sesaparittāni, cittāni pana labbhare.
256. Dviihetukāhetukānaṃ, sesānaṃ kāmamānasā;  
Labbhanti pana hitvāna, ñāṇapākakriyājave.
257. Tiihetukānaṃ sattānaṃ, tattha tathūpapattiyaṃ;

Tattha tatthūpapannānaṃ, labbhamānāni labbhare.

258. Tihetukānaṃ sabbepi, mānasāpāyapāṇinaṃ;  
Sattatiṃsāvasesānaṃ, ekatālīsa niddise.
259. Puthujjanāna sekkhānaṃ, na santi javanakriyā;  
Na santi vītarāgānaṃ, puññāpuññāni sabbathā.
260. Kaṅkhādiṭṭhiyutā pañca, sekkhānaṃ natthi mānasā;  
Dosamūladvayañcāpi, natthānāgāmino pana.
261. Vavatthitāriyesveva, yathāsakamanuttarā;  
Maggatṭhānaṃ sako maggo, natthaññaṃ kiñci sabbathā.
262. Puthujjanānaṃ dvinnampi, phalaṭṭhānaṃ yathākkamaṃ;  
Tatiyassa phalaṭṭhassa, catutthassa ca sambhavā.
263. Tesatṭhi ceva cittāni, labbhantekūnasaṭṭhi ca;  
Sattapaññāsa cittāni, tepaññāsa ca sabbathā.
264. Catupaññāsa paññāsa, paññāsadvayahīnakā;  
Kāmesu tesamaṃ sambhonti, catutālīsa cakkamā.
265. Tecattālīsa cekūnacattālīsa yathākkamaṃ;  
Bhavantekūnatālīsa, pañcattiṃsa ca rūpisu.
266. Sattavīsa ca tevīsa, tevīsa ca yathākkamaṃ;  
Āruppesupi labbhanti, tesamaṭṭhāraseva ca.
267. Puthujjanā ca cattāro, apāyāhetukādayo;  
Ariyā ceva aṭṭhāti, dvādasannaṃ vasā siyuṃ.
268. Chabbidhā cittakoṭṭhāsā, ekapuggalikā tathā;  
Catupañcachasattaṭṭha-puggalaṭṭhāti cakkamā.
269. Chabbīsa cuddasevātha, terasa dve ca mānasā;  
Dasa sattādhikā ceva, puna sattādhikā dasāti.

Iti cittavibhāge bhūmipuggalacittappavattikathā niṭṭhitā.

Chaṭṭho paricchedo.

## Sattamo paricchedo

### 7. Bhūmipuggalasambhava-kathā

270. Dvihetukāhetukānaṃ, na sampajjati appanā;  
Arahattañca natthīti, nattheva javanakriyā.
271. Ñāṇapākā na vattanti, jaḷattā mūlasandhiyā;  
Dvihetukatadālambaṃ, siyā sugatīyaṃ na vā.

272. Tihetukānaṃ sattānaṃ, samathañca vipassanaṃ;  
Bhāventānaṃ pavattanti, chabbīsatiṭṭhi appanā.
273. Arahanānaṃ sattānaṃ, bhavanti javanakriyā;  
Yathābhūminiyāmena, ñāṇapākā ca labbhare.
274. Vajjhā paṭhamamaggena, kaṅkhādīṭṭhiyutā pana;  
Paṭighaṃ tatiyeneva, kammamantena sāsavaṃ.
275. Tasmā tesāṃ na vattanti, tāni cittāni sabbathā;  
Maggaṭṭhānaṃ tu maggova, nāññaṃ sambhoti kiñcīpi.
276. Ahetukavipākāni, labbhamānāya vīthiyā;  
Sabbathāpi ca sabbesaṃ, sambhavanti yathārahaṃ.
277. Pañcadvāre manodvāre, dhuvamāvajjanadvayaṃ;  
Parittapuññāpuññāni, labbhanti lahuvuttito.
278. Kriyājavānaṃ appanā, natthāpāyesu kāraṇaṃ;  
Natthi sahetukā pākā, duggatattā hi sandhiyā.
279. Brahmānaṃ paṭighaṃ natthi, jhānavikkhambhitaṃ tathā;  
Heṭṭhājhānaṃ virattattā, na bhāventi arūpino.
280. Pubbeva diṭṭhasaccāva, ariyārūpabhūmakā;  
Tasmādimaggo natthettha, kāyābhāvā sitaṃ tathā.
281. Suddhāvāsāpi pattāva, heṭṭhānuttarapañcakaṃ;  
Sattapāpapahīnā ca, tasmā natthettha tāni ca.
282. Pañcadvārikacittāni, dvārābhāve na vijjare;  
Sahetukavipākā ca, yathābhūmivavatthitā.
283. Sambhavāsambhavañcevaṃ, ñatvā puggalabhūmisu;  
Labbhamānavasā tattha, cittasaṅghamuddise.
284. Kusalādippabhedā ca, tathā bhūmādibhedato;  
Vatthudvārārammaṇato, bhūmipuggalatopi ca.
285. Vibhāgo yo samuddiṭṭho,  
Cittānañca tu sambhavā;  
Ñeyyo cetasikānañca,  
Sampayogānusāratoti.

Iti cittavibhāge bhūmipuggalasambhavaṃ kathā niṭṭhitā.

Sattamo paricchedo.

Niṭṭhito ca cittavibhāgo.

## Aṭṭhamo paricchedo

## 2. Cetasikavibhāgo

### 8. Cetasikasampayogakathā

286. Iti cittavidhiṃ ñatvā, dvepaññāsa vibhāvinā;  
Ñeyyā cetasi sambhūtā, dhammā cetasikā katham.
287. Phasso ca vedanā saññā, cetanekaggatā tathā;  
Jīvitam manasikāro, satta sādharmaṇā ime.
288. Vitakko ca vicāro ca, pīti ca vīriyam tathā;  
Chando ca adhimokkho ca, cha pakiṇṇakanāmakā.
289. Puññāpuññesu pākesu, kriyāsu ca yathārahaṃ;  
Mānesesu pavattanti, vippakiṇṇā pakiṇṇakā.
290. Saddhā satindriyañceva, hirottappabaladvayam;  
Aloho ca adoso ca, paññā majjhataṭṭhāpi ca.
291. Aṭṭhete uttamā nāma, dhammā uttamasādhanā;  
Nīvajjāti pavuccanti, yugaḷā cha tatopare.
292. Passaddhi kāyacittānaṃ, lahutā mudutā tathā;  
Kammaññatā ca pāguñña-tā ca ujukatāti ca.
293. Appamaññādvayam nāma, karuṇāmuditā siyumaṃ;  
Sammāvācā ca kammantā-jīvā ca viratittayam.
294. Pañcavīsa paniccete, anavajjā yathārahaṃ;  
Pāpāhetukamuttesu, anavajjesu jāyare.
295. Lobho doso ca moho ca,  
Māno diṭṭhi ca saṃsayo;  
Thinamiddhañca uddhaccaṃ,  
Kukkuccañca tathā dasa.
296. Ahirīkamanottappaṃ, issā macchariyanti ca;  
Honti cuddasa sāvajjā, sāvajjesveva sambhavā.
297. Dvepaññāsa catuddhevaṃ, dhammā cetasikā ṭhitā;  
Tesaṃ dāni pavakkhāmi, sampayogañca saṅghaṃ.
298. Satta sādharmaṇā sabba-cittasādhāraṇā tato;  
Cittena saddhi aṭṭhannaṃ, vippayogo na katthaci.
299. Vitakko pañcaviññānaṃ, dutiyādivivajjite;  
Vicāropi ca tattheva, tatiyādivivajjite.
300. Somanassayute pīti-catutthajjhānavajjite;  
Vīriyam paṭhamāvajja-vipākāhetuvajjite.
301. Chando sambhoti sabbattha, momūhāhetuvajjite;

Adhimokkho vicikicchā-pañcaviññānavajjite.

302. Chasaṭṭhi pañcapaññāsa, sattati ceva soḷasa;  
Vīsatekādasevātha, pakiṇṇakavivajjitā.
303. Mānasā pañcapaññāsa, savitakkā chasaṭṭhi ca;  
Savicārekapaññāsa, sappītikamanā tathā.
304. Tesattati savīriyā, sachandekūnasattati;  
Sādhimokkhā pavuccanti, aṭṭhasattati mānasā.
305. Paññāppamaññāviratī, hitvā ekūnasatṭhisu;  
Pāpāhetukamuttesu, saddhādekūnavīsati.
306. Dvīhetukāhetupāpavajjitesu samāsato;  
Paññā tu jāyate sattacattālīsesu sabbathā.
307. Mahākriyākāmapuñña-rūpajjhānesu jāyare;  
Appamaññāṭṭhavīsesu, hitvā jhānaṃ tu pañcamaṃ.
308. Lokuttaresu sabbattha, saheva viratittayaṃ;  
Kāmapuññesu sambhoti, yathāsambhavato visuṃ.
309. Viratīappamaññāsu, pañcasvapi yathārahaṃ;  
Kadācīdeva sambhoti, ekekova na cekato.
310. Ahirīkamanottappaṃ, mohauddhaccameva ca;  
Pāpasādhāraṇā nāma, cattāro pāpasambhavā.
311. Lobho ca lobhamūlesu, diṭṭhiyuttesu diṭṭhi ca;  
Māno diṭṭhiviyuttesu, diṭṭhimānā na cekato.
312. Dosamūlesu doso ca, issā macchariyaṃ tathā;  
Kukkuccamiti cattāro, vicikicchā tu kaṅkhite.
313. Saheva thinamiddhaṃ tu, sasaṅkhāresu pañcasu;  
Iti cuddasa sāvajjā, sāvajjesveva nicchitā.
314. Māno ca thinamiddhañca, saha vātha visuṃ na vā;  
Issāmaccherakukkuccā, aññamaññaṃ visuṃ na vāti.

Iti cetasikavibhāge cetasikasampayogakathā niṭṭhitā.

Aṭṭhamo paricchedo.

## Navamo paricchedo

### 9. Cetasikaṅgahakathā

315. Satta sādharmaṇā ceva, cha dhammā ca pakiṇṇakā;  
Saddhādi pañcavīseti, aṭṭhatimsa samissitā.

316. Kāmāvacarapuññesu, labbhanti paṭhamadvaye;  
Sattatiṃseva dutiye, paññāmattevivajjitā.
317. Tatiye ca yathāvuttā, pītimattavivajjitā;  
Chattatiṃseva catutthamhi, paññāpītidvayaṃ vinā.
318. Mahākriyāsu yujjanti, hitvā viratiyo tathā;  
Pañcatīṃsa catuttiṃsadvayaṃ tettiṃsakaṃ kamā.
319. Ṭhapetvā appamaññā ca, mahāpākesu yojitā;  
Tettiṃsā ceva dvattiṃsadvayekattiṃsakaṃ kamā.
320. Appamaññā gahetvāna, hitvā viratiyo tathā;  
Pañcatīṃseva paṭhame, rūpāvacaramānase.
321. Vitakkaṃ dutiye hitvā, vicārañca tato paraṃ;  
Catutthe pana pītiñca, appamaññañca pañcame.
322. Yathāvuttapakārāva, catuttiṃsa yathākkamaṃ;  
Tettiṃsa ceva dvattiṃsa, samatiṃsañca labbhare.
323. Pañcamena samānā ca, ṭhapetvārappamānasā;  
Bhūmārammaṇabhedañca, aṅgānañca paṇītaṃ.
324. Appamaññā ṭhapetvāna, gahetvā viratittayaṃ;  
Chattīṃsānuttare honti, paṭhamajjhānamānase.
325. Vitakkaṃ dutiye hitvā, vicārañca tato paraṃ;  
Pītiṃ hitvā catutthe ca, pañcamepi ca sabbathā.
326. Yathāvuttappakārāva, pañcatīṃsa yathākkamaṃ;  
Catuttiṃsañca tettiṃsa, tathā tettiṃsa cāpare.
327. Evaṃ bāvīsadhā bhedo, anavajjesu saṅgaho;  
Ekūnasatṭhicittesu, aṭṭhatīṃsānamīrito.
328. Viratī appamaññā ca, gahetvā pana sabbaso;  
Ekamekaṃ gahetvā ca, paccakkhāya ca sabbathā.
329. Kāmesu sattadhā puññe, catudhā ca kriye tathā;  
Rūpajjhānacatukke ca, kattabboyampi saṅgaho.
330. Iminā panupāyena, samasattati bhedato;  
Anavajjesu viññeyyo, cittuppādesu saṅgaho.
331. Iti sabbappakārena, anavajjavinicchayaṃ;  
Ñatvā yojeyya medhāvī, sāvajjesu ca saṅgahaṃ.
332. Satta sādharmaṇā ceva, cha dhammā ca pakiṇṇakā;  
Cattāro pāpasāmaññā, dhammā sattarasevime.
333. Ekūnavīsāsānkhāre, paṭhame lobhadiṭṭhiyā;

- Dutiye lobhamānena, yathāvuttā ca tattakā.
334. Aṭṭhārasa vinā pītiṃ, tatiye lobhaditṭhiyā;  
Catuttheṇi vinā pītiṃ, lobhamānena tattakā.
335. Paṭiḅhe ca vinā pītiṃ, asaṅkhāre tatheva te;  
Labbhanti dosakukkucca-macchariyāhi vīsati.
336. Asaṅkhāresu vuttā ca, sasaṅkhāresu pañcadhā;  
Thinamiddhenekavīsa, vīsa dvevīsaticcamā.
337. Chandaṃ pītiṅca uddhacce, hitvā pañcadaseva te;  
Hitvā vimokkhaṃ kaṅkhaṅca, gahetvā kaṅkहितe tathā.
338. Sattavīsaticcammānaṃ, iti dvādasa saṅgahā;  
Dvādasāpuññacittesu, viññātabbā vibhāvīnā.
339. Hitvā chāniyate dhamme, gahetvā ca yathārahaṃ;  
Catuttiṃsāpi viññeyyā, saṅgahā tattha viññunā.
340. Dvādasākusalesveva, ṅatvā saṅgahamuttaraṃ;  
Ñeyyāhetukacittesu, saṅgahaṃ kamato kathaṃ?
341. Satta sādharmaṇā chandavajjitā ca pakiṅṅakā;  
Hasituppādacittamhi, dvādaseva pakāsītā.
342. Voṭṭhabbe ca vinā pītiṃ, vīriyaṃ sukhatīraṇe;  
Ekādasa yathāvuttā, dhammā dvīsupi desitā.
343. Manodhātuttike ceva, upekkhātīraṇadvaye;  
Dasa honti yathāvuttā, hitvā vīriyapītiyo.
344. Satta sādharmaṇā eva, pañcaviññāṇasambhavā;  
Iccāhetukacittesu, pañcadhā saṅgaho ṭhito.
345. Iti cetāsike dhamme, cittesu gaṇite puna;  
Cittena saha saṅgayha, gaṇeyyāpi ca paṇḍito.
346. Aṭṭhatimṣāti ye vuttā, cittena saha te puna;  
Ekūnacattālīseti, sabbatthekādhikaṃ naye.
347. Bāvīsevaṃ dasa dve ca, pañca ceti yathārahaṃ;  
Saṅgahā sampayuttānaṃ, tālīsekūnakā kathā.
348. Vitakko ca vicāro ca, pīti paññā tathā pana;  
Appamaññā viratīti, nava dhammā yathārahaṃ.
349. Gahetabbāpanetabbā, bhavanti anavajjake;  
Parivatteti sabbattha, vedanā tu yathārahaṃ.
350. Chandādhimokkhavīriyā, saddhādekūnavīsati;  
Phassādayo chaḷevāti, na calantaṭṭhavīsati.

351. Teraseva tu sāvajje, chaḷevāhetumānase;  
Na calanti dasa aññe, cuddasā cha ca sambhavāti.

Iti cetasikavibhāge cetasikaṅgahakathā niṭṭhitā.

Navamo paricchedo.

## Dasamo paricchedo

### 10. Pabhedakathā

352. Ekuppādā nirodhā ca, ekālambaṇavatthukā;  
Sahagatā saḥajātā, saṃsaṭṭhā saḥavuttino.
353. Tapaññāsa paniccete, sampayuttā yathārahaṃ;  
Cittacetasikā dhammā, aṭṭhārasavidhāpi ca.
354. Ekadhā chabbidhā ceva, catudhā sattadhā ṭhitā;  
Cittuppādapabhedena, bhinditabbā vibhāvinā.
355. Aṭṭha dhammāvinibbhogā, bhinnāsīti navuttarā;  
Sattasataṃ dasa dve ca, sabbe honti samissitā.
356. Santīraṇamanodhātu, sitavoṭṭhabbanā tathā;  
Apuññā kāmāpuññā ca, mahāpākā mahākriyā.
357. Paṭhamajjhānadhammā ca, lokuttaramahaggaṭā;  
Pañcapaññāsa sabbepi, vitakkā honti bheditā.
358. Vicārāpi ca teyeva, dutiyajjhānanāmakā;  
Ekādasāpare ceti, chasaṭṭhi paridīpitā.
359. Apuññā kāmāpuññā ca, mahāpākā mahākriyā;  
Catukkā ceva cattāro, sitaṅca sukhatīraṇaṃ.
360. Paṭhamāditikajjhānā, lokuttaramahaggaṭā;  
Iccevamekapaññāsa, pītiyo honti sabbathā.
361. Sitavoṭṭhabbanā dve ca, sāvajjā cānavajjakā;  
Bhinnamevaṃ tu vīriyaṃ, tesattatividhaṃ bhava.
362. Sāvajjā cānavajjā ca, momūhadvayavajjitā;  
Chandā bhavanti sabbepi, saṭṭhibhedā navuttarā.
363. Santīraṇamanodhātu, sitavoṭṭhabbanā tathā;  
Sāvajjā cānavajjā ca, vicikicchāvivajjitā.
364. Adhimokkhā paniccevaṃ, aṭṭhasattati bheditā;  
Tisataṃ navutī dve ca, bhinnā honti pakiṇṇakā.
365. Ekūnasatṭhi vā honti, saddhādekūnavīsati;



Sahassañca satañcekam, ekavīsañca sabbathā.

366. Nāṇena sampayuttā ca, kāme dvādasadhāpare;  
Pañcatiṃsāti paññāpi, sattatālīsadhā kathā.
367. Rūpajjhānacatukkā ca, kāmapuññā mahākriyā;  
Aṭṭhavīsappamaññevaṃ, chappaññāsa bhavanti ca.
368. Anuttarā kāmapuññā, tisso viratiyo pana;  
Honti soḷasadhā bhinnā, aṭṭhatālīsa piṇḍitā.
369. Pañcavīsānavajjevaṃ, sampayuttā catubbidhā;  
Sahassadvisatañceva, dvi ca sattati bhedato.
370. Cattāro pāpasāmaññā, bhinnā dvādasadhā pana;  
Aṭṭhatālīsadhā honti, te sabbe paripiṇḍitā.
371. Lobho panaṭṭhadhā bhinno, thinamiddhañca pañcadhā;  
Catudhā diṭṭhimāno ca, catudhā diṭṭhiyo visuṃ.
372. Dvidhā dosādicattāro, vicikicchekadhāti ca;  
Sāvajjā sattadhā vuttā, bhinnāsīti tikuttarā.
373. Iccaṭṭhārasadhā vuttā, tepaññāsāpi bhedato;  
Dvisahassañca tu satam, bhavantekūnasatṭhi ca.
374. Vitakkavicārapītisukhopekkhāsu pañcasu;  
Bhinditvā jhānabhedenā, gahetabbā anuttarā.
375. Aññatra pana sabbattha, natthi bhedappayojanaṃ;  
Aṭṭheva kasmā gayhanti, abhedenāti lakkhaye.
376. Paṭhamādicatujjhānā, lokuttaramahaggaṭā;  
Iccekamekadasadhā, catutālīsa piṇḍitā.
377. Tevīsa pañcamā ceti, sattasatṭhi samissitā;  
Appanā tattha sabbāpi, aṭṭhapaññāsa dīpitā.
378. Pañcatiṃseva saṅkhepā, lokuttaramahaggaṭā;  
Appanā tattha sabbāpi, chabbīsati pakāsītā.
379. Iddhividhaṃ dibbasotaṃ, cetopariyanāmakā;  
Pubbenivāsānussati, dibbacakkhūti pañcadhā.
380. Abhiññāññamīrenti, rūpāvacarapañcamā;  
Kusalañca kriyā ceti, bheditaṃ duvidhampi ca.
381. Taṃ dvayampi sammissetvā, pañcābhiññā ca lokiyā;  
Āsavakkhayaññāñca, chaḷabhiññā pavuccare.
382. Lokiyā ca dasābhiññā, bhinditvā kusalakriyā;  
Sattasattati jhānāni, aṭṭhasatṭhi panappanā.

383. Sattasattati cittāni, catupaññāsa sabbathā;  
Pacitāni ca cittāni, ekatiṃsasatam siyunti.

Iti cetasikavibhāge pabhedakathā niṭṭhitā.

Dasamo paricchedo.

## Ekādasamo paricchedo

### 11. Rāsisarūpakathā

384. Sabbaṃ sabhāvasāmañña-visesena yathārahaṃ;  
Gatarāsivasenātha, aṭṭhārasavidhaṃ kathaṃ.

385. Phassapañcakarāsī ca, jhānindriyamathāpare;  
Maggabalahetukamma-pathalokiyarāsayo.

386. Niravajjā cha passaddhi-ādikā ca satīmatā;  
Yuganandhā ca samathā, tathā yevāpanāti ca.

387. Phasso ca vedanā saññā, cetanā cittameva ca;  
**Phassapañcakarāsī**ti, pañca dhammā pakāsītā.

388. Vitakko ca vicāro ca, pīti cekaggatā tathā;  
Sukhaṃ dukkhamupekkhāti, satta **jhānaṅganāmakā**.

389. Saddhindriyañca vīriyaṃ, sati ceva samādhi ca;  
Paññā catubbidhā vuttā, mano pañcāpi vedanā.

390. Jīvitindriyamekanti, cakkhādīni ca sattadhā;  
Bāvīsati**ndriyā** nāma, dhammā soḷasa desitā.

391. Ādimagge anaññāta-ññassāmīndriyaṃ bhavē;  
Majjhe aññindriyaṃ ante, aññātāvindriyanti ca.

392. Paññānuttaracittesu, honti tīṇindriyānīpi;  
Tihetukesu sesesu, ekaṃ paññindriyaṃ mataṃ.

393. Sukhaṃ dukkhindriyañceva, somanassindriyaṃ tathā;  
Domanassamupekkhāti, pañcadhā vedanā kathā.

394. Rūpārūpavasā dvedhā, jīvitindriyamekakaṃ;  
Cakkhusotaghānājivhākāyitthipurisindriyā.

395. Tattha jīvitarūpañca, aṭṭhettha na tu gayhare;  
Tasmā nāmindriyāneva, dasapañca viniddise.

396. Sammādiṭṭhi ca saṅkappo, vāyāmo viratittayaṃ;  
Sammāsati samādhi ca, micchādiṭṭhi ca dhammato.

397. **Maggaṅgāni** navetāni, dvādasāpi yato dvidhā;

Sammāmicchāti saṅkappo, vāyāmo ca samādhi ca.

398. Lokapāladukañceva, hirottappamathāparam;  
Ahirīkamanottappaṃ, dukkaṃ lokavināsakaṃ.
399. Pañca saddhādayo ceti, **baladhammā** naveritā;  
Kaṇhasukkavasenāpi, paṭipakkhe akampiyā.
400. Cha hetū **heturāsīmhi**,  
Lobhālobhādikā tikā;  
Momūhe kaṅkhituddhaccā,  
Tattha vuttāti aṭṭhadhā.
401. Micchādiṭṭhi abhijjhā ca, byāpādo viratittayaṃ;  
Sammādiṭṭhinabhijjhā ca, abyāpādo ca cetanā.
402. Dasa **kamma**pathānettha, vuttā viraticetanā;  
**Lokapālavināsāti**, vuttā lokadukā dvidhā.
403. **Passaddhiādiyugaḷā**, niravajjā cha rāsayo;  
Sati ca sampajaññaṅca, **upakāradukkaṃ** bhava.
404. **Yuganandhadukkaṃ** nāma, samatho ca vipassanā;  
Paggaho ca avikkhepo, **samathaddukamīritayaṃ**.
405. Ye sarūpena niddiṭṭhā, cittuppādesu tādinā;  
Te ṭhapetvāvasesā tu, **yevāpanakanāmakā**.
406. Chando ca adhimokkho ca, tatramajjhataṭṭhā tathā;  
Uddhaccaṃ manasikāro, pañcāpaṇṇakanāmakā.
407. Māno ca thinamiddhaṅca, issā macchariyaṃ tathā;  
Kukkuccamappamañña ca, tisso viratīyopi ca.
408. Ete aniyatā nāma, ekādasa yathārahaṃ;  
Tato ca sesā sabbepi, niyatāti pakittitā.
409. Keci rāsīṃ na bhajanti, keci cāniyatā yato;  
Tasmā yevāpanāteva, dhammā soḷasa desitā.
410. Sattatīmsāvasesā tu, tattha tattha yathārahaṃ;  
Sarūpeneva niddiṭṭhā, cittuppādesu sabbathā.
411. Desitānuttaruddhacce, nāmato viratuddhavā;  
Tathānuttaracittesu, niyatayaṃ viratittayaṃ.
412. Cittaṃ vitakko saddhā ca,  
Hirottappabaladvayaṃ;  
Alobho ca adoso ca,  
Lobho doso ca diṭṭhi ca.
413. Ahirīkamanottappaṃ,

Uddhaccaṃ viratittayaṃ;  
Soḷasete yathāyogaṃ,  
Dvīsu t̥hānesu desitā.

414. Vedanā tīsu vīriyaṃ, sati ca caturāsikā;  
Samādhi chasu paññā ca, sattaṭṭhānesu dīpitā.

415. Ekavīsa paniccete, savibhattikanāmakā;  
Sesā dvattiṃsati dhammā, sabbepi avibhattikāti.

Iti cetasikavibhāge rāsisarūpakathā niṭṭhitā.

Ekādasamo paricchedo.

## Dvādasamo paricchedo

### 12. Rāsivinicchayakathā

416. Tattha viññāṇakāyā cha, satta viññāṇadhātuyo;  
Phassā cakkhādisamphassā, chabbidhā sattadhāpi ca.

417. Cakkhusamphassajādīhi, bhedehi pana vedanā;  
Saññā ca cetanā ceva, bhinnā chadhā ca sattadhā.

418. Cittuppādesu dhammā ca, khandhāyatanadhātuyo;  
Āhārā ca yathāyogaṃ, phassapañcakarāsiyaṃ.

419. Sabbe saṅgahitā honti, tasmā nāmapariggaho;  
Mūlarāsi ca so sabba-saṅgahoti pavuccati.

420. Jhānarāsimhi pañceva, dhammā sattappabhedato;  
Indriyāni ca bāvīsa, dhammato pana soḷasa.

421. Nava maggaṅgadhammā ca, bhinnā dvādasadhāpi te;  
Chaḷeva hetuyo tattha, desitā kaṅkhituddhavā.

422. Dasa kammaṭṭhā dhammā, chaḷeva pana desitā;  
Sesāva dasadhammehi, samānā caturāsayo.

423. Paññā dasavidhā tattha, vedanā navadhā t̥hitā;  
Samādhi sattadhā hoti, vīriyaṃ pana pañcadhā.

424. Sati bhinnā catudhāva, vitakko tividho mato;  
Dvidhā cittādayo honti, dasapañceva sambhavā.

425. Sesā dvattiṃsa sabbepi, dhammā ekekadhāpi ca;  
Hitvā rūpindriyānete, vibhāgā aṭṭhadhā kathaṃ.

426. Phasso ca cetanā saññā, vicāro pīti jīvitayaṃ;  
Niravajjā cha yugaḷā, sāvajjamohakaṅkhitā.

427. Yevāpanakadhammā ca, viratuddhaccavajjitā;  
Dvādasā ceti sabbepi, dvattiṃsakekadhā tathā.
428. Cittaṃ manindriyaṃ cittaṃ, saddhā saddhindriyaṃ balaṃ;  
Balesu lokiyā vuttā, lokiye ca dukadvaye.
429. Lobhālobhādikā dve dve,  
Cattāro heturāsiyaṃ;  
Micchādiṭṭhi ca maggaṅge,  
Pañcakammapathepi te.
430. Yevāpanakarāsimhi, desitā viratuddhavā;  
Maggahetūsu ceveti, dvidhā pañcadasa ṭhitā.
431. Vitakko jhānamaggesu, tividhā navadhā pana;  
Vedanā mūlarāsimhi, tathā jhānindriyesu ca.
432. Indriyamaggarāsimhi, balapiṭṭhidukattike;  
Catudhā sati tattheva, vīriyampi ca pañcadhā.
433. Samādhi sattadhā vutto, jhānaṅgesu ca tattha ca;  
Tattheva dasadhā paññā, hetukammapathesu ca.
434. Dasanavasattapañcacatutidvekadhā ṭhitā;  
Chalekakā pañcadasa, dvattiṃsa ca yathākkamaṃ.
435. Aṭṭha vibhāgasāṅkhepā, padāni dasadhā siyuṃ;  
Tepaññāseva dhammā ca, aṭṭhārasa ca rāsayo.
436. Iti dhammavavatthāne, **dhammasaṅgaṇiyaṃ** pana;  
Cittupādaparicchede, uddesanayasāṅgaho.
437. Padāni caturāsīti, desitāni sarūpato;  
Yevāpanakanāmena, soḷaseva yathārahaṃ.
438. Tatthāniyatanāmāni, padānekādaseva tu;  
Vuttānekūnavutī, niyatāneva sambhavā.
439. Asambhinnapadānettha, tepaññāseva sabbathā;  
Cittacetāsikānaṃ tu, vasena paridīpaye.
440. Vibhāgapadadhammānaṃ, vasenevaṃ pakāsīto;  
Cittacetāsikānaṃ tu, kamato rāsiniṅchayoti.

Iti cetāsikavibhāge rāsiviniṅchayakathā niṭṭhitā.

Dvādasamo paricchedo.

## Terasamo paricchedo

### 13. Rāsiyogakathā

441. Iti rāsivīthiṃ ñatvā, labbhamānavasā budho;  
Tesamevātha yogampi, cittuppādesu dīpaye.
442. Kāmāvacarakusalassa, paṭhamadvayamānase;  
Sabbepi rāsayo honti, yathāsambhavato katham.
443. Phassapañcakarāsī ca, jhānapañcakarāsī ca;  
Indriyaṭṭhakarāsī ca, maggapañcakarāsī ca.
444. Balasattakarāsī ca, hetukammaphattikā;  
Dasāvasesā rāsī ca, lokapāladukādayo.
445. Yevāpanakanavakam, niyatuddhaccavajjitā;  
Appamaññādvayañceva, tisso viratīyoti ca.
446. Iti sattarasevete, desitā ca sarūpato;  
Yevāpanakarāsī ca, labbhantiṭṭhārasāpi ca.
447. Chappaññāsa padānettha, desitāni sarūpato;  
Dhammā pana samatiṃsa, tattha honti sarūpato.
448. Tāni yevāpanakehi, pañcassaṭṭhi padāni ca;  
Dhammā cekūnatālīsa, bhavanti pana sambhavā.
449. Tattha dvādasa dhammā ca, desitā savibhattikā;  
Avasesā tu sabbepi, avibhattikanāmakā.
450. Ekadvi ca ticatukka-chasattaṭṭhānikā pana;  
Sattavīsa ca satteko, dvekeko ca yathākkamaṃ.
451. Niyatā tu catuttiṃsa, dhammāva sahavuttito;  
Yathāsambhavavuttito, pañcadhā niyatā kathā.
452. Tattha cāniyate sabbe, gahetvā ca pahāya ca;  
Paccekañca gahetvāpi, sattadhā yojanakkamo.
453. Sakimekūnatālīsa, catuttiṃsa yathākkamaṃ;  
Pañcakkhattuñca yojeyya, pañcatīṃsāti paṇḍito.
454. Rāsayo ca padānīdha, dhammantaravibhattiyo;  
Sarūpayevāpanake, niyatāniyate yathā.
455. Yojanāyabhedañca, gaṇanāsaṅgahaṭṭhiti;  
Labbhamānānumānena, sallakkhento tahiṃ tahiṃ.
456. Ñāṇam ñāṇaviyuttamhi, hitvā pītiṃ upekkhite;  
Vedanā parivattento, kāmapuññe ca sesake.
457. Mahākriye ca yojeyya, pahāya viratittayam;  
Appamaññā ca hitvātha, mahāpāke ca yojaye.
458. Takkādiṃ kamato hitvā, sabbattha viratittayam;

- Pañcame appamaññāya, hitvā rūpe ca yojaye.
459. Hitvāppamaññā yojaye, yathājhānamanuttare;  
Lokuttarindriyañceva, gahetvā viratittayaṃ.
460. Jhānāni catutālīsa, sukhayuttāni vattare;  
Upekkhitāni tevīsa, pañcamajjhāne ca sabbathā.
461. Appamaññāviratiyo, kāmapuññesu labbhare;  
Appamaññā rūpajjhāna-catukke ca mahākriye.
462. Lokuttaresu sabbattha, sambhoti viratittayaṃ;  
Natthidvayampi āruppe, mahāpāke ca pañcame.
463. Vitakkādittayaṃ paññā, pañca cānīyatā calā;  
Hānibuddhivasā sesā, na calanti kudācanaṃ.
464. Bāvīsatividho cettha, saṅgaho anavajjake;  
Dvayadvayavasā ceva, jhānapañcakatopi ca.
465. Iti ñatvānavajjesu, rāsisaṅgaha sambhavaṃ;  
Sāvajjesupi viññeyyā, viññunā rāsayo kathaṃ.
466. Lobhamūlesu paṭhame, phassapañcakarāsi ca;  
Jhānapañcakarāsī ca, tathevindriyapañcakaṃ.
467. Maggabalacatukkañca, hetukammaṭṭhadukā;  
Lokanāsakarāsī ca, samatho samathaddukā.
468. Tatrāmajjhataṃ hitvā, yevāpanakanāmakā;  
Cattāro ceti labbhanti, tatthekādasa rāsayo.
469. Dvattiṃseva padānettha, desitāni sarūpato;  
Tāni yevāpanakehi, chattiṃseva bhavanti ca.
470. Asambhinnapadānettha, samavīsati sambhavā;  
Savibhattikanāmā ca, nava dhammā pakāsītā.
471. Ekadvayaticatukka-chaṭṭhānaniyatā pana;  
Ekādasa chaḷekā ca, kameneko punekako.
472. Natthevānīyatā hettha, yevāpanakanāmakā;  
Yojanānāyabhedo ca, tasmā tattha na vijjati.
473. Māno ca thinamiddhañca, issā macchariyaṃ tathā;  
Kukkuccamiti sāvajje, chaḷevānīyatā matā.
474. Māno diṭṭhiviyuttesu, sasaṅkhāresu pañcasu;  
Thinamiddhaṃ tayo sesā, paṭighadvayayogino.
475. Icevamaṭṭha sāvajjā, anavajjaṭṭhavīsati;  
Chattiṃsa mānasā sabbe, hontānīyatayogino.

476. Tehi yuttā yathāyogaṃ, ekadvittayapañcahi;  
Dve dvāvīsaṃ tayo ceva, nava cātha yathākkamaṃ.
477. Iti vuttānusārena, labbhamānavasā pana;  
Tadaññesupi yojeyya, sāvajjesu yathākkamaṃ.
478. Lobhamūlesu lobhañca, dosañca paṭighadvaye;  
Mohamūle kaṅkhuddhaccaṃ, gahetvā heturāsiyaṃ.
479. Diṭṭhiṃ diṭṭhiviyuttamhi, hitvā pītimupekkhite;  
Vedanam parivattento, dosamūle ca paṇḍito.
480. Tathā kammaṃpathaṃ diṭṭhiṃ,  
Pītiṃ chandañca momuhe;  
Kaṅkhite adhimokkhañca,  
Hitvā yojeyya rāsayo.
481. Cittassa ṭhitiṃ pattāsu, cittassekaggatā pana;  
Kaṅkhite parihīnāva, indriyādīsu pañcasu.
482. Iti dvādasadhā ñatvā, sāvajjesupi saṅghaṃ;  
Ahetukepi viññeyyā, yathāsambhavato kathaṃ.
483. Aṭṭhārasāhetukesu, pañcaviññāṇamānase;  
Phassapañcakarāsī ca, jhānaṭṭhānadukamaṃ tathā.
484. Indriyattikarāsī ca, yevāpanakanāmako;  
Eko manasikāroti, cattāro rāsayo siyuṃ.
485. Asambhinnā panaṭṭheva, dve tattha savibhattikā;  
Ekadvayatikaṭṭhānā, chaḷeko ca punekako.
486. Manodhātuttikāhetu-paṭisandhiyuge pana;  
Vitakko ca vicāro ca, adhikā jhānarāsiyaṃ.
487. Sukhasantīraṇe pīti, dutiyāvajjane pana;  
Vīriyañca samādhiñca, labbhatindriyarāsiyaṃ.
488. Adhikā hasite honti, pīti ca vīriyādayo;  
Yevāpanādhimokkho ca, pañcaviññāṇavajjite.
489. Iccānavajje bāvīsa,  
Sāvajje dvādasāpare;  
Yogā hetumhi pañcete,  
Tālīsekūnakā kathāti.

Iti cetasikavibhāge rāsiyogakathā niṭṭhitā.

Terasamo paricchedo.

## Cuddasamo paricchedo



#### 14. Rāsisambhavakathā

490. Naveva yevāpanakā, aṭṭhārasa ca rāsayo;  
Navabhiṃsatisambhinnā, dasa dve savibhattikā.
491. Ekadvayaticatuchasattaṭṭhānānavajjake;  
Sattavīsati satteko, dvayameko punekako.
492. Daseva yevāpanakā, ekādasa ca rāsayo;  
Aṭṭhavīsatisambhinnā, daseva savibhattikā.
493. Ekadvayaticatukkachaṭṭhānaniyatā pana;  
Aṭṭhārasa ca satteko, eko cekova pāpake.
494. Dve yevāpanakā honti, rāsayo ca catubbidhā;  
Terasettha asambhinnā, tayova savibhattikā.
495. Ekadvayatikatṭhānā, dasa dveko ahetuke;  
Iccānavajjā sāvajjā-hetuke yoganicchayo.
496. Sattāpi natthi sāvajje, niravajje pakāsako;  
Ahetuke ca maggādirāsayo natthi cuddasa.
497. Anavajjā tu sāvajje, sāvajjakānavajjake;  
Cittupādami nattheva, natthobhayamahetuke.
498. Sāvajjā pana sāvajje, anavajjānavajjake;  
Gahetabbā tu sabbattha, sādharmaṇā pakiṇṇakā.
499. Jhānapañcakacittesu, sattaṣaṭṭhisu niddise;  
Jhānaṅgayogabhedena, rāsibhedam taṃ taṃ.
500. Catuchakkānavajjesu, ñāṇapītikataṃ tathā;  
Catuvīsa parittesu, catudhā bhedaṃmuddise.
501. Sarāgavītarāgānaṃ, appamaññāpavattiyam;  
Karuṇāmuditā honti, kāmapuññamahākriye.
502. Upacārappanāpattā, sukhitā sattaṅgarā;  
Tasmā na pañcamāruppe, mahāpāke anuttare.
503. Sotāpatitupakkhāsu, parikkammādisambhave;  
Jhānaṇaṃ tulyapākattā, tappākesu ca labbhare.
504. Viratī ca sarāgānaṃ, vītikkamanasambhavā;  
Sampatte ca samādāne, kāmapuññesu labbhare.
505. Taṃtaṃdvārikadussilya-cetanucchedakiccato;  
Magge ca tulyapākattā, phale ca niyatā siyuṃ.
506. Pavattākāravisaṃbhinnā pañcāpi sambhavā;  
Lokiye labbhamānāpi, viṣuṃ ceva siyuṃ na vā.

507. Pāpā labbhanti pāpesu, satta chakkekakā kamā;  
Sarūpayevobhayakā, niyataṭṭha chaletare.
508. Sādhāraṇā ca sabbattha, yathāvuttā pakiṇṇakā;  
Tattha cekaggatā natthi, indriyādīsu kaṅkhite.
509. Chandādhimokkhā yevāpi, vīsekādasavajjite;  
Uddhaccamekādasasu, majjhattamanavajjake.
510. Sabbattha manasikāro, tidvekadvitikāpare;  
Aṭṭhaṭṭhavīsacatūsu, pañcadvīsu yathākkamaṃ.
511. Samudāyavasettha, uddhaccaviratittayaṃ;  
Savibhattikamaññattha, avibhattikameva taṃ.
512. Cittuppādesu tenetaṃ, vibhattiavibhattikaṃ;  
Iti sādhu sallakkheyya, sambhavāsambhavaṃ budhoti.

Iti cetasikavibhāge rāsisambhavakathā niṭṭhitā.

Cuddasamo paricchedo.

## Pannarasamo paricchedo

### 15. Rāsisāṅgahakathā

513. Tettiṃsa ceva dvattiṃsa, ekattiṃsa ca tiṃsa ca;  
Ekadvattiṃsahīnā ca, tiṃsa dhammānavajjake.
514. Dasa dhammā tu sāvajje, chapañcaturādhikā;  
Ekādasa dasa nava, sattadhāhetuke pana.
515. Itthaṃ cuddasadhā bhinnā, koṭṭhāsā tu sarūpato;  
Vibhattā tehi yuttā ca, cittuppādā yathākkamaṃ.
516. Tikaṭṭhakā pañcavīsa, dasa pañcādhikā nava;  
Aṭṭhāraseti sattete, anavajjā tathetare.
517. Dve cattāro chaḷekaṃ dve,  
Pañcātha dasadhāpare;  
Sāvajjāhetukā ceti,  
Koṭṭhāsā honti cuddasa.
518. Nava cāpi cha cattāro, catupañcachasattakā;  
Nava dve dve tatheko ca, yevāpanakasaṅgahā.
519. Tehi yuttā panaṭṭhātha, vīsekatīṃsa mānasā;  
Dve dve dve tīṇi cekaṃ dve, aṭṭha dasa yathākkamaṃ.
520. Sattatiṃsakato yāva, ekattiṃsānavajjake;  
Tikaṭṭhakādike satta, ṭhitā niyatasāṅgahā.

521. **Pāpesu** vīsa cekūna-vīsaṭṭhārasa soḷasa;  
Catudhā dvīsu catūsu, catūsu dvīsu caṭṭhitā.
522. Ekadvipañcadasasu, ca dvidhā**hetukesu** ca;  
Tikadvēkādhikā dhammā, dasaṭṭha ca yathākkamaṃ.
523. Pañcadvekadvibhipañca, koṭṭhāsā niyatā ṭhitā;  
Tehi yuttā panaṭṭhātha, vīsa dve dve tikekakā.
524. Pubbāparadvayāpuññe, kāmapāke ahetuke;  
Pañcamānuttarāruppe, natthāniyatāsambhavo.
525. Chattiṃsamānasesveva, labbhantāniyatā na vā;  
Tepaññāsāvasesā tu, sabbe niyatayogino.
526. Niyatāniyate katvā, labbhantobhayathā tathā;  
Sarūpayevobhayakā, tividhevaṃ tu saṅgahā.
527. Ñeyyā vuttānusārena, tehi yuttāva mānasā;  
Tato puna vibhāveyya, sabbasaṅgāhikaṃ nayamaṃ.
528. Ekūnatālīsakato, yāvekattiṃsakā ṭhitā;  
Navadhā **anavajjesu**, tehi yuttā ca mānasā.
529. Dve cattāro dasevātha, tikapañcādhikā dasa;  
Tevīsa kamato satta, dve ca pañcadasāpare.
530. Dve ca dve tikadve dvekā, **sāvajjesu** ca soḷasa;  
Ekūnavīsa vīsātha, vīsekadvitayādhikā.
531. **Ahetuke** panaṭṭhātha, dasekadvitayādhikā;  
Dasapañca dvikekāti, bhavantekūnavīsati.
532. Labbhamānānusārena, dhammānaṃ pana saṅgaho;  
Sakkā vuttanayeneva, viññātuṃ pana viññunāti.

Iti cetāsikavibhāge rāsisaṅgahakathā niṭṭhitā.

Pannarasamo paricchedo.

## Soḷasamo paricchedo

### 16. Cittuppādakathā

533. Cittuppādesu dhammānaṃ, iti ñatvā vinicchayaṃ;  
Cittuppādānamevātha, ñātabbo bhedaṅgaho.
534. Vedanāhārato ceva, hetādhīpatito tathā;  
Jhānindriyamaggabalā, yevāpanapathādito.
535. Tattha sukhā ca dukkhā ca, adukkhamasukhāti ca;

Tisso ca **vedanā** vuttā, sambhogatthavisesato.

536. Sukhaṃ dukkhaṃ somanassaṃ, domanassamathāparam;  
Upekkhindriyamiccevaṃ, pañcindriyavibhāgato.
537. Kāyaviññāṇayugaḷe, sukhadukkhā hi vedanā;  
Somanassaṃ domanassaṃ, iti nāmaṃ labhanti na.
538. Aññattha pana sabbattha, sukhā dukkhā ca vedanā;  
Somanassaṃ domanassaṃ, iti nāmaṃ labhanti ca.
539. Adukkhi asukhopekkhā, majjhattāti ca vedanā;  
Pañcapaññāsacittesu, tadaññesu pakāsītā.
540. Sukhadukkhindriyayuttaṃ, kāyaviññāṇakadvayaṃ;  
Domanassindriyayuttaṃ, paṭighadvayamānasam.
541. Aṭṭhārasa parittāni, catukkajjhānamādito;  
Somanassindriyayuttā, dvāsaṭṭhividha mānasā.
542. Dvattiṃsa ca parittāni, tevīsa jhānapañcamā;  
Hontipekkhindriyayuttā, pañcapaññāsa mānasā.
543. Sukhayuttā tu tesaṭṭhi, dukkhayuttā tayo tahiṃ;  
Adukkhamasukhayuttā, pañcapaññāsupekkhakā.
544. Ojaṭṭhamakarūpañca, vedanaṃ sandhimānasam;  
Nāmarūpañca kamato, āharantīti desitā.
545. **Āhārā** kabaḷikāro, phasso sañcetanā tathā;  
Viññāṇañceti cattāro, upatthambhā ca sambhavā.
546. Cittuppādesu sabbattha,  
Āhārārūpino tayo;  
Kabaḷikāro āhāro,  
Kāme kāyānupālako.
547. Alobho ca adoso ca,  
Amoho ca tathāparo;  
Lobho doso ca moho ca,  
**Hetū** dhammā cha desitā.
548. Kusalākusalā hetū, tayo abyākatāti ca;  
Navadvādasadhā tattha, vipākakriyābhedato.
549. Dasa pañcādhikā honti, bhūmibhedā tato tahiṃ;  
Puññapākakriyābhedā, tālīsa catunūnakā.
550. Santīraṇamanodhātu-pañcaviññāṇamānase;  
Voṭṭhabbane ca hasite, hetu nāma na vijjati.
551. Lobhamūlesu lobho ca,

Moho ca paṭighadvaye;  
Doso moho ca labbhanti,  
Moho ekova momuhe.

552. Ñāṇena vippayuttesu,  
Alobhādidvayaṃ bhava;  
Tato sesesu sabbattha,  
Alobhāditayopi ca.
553. Tihetukā sattacattā-līsa honti dvihetukā;  
Bāvīsa dvekahetukā, aṭṭhārāsa ahētukā.
554. Chando cittaṅca vīriyaṃ, vīmaṃsāti catubbidhā;  
Sahajātādhipā dhammā, vuttā**dhīpatayo** siyaṃ.
555. Yamālambaṃ garuṃ katvā, nāmadhammā pavattare;  
Ārammaṇādhipanāmena, tadālambaṇamīritaṃ.
556. Tihetukajavesveko, catūsopi yathārahaṃ;  
Dvihetukesu sambhoti, vīmaṃsādhipatiṃ vinā.
557. Anuttare kāmapuñṇe, tihetukamahākriye;  
Lobhamūle ca sāvajje, labbhatālambaṇādhipo.
558. Tattha cāniyatā kāme, labbhamānāpi labbhare;  
Mahaggatānuttare, niyatāva yathārahaṃ.
559. Kriyādvihetupaṭighe,  
Nathevālambaṇādhipo;  
Momūhāhetuke pāke,  
Lokiye ca na kocipi.
560. Ubhayādhipayuttā ca, sahajādhipayogino;  
Ubhayāniyatādhippā, sahajāniyatādhipā.
561. Ubhayavippayuttā ca, pañcadhā tattha mānasā;  
Aṭṭhaṭṭhārāsa vīsaṃ cha, sattatiṃsa yathākkamaṃ.
562. Pañcādhipatīyogā ca, caturādhipayogino;  
Tividhādhipayuttā ca, vimuttāpi ca sabbathā.
563. Soḷasātha samattiṃsa, chaḷevātha yathākkamaṃ;  
Sattatiṃsatividhāti, catudhevampi niddise.
564. Vīmaṃsādhipayuttā ca, sahajādhipayogino;  
Ālambādhipayuttā ca, vippamuttāpi sabbathā.
565. Catuttiṃsa dvipañṇāsa, aṭṭhavīsa yathākkamaṃ;  
Sattatiṃsati ceveti, catudhevampi niddise.
566. Sahajādhipaladdhā tu, dvepañṇāseva sabbathā;  
Ālambādhipaladdhā ca, ubhayādhipalābhino.

567. Aṭṭhavīseva sabbepi, dvepaññāseva sādhipā;  
Sesā nirādhipā sabbe, sattatiṃsāpi sabbathā.
568. Vedanādivasenevaṃ, ñatvā bhedaṃ catubbidhaṃ;  
**Jhānindriyamaggabala**-vasenāpi vibhāvaye.
569. Vitakkahetṭhimaṃ jhānaṃ, manoparaṃ manindriyaṃ;  
Hetuparañca maggaṅgaṃ, balaṃ vīriyapacchimāṃ.
570. Avitakke pakatiyā, tasmā jhānaṃ na vijjati;  
Ahetuke ca maggaṅgaṃ, balañcāvīriye yathā.
571. Aṭṭha rūpindriyānettha, agayhanteva sabbathā;  
Maggindriyabalaṭṭhesu, samādhi ca na kaṅkhite.
572. Kāmapuññesvaniyatā, viratīpi anuddhatā;  
Paññānuttaracittesu, indriyattayabhājitā.
573. Sesā vuttānusārena, labbhamānājjhānādikā;  
Tehi yuttā ca viññeyyā, cittuppādā yathākkamaṃ.
574. Somanassayuttā kāme, lokuttaramahaggaṭṭe;  
Paṭhamājjhānacittā ca, pañcajhānaṅgikā matā.
575. Dukkupekkhāyuttā kāme, pañcaviññāṇavajjitā;  
Dutiyājjhānacittā ca, catujhānaṅgikā siyuṃ.
576. Jhānaṅgattayasāmyuttā, tatiyājjhānamānasā;  
Catutthapañcamāruppā, jhānaṅgadvayayogino.
577. Pañcaviññāṇayugaḷe, jhānaṅgaṃ natthi kiñcipi;  
Itthaṃ jhānaṅgaṃ bhedenā, **pañcadhā** mānasā ṭhitā.
578. Ekūnatīṃsati satta-tīṃsa cekādasāpare;  
Catutīṃsa dasevātha, gaṇikā tu yathākkamaṃ.
579. Lokuttaresu sabbesu, indriyāni navuccare;  
Tihetukesu sabbesu, lokiyesu panaṭṭhadhā.
580. Ñāṇena vippayuttesu, sattadhāva samuddhare;  
Sitavoṭṭhabbanā puññe, pañcadhāva pakāsaye.
581. Vicikicchāsahaggaṭṭe, catudhāva viniddise;  
Tīṇindriyāni vuttāni, sesāhetukamānase.
582. Aṭṭha cekūnatālīsa, dvādasa vātha terasa;  
Ekañca soḷasa ceti, **chabbidhā** tatha saṅgaho.
583. Paṭhamānuttaraṃ jhānaṃ, aṭṭhamaggaṅgikaṃ matāṃ;  
Sattamaggaṅgikaṃ nāma, sesaṃ jhānānuttaraṃ.
584. Lokiyaṃ paṭhamaṃ jhānaṃ, tathā kāme tihetukaṃ;

Pañcamaggaṅgikā nāma, cittuppādā pakāsītā.

585. Sesam mahaggataṃ jhānaṃ, sampayuttā ca diṭṭhiyā;  
Ñāṇena vippayuttā ca, catumaggaṅgikā matā.
586. Dosamūladvayañceva, uddhaccasahitaṃ tathā;  
Diṭṭhiyā vippayuttā ca, maggaṅgattayayogino.
587. Vicikicchāsampayutto, vutto maggo duvaṅgiko;  
Amaggāhetuko ceti, **sattadhā** tattha saṅgaho.
588. Aṭṭha dvattiṃsati ceva, dasa pañcādhikāpare;  
Tālisa kamato satta, ekañcaṭṭhadasaṅgaho.
589. Balāni pana satteva, sabbatthāpi tihetuke;  
Ñāṇena vippayuttesu, cha balāni samuddise.
590. Catudhākusale honti, tividhā kaṅkhite pana;  
Dvibalaṃ sitavoṭṭhabbaṃ, abalaṃ sesamīritaṃ.
591. **Chabbidho** saṅgaho tattha, sattatālīsathāpare;  
Dvādasekādasekaṃ dve, soḷaseti yathākkamaṃ.
592. Itthaṃ pañca cha satta cha-koṭṭhāsā kamato ṭhitā;  
**Catuvīsati** sabbepi, jhānaṅgādivasā kathā.

Iti cetasikavibhāge cittuppādakathā niṭṭhitā.

Soḷasamo paricchedo.

## Sattarasamo paricchedo

### 17. Diṭṭhisāṅgahakathā

593. Yevāpanakanāmena, dhammā chandādayo tathā;  
Khandhādayo ca koṭṭhāsā, uddiṭṭhā hi yathārahaṃ.
594. Tattha chandādayo dhammā, vibhattāva yathārahaṃ;  
Khandhādirāsayo vāpi, viññeyyā dāni sambhavā.
595. Vedanā vedanākkhandho, cakkhusamphassajādikā;  
Saññā ca saññākkhandhoti, chabbidhāpi pakāsītā.
596. Saṅkhārakkhandhanāmena, sesā cetasikā matā;  
Vuttā viññāṇakāyā cha, viññāṇakkhandhanāmato.
597. Rūpakkhandho punekova, sampayuttāviyogino;  
Arūpino ca cattāro, **pañcakkhandhā** pavuccare.
598. Manāyatananāmaṃ tu, cittameva tathāparā;  
Cakkhuvīññāṇadhātādisattaviññāṇadhātuyo.

599. Sabbe cetasikā dhammā, dhammāyatanasaṅgahā;  
Dhammadhātūti ca vuttā, dvipaññāsāpi sabbathā.
600. Sukhumāni ca rūpāni, nibbānañcettha gayhare;  
Oḷārikāni rūpāni, dasāyatanadhātuyo.
601. Cakkhusotaghānajivhā-kāyāyatananāmakā;  
Rūpasaddagandharasa-phoṭṭhabbāyatanāni ca.
602. **Dvādasāyatanā** sabbe, hontaṭṭhārasadhātuyo;  
Khandhā ṭhapetvā nibbānaṃ, natthi paṇṇatti tīsupi.
603. Āhārādi ca koṭṭhāsā, pubbe vuttanayāva te;  
Iti missakasaṅkhepo, viññātabbo vibhāvinā.
604. Dvādasākusalesveva, cuddasāpi vavatthitā;  
Ye sāvajjāva tesampi, saṅgaho dāni niyyate.
605. Kāmāsavo bhavāsavo, diṭṭhāvijjāsavāti ca;  
Cattāro **āsavā** vuttā, tayo dhammā sarūpato.
606. Āsavā āsavatṭhena,  
**Oghā** vuyhanato tathā;  
Yojentīti ca **yogāti**,  
Te cattāro ca desitā.
607. Kāmabbhavo ca paṭigho, māno diṭṭhi ca saṃsayo;  
Sīlabbataparāmāso, bhavarāgo tathāparo.
608. Issā macchariyāvijjā, iti **saṃyojanā** dasa;  
Aṭṭha dhammā sarūpena, abhidhamme pakāsitā.
609. Issāmacchariyaṃ hitvā, katvā mānuddhavaṃ tahiṃ;  
Bhinditvā bhavarāgañca, rūpārūpavasā dvidhā.
610. Pañcorambhāgiyā ceva, pañcuddhambhāgiyāti ca;  
Dasa saṃyojanā vuttā, sutte satta sarūpato.
611. **Ganthā** dhammā ca cattāro, tayo dhammā sarūpato;  
Abhijjhākāyagantho ca, byāpādo ca pavuccati.
612. Sīlabbataparāmāso, kāyagantho tathāparo;  
Idaṃsaccābhiniveso, iti diṭṭhi vibhedito.
613. Kāmacchando ca byāpādo, thinamiddhamathāparaṃ;  
Tathā uddhaccakukkucçaṃ, kaṅkhāvijjāti aṭṭhime.
614. Dhammā **nivaraṇā** nāma, chadhā ca pana desitā;  
Micchādiṭṭhi panekāva, **parāmāsoti** vuccati.
615. **Upādānāni** cattāri, kāmupādādināmakā;  
Diṭṭhisīlabbataṃ atta-vādupādānameva ca.



616. Lobhadiṭṭhivasā dveva, tividhā diṭṭhi desitā;  
Diṭṭhi sīlabbatamatta-vādo ceti mahesinā.
617. Lobho doso ca moho ca,  
Māno diṭṭhi ca saṃsayo;  
Thinamuddhaccamevātha,  
Lokanāsayugaṃ tathā.
618. Itthaṃ kilesavatthūni, **kilesāti** pakāsītā;  
Dasete tu samānāva, parato ca sarūpato.
619. Kāmarāgo ca paṭiḅho, māno diṭṭhi ca saṃsayo;  
Bhavarāgo avijjāti, cha sattā**nusayā** matā.
620. **Gāhā** ca **palibodhā** ca, **papañcā** ceva **maññanā**.  
  
Taṇhā māno ca diṭṭhi ca, diṭṭhi taṇhā ca **nissayā**.
621. Parāmāsekako dveva, nissayā maññanā tayo;  
Āsavoghayoganthā, upādānā ca dubbidhā.
622. Aṭṭha nīvaraṇā vuttā, sattadhānusayā kathā;  
Saṃyojanā kilesā ca, daseva parato ṭhitā.
623. Ekadvitichasattaṭṭhadasakā tu yathārahaṃ;  
Dhammā sarūpato hontī, yathāvuttesu rāsīsu.
624. Kāmarāgabhavarāgā, kāmāsavabhavāsavā;  
Rūparāgārūparāga, iti lobho vibhedito.
625. Idamsaccābhiniveso, diṭṭhi sīlabbatam tathā;  
Attavādo parāmāso, iti diṭṭhi pavuccati.
626. Diṭṭhi pañcadasavidhā, lobhaṭṭhārasadhā taḅiṃ;  
Sesā sapararāsīhi, samānā dvādasatṭhitā.
627. Ekādasasamuṭṭhāne, diṭṭhilobhā vavatthitā;  
Avijjā sattasu vuttā, paṭiḅho pana pañcasu.
628. Māno ca vicikicchā ca, catuṭṭhānesu uddhaṭo;  
Tīsu dvīsu ca thīnanti, aṭṭhete **savibhattikā**.
629. Issāmaccherakukkuccamiddhalokavināsakā;  
**Chāvibhattikadhammāti**, asambhinnā catuddasa.
630. Rūparāgārūparāga-kāmāsavabhavāsavā;  
Hontī diṭṭhiviyuttesu, pubbe vuttanayā pana.
631. Iti sāvajjasāṅkhepaṃ, ñatvā puna vicakkhaṇo;  
Bodhipakkhiyadhammānaṃ, saṅgahampi vibhāvaye.

632. Yesu saññācittadiṭṭhi-vipallāsā yathākkamaṃ;  
Subhaṃ sukhaṃ niccamattā, iti dvādasadhā ṭhitā.
633. Tattha kāye vedanāsu, citte dhammesu cakkamā;  
Asubhaṃ dukkhamaniccamanattāti upaṭṭhitā.
634. Yathāvuttavipallāsapahānāya yathārahaṃ;  
Bhinnā visayakiccānaṃ, vasena pana sambhavā.
635. Cattāro **satipaṭṭhānā**, kāyānupassanādayo;  
Iti vuttā panekāva, sammāsati mahesinā.
636. Uppannānuppannapāpapahānānuppannāya ca;  
Anuppannuppannehi vā, nibbatti abhivuddhiyā.
637. Padahantassa vāyāmo, kiccābhogavibhāgato;  
**Sammappadhānā** cattāro, iti vuttā mahesinā.
638. Chando ca vīriyaṃ cittaṃ, vīmaṃsāti ca tādinā;  
Cattāro **iddhipādāti**, vibhattā caturādhipā.
639. Saddhindriyañca vīriyaṃ, sati ceva samādhi ca;  
Paññindriyañca pañceva, bodhipakkhiyasaṅgahe.
640. **Indriyānindriyaṭṭhena**, balaṭṭhena **balāni** ca;  
Iti bhinnā vibhattā ca, duvidhāpi mahesinā.
641. Satī ca dhammavicayo, tathā vīriyaṭṭiyo;  
Passaddhi ca samādhi ca, upekkhāti ca tādinā.
642. Desitā **satta bojjaṅgā**, bujjhantassa sabhāvato;  
Kāyacittavasā bhinnaṃ, katvā passaddhimekakaṃ.
643. Sammādiṭṭhi ca saṅkappo, vāyāmo viratittayaṃ;  
Sammāsati samādhī ca, **maggo** aṭṭhaṅgiko mato.
644. Iti satteva saṅkhepā, sattatiṃsa pabhedato;  
Ekaṃ katvāna passaddhiṃ, asambhinnā catuddasa.
645. Navadhā vīriyaṃ vuttaṃ, chasu rāsīsu pañcasu;  
Aṭṭhadhā sati sesā tu, samānapadarāsikā.
646. Pañcasveva tu paññā ca, samādhi caturāsiko;  
Saddhā dvīsu vibhattāti, pañcete **savibhattikā**.
647. Navā **vibhattikā** sesā, chando cittamathāparaṃ;  
Pīti passaddhipekkhā ca, saṅkappo viratittayaṃ.
648. Iti vuttanayā sabbe, bodhipakkhiyasaṅgahā;  
Lokuttaresu sambhonti, sabbathāpi yathārahaṃ.
649. Pubbabhāge yathāyogaṃ, lokiyesu ca labbhare;

Nibbedabhāvanākāle, chabbisuddhipavattiyam.

650. Iti missakasāvajjā, bodhipakkhiyasāṅgahā;  
Yevāpanakarāsimhi, yathāsambhavato ʘhitā.
651. Kammapathā tu sambhonti, puññāpuññesu sabbathā;  
Apathā ca sucaritā, tathā duccharitāpi ca.
652. Tattha kammapathaṭṭhāne, anabhijjhādayo pana;  
Upacārena vuccanti, vipākesu kriyesu vāti.

Iti cetasikavibhāge diṭṭhisāṅgahakathā niṭṭhitā.

Sattarasamo paricchedo.

Niṭṭhito ca sabbathāpi cetasikavibhāgo.

## Aṭṭhārasamo paricchedo

### 3. Rūpavibhāgo

#### 18. Sarūpakathā

653. Tēpaññāsa panicevām, nāmadhammā pakāsītā;  
Aṭṭhavīsavidham dāni, rūpaṃ nāma kathiyati.
654. Pathavāpo ca tejo ca, vāyo ceti catubbidho;  
Cakkhusotaghānajivhā, kāyoti pana pañca ca.
655. Rūpasaddagandharasā, cattāro ca athāparaṃ;  
Itthipumbhāvayugaḷaṃ, jīvitam hadayampi ca.
656. Kāyaviññatti cevātha, vacīviññatti ca dvayaṃ;  
Ākāsadhātu rūpassa, lahutā mudutā tassa.
657. Kammaññatā upacayo, santati jaratā pana;  
Aniccatā ca kabaḷikārāhāroti sabbathā.
658. Aṭṭhavīsavidham hoti, rūpametam sarūpato;  
Tassa lakkhaṇabhedenā, sabhāvañca vibhāvaye.
659. Sandhāraṇam tu **pathavīdhātu** kakkhaḷalakkhaṇā;  
Ābandhanamā**podhātu**, āpaggharaṇalakkhaṇā.
660. Paripācanatā **tejodhātu** uṇhattalakkhaṇā;  
Samudīraṇatā **vāyodhātu** vitthambhalakkhaṇā.
661. Sabbatthāvinibhuttāpi, asammissakalakkhaṇā;  
Taṃtaṃbhāvasamussannasambhāresupalakkhitā.
662. Aññamaññenupatthaddhā, sesarūpassa nissayā;

Catudhevaṃ kalāpesu, mahābhūtā pavattare.

- 663.** **Cakkhu** sambhāracakkhumhi, sattakkhipaṭalocite;  
Kaṇhamaṇḍalamajjhamhi, pasādoti pavuccati.
- 664.** Yena cakkhupasādena, rūpāni anupassati;  
Parittam sukhumañcetaṃ, ūkāsirasamūpamaṃ.
- 665.** **Sotaṃ** sotabilassanto,  
Tambalomācite tathā;  
Aṅgulivedhanākāre,  
Pasādoti pakāsito.
- 666.** Anto ajapadaṭṭhāne, **ghānaṃ** ghānabile ṭhitam;  
**Jivhā** jivhāya majjhamhi, uppalākārasannibhe.
- 667.** Icevaṃ pana cattāro, taṃtaṃdesavavatthitā;  
**Kāyappasādopādinne**, sabbaketi yathākkamaṃ.
- 668.** Rūpādyābhihātārahabhūtānaṃ vā yathārahaṃ;  
Daṭṭhukāmanidānādikammabhūtānameva vā.
- 669.** Pasādalakkhaṇā bhūtarūpānaṃ bhūtanissitā;  
Kappāsapaṭalasnehasannibhāti ca vaṇṇitā.
- 670.** Pañcāpi jīvitārakkhā, rūpādi parivāritā;  
Dhītarāva kumārāva, kalāpantaravuttino.
- 671.** **Rūpaṃ** nibhāso bhūtānaṃ, **saddo** nigghosanaṃ tathā;  
**Gandho** ca gandhanaṃ tattha, **raso** ca rasanīyatā.
- 672.** Bhūtattayaṅca **phoṭṭhabbaṃ**, āpodhātu vivajjitam;  
Saddo aniyato tattha, tadaññe sahavuttino.
- 673.** Cakkhādipaṭihananalakkhaṇā tu yathākkamaṃ;  
Pañceva pañcaviññānavīthiyā visayā matā.
- 674.** Itthindriyaṃ panitthittam, **itthibhāvoti** desito;  
Purisattam tathābhāvo, **purisindriya** nāmako.
- 675.** Tam dvayaṃ panupādinne, kāye sabbattha labbhati;  
Kalāpantarabhinnaṅca, bhinnasantānavatti ca.
- 676.** Rūpānaṃ kammajātānaṃ, anupālanalakkhaṇaṃ;  
**Jīvitindriyarūpanti**, āyu nāma pavuccati.
- 677.** Manodhātuyā ca tathā, manoviññādhātuyā;  
Nissayalakkhaṇaṃ **vatthurūpaṃ** hadayanissitam.
- 678.** Majjhe hadayakosamhi, aḍḍhappasatalohite;  
Bhūtarūpamupādāya, cakkhādi viya vattati.

679. **Ākāsadhātu** rūpānaṃ, paricchedakalakkhaṇā;  
Taṃtaṃrūpakalāpānaṃ, pariyantoti vuccati.
680. Cittaṃ saharūpānaṃ, kāyassa gamanādisu;  
Santhambhanasandhāraṇacalanassa tu paccayo.
681. Vāyodhātuvikāroyaṃ, **kāyaviññattinā**mako;  
Vāyodhātādhikānaṃ tu, bhūtānamiti kecaṇā.
682. Tathā cittasamuṭṭhino, vacīghosappavattiyaṃ;  
Upādinnarūpakāyaghaṭṭanassa tu paccayo.
683. Pathavīdhātuvikāroyaṃ, **vacīviññattinā**mako;  
Pathavīdhātādhikānaṃ tu, bhūtānamiti kecaṇā.
684. Dvepi kāyavacīkammadvārabhūtā yathākkamaṃ;  
Te pana ghaṭṭanāhetu-vikārākāralakkhaṇā.
685. Viññāpetīti kāyena, vācāya ca vicintitaṃ;  
Sayaṇca viññāyatīti, viññattīti pakittitā.
686. **Lahutā** pana rūpānaṃ, adandhākāralakkhaṇā;  
**Mudutāpi** ca rūpānaṃ, maddavākāralakkhaṇā.
687. **Kammaññatā** ca rūpānaṃ, yoggatākāralakkhaṇā;  
Gāravathaddhatā yoggapaṭipakkhā yathākkamaṃ.
688. Sappāyamutumāhāraṃ, labhitvā cittasampadaṃ;  
Lahū mudu ca kammaññaṃ, yadā rūpaṃ pavattati.
689. Tathāpavattarūpassa, pavattākārabheditaṃ;  
Lahutādittayampetaṃ, sahavutti tadā bhava.
690. Sappāyaṃ paṭivedhāya, paṭipattupakāritā;  
Sākārā rūpasampatti, paññattāva mahesinā.
691. Rūpassopacayo nāma, rūpassācayalakkhaṇo;  
Pavattilakkhaṇā **rūpasantatīti** pakāsītā.
692. Rūpamācayarūpena, jāyaticcuparūpari;  
Pekkhato pacayākārā, jāti gayhati yogino.
693. Anuppabandhākārena, jāyatīti sapekkhato;  
Tadāyaṃ santatākārā, jāti gayhati tassa tu.
694. Evamābhogabhedena, jātirūpaṃ dvidhā kataṃ;  
Attūpaladdhibhāvena, jāyantaṃ vātha kevalaṃ.
695. Rūpaṃ vivittokāsassa, pūrakatṭhena cīyati;  
Abhāvā punabhāvāya, pavattaṃ santatīti ca.
696. Evamākārabhedāva, sabbākāraravārāro;

Jātirūpaṃ dvidhākāsi, jātirūpavirocano.

697. Jaratā navatāhāyā, rūpānaṃ pākalakkhaṇā;  
Aniccataṅti mappatti, paribhijjanalakkhaṇā.
698. Iti lakkhaṇarūpaṃ tu, tividhaṃ bhinnakālikam;  
Sabhāvarūpadhammesu, taṃtaṃkālopalakkhitam.
699. Yena lakkhīyati rūpaṃ, bhinnākāraṃ khaṇe khaṇe;  
Vipassanāyatthāya, tamiccāha tathāgato.
700. Kabaḷīkāro āhāro,  
Yāpetabbojalakkhaṇo;  
Āhāro sendriyajāto,  
Rūpakāyānupālako.
701. Iccevaṃ sapaṇicchedā, savikārā salakkhaṇā;  
Akiccapaṭivedhāya, dayāpanna tādīnā.
702. Tattha tattha yathāyogaṃ, desitāti pakāsītā;  
Rūpadhammā sarūpena, aṭṭhavīsati sabbathā.
703. Katvāna jātimekaṃ tu, tathopacayasantaṃ;  
Sattavīsati rūpāni, bhavanti viniddise.
704. Bhūtattayaṃ tu phoṭṭhabbaṃ, katvā chabbīsadhāpi ca;  
Ubhayaṃ jātiphoṭṭhabbaṃ, gahetvā pañcavīsati.
705. Rūpadhammānamiccevaṃ, vibhāveyya visārado;  
Sarūpaṃ nāmasaṅkhepaṃ, sabhāvañca salakkhaṇanti.

Iti rūpavibhāge sarūpakathā niṭṭhitā.

Aṭṭhārasamo paricchedo.

## Ekūnavīsatimo paricchedo

### 19. Pabhedakathā

706. Aṭṭhavīsavidhampetaṃ, rūpaṃ dāni yathārahaṃ;  
Bhūtarūpādibhedehi, vibhajeyya vicakkhaṇo.
707. Pathavādīkamidanti, bhūtarūpaṃ catubbidhaṃ;  
Upādārūpamaññaṃ tu, catuvīsatividhaṃ bhava.
708. Pañcavidhampi cakkhādirūpamajjhaticcaṃ matam;  
Tevīsatividhaṃ sesam, bāhiranti pavuccati.
709. Rūpasaddagandharasaphoṭṭhabbā satta pañcadhā;  
Pañcappasādavisayā, pañcārammaṇanāmakā.

710. Ekavīsatividhaṃ sesaṃ, dhammārammaṇasaṅgahaṃ;  
Manoviññāṇaviññeyaṃ, manodvārassa gocaraṃ.
711. Pasādā visayā ceva, pañcakā dvepi sambhavā;  
Dvādasāpi sarūpena, dasāyatanadhātuyo.
712. Yadedamaṃ pana sabbampi, rūpaṃ sappaṭighaṃ matamaṃ;  
Tadevoḷārikaṃ nāma, santiketi pavuccati.
713. Sesamappaṭighaṃ nāma, dhammāyatanadhātu ca;  
Sukhumañceva rūpañca, rūpaṃ soḷasadhā ṭhitaṃ.
714. Chabbidhā vatthurūpaṃ tu, pasādahadayampi ca;  
Avatthurūpaṃ sesaṃ tu, dvāvīsatividhaṃ bhava.
715. Pasādā ceva viññatti, dvārarūpaṃ tu sattadhā;  
Sesaṃ advārarūpaṃ tu, ekavīsavidhampi ca.
716. Pasādā bhāvayugaḷaṃ, jīvitañceti aṭṭhadhā;  
Indriyarūpamaññaṃ tu, vīsadhānindriyaṃ siyā.
717. Vaṇṇo gandho raso ojā, bhūtarūpanti aṭṭhadhā;  
Avinibbhogamitaraṃ, vinibbhogaṃ tu vīsadhā.
718. Avinibbhogarūpāni, saddavatthindriyāni ca;  
Nipphannaṃ aṭṭhārasadhā, rūparūpanti veditaṃ.
719. Paricchedo panākāso, viññattilahutādayo;  
Vikārā lakkhaṇā ceva, rūpassupacayādayo.
720. Dasadhāpi anipphannaṃ, natthetaṃ paramatthato;  
Rūpassetanti katvāna, rūpamicceva vuccati.
721. Rūpāyatanamevekaṃ, sanidassanamīritaṃ;  
Anidassanamaññaṃ tu, sattavīsatividhampi ca.
722. Kammajaṃ panupādinnaṃ, anupādinnaṃ kāparaṃ;  
Tividhaṃ cittaṇceva, utujāhārajanti ca.
723. Cakkhusamphassavatthūti, cakkhudhātu pakittitā;  
Na vatthu tassa sesaṃ tu, sattavīsatividhaṃ bhava.
724. Sotasamphassavatthādi-vasā ca duvidhā tathā;  
Tividhā ca vibhāveyya, yathāsambhavato kathaṃ.
725. Sanidassanarūpañca, vaṇṇo sappaṭighampi ca;  
Anidassanamaññaṃ tu, thūlaṃ sappaṭighaṃ bhava.
726. Anidassanarūpañca, sesamappaṭighampi ca;  
Soḷasāti ca sabbampi, rūpaṃ tividhamuddise.
727. Apattaḡāhakaṃ nāma, cakkhusotadvayaṃ pana;

Sampattagāhakaṃ nāma, ghānādittayamīritaṃ.

728. Agāhakaṃato sesaṃ, tevīsatividhaṃ bhava;  
Kiñci sārammaṇaṃ nāma, na gayhatīti sabbathā.
729. Upādā ajjhattikaṃ rūpaṃ, upādā bāhiraṃ tathā;  
Nopādā bāhirañceti, evampi tividhaṃ bhava.
730. Ajjhattikamupādinnaṃ, bāhirañca tathāparaṃ;  
Anupādinnañceti, evamādivasāpi ca.
731. Diṭṭhaṃ rūpaṃ sutaṃ saddo, gandhādi tividhaṃ mutaṃ;  
Viññātamaññaviññeyyaṃ, manasāti catubbidhaṃ.
732. Rūparūpaṃ paricchedo, vikāro lakkhaṇaṃ kamā;  
Aṭṭhārasekakaṃ pañca, catukkanti ca taṃ tathā.
733. Dvārañca hoti vatthu ca, na vatthu dvārameva tu;  
Na dvāraṃ vatthumevātha, nobhayanti ca niddise.
734. Upādā anupādinnaṃ, anupādinnaṃ tathā;  
Nopādā duvidhañceti, catuddhevampi desitaṃ.
735. Sappaṭiḡghamupādā ca, rūpamappaṭiḡghaṃ tathā;  
Nopādā duvidhañceti, catuddhā evamādito.
736. Ekādasekajarūpaṃ, hadayindriyanavakaṃ;  
Kammajaṃ cittañceva, tathā viññattikaṃ dvayaṃ.
737. Saddo cittotujo tasmā, rūpamekaṃ dvijaṃ matam;  
Cittotāhārasambhūtaṃ, lahutādittayaṃ tijaṃ.
738. Navākāsāvinibbhogā, kammādicatusambhavā;  
Atha lakkhaṇarūpanti, rūpamevaṃ tu pañcadhā.
739. Navākāsāvinibbhogā, nava vatthindriyāni ca;  
Aṭṭhārasavidhaṃ rūpaṃ, kammajaṃ hoti piṇḍitaṃ.
740. Saddākāsāvinibbhogā, viññattilahutādayo;  
Pañcadasavidhaṃ rūpaṃ, cittasambhavamuddise.
741. Saddākāsāvinibbhogā, lahutādittayanti ca;  
Utusambhavamīrenti, rūpaṃ terasadhā ṭhitaṃ.
742. Paricchedāvinibbhogā, lahutādittayampi ca;  
Evamāhārajaṃ nāma, rūpaṃ dvādasadhā ṭhitaṃ.
743. Jāti jarā ca maraṇaṃ, na kutoci pi jāyati;  
Evampi pañcadhā hoti, rūpajātivibhāgato.
744. Pañcavīsatividhaṃ kammaṃ, kāmarūpavavatthitaṃ;  
Janeti kammajaṃ rūpaṃ, kāmarūpabhavadvaye.



745. Pañcaviññānamāruppa-vipākā sabbasandhiyo;  
Cutī khīṇāsavasseti, soḷasete vivajjaye.
746. Pañcasattati sesāni, cittānimāni sambhavā;  
Janenti cittajaṃ rūpaṃ, pañcavokārabhūmiyaṃ.
747. Janebhi utujaṃ rūpaṃ, tejodhātu bhavadvaye;  
Kāmabhūmiyamojā tu, janetāhārajaṃ tathā.
748. Kammaṃ janeti rūpāni, attajāni khaṇe khaṇe;  
Cittamuppādakālamhi, uppādānantaraṃ paraṃ.
749. Utusambhavamīrenti, rūpaṃ terasadhā ṭhitam;  
Paricchedāvinibbhoga, lahutādittayampi ca.
750. Sandhiyampi kammajaṃ tu, pavattepi ca sambhavā;  
Janeti rūpaṃ sesāni, pavatte, na tu sandhiyaṃ.
751. Indriyabaddhasantāne, kammādi tividhampi ca;  
Janeti rūpaṃ matake, bāhire tu yathārahaṃ.
752. Iti kammādayo rūpaṃ, janenti ca yathāsakaṃ;  
Sesānampi ca rūpānaṃ, paccayā honti sambhavā.
753. Iti rūpavibhāgañca, jātibhedañca sambhavā;  
Janakādippabhedañca, rūpānaṃ tattha dīpayeti.

Iti rūpavibhāge pabhedakathā niṭṭhitā.

Ekūnavīsatiṃ paricchedo.

## Vīsatiṃ paricchedo

### 20. Kalāpakathā

754. Iti vuttappakārena, sabbaṃ rūpampi piṇḍitaṃ;  
Sahavuttiniyāmena, ekavīsavidhaṃ kathaṃ.
755. Kammaṃ cittotukāhārasamuṭṭhānā yathākkamaṃ;  
Nava cha caturo dve ca, **kalāpā ekavīsati**.
756. Jīvitañcāvinibbhoga-rūpāni ca yathākkamaṃ;  
Cakkhādikehi yojetvā, dasakā aṭṭha dīpitā.
757. Cakkhusotaghānajivhādasakā ca catubbidhā;  
Kāyitthipumbhāvavattthudasakā ca tathāpare.
758. Jīvitena vinibbhogarūpāni navakanti ca;  
**Navete** kammajā nāma, kalāpā samudīritā.
759. Avinibbhogarūpāni, suddhaṭṭhakamathāparaṃ;

Kāyaviññattinavakaṃ, kāyaviññattiyā saha.

760. Vacīviññattidasakaṃ, saddena sahavuttito;  
Lahutādekādasakaṃ, tiṇṇannaṃ saha sambhavā.
761. Kāyaviññattilahutādīhi dvādasakaṃ bhave;  
Vacīviññattilahutādīhi terasakaṃ tathā.
762. Iti cittasamuṭṭhānā, kalāpā **cha** pakāsītā;  
Rūpākāravikārampi, saṅgahetvā yathārahaṃ.
763. Suddhaṭṭhakaṃ tu paṭhamaṃ, saddena navakaṃ bhave;  
Lahutādekādasakaṃ, lahutādīhi tīhipi.
764. Saddena lahutādīhi, tathā dvādasakanti ca;  
Kalāpā utusambhūtā, **catudhāva** pakittitā.
765. Suddhaṭṭhakaṃca paṭhamaṃ, āhārajamathāparaṃ;  
Lahutādekādasakaṃ, iti **dve** ojaṃ matā.
766. Kalāpānaṃ paricchedalakkhaṇattā vicakkhaṇā;  
Na kalāpaṅgamiccāhu, ākāsaṃ lakkhaṇāni ca.
767. Tattha cekūnanavuti, tesatṭhi ca yathākkamaṃ;  
Tālīsekūnavīsā ca, kalāpaṅgāni tāni ca.
768. Lakkhaṇākāsarūpāni, kalāpesu tahiṃ tahiṃ;  
Pañca pañceti rūpāni, tisataṃ soḷasādhikaṃ.
769. Agahītaggahaṇena, aṭṭhavīsavidhānīpi;  
Rūpakoṭṭhāsanāmena, pañcavīsati bhāvaye.
770. Bhūtattayaṃ tu phoṭṭhabbaṃ, katvāpacayasantatiṃ;  
Jātimekaṃca katvā vā, vinātha hadayaṃ tahiṃ.
771. **Dhammasaṅgaṇiyaṃ** hetamaṃ, rūpakaṇḍe sarūpato;  
Vatthurūpaṃ na niddiṭṭhamaṃ, **paṭṭhāne** desitaṃ tu taṃ.
772. Dve saddanavakā ceva,  
Tayo suddhaṭṭhakāpi ca;  
Dve dve cittotusambhūtā,  
Eko āhārajoti ca.
773. Tesamuṭṭhānikā pañca, kammajāni naveti ca;  
Rūparūpavasenete, kalāpā cuddaseritā.
774. Dasakesveva saṅgayha, jīvitanavakaṃ tahiṃ;  
Bhāvaddasakamekaṃ vā, katvā vatthumaṃ vinā tathā.
775. Saddā cittotujā dveva, tesamuṭṭhānikā tayo;  
Suddhaṭṭhakā ca satteva, kammajā dasakāni ca.

776. Channavūtividham tattha, rūpaṃ bhāsanti paṇḍitā;  
Agahītaggaṇaṇena, aṭṭhārasavidham bhava.
777. Tesameva kalāpānaṃ, sattakacchakkapañcakā;  
Catukkā ca tikadvikā, ekakā ca yathārahaṃ.
778. Dve satta nava cha tayo, tayopi ca yathākkamaṃ;  
Cattāroti catuttiṃsa, sahaṇvuttikarāsayo.
779. Cakkhusotaghānajiṃhā-kāyavattuvasā siyuṃ;  
Itthipumbhāvadasakasahitā **sattakā dvidhā**.
780. Cakkhusotaghānahīnā, paccekamaṃ dve sabhāvakā;  
Abhāvato bhāvahīno, itthaṃ **chakkāpi sattadhā**.
781. Cakkhusotavihīnā ca,  
Cakkhughānavihīnakā;  
Sotaghānavihīnā ca,  
Sabhāvā dve tayo tayo.
782. Cakkhādekekato hīnā,  
Tividhāpi abhāvato;  
Icevamaṃ **pañcakā** nāma,  
**Navakā** rāsayo siyuṃ.
783. Cakkhādittayahīnāva, ekato dve sabhāvakā;  
Cakkhādittayato dvīhi, tayo hīnā abhāvakā.
784. Rūpaloke cakkhusota-vatthujīvitanavakā;  
Cattārova kalāpāti, **catukkā cha** yathārahaṃ.
785. Jivhākāyavattuvasā,  
Abhāvo dve sabhāvakā;  
Kāyabhāvavattuvasā,  
Iti honti **tayo tikā**.
786. Kāyavattuvaseneko, dve ca cittotusambhavā;  
Saddanavakaṭṭhakāti, **dukā** ca **tividhā** siyuṃ.
787. Jīvitanavakañcekamaṃ, tesamuṭṭhānikāni ca;  
Suddhaṭṭhakāni tīṇīti, **cattāro ekakā** siyuṃ.
788. **Catuttiṃsa** paniccete, sandhiyañca pavattiyamaṃ;  
Rūparūpakalāpānaṃ, rāsayo honti sambhavā.
789. Sattati saṭṭhimiccevamādinā ca yathārahaṃ;  
Kalāparāsirūpāni, tattha tattha vibhāvaye.
790. Soḷasa pañcadasetiādibhedavasāpi ca;  
Agahītaggaṇaṇena, tattha tattha viniddise.
791. Catucattālīsataṃ, kalāpā honti piṇḍitā;

Chabbīsa tattha rūpāni, saḥassaṇca catussatam.

792. Iccāpāyacatukke ca, kāme sugatisattake;  
Rūpe ca pañcadasake, asaṇṇāpāyabhūmiyaṃ.
793. Catukoṭṭhāsikesveva, sattavīsavidhesupi;  
Jātiṭṭhānesu sattānaṃ, sandhiyaṇca pavattiyaṃ.
794. Indriyabaddhasantāne, tathānindriyakamhi ca;  
Bahisaṅkhārasantāne, matakāye ca sambhavā.
795. Labbhamānakalāpā ca, kalāpānaṇca rāsayo;  
Tattha vitthārasaṅkhepā, rūpānaṃ gaṇanāpi ca.
796. Ettha rūpā avuttā hi, yathāvuttānusārato;  
Vitthāretvāna viññeyyā, sabbathāpi ca viññunāti.

Iti rūpavibhāge kalāpakathā niṭṭhitā.

Vīsatimo paricchedo.

## Ekavīsatimo paricchedo

### 21. Uppattikathā

797. Aṭṭhavīsati rūpāni, kalāpā cekavīsati;  
Vuttā cettāvata tesam, uppādo dāni niyyate.
798. Aṇḍajā jalābujā ca, saṃsedajopapātikā;  
Iccupattipabhedena, catasso yoniyo matā.
799. Bhumavajjesu devesu,  
Pete nijjhāmatanḥike;  
Nirayesu ca sambhoti,  
Yonekāvopapātikā.
800. Bhummadeve manussesu,  
Tiracchānāsura tathā;  
Petesu cāvasesesu,  
Catassopi ca yoniyo.
801. Tatthaṇḍajā jalābujā, gabbhaseyyasamuggamo;  
Saṃsedajopapātikā, opapātikanāmakā.
802. Tattha sampuṇṇāyatano, gabbhaseyyasamuggamo;  
Abhāvo dve sabhāvā ca, itthipumbhāvamissitā.
803. Paripuṇṇāparipuṇṇo, opapātikanāmakō;  
Abhāvo dve sabhāvā ca, caturāpāyabhūmiyaṃ.
804. Sampuṇṇāyatanoveso,

Kāme sugatīyaṃ pana;  
Ādikappe abhāvo ca,  
Dve sabhāvā tato paraṃ.

- 805.** Aparipuṇṇāyatano, abhāvo ca mahaggaṭṭe;  
Iccevaṃ dasadhā honti, sabbā sandhisamuggamā.
- 806.** Tattheva dasadhā bhinne, attabhāvasamuggame;  
Sandhiyañca pavatte ca, rūpuppattiṃ vibhāvaye.
- 807.** Tatthābhāvakasattānaṃ, gabbhaseyyasamuggame;  
Kāyavatthivasā dveva, dasakā honti kammajā.
- 808.** Rūpasantatisīsāni, dve ca rūpāni vīsati;  
Agahītaggaṇaṇena, tatthekādasa niddise.
- 809.** Tato paraṃ pavattimhi, vaḍḍhamānassa jantuno;  
Cakkhudasakādayo ca, cattāro honti sambhavā.
- 810.** Iccābhāvakasattānaṃ, chaḷevuttamakoṭiyā;  
Heṭṭhimakoṭiyā dveva, gabbhaseyyasamuggame.
- 811.** Cakkhusotaghānavasā, tattha tidvekahīnakā;  
Eko tayo tayo ceva, siyuṃticatupañcakā.
- 812.** Oparātikasaṅkhāte, abhāvakasamuggame;  
Jivhākāyavatthivasā, tayo heṭṭhimakoṭiyā.
- 813.** Uttamakoṭiyā honti, chaḷevobhinnamantare;  
Catukkapañcakā tattha, dvekahīnā tayo tayo.
- 814.** Chakkādayo abhāvānaṃ,  
Iccevaṃ pañcasaṅgahā;  
Eko tayo tayo ceko,  
Ekoti ca yathākkamaṃ.
- 815.** Sabhāvakānaṃ dvinnampi, duvidhā sattakādayo;  
Bhāvādikā yathāvuttā, navadhā navadhā siyuṃ.
- 816.** Sattēvuttamato heṭṭhā, ticatukkā tadantare;  
Catukkapañcakacchakkā, pañcachakkāpi ca dvidhā.
- 817.** Tiṇṇannampi vaseneva, sattakacchakkapañcakā;  
Catukkatikadukkā ca, cha koṭṭhāsā yathārahaṃ.
- 818.** Dve satta ca nava pañca, tayo ceko yathākkamaṃ;  
Rūpasantatisīsānaṃ, rāsayo sattavīsati.
- 819.** Kammajātā yathāyogaṃ, pavattanti khaṇe khaṇe;  
Kāmāvacarasattānaṃ, paṭisandhipavattiyā.
- 820.** Tattha santatisīsāni, rūpāni ca yathārahaṃ;

Pubbe vuttanayeneva, sabbatthāpi viniddise.

821. Sītuṅhotusamaññātā,  
Tejodhātu ʘhitikkhaṇe;  
Bhūtā sandhikkhaṇe rūpaṃ,  
Janeti utujaṭṭhakaṃ.
822. Paṭisandhimatikkamma, cittaṃ cittajamaṭṭhakaṃ;  
Bhavaṅgādimupādāya, janetuppattiyaṃ pana.
823. Bhuttāhāro ʘhitippatto, mātarā ca sayampi ca;  
Sarīrānugato hutvā, janetāhārajaṭṭhakaṃ.
824. Iti suddhaṭṭhakāni ca, tesamuṭṭhānikāpare;  
Saddaviññattilahutā, sambhave sambhavanti ca.
825. Itthaṃ catusamuṭṭhānā, kalāpā kāmabhūmiyaṃ;  
Yāvajīvaṃ pavattanti, dīpajālāva santati.
826. Cakkhusotavattuvasā, dasakā ca tayo paraṃ;  
Jīvitanaṅkaṅceva, rūpāvacarabhūmiyaṃ.
827. Honti sandhipavattīsu, cattāro kammajā sadā;  
Pubbe vuttanayeneva, pavatte utucittajā.
828. Jīvitanaṅkaṅcekaṃ, paṭisandhipavattiyaṃ;  
Pavatte utujaṅceti, dvedhāsaññīnamuddise.
829. Iccuppattikamaṃ ñatvā, vibhāveyya tato paraṃ;  
Kalāpānaṅca rūpānaṃ, sambhavāsambhavampi ca.
830. Indriyabaddhasantāne, sabbe sambhonti sambhavā;  
Kalāpā ceva rūpāni, tathā santatirāsayo.
831. Bahiddhā matakāye ca, nopalabbhanti kammajā;  
Cittojajā kalāpā ca, utujā lahutādayo.
832. Tathā suddhaṭṭhakasadda-navakaṅcotu sabbathā;  
Kalāpā tattha labbhanti, dve ca rūpāni uddise.
833. Tesamuṭṭhānikā sabbe, kalāpā natthi sandhiyaṃ;  
Uppādakāle sabbattha, jaratāniccatāpi ca.
834. Kalāpā kammajā santi, jātirūpaṅca sandhiyaṃ;  
Rūpāni ca kalāpā ca, sabbepi ca pavattiyaṃ.
835. Santi sabbāni rūpāni, kāmesu catusambhavā;  
Jīvitanaṅkaṃ hitvā, kalāpā honti vīsati.
836. Dasakesveva gahitaṃ, visuṃ kāme na labbhati;  
Jīvitanaṅkaṃ nāma, rūpaloke visuṃ siyā.

837. Āhārajalālāpā ca, bhāvā dve cādikappike;  
Ādikāle na labbhanti, pacchā labbhanti kecipi.
838. Ghānājivhākāyabhāva-dasakā rūpabhūmiyaṃ;  
Āhārajalālāpā ca, na labbhanteva sabbathā.
839. Cakkhusotavatthusaddā, kalāpā cittajāpi ca;  
Asaññibhūmiyaṃ pubbe, vuttāpi ca na labbhare.
840. Kalāpā satta rūpāni, pañca rūpesvasaññisu;  
Natthekādasa rūpāni, kalāpekūnavīsati.
841. Tasmā tevīsa rūpāni, kalāpā pana cuddasa;  
Tesamuṭṭhānikā santi, rūpāvacarabhūmiyaṃ.
842. Sattaraseva rūpāni, kalāpā dve dvisambhavā;  
Asaññīnaṃ tu sambhonti, natthārūpesu kiñcīpi.
843. Uppattikkamamiccevaṃ, sambhavāsambhavampi ca;  
Kalāpānañca rūpānaṃ, yathāyogaṃ vibhāvayeti.

Iti rūpavibhāge uppattikathā niṭṭhitā.

Ekavīsatimo paricchedo.

## Dvāvīsatimo paricchedo

### 22. Pakiṇṇakakathā

844. Itthaṃ rūpānamuppattiṃ, dīpetvā dāni vuccati;  
Pavattikosallatthāya, tatthetvaṃ pakiṇṇakaṃ.
845. Duvidhā sandhiyo tattha, missāmissavibhāgato;  
Tividhāpi cekacatu-pañcavokārabhedato.
846. Rūpamattā asaññīnaṃ, nāmābhāvā amissitā;  
Nāmamattā arūpīnaṃ, rūpābhāvāti ca dvidhā.
847. Kāmāvacarikā ceva, rūpāvacarikāti ca;  
Duvidhā missitā ceti, bhavanti ca catubbidhā.
848. Ekacatuvoḍḍhā ca, amissā pañca sandhiyo;  
Chabbīsatividhā missā, pañcavokārasandhiyo.
849. Itthaṃ bhūmiṃpabhedenā, ekatiṃsavidhāpi ca;  
Santatirāsibhedena, siyumaṃ tiṃsavidhā kathaṃ.
850. Rūpasantatisānaṃ,  
Rāsāyo sattavīsati;  
Vuttā kāme vasā tesāṃ,  
Sattakā kāmasandhiyo.

851. Vedanāsaññāsaṅkhāra-viññāṇakkhandhasaṅgahā;  
Sabbatthāpi catassova, nāmasantatiyo siyuṃ.
852. Iccubhinnaṃ vasā honti, tatthekādasakādayo;  
Santatirāsayo pubbe, vibhattā sattakādayo.
853. Ekādasakadasaka-ṇavaṭṭhasattakā siyuṃ;  
Chakkena saddhiṃ viññeyyā, tasmā tattha cha saṅgahā.
854. Aṭṭha santatiyo honti, rūpalokena missitā;  
Aṭṭhako rāsi tattheke, tasmā santati vuccati.
855. Jīvitanaṅkako tveko, asaṅgāni paṭisandhiyaṃ;  
Arūpīnaṃ catassopi, nāmasantatiyo siyuṃ.
856. Iccekakacatukkānaṃ, vasena dve amissitā;  
Aṭṭhavīsaṅga missatī, tiṃseva honti sandhiyo.
857. Ekuppādanirodhā ca, amissā tattha rāsayo;  
Missitānaṃ vibhāgoyā, yathāyogaṃ kathīyati.
858. Uppādaṭṭhitibhaṅgānaṃ, vasā tīṇi khaṇānipi;  
Samānāneva nāmānaṃ, ekacittakkhaṇaṃ matāṃ.
859. Tulyamuppādabhaṅgānaṃ, rūpānampi khaṇadvayaṃ;  
Ekūnapaññāsamattaṃ, ṭhitikkhaṇamudīritaṃ.
860. Nāmarūpānamuppādo, bhaṅgopi hi samo mato;  
Dandhaṃ hi vattikaṃ rūpaṃ, nāmaṃ tu lahuvattikaṃ.
861. Tathā hi rūpe tiṭṭhante, cittuppādā tu soḷasa;  
Uppajjitvā pavattitvā, bhijjanti ca lahuṃ lahuṃ.
862. Tasmā hi ekapaññāsa-khaṇarūpakkaṇaṃ tathā;  
Sattarasacittakkhaṇaṃ, tikhaṇanti ca vuccati.
863. Cittakkhaṇaṃ hi tiṇṇannaṃ, tattha viññattikadvayaṃ;  
Lakkhaṇattayarūpaṃ tu, salakkhaṇavavattitaṃ.
864. Tasmā hitvā dvayañcetaṃ, bāvīsatividhampi ca;  
Rūpaṃ nāma catukkaṅga, salakkhaṇaniyāmitaṃ.
865. Ekuppādanirodhā ca, tattha tulyakkhaṇā matā;  
Atulyakkhaṇadhammānaṃ, siyā bhedaṃ yathārahaṃ.
866. Paṭisandhikkhaṇe jātaṃ, tasmā rūpaṃ tato paraṃ;  
Sattarasamacittassa, bhaṅgena saha bhijjati.
867. Tassa ṭhitikkhaṇe jātaṃ, rūpampi ca tato paraṃ;  
Aṭṭhārasamacittassa, uppāde pana bhijjati.
868. Tassa bhaṅgakkhaṇe jātaṃ, rūpampi ca tato paraṃ;



Aṭṭhārasamacittassa, ṭhitikālesu bhijjati.

869. Tathā dutiyacittassa, uppādamhi samuṭṭhitam;  
Aṭṭhārasamacittassa, bhaṅgena saha bhijjati.
870. Iti vuttaniyāmena, saṅgātikkaṅkhaṇato param;  
Ṭhatvā ekūnapaññāsa, khaṇāni puna bhijjati.
871. Tasmā ekūnapaññāsa, kalāpā saha vattare;  
Eko jāyati eko ca, bhijjatīti ca sabbathā.
872. Ekasantatisambandhā, kalāpā saha kammajā;  
Yathānupubbagaṭṭhitā, ekapaññāsa labbhare.
873. Sattavīsa panicevaṃ, kāme dve rūpabhūmiyaṃ;  
Rūpasantatisīsānaṃ, rāsayo sattakādayo.
874. Ekūnatimṣa sabbepi, kammajātā yathārahaṃ;  
Ekapaññāsa ghaṭikā, pavattanti khaṇe khaṇe.
875. Tattha sandhikkhaṇe jātaṃ, sattarasamacetaso;  
Uppāde bhijjaticcevaṃ, vutto **aṭṭhakathānayo**.
876. Taṃ nayaṃ paṭibāhitvā, cittena saha bhijjati;  
Cittena saha jātanti, vuttamācariyena hi.
877. Ānāpānatakkacārā, ekuppādanirodhakā;  
Vuttā hi **yamake** kāyavacīsāṅkhāranāmakā.
878. Cittuppādakkhaṇe jātā, utu tassa ṭhitikkhaṇe;  
Rūpaṃ janeti tatthāpi, utu bhaṅgakkhaṇepi ca.
879. Anupubbakkamenevaṃ, jātaṃ rūpaṃ tathāparaṃ;  
Aṭṭhārasamauppādaṭṭhitiādīsu bhijjati.
880. Itthaṃ kalāpā ghaṭitā, utujāhārajāpi ca;  
Ekasantatisambandhā, ekapaññāsa labbhare.
881. Kalāpā cittaajā yasmā, uppādakkhaṇasambhūtā;  
Ghaṭikā saha labbhanti, tasmā sattaraseva te.
882. Sabbepi rūpajanakā, cittuppāde yathāsakaṃ;  
Janenti ṭhitibhaṅgesu, na janentīti kecanā.
883. Kusalābyākatādīnaṃ, ekuppādanirodhatā;  
Dhammānaṃ **yamake** vuttā, iti pāḷi vadanti ca.
884. Kusalādikasambandhā, tattha tattha hi desitā;  
Iti vatvā pure vuttaṃ, icchantācariyā nayaṃ.
885. Icevaṃ catusambhūtā, rūpasantatirāsayo;  
Rūpāni ca kalāpā ca, ekābaddhā yathārahaṃ.

886. Suttapavattamattānaṃ, sambuddhānampi paṇinaṃ;  
Yāva maraṇakālāpi, pavattanti nirantaraṃ.
887. Āyukkhayā ca maraṇaṃ, tathā kammakkhayā siyā;  
Ubhinnaṃ vā khayā cātha, upacchedakakammunā.
888. Catudhāpi marantassa, tassevaṃ tu yathārahaṃ;  
Sattarasacittakkhaṇamattasesamhi jīvite.
889. Upariccucittassa, sattarasamacetaso;  
Ṭhitikālamupādāya, na tu jāyati kammajaṃ.
890. Tassuppādakkhaṇe jātaṃ,  
Rūpañca cutiyā saha;  
Bhijjati mato nāma,  
Tato hoti sa puggalo.
891. Cittajāhārajañcāpi, na jāyati tato paraṃ;  
Utusambhavarūpaṃ tu, avasissati vā na vā.
892. Tato vuttanayeneva, matasatto yathārahaṃ;  
Missāmissāhi sandhīhi, punadevopapajjati.
893. Tato vuttanayeneva, ekūnatimṣa kammajā;  
Tesamuṭṭhānikā pañca, catuttimṣa samissitā.
894. Kalāpā rāsayo honti, sattavīsati bhūmisu;  
Iti sabbapakārena, rūpadhammā pakāsītati.

Iti rūpavibhāge pakiṇṇakakathā niṭṭhitā.

Dvāvīsatiṃ paricchedo.

Niṭṭhito ca sabbathāpi rūpavibhāgo.

## Tevīsatiṃ paricchedo

### 4. Nibbānavibhāgo

#### 23. Mūlavisuddhikathā

895. Itthaṃ cittaṃ cetasikaṃ, rūpañcevāti saṅkhatā;  
Vuttā asaṅkhatā dāni, nibbānanti pavuccati.
896. Sīlavisuddhi ādimhi, tato cittavisuddhi ca;  
Diṭṭhivisuddhināmā ca, kaṅkhāvitaraṇāpi ca.
897. Tato paraṃ maggāmagga-ñāṇadassananāmikā;  
Tathā paṭipadāñāṇa-dassanā ñāṇadassanaṃ.
898. Iccānukkamato vuttā, satta honti visuddhiyo;

Sattamānuttarā tattha, pubbabhāgā cha lokiyā.

899. Saṃvaro pātimokkho ca, tathevindriyaṣaṃvaro;  
Ājīvapārisuddhi ca, sīlaṃ paccayanissitaṃ.
900. Iti **sīlavissuddhī**, suddhametaṃ pavuccati;  
Catupārisuddhisīlaṃ, dhutaṅgaparivāritaṃ.
901. Kasiṇāni dasāsubhā, dasānussatiyo pana;  
Appamaññā ca saññā ca, vavatthāruppakāti ca.
902. **Samathakkammaṭṭhānāni**, tālīsaṭṭhakathānaye;  
Pāliyaṃ tu vibhattāni, aṭṭhatimsāti vaṇṇitaṃ.
903. Pathavāpo ca tejo ca,  
Vāyo nīlañca pītakaṃ;  
Lohitodātamākāsaṃ,  
Ālokakasiṇanti ca.
904. **Kasiṇāni dasetāni**, vuttānaṭṭhakathānaye;  
Aṭṭheva pāliyaṃ hitvā, ante tu kasiṇadvayaṃ.
905. Uddhumātaṃ vinīlañca, vipubbakaṃ vikhāyitaṃ;  
Vicchiddakañca vikkhittaṃ, hatavikkhittalohitaṃ.
906. Puḷavakaṃ aṭṭhikañceti, **asubhā dasa** desitā;  
Rūpakāyavibhāgāya, dasakāyavipattiyā.
907. Buddhē dhamme ca saṅghe ca, sīle cāge ca attanā;  
Devatopasamāyañca, sattānussatiyo kamā.
908. Maraṇassati nāmekā, tathā kāyagatāsati;  
Ānāpānassaticcevaṃ, **dasānussatiyo** matā.
909. Mettā karuṇā muditā, upekkhāti catubbidhā;  
Vuttā brahmavihārā ca, **appamaññā**ti tādinā.
910. Ekāhāre **paṭikkūla-saññā** nāmekameva tu;  
**Catudhātuvavatthānaṃ**, catudhātupariggaho.
911. Ākāsānañcāyatanaṃ, viññāṇaṅcamathāparaṃ;  
Ākiñcaññaṃ tathā neva-saññānāsaññānāmakāṃ.
912. Iccānukkamato vuttā, arūpajjhānikā pana;  
**Arūpakammaṭṭhānāni**, cattāropi pakittitā.
913. Kasiṇāsubhakoṭṭhāse, ānāpāne ca sabbathā;  
Disvā sutvā phusitvā vā, parikkammaṃ tu kubbato.
914. Uggaho nāma sambhoti, nimittaṃ tattha yuñjato;  
Paṭibhāgo tamārabba, tattha vattati appanā.

915. Sādhu sattā sukhī hontu, dukkhā muccantu pāṇino;  
Aho sattā sukhappattā, hontu yadicchakāti ca.
916. Uddissa vā anodissa, yuñjato sattagocare;  
Appamaññā panappenti, anupubbena vattikā.
917. Kasiṇuggghāṭimākāse, paṭhamāruppamānase;  
Tasseva natthibhāve ca, tatiyāruppaketi ca.
918. Yuñjantassa panetesu, gocaresu catūsupi;  
Appenti anupubbena, āruppāpi catubbidhā.
919. Ānāpānañca kasiṇaṃ, pañcakajjhānikaṃ tahiṃ;  
Paṭhamajjhānikā vuttā, koṭṭhāsāsubhabhāvanā.
920. Sukhitajjhānikā tisso, appamaññā ca heṭṭhimā;  
Upekkhāruppakā pañca, upekkhājjhānikāti ca.
921. Ekā dasekā dasa ca, tayo pañceti sabbathā;  
Parikammavasā tiṃsa, cha koṭṭhāsā yathākkamaṃ.
922. Pañcakādisukhopekkhā, jhānabhedā catubbidhā;  
Ekaccatupañcājhāna-vasena tividhā siyuṃ.
923. Rūpārūpavasā dve ca, appanāto punekadhā;  
Icevamappanā kamma-ṭṭhānabhedā samissitā.
924. Dve ca saññāvavatthānā, aṭṭhānussatīyoti ca;  
Sesā dasa pavuccanti, upacārasamādhikā.
925. Parikammopacārānulomagotrabhūto paraṃ;  
Pañcamaṃ vā catutthaṃ vā, javanaṃ hoti appanā.
926. Appanājavanaṃ sabbaṃ, lokuttaramahaggataṃ;  
Tihetukaparittāni, purimāni yathārahaṃ.
927. Āvajjanā ca vasitā, taṃsamāpajjanā tathā;  
Adhiṭṭhānā ca vuṭṭhānā, paccavekkhaṇa pañcamā.
928. Vasitāhi vasībhūtā, iti katvāna pañcahi;  
Bhāventassa panappenti, uparūpari appanā.
929. Yuñjantassa tu vuṭṭhāya, kasiṇajjhānapañcamā;  
Pañcābhiññā hi appenti, rūpasaddādigocare.
930. Lokuttarā panappenti, sabbe nibbānagocare;  
Aniccadukkhānattāti, bhūmidhamme vipassato.
931. Tattha ca pādakajjhānaṃ, sammaṭṭhajjhānameva vā;  
Ajjhāsayo ca vuṭṭhāna-gāminī ca vipassanā.
932. Maggānaṃ jhānabhedāya, yathāyogaṃ niyāmatā;

Yathāsakaṃ phalānaṃ tu, maggā honti niyāmatā.

933. Maggānantaramevātha, bhūmidhamme vipassato;  
Phalasaṃpattiyampi, appeti phalamānaṃ.
934. Anupubbasaṃpattiṃ, saṃpājjissa vuṭṭhito;  
Jhānadhamme vipassitvā, tattha tattheva paṇḍito.
935. Catutthārappamappetvā, ekadvijavanāparaṃ;  
Nirodhaṃ nāma phusati, saṃpattimacittakaṃ.
936. Arahā vā anāgāmī, pañcavokārabhūmiyaṃ;  
Yathāsakaṃ phaluppādo, vuṭṭhānanti tato mato.
937. Appanāpariyosāne, siyā sabbattha sambhavā;  
Bhavaṅgapāto taṃ chetvā, jāyate paccavekkhaṇā.
938. Iti vuttānusārena, appanānayasaṅgahaṃ;  
Yathāyogaṃ vibhāveyya, tattha tattha vicakkhaṇo.
939. **Cittavisuddhi** nāmāyaṃ, cittasaṃklesasodhanaṃ;  
Upacārappanābhedo, samatho pubbhāgiyoti.

Iti nibbānavibhāge mūlavisuddhikathā niṭṭhitā.

Tevīsatimo paricchedo.

## Catuvīsatimo paricchedo

### 24. Pariggahavisuddhikathā

940. Sīlacittavisuddhīhi, yathāvuttāhi maṇḍito;  
Payogāsayasampanno, nibbānābhirato tato.
941. Khandhāyatanadhātādippabhedehi yathārahaṃ;  
Lakkhaṇapaccupaṭṭhāna-padaṭṭhānavibhāgato.
942. Pariggahetvā saṅkhāre, nāmarūpaṃ yathākathaṃ;  
Vavatthapento tatthevamanupassati paññavā.
943. Nāmarūpamidaṃ suddhaṃ, attabhāvoti vuccati;  
Natthettha koci attā vā, satto jīvo ca puggalo.
944. Yathāpi aṅgasambhārā, hoti saddo ratho iti;  
Evaṃ khandhesu santesu, hoti sattoti sammuti.
945. Khandhāyatanadhātūnaṃ, yathāyogamanukkamo;  
Abbocchinno pavattanto, saṃsāroti pavuccati.
946. Iti nānappakārena, tebhūmakapariggaho;  
Bhūmidhammavavatthānaṃ, suddhasaṅkhāradassanaṃ.

947. Attadiṭṭhipahānena, diṭṭhisamklesasodhanam;  
**Diṭṭhivisuddhi** nāmāti, ñāṇametam pavuccati.
948. Pariggahitasankhāro, nāmarūpamapatthiyā;  
 Tato param yathāyogaṃ, pariggaṇhati paccaye.
949. Dukkhasamudayo tatha, taṇhā saṃsāranāyikā;  
 Samodhāneti saṅkhāre, tatha tatthupapattiyā.
950. Taṇhāsambhavamevetam, tasmā dukkham pavuccati;  
 Tadappavatti nibbānam, maggo taṃpāpakoti ca.
951. Catusaccavavattāna-mukhenevampi paccaye;  
 Pariggaṇhanti ekacce, saṅkhārānamathāpare.
952. Ālokākāsavāyāpapaṭṭhaviñcupanissayam;  
 Bhavaṅgapaṇiṇāmañca, labhitvāva yathārahaṃ.
953. Cha vatthūni ca nissāya, cha dvārārammaṇāni ca;  
 Paṭicca manasikāram, pavattanti arūpino.
954. Yathāsakasamuṭṭhānam, vibhāgehi ca rūpino;  
 Pavattanti ekaceti, pariggaṇhanti paccaye.
955. Avijjāpaccayā honti, saṅkhārā tu tato tathā;  
 Viññānam nāmarūpañca, saḷāyatanañamakaṃ.
956. Phasso ca vedanā taṇhā, upādānam bhavo tato;  
 Jāti jarā maraṇaṇca, pavattati yathārahaṃ.
957. Tato soko paridevo, dukkhañceva tathāparam;  
 Domanassamupāyāso, sambhoti ca yathārahaṃ.
958. Etassa kevalassevam, dukkhakkhandhassa sambhavo;  
 Paṭiccasamuppādova, natthañño koci kārako.
959. Tatthāvijjādayo dvepi, addhātīto anāgato;  
 Jātādayopare aṭṭha, paccuppannoti vaṇṇito.
960. Puññāpuññāneñjivasā, saṅkhārā tividhā tathā;  
 Bhavakadeso kammañca, kammavaṭṭanti vuccati.
961. Avijjātaṇhupādānā, klesavaṭṭamathāpare;  
 Vipākavaṭṭam sattāpi, upapattibhavopi ca.
962. Avijjāsankhārānam tu, gahaṇe gahitāva te;  
 Taṇhupādānabhavāti, atīte pañca hetavo.
963. Taṇhupādānabhavānam, gahaṇe gahitāva te;  
 Avijjā saṅkhārā ceti, paccuppannepi pañcake.
964. Viññāṇādisarūpena, dassitam phalapañcakam;

Tathā tadeva jātādi-nāmenānāgatanti ca.

965. Atīte hetavo pañca, idāni phalapañcakaṃ;  
Idāni hetavo pañca, āyatīṃ phalapañcakaṃ.
966. Hetuphalaṃ phalahetu, puna hetuphalāni ca;  
Tisandhi catusaṅkhepaṃ, vīsatakāramabravum.
967. Atthadhammapaṭivedha-desanānaṃ yathārahaṃ;  
Gambhīrattā catunnampi, catugambhīratā matā.
968. Ekattanānattanayā, abyāpāranayoparo;  
Tathevaṃdhammatā ceti, nayā vuttā catubbidhā.
969. Jarāmaraṇasokādi-pīlītānamabhiṇhaso;  
Āsavānaṃ samuppādā, avijjā ca pavattati.
970. Avijjāpaccayā honti, saṅkhārāpi yathā pure;  
Baddhāvicchedamiccevaṃ, bhavacakkamanādikaṃ.
971. Taṇhāvijjānābhikaṃ taṃ, jarāmarāṇanemikaṃ;  
Sesākārādighaṭikaṃ, tibhavārathayojitaṃ.
972. Tiaddhañca tivattañca, tisandhighaṭikaṃ tathā;  
Catusaṅkhepagambhīranayamaṇḍitadesanaṃ.
973. Vīsatakāravibhāgaṃ, dvādasākārasaṅgahaṃ;  
Dhammaṭṭhitīti dīpentī, idappaccayatamaṃ budhā.
974. Paṭiccasamuppādoyaṃ, paccayākāranāmato;  
Saṅkhepato ca vitthārā, vividhākārabhedato.
975. Janeti paccayuppanne, avijjādipavattiyā;  
Avijjādinirodhena, nirodheti ca sabbathā.
976. Paccayappaccayuppanna-vaseneva pavattati;  
Saṃsāroyanti ekacce, pariggaṇhanti paccaye.
977. Samantapaṭṭhānamahāpakaraṇavibhāgato;  
Ekacce pariggaṇhanti, catuvīsati paccaye.
978. Iti nānappakārena, paccayānaṃ pariggaho;  
Sappaccayanāmarūpaṃ, vavatthānanti veditaṃ.
979. Idappaccayatāññaṃ, paccayākāradassanaṃ;  
Dhammaṭṭhiti yathābhūtaññadassananāmakaṃ.
980. Kālattayavibhāgesu, kaṅkhāsamklesasodhanaṃ;  
**Kaṅkhāvitaraṇā nāma, visuddhīti** pavuccatīti.

Iti nibbānavibhāge pariggahavisuddhikathā niṭṭhitā.

Catuvīsatimo paricchedo.

## Pañcavīsatimo paricchedo

### 25. Vipassanāvuddhikathā

981. Sīlacittadiṭṭhikāṅkhāvitarāṇavisuddhiyo;  
Patvā kalāpato tāva, sammaseyya tato paraṃ.
982. Kalāpato sammasanaṃ, udayabbayadassanaṃ;  
Bhaṅgañāṇaṃ bhayañāṇaṃ, tathādīnavanibbidā.
983. Muccitukamyatāñāṇaṃ, paṭisaṅkhānupassanā;  
Saṅkhārupekkhānulomamiccānukkamato ṭhitā.
984. Vipassanāti cakkhātā, dasañāṇaparamparā;  
Lakkhaṇattayamāhacca, saṅkhāresu pavattati.
985. Tasmā kalāpato tāva, sammaseyya tilakkhaṇaṃ;  
Sammāsivā atītādikhandhāyatanadhātuyo.
986. Aniccā te khayatṭhena, khandhā dukkhā bhayaṭṭhato;  
Anattā asārakaṭṭhena, iccābhiṅhaṃ vicintayaṃ.
987. Tassevaṃ sammasantassa, upaṭṭhāti tilakkhaṇaṃ;  
Saṅkhāresu tato yogī, khaṇasantatiaddhato.
988. Paccuppannāna dhammānaṃ, udayaṅca vayaṃ tathā;  
Paññāsākārabhedehi, anupassati tattha hi.
989. Avijjātaṅhākammānaṃ, udayā ca nirodhato;  
Samudayā nirodhā ca, pañcannaṃ dassitā tathā.
990. Rūpassāhārato tiṅṅaṃ, phassato nāmarūpato;  
Viññāṇasseti sabbepi, cattālīsa samissitā.
991. Nibbattilakkhaṇaṃ bhaṅga-  
Lakkhaṇaṅcetha passato;  
Khaṇatodayato ceti,  
Samapaññāsa honti te.
992. Iti khandhamukhenete, vibhattā udayabbayā;  
Āyatannādibhedehi, yojetabbā yathārahaṃ.
993. Udayaṅca vayaṅcevaṃ, passato tassa yogino;  
Vibhūtā honti saṅkhārā, samuṭṭhāti tilakkhaṇaṃ.
994. Bodhipakkhiyadhammā ca,  
Te passantī visesato;  
Tato jāyantupaklesā,  
Dasopaklesavatthukā.



995. Obhāso pīti passaddhi, adhimokkho ca paggaho;  
Sukhaṃ ñāṇamupaṭṭhānaṃ, upekkhā ca nikanti ca.
996. Taṇhāmānadiṭṭhiggāhasena tividhepi te;  
Assādentō unnamanto, mamāyanto kilissati.
997. Maggaṃ phalañca nibbānaṃ, pattosmīti akovido;  
Vekkhābujjhāti maññanto, pappoti adhimāniko.
998. Maggādayo na hontete,  
Taṇhāgāhādivatthuto;  
Taṇhāmānadiṭṭhiyo cupaklesā paripanthakā.
999. Porāṇameva khandhānaṃ, udayabbayadassanaṃ;  
Tilakkhaṇārammaṇato, maggo nibbānapaccayo.
1000. Iti maggaṃ amaggañca, visodhentassa sijjhāti;  
**Visuddhi ca maggāmaggañāṇadassananāmikā.**
1001. Tathāparā visuddhīnaṃ, udayabbayadassanaṃ;  
Ādiṃ katvā **paṭipadāñāṇadassananāmikā.**
1002. Pacchā saṃklesavikkhepavisuddhantaṃ yathā pure;  
Paṭipajjati medhāvī, udayabbayadassanaṃ.
1003. Iti khodayabbayānupassanāñāṇavīthiyaṃ;  
Sikkhantassācīreṇeva, paripakkā vipassanā.
1004. Pahāyodayavohāraṃ, vayamevādhimuccato;  
Uppādābhogamohāya, bhaṅgamevānutiṭṭhati.
1005. Tato nijjaradhārāva, gaṅgāvārodakaṃ viya;  
Bhijjamānatiñāniva, paṭipajjā sikhā viya.
1006. Patante ca vayante ca, bhijjanticceva saṅkhate;  
Passato tassa bhaṅgānupassanāñāṇamīritaṃ.
1007. Tato bhayānupassanā, sabhayāti vipassato;  
Ādīnavānupassanā-ñāṇaṃ ādīnavāti ca.
1008. Nibbidānupassanā ca, nibbindantassa yogino;  
Muccitukamyatāñāṇaṃ, tato muccitumicchato.
1009. Niccā ce na nirujjheyya, na bādheyya sukhā yadi;  
Vase vatteyya attā ce, tadabhāvā na te tathā.
1010. Suṭṭhu muccitumiccevaṃ, paṭipaccakkhato tato;  
Paṭisaṅkhānupassanā-ñāṇaṃ jātanti vuccati.
1011. Sādhukaṃ paṭisaṅkhāya, saṅkhāresu tilakkhaṇaṃ;  
Supariññātasāṅkhāre, tatheva paṭipassati.

- 1012** Aniccā dukkhānattā ca, saṅkhārāva na cāparo;  
Attā vā attanīyaṃ vā, nāhaṃ na tu mamāti ca.
- 1013** Tatova tattha majjhatto, nandirāgavinissaṭo;  
Attattaniyabhāvena, saṅkhāresvajjupekkhati.
- 1014** Saṅkhārupekkhāsāṅkhātāṃ, ñāṇaṃ tassa itīritāṃ;  
Tato vuṭṭhānaghaṭitaṃ, anulomanti vuccati.
- 1015** Supariññātasāṅkhāre, susammaṭṭhatilakkhaṇe;  
Upekkhantassa tasseva, sikhāpattā vipassanā.
- 1016** Saṅkhāradhamme ārabba, tāva kālaṃ pavattati;  
Tīradassīva sakuṇo, yāva pāraṃ na passati.
- 1017** Yadā passati nibbānaṃ, vuṭṭhānagahitā tadā;  
Vuṭṭhānagāminī nāma, sānulomā pavuccati.
- 1018** Iti dvīhi visuddhīhi, visuddhāya vipassato;  
Vipassanāpaṭipadaṃ, pūretīti pavuccatīti.

Iti nibbānavibhāge vipassanāvuddhikathā niṭṭhitā.

Pañcavīsatiso paricchedo.

## Chabbisatiso paricchedo

### 26. Vuṭṭhānavisuddhikathā

- 1019** Tassevaṃ paṭipannassa, sikhāpattā vipassanā;  
Vuṭṭhānagāminī nāma, yadā hoti tadā pana.
- 1020** Parikammopacārānulomagotrabhuto paraṃ;  
Maggo tato phalaṃ hoti, bhavaṅgā paccavekkhaṇā.
- 1021** Parikammopacārānulomasāṅkhātagocarā;  
Maggassāvajjanaṃ hutvā, nibbāne hoti gotrabhu.
- 1022** Catutthaṃ pañcamaṃ vātha, chaṭṭhaṃ vāpi yathārahaṃ;  
Appeti maggajavanaṃ, nibbāne sakimeva taṃ.
- 1023** Tato phalāni tīni dve, ekaṃ vātha yathākkamaṃ;  
Maggāvasesanirodhamaggavuṭṭhānavīthiyaṃ.
- 1024** Tato bhavaṅgapātova,  
Taṃ chetvā paccavekkhaṇā;  
Tisso pañcavidhā honti,  
Yathāyogaṃ tathā hi ca.
- 1025** Maggaṃ phalaṅca nibbānaṃ, avassaṃ paccavekkhati;  
Hīne kilese sese ca, paccavekkhati vā na vā.

- 1026Tato ca puna saṅkhāre, vipassanto yathā pure;  
Appeti anupubbena, sesamaggaphalāni ca.
- 1027Tattha vuccanti nibbāna-phalamaggavipassanā;  
Suññatā cānimittā ca, tathāpaṇihitāni ca.
- 1028Suññatāvipassanādināmena hi vipassati;  
Vimokkhamukhabhūtāti, tividhā bhājitā tathā.
- 1029Suññatādikanāmena, vimokkhā tividhā matā;  
Nibbānaphalamaggā ca, samāpattisamādhayo.
- 1030Tattheva paṭhamabhūmiṃ, patto ariyapuggalo;  
Sattakkhattuparamo so, **sotāpannoti** vuccati.
- 1031Patto dutiyabhūmiṃca, **sakadāgāminā**mako;  
Sakimeva imaṃ lokaṃ, āgantvā hoti mānusaṃ.
- 1032Patto tatiyabhūmiṃca, **anāgāmī**ti vuccati;  
Brahmalokā anāgantvā, idhakāmopapattiyā.
- 1033Patto catutthabhūmiṃca, **arahā** aggapuggalo;  
Diṭṭheva dhamme dukkhaggiṃ, nibbāpetīti vuccati.
- 1034Iti maggaphalaṭṭhānaṃ, vasā ariyapuggalā;  
Dvidhāpi catudhā yuggā, aṭṭha honti vibhāgato.
- 1035Ubhatobhāgavimutta-  
Vibhāgādivasā pana;  
Vibhattā honti sattete,  
Yathāyogaṃ tathā hi ca.
- 1036Saddhādhurassāniccato, vuṭṭhānaṃ dukkhatopi ca;  
Paññādhurassānattato, iti dīpenti paṇḍitā.
- 1037Saddhānusāri ādimhi, majjhe saddhāvimuttako;  
Ante paññāvimuttova, tasmā saddhādhuro siyā.
- 1038Dhammānusāri ādimhi, diṭṭhippatto tatopari;  
Ante paññāvimuttova, hoti paññādhuropi ca.
- 1039Samathayānikā ceva, rūpānuttarapādakā;  
Vipassanāyānikā ca, sabbe sukkhavipassakā.
- 1040Dhuravuṭṭhānabhedena, honti pañceva sabbathā;  
Ārupapādakā cāpi, ādimhi duvidhā tathā.
- 1041Chasu ṭhānesu majjhake, kāyasakkhīti bhājitā;  
Ubhatobhāgavimutto, arahatte patiṭṭhito.
- 1042Itthaṃ vuttayānadhura-vuṭṭhānānaṃ vibhāgato;  
Maggaphalabhūmiyo ca, sattatṭhāriyapuggalā.

- 1043 Tattha cānuttaraññaṃ, saccānaṃ paṭivedhakaṃ;  
Samucchedappahānena, klesānusayasodhanaṃ.
- 1044 Catumaggavibhāgena, vuṭṭhānanti pakittitaṃ;  
**Ñāpadassanavisuddhi**, nāma hoti tathāpi ca.
- 1045 Maggo ca parijānāti, dukkhaṃ tebhūmakam tathā;  
Yathāyogaṃ pajahati, taṇhāsamudayampi ca.
- 1046 Nirodhaṃ sacchikaroti, maggasaccamanuttaraṃ;  
Bhāvanāvīthimotiṇṇo, bhāvetīti pavuccati.
- 1047 Ditṭhiggatavicikicchā-sīlabbatamasesato;  
Apāyagamanīyañca, rāgadosādikattayaṃ.
- 1048 Tadekaṭṭhe kilese ca, sahaṇṇāpappahānato;  
Pajahāti **sotāpatti-maggo** paṭhamabhūmiko.
- 1049 Tadekaṭṭhe pajahati, rāgadosādikepi ca;  
Thūle tu **sakadāgāmi-maggo** dutiyabhūmiko.
- 1050 Pajahāti **anāgāmi-maggo** niravasesato;  
Kāmarāgabyāpāde ca, tadekaṭṭhe ca sambhavā.
- 1051 Rūpārūparāgamānu-ddhaccāvijjāti pañcakaṃ;  
**Aggamaggo** pajahati, klese sese ca sabbathā.
- 1052 Iti saccapaṭivedhaṃ, klesakkhayaphalāvahaṃ;  
Maggaññaṃ pakāseti, visuddhiṃ sattamaṃ budhā.
- 1053 Chabbisuddhikamenevaṃ, sabbathāya visuddhiyā;  
Sattamāyānupattabbaṃ, nibbānanti pavuccati.
- 1054 Klesakkhayakaraṃ tāṇaṃ, saṃsārātikkaṃ paramaṃ;  
Pārimaṃ tīramabhayaṃ, sabbasaṅkhāranissaṭaṃ.
- 1055 Tenammadanimmadanaṃ, pipāsavinayādinaṃ;  
Klesasaṃsārasaṅkhāra-paṭipakkhanidassitaṃ.
- 1056 Ajarāmarāmaṃcanta-manuppādamaṃsaṅkhatam;  
Anuttaramasaṅkhāraṃ, anantamatulañca taṃ.
- 1057 Paramatthamanopammaṃ, santi appaṭimaṃ sukhaṃ;  
Nirodhasacca nibbānaṃ, ekantaṃ amataṃ padaṃ.
- 1058 Sopādisesanibbāna-dhātu ceva tathāparā;  
Anupādisesā ceti, duvidhā pariyāyato.
- 1059 Suññataṃ cānimittañca, tathāpaṇihitanti ca;  
Attādigāhābhāvena, tividhāpi ca bhājitaṃ.
- 1060 Klesasaṃsārasaṅkhāra-paccanīkavibhāgato;

Bhavakkhayādibhedehi, bahudhāpi pavuccati.

**1061** Tadevamaccutaṃ dhammaṃ, lokuttaramakālikaṃ;  
Vānābhāvā vānātīto, “**nibbāna**”nti pakittitaṃ.

Iti nibbānavibhāge vuṭṭhānavisuddhikathā niṭṭhitā.

Chabbīsatisimo paricchedo.

Niṭṭhito ca sabbathāpi nibbānavibhāgo.

## Sattavīsatisimo paricchedo

### 5. Paññattivibhāgo

#### 27. Pabhedakathā

**1062** Cittaṃ cetasiṃkaṃ rūpaṃ, nibbānampi ca bhājitaṃ;  
Tasmā dāni yathāyogaṃ, paññattipi pavuccati.

**1063** Sā cāyaṃ atthapaññatti-nāmapaññattibhedato;  
Duvidhā hoti paññatti, atthapaññatti tattha ca.

**1064** Sattasambhārasaṅghāna-saṅghāṭaparinaṃmato;  
Vikappupaṭṭhānākāravohārābhini vesato.

**1065** Tathā pavattasaṅketasiddhā atthā pakappitā;  
Paññāpīyanti nāmāti, **paññattīti** pakittitā.

**1066** Atthā hi paramatthathā, paññattatthāti ca dvidhā;  
Tattha ca paramatthathā, saccikaṭṭhā salakkhaṇā.

**1067** Paññattatthā saccikaṭṭhasalakkhaṇasabhāvato;  
Aññathā gahitā taṃtamupādāya pakappitā.

**1068** Tasmā upādāpaññatti, atthapaññattināmakā;  
Paññāpetabbanāmāva, paññattatthāva sabbathā.

**1069** Paramatthā yathāvuttā, cittacetasiṃkādayo;  
Paññattā itthipurisamañcapīṭhapaṭādayo.

**1070** Yena vuccati taṃ nāmaṃ, paññāpetīti vuccati;  
**Paññattīti** ca sā nāmapaññattīti tato matā.

**1071** Saṅkhā samaññā paññatti, vohāroti ca bhājitā;  
Catudhā paññāpetabbapaññattīti hi vaṇṇitā.

**1072** Tato nāmaṃ nāmakammaṃ, nāmadheyyaṃ athāparaṃ;  
Nirutti byañjanamabhilāpoti pana bhājitā.

**1073** Nāmapaññatti nāmāti, paññatti duvidhā katā;

Sabbeva dhammā paññattipathāti pana bhājita.

**1074**Paramatthapaññattatthā, duvidhā honti tattha ca;  
Paññattipathāva honti, paramatthā salakkhaṇā.

**1075**Paññattatthā paññatti ca, paññāpetabbamattato;  
Paññattipathā ca nāmapaññattipathabhāvato.

**1076**Nāmampi paññāpetabbameva kiñcāpi kenaci;  
Nāmamevampetaṃ tattha, paññatticceva vaṇṇitaṃ.

**1077**Paññāpetabbadhammā ca, tesam paññāpitāpi ca;  
Icchitabbāpi paññattipathā paññattinānatā.

**1078**Iti vuttānusārena, vuttaṃ aṭṭhakathānaye;  
Nayaṃ gahetvā etthāpi, paññatti duvidhā katā.

**1079**Tasmimpi paramatthā ca, saccikaṭṭhasalakkhaṇā;  
Atthā paññattimattā ca, atthapaññattināmakā.

**1080**Tesam paññāpikā ceva, nāmapaññattināmikā;  
Iccevaṃ vaṇṇanāmage, ñeyyattā tividhā katā.

**1081**Paramatthasaccaṃ nāma, paramatthāva tattha ca;  
Saccikaṭṭhasabhāvattā, avisaṃvādakā hi te.

**1082**Sammutisaccaṃ paññattidvayaṃ vohāravuttiyā;  
Lokasamaññādhippāyāvisaṃvādakabhāvato.

**1083**Iti saccadvayampetaṃ, akkhāsi purisuttamo;  
Tenāpi nāmasaṃviññū, vohareyyubhayampi vā.

Iti paññattivibhāge pabhedakathā niṭṭhitā.

Sattavīsatiso paricchedo.

## Aṭṭhavīsatiso paricchedo

### 28. Atthapaññattikathā

**1084**Tattha ca pubbāpariya-pavattakkhandhasammatā;  
Viññattindriyavipphāra-visesopanibandhanā.

**1085**Devayakkhamanussādi-nānābheda salakkhikā;  
Sattapaññatti nāmāyaṃ, svāyaṃ sattoti sammato.

**1086**Vaṭṭattayamupādāya,  
Khandhāyatanavuttiyā;  
Kārako vedako vāyaṃ,  
Sandhāvati bhava bhava.

- 1087 Tasmā saṃsāramāpanno, satto nāma sa puggalo;  
Ahamattāparā itthī, purisoti ca kappito.
- 1088 Svāyaṃ khandhādito satto, aññoti ca na vuccati;  
Khandhādivinimuttassa, sattasseva abhāvato.
- 1089 Khandhā khandhānamevāyaṃ, sattoti ca na vuccati;  
Khandhavohārato tassa, aññavohārasambhavā.
- 1090 Iccevaṃ khandhanānatte-kattamuttopi atthato;  
Tabbisesāvacarita-vohāro ca tu dissati.
- 1091 Tenāyaṃ puggalo satto, jāyatijjiyyatīti ca;  
Mīyatīti ca tassāyaṃ, saṃsāroti pavuccati.
- 1092 Mato jāto ca na sveva, khandhabhedopacārato;  
Nāparo sveva santānabhedābhāvopacārato.
- 1093 Nānattekattamiccevaṃ, puggalassopacārato;  
Ucchedasassatattaṃ vā, tasmā nopeti puggalo.
- 1094 Iccāyaṃ puggalo nāma, satto saṃsārakārako;  
Khandhādikamupādāya, paññattoti pavuccati.
- 1095 Tasmā puggalasaṅkhātā, saṃsāropanibandhanā;  
Sattapaññatti nāmāti, viññātabbā vibhāvinā.
- 1096 Ajjhattikā ca kesādikoṭṭhāsā bāhiresu ca;  
Bhūmipabbatapāsāṇatiṇarukkhalatādikā.
- 1097 Bhūtasambhāranibbattivibhāgaparikappitā;  
Tamupādāya **sambhārapaññattīti** pavuccati.
- 1098 Bhūtasambhārasaṅghānavibhāgaparikappitā;  
**Saṅghānapaññatti** nāma, thambhakumbhādikā matā.
- 1099 Bhūtasambhārasaṅghātavisesaparikappitā;  
**Saṅghātapaññatti** nāma, rathagehādikā matā.
- 1100 Bhūtasambhāravisesapariṇāmapakappitā;  
**Pariṇāmapaññattīti**, dadhibhattādikā matā.
- 1101 Itthamajjhatabhiddhā, dhammā sambhārasambhūtā;  
Santānavutti saṅketasiddhā paññatti pañcadhā.
- 1102 Tathā tathā samuppannavikappābhogasammatā;  
**Vikappapaññatti** nāma, kālākāsadisādikā.
- 1103 Taṃ taṃ nimittamāgamma, tatopaṭṭhānakappitā;  
**Upaṭṭhānapaññattīti**, paṭibhāgādikā matā.
- 1104 Visesākāramattāpi, atthantarapakappitā;

**Ākārapaññatti** nāma, viññattilahutādikā.

**1105** Tam tam kāraṇamāgamma, tathā vohārakappitā;  
**Vohārapaññatti** nāma, kathināpattiādikā.

**1106** Bālo yo so ca me attā,  
So bhavissāmi maṃ ca tu;  
Nicco dhuvo sassatoti-  
Ādikā pana sabbathā.

**1107** Tabbohāranimittānaṃ, abhāvepi pavattito;  
**Abhinivesapaññatti**, nāma titthiyakappitā.

**1108** Iccevaṃ lokasāsanatitthāyatanakappitā;  
Santānamuttasaṅketasiddhā atthāpi pañcadhā.

**1109** Saṅkānavuttisantānamuttabhedavasā dvidhā;  
Atthapaññatti nāmāyaṃ, dasadhā paridīpitā.

**1110** Iti vuttappakāresu, paññattatthesu paṇḍitā;  
Paññattimattaṃ sandhāya, voharanti yathākathaṃ.

**1111** Tadaññe pana bālā ca, titthiyāpi akovidā;  
Paññattimatidhāvitvā, gaṇhanti paramatthato.

**1112** Te tathā gahitākārā, aññāṇagahitā janā;  
Micchattābhiniviṭṭhā ca, vaḍḍhanti bhavabandhanaṃ.

**1113** Duvidhesupi atthesu, tasmā paṇḍitajātiko;  
Paramatthapaññattīsu, vibhāgamiti lakkhayeti.

Iti paññattivibhāge atthapaññattikathā niṭṭhitā.

Aṭṭhavīsatimo paricchedo.

## **Ekūnatīṃsatimo paricchedo**

### **29. Nāmapaññattikathā**

**1114** Nāmavohārasaṅketakāraṇopanibandhanā;  
Yathāvuttatthasaddānaṃ, antarā cintanā gatā.

**1115** **Nāmapaññatti** nāmāyaṃ, atthasaddavinissaṭṭā;  
Taṃdvayābaddhasaṅketañneyyākāropalakkhitā.

**1116** Yā gayhati nāmaghosagocaruppannavīthiyā;  
Pavattānantaruppanna-manodvārikavīthiyā.

**1117** Mañcapīṭhādisaddaṃ hi, sotaviññānavīthiyā;  
Sutvā tameva cintetvā, manodvārikavīthiyā.



- 1118Tato saṅketanipphannaṃ, nāmaṃ cintāya gayhati;  
Nāmapaññattiatthā tu, tato gayhanti sambhavā.
- 1119Saddanāmatthapaññattiparamatthavasena hi;  
Catudhā tividhā vātha, cintanā tattha icchitā.
- 1120Ītthamaṭṭhakathāmaggaṃ, vaṇṇentena hi dassito;  
Nayo ācariyeneti, vibhāgoyaṃ pakāsito.
- 1121Natthaññā kāci viññatti, vikārasahito pana;  
Saddova nāmapaññatti, iccekaccehi vaṇṇitaṃ.
- 1122Tadetaṃ nāmapaññattibhāvenekavidhampi ca;  
Neruttikayādicchakavasā nāmaṃ dvidhā bhava.
- 1123Saññāsu dhāturūpāni, paccayañca tato paraṃ;  
Katvā vaṇṇāgamādiñca, saddalakkhaṇasādhitaṃ.
- 1124Neruttikamudīrenti, nāmaṃ yādicchakaṃ padaṃ;  
Yadicchāya katamattaṃ, byañjanatthavivajjitaṃ.
- 1125Tividhampi tadanvatthakādimañcopacārimaṃ;  
Nibbacaṇatthasāpekkhaṃ, tatthānvatthamudīritaṃ.
- 1126Yadicchākatasāṅketāṃ, kādimañcopacārimaṃ;  
Atambhūtassa tabbhāvavohāroti pavuccati.
- 1127Tathā sāmāññanāmañca, guṇanāmañca kittimaṃ;  
Opaṭṭikamiccevaṃ, nāmaṃ hoti catubbidhaṃ.
- 1128Mahājanasammatañca, anvatthañceva tādisaṃ;  
Tṇi nāmāni candādināmaṃ tatthopapātikaṃ.
- 1129Yādicchakamāvatthikaṃ, nemittakamathāparaṃ;  
Liṅgikaṃ ruḷhikañceti, nāmaṃ pañcavidhaṃ bhava.
- 1130Yādicchakaṃ yathāvuḍḍhaṃ, vacchadammādikaṃ pana;  
Āvatthikaṃ nemittakaṃ, sīlavāpaññavādikaṃ.
- 1131Liṅgikaṃ diṭṭhaliṅgaṃ tu, daṇḍīchattītiādikaṃ;  
Ruḷhikaṃ lesamattena, ruḷhaṃ gomahiṃsādikaṃ.
- 1132Vijjamānāvijjamāna-paññattobhayamissitā;  
Vibhattā nāmapaññatti, chabbidhā hoti tattha hi.
- 1133Vijjamānapaññattīti, vijjamānatthadīpitā;  
Vuccati khandhāyatana-dhātupañcīndriyādikā.
- 1134Avijjamānapaññatti-nāmikā paramatthato;  
Avijjamānamañcādi, atthapaññattidīpitā.
- 1135Vijjamānena avijja-mānapaññattināmikā;

Tevijjo chaḷabhiñño ca, sīlavā paññavāpi ca.

- 1136**Avijjamānena vijja-mānapaññattināmikā;  
Itthirūpaṃ itthisaddo, itthicittantiādikā.
- 1137**Vijjamānena tu vijja-mānapaññattināmikā;  
Cakkhuviññāṇaṃ ca cakkhu-samphasso cevamādikā.
- 1138**Avijjamānenāvijja-mānapaññattināmikā;  
Khattiyaputto brāhmaṇa-putto iccevamādikā.
- 1139**Iti vuttānusārena, nāmapaññattiyā budho;  
Sarūpaṃ visayañceva, vibhāgañca vibhāvaye.
- 1140**Icevaṃ paramatthā ca, yathāvuttā catubbidhā;  
Paññatti duvidhā ceti, ñeyyatthā chabbidhā matāti.

Iti paññattivibhāge nāmapaññattikathā niṭṭhitā.

Ekūnatimsatimo paricchedo.

Niṭṭhito ca sabbathāpi paññattivibhāgo.

### Nigamanakathā

- 1141**Seṭṭhe **kañcivare** raṭṭhe, **kāverinagare** vare;  
Kule sañjātabhūtena, bahussutena ñāṇinā.
- 1142****Anuruddhena therena**, aniruddhayasassinā;  
Tambaraṭṭhe vasantena, nagare **tañjanā**make.
- 1143**Tattha **saṅghavisiṭṭhena**, yācitenā anākulaṃ;  
Mahāvihāravāsīnaṃ, vācanāmagganissitaṃ.
- 1144****Pakaranaṃ katattena, paramatthavinicchayaṃ;**

Iti anuruddhācariyena racito

Paramatthavinicchayo niṭṭhito.

Namo tassa bhagavato arahato sammāsambuddhassa

### Saccasaṅkhepo

### Ganthārambhakathā

1. Namassitvā tilokaggaṃ, ñeyyasāgarapāraguṃ;  
Bhavābhāvakaraṃ dhammaṃ, gaṇaṇca guṇasāgaraṃ.
2. Nissāya pubbācariyamataṃ atthāvirodhiṇaṃ;

Vakkhāmi saccasaṅkhepaṃ, hitaṃ kārakayoginaṃ.

## 1. Paṭhamo paricchedo

### Rūpasāṅkhepo

3. **Saccāni** paramatthaṅca, sammutiñcāti dve tahiṃ;  
Thaddhabhāvādinā ñeyyaṃ, saccaṃ taṃ **paramatthakaṃ**.
4. Sannivesavisesādiñeyyaṃ **sammuti** taṃ dvayaṃ;  
Bhāvasāṅketasiddhīnaṃ, tathattā saccamīritaṃ.
5. Paramattho sanibbānapañcakkhandhettha rāsito;  
Khandhattho ca samāsetvā, vuttotītādibhedanaṃ.
6. Vedanādīsupekasmīṃ, khandhasaddo tu ruḷhiyā;  
Samuddādekadeso tu, samuddādiravo yathā.
7. Tattha sītādiruppattā, **rūpaṃ** bhvāpānalānilaṃ;  
**Bhūtaṃ** kathinadavatāpacanīraṇabhāvakaṃ.
8. Cakkhu sotaṅca ghānaṅca, jivhā kāyo pabhā ravo;  
Gandho rasoja itthī ca, pumā vatthu ca jīvitaṃ.
9. Khaṃ jāti jaratā bhaṅgo, rūpassa lahutā tathā;  
Mudukammaññatā kāyavacīviññatti **bhūtikaṃ**.
10. Cakkhādī daṭṭhukāmādi hetukammajabhūtikā;  
Pasādā rūpasaddādī, cakkhuññādigocarā.
11. Ojā hi yāpanā itthipumaliṅgādi hetukaṃ;  
Bhāvadvayaṃ tu kāyaṃva, byāpi no sahavuttikaṃ.
12. Nissayaṃ vatthu dhātūnaṃ, dvinnaṃ kammajapālaṃ;  
Jīvitaṃ uppalādīnaṃ, udakaṃva t̥hitikkhaṇe.
13. Khaṃ rūpānaṃ paricchedo, jātiādittayaṃ pana;  
Rūpanibbatti pāko ca, bhedo ceva yathākkamaṃ.
14. Lahutādittayaṃ taṃ hi, rūpānaṃ kamato siyā;  
Adandhathaddhatā cāpi, kāyakammānukūlatā.
15. Abhikkamādi janakacittajassānilassa hi;  
Vikāro kāyaviññatti, rūpatthambhādikāraṇaṃ.
16. Vacībhedakacittena, bhūtabhūmivikāratā;  
Vacīviññattupādinnaghaṭṭanasseva kāraṇaṃ.
17. Rūpamabyākataṃ sabbaṃ, vippayuttamahetukaṃ;  
Anālambaṃ parittādi, iti **ekavidhaṃ** naye.

18. Ajjhattikāni cakkhādī, pañceteva pasādakā;  
Vatthunā vatthu tāneva, dvārā viññattibhī saha.
19. Sesam bāvīsati cekavīsa vīsati bāhiram;  
Appasādamavatthum ca, advārañca yathākkamaṃ.
20. Pasādā pañca bhāvāyu, indriyanindriyetaram;  
Vināpaṃ ādito yāva, rasā thūlam na cetaram.
21. Aṭṭhakaṃ avinibbhogaṃ, vaṇṇagandharasojaṃ;  
Bhūtaṃ taṃ tu vinibbhogamitaranti viniddise.
22. Aṭṭhārasādito rūpā, nipphannaṃ tu na cetaram;  
Phoṭṭhabbamāpavajjaṃ tu, bhūtaṃ kāme na cetaram.
23. Sekkhasappaṭighāsekkhapaṭighaṃ dvayavajjitaṃ;  
Vaṇṇaṃ taditaraṃ thūlam, sukhumañceti taṃ **tidhā**.
24. Kammajākammajaṃnevakammākammajato tidhā;  
Cittojautujādīnaṃ, vasenāpi tidhā tathā.
25. Diṭṭhaṃ sutam mutañcāpi, viññātaṃ vata cetasā;  
Ekamekañca pañcāpi, vīsati ca kamā siyuṃ.
26. Hadaṃ vatthu viññatti, dvāraṃ cakkhādipañcakaṃ;  
Vatthu dvārañca sesāni, vatthu dvārañca no siyā.
27. Nipphannaṃ rūparūpaṃ khaṃ, paricchedoṭṭha lakkhaṇaṃ;  
Jātiādittayaṃ rūpaṃ, vikāro lahutādikaṃ.
28. Yathā saṅkhatadhammānaṃ, lakkhaṇaṃ saṅkhatam tathā;  
Paricchedādikaṃ rūpaṃ, tajjātīmanatikkamā.
29. Kammacittānalāhārapaccayānaṃ vasenidha;  
Ñeyyā pavatti rūpassa, piṇḍānañca vasā kathaṃ.
30. **Kammajaṃ** sendriyaṃ vatthu, viññatti **cittajā** ravo;  
**Cittaggi** lahutādittayaṃ **cittānalanna**jaṃ.
31. Aṭṭhakaṃ jāti cākāso, **catujā** jaratā khayam;  
**Kutoci neva jātam** tappākabhedaṃ hi taṃ dvayaṃ.
32. Jātiyāpi na jātattaṃ, kutociṭṭhakathānāyā;  
Lakkhaṇābhāvato tassā, sati tasmim na niṭṭhiti.
33. Kammacittānalannehi, **piṇḍā** nava ca satta ca;  
Cattāro dve ca viññeyyā, sajīve dve ajīvake.
34. Aṭṭhakaṃ jīvitenāyunavakaṃ bhāvavatthunā;  
Cakkhādī pañca dasakā, kalāpā **nava kammajā**.
35. Suddhaṭṭhaviññattiyuttanavakopi ca dasako;

Suddhasaddena navako, lahutādidasekako.

36. Viññattilahutādīhi, puna dvādasa terasa;  
**Cittajā** iti viññeyyā, kalāpā **satta vā cha vā**.
37. Suddhaṭṭhaṃ saddanavakaṃ, lahutādidasekakaṃ;  
Saddenalahutādīhi, **caturotujakaṇṇikā**.
38. Suddhaṭṭhalahutādīhi, **annajā dvetime** nava;  
Satta cattāri dve ceti, **kalāpā vīsati dvibhi**.
39. Tayatṭhakā ca cattāro, navakā dasakā nava;  
Tayo dveko ca ekena, dasa dvīhi ca tīhi ca.
40. Catunnampi ca dhātūnaṃ, adhikaṃsavasenidha;  
**Rūpabhedo**tha viññeyyo, kammacittānalannaṃ.
41. Kesādimatthaluṅgantā, pathavaṃsāti vīsati;  
Pittādimuttakantā te, jalaṃsā dvādasāritā.
42. Yena santappanaṃ yena, jīraṇaṃ dahanāṃ tathā;  
Yenasitādipākoti, caturaṃsānalādhikā.
43. Uddhādhogamakucchiṭṭhā, koṭṭhāseyyaṅgasāri ca;  
Assāsoti ca viññeyyā, chaḷaṃsā vāyunissitā.
44. Pubbamuttakarīsañcudariyaṃ caturotujā;  
Kammā pācaggi cittamhā-ssāsoti chapi ekajā.
45. Sedasiṅghānikassu ca, kheḷo cittotusambhavā;  
Dvijā dvattimsa koṭṭhāsā, sesā eva catubbhavā.
46. Ekajesvādicatūsu, utujā caturatṭhakā;  
Jīvītanavako pācessāse cittabhavaṭṭhako.
47. Dvijesu manatejehi, dve dve honti panaṭṭhakā;  
Sesatejānilaṃsesu, ekekamhi tayo tayo.
48. Aṭṭhakojamanaggīhi, honti aṭṭhasu kammato;  
Aṭṭhāyunavakā evaṃ, ime aṭṭha catubbhavā.
49. Catuvīsasu sesesu, catujesuṭṭhakā tayo;  
Ekekamhi ca viññeyyā, piṇḍā cittānalannaṃ.
50. Kammajā kāyabhāvavhā, dasakāpi siyuṃ tahiṃ;  
Catuvīsasu aṃsesu, ekekamhi duve duve.
51. Pañcāpi cakkhusotādī, padesadasakā puna;  
Navakā saddasaṅkhātā, dveticcevaṃ kalāpato.
52. Tapaññāsa dasekañca, navuttarasatāni ca;  
Dasakā navakā ceva, aṭṭhakā ca siyuṃ kamā.

53. Sekapañcasatam kāye, sahasam tam pavattati;  
Paripuññindriye rūpaṃ, nipphanam dhātubhedato.
54. Cittuppāde siyūṃ rūpa-hetū kammādayo pana;  
Ṭhiti na **pāṭhe** cittaṃ, na bhaṅge rūpasambhavo.
55. “Aññathattam ṭhitassā”’ti, vuttattāva ṭhitikkhaṇam;  
Atthīti ce pabandhena, ṭhiti tattha pavuccati.
56. Atha vā tikkhaṇe kammaṃ, cittamattudayakkhaṇe;  
Utuojāttano ṭhāne, rūpahetū bhavanti hi.
57. Seyyassādikkhaṇe kāya-  
Bhāvavatthuvāsā tayo;  
Dasakā hontibhāvissa,  
Vinā bhāvaṃ duve siyūṃ.
58. Tato parañca kammaggicittajā te ca piṇḍikā;  
Aṭṭhakā ca duve pubbe, vuttavuttakkhaṇe vade.
59. Kālenāhārajaṃ hoti, cakkhādidasakāni ca;  
Catupaccayato rūpaṃ, sampiṇḍevaṃ pavattati.
60. Tam sattarasacittāyu, vinā viññattilakkhaṇam;  
Santatāmaraṇā rūpaṃ, jarādiphalamāvahaṃ.
61. Bhaṅgā sattarasuppāde, jāyate kammajaṃ na tam;  
Taduddham jāyate tasmā, takkhaṇā maraṇam bhava.
62. Āyukammubhayesaṃ vā, khayena maraṇam bhava;  
Upakkamena vā kesañcupacchedakakammunā.
63. Opaṭatikabhāvissa, dasakā satta kammajā;  
Kāme ādo bhavantaggi jāhi pubbeva bhūyate.
64. Ādikappanarānañca, apāye andhakassa ca;  
Badhirassāpi ādo cha, pubbevetarajā siyūṃ.
65. Tatthevandhabadhirassa, pañca honti abhāvino;  
Yuttiyā idha viññeyyā, pañca vā caturopi vā.
66. Cakkhādittayahīnassa, caturōva bhavantiti;  
Vuttam uparikkhitvā, gahetabbaṃ vijānatā.
67. Rūpe jīvitachakkañca, cakkhādisattakattayaṃ;  
Pañca cha utucittehi, pañca chāsāññaṃ bhava.
68. Pañcadhātvdīnīyamā, **pāṭhe** gandharasojanam;  
Nuppatti tattha bhūtānaṃ, aphoṭṭhabbapavattinaṃ.
69. Thaddhuñhīraṇabhāvova, natthi dhātvdikiccatō;  
Aññaṃ gandhādīnaṃ tesam, takkiccenopaladdhito.

70. Rūpe sappañighattādi, tattha ruppanatā viya;  
Ghaṭṭanañca ravuppādassaññatthasseva hetutā.
71. Icchitabbamimekantamevaṃ pāṭhāvirodhato;  
Atha vā tehi viññeyyaṃ, dasakaṃ navakaṭṭhakaṃ.
72. Sabbaṃ kāmabhava rūpaṃ, rūpe ekūnavīsati;  
Asaññīnaṃ dasa gandharasojaḥi ca brahmunāṃ.

Iti saccasaṅkhepe rūpasaṅkhepo nāma

Paṭhamo paricchedo.

## 2. Dutīyo paricchedo

### Khandhattayasaṅkhepo

73. **Vedanā** nubhavo tedhā, sukhadukkhamupekkhayā;  
Iṭṭhāniṭṭhānubhavanamajjhānubhavalakkhaṇā.
74. Kāyikaṃ mānaṃ dukkhaṃ, sukhopekkhā ca vedanā;  
Ekaṃ mānasameveti, pañcadhindriyabhedato.
75. Yathā tathā vā saññānaṃ, **saññā** satinibandhanaṃ;  
Chadhā chadvārasambhūtapassajānaṃ vasena sā.
76. **Saṅkhārā** cetanā phasso,  
Manakkārāyu saṅghiti;  
Takko cāro ca vāyāmo,  
Pīti chandodhimokkhako.
77. Saddhā sati hirottappaṃ, cāgo mettā mati puna;  
Majjhataṭā ca passaddhī, kāyacittavasā duve.
78. Lahutā mudukammaññapāguññamujutā tathā;  
Dayā mudā micchāvācā, kammantājīvasaṃvaro.
79. Lobho doso ca moho ca, diṭṭhi uddhaccameva ca;  
Ahirīkaṃ anottappaṃ, vicikicchitameva ca.
80. Māno issā ca maccheraṃ, kukkuccaṃ thinamiddhakaṃ;  
Iti eteva paññāsa, saṅkhārakkhandhasaññitā.
81. Byāpāro cetanā phasso, phusaṃ saraṇaṃ taḥiṃ;  
Manakkāro pālanāyu, samādhi avisāratā.
82. Āropanānumajjaṭṭhā, takkacārā pañhanā;  
Vīriyaṃ pīnanā pīti, chando tu kattukāmatā.
83. Adhimokkho nicchayo saddhā,  
Pasādo saraṇaṃ sati;

Hirī pāpajigucchā hi,  
Ottappaṃ tassa bhīrutā.

84. Alaggo ca acaṇḍikkaṃ, cāgo mettā mati pana;  
Yāthāvabodho majjhataṃ, samavāhitalakkhaṇaṃ.
85. Cha yugāni kāyacittadaragāravathaddhatā-  
Akammaññattagelaññakuṭilānaṃ vinodanā.
86. Tānuddhatādithinādidiṭṭhādīnaṃ yathākkamaṃ;  
Sesakādiasaddhādīmāyādīnaṃ vipakkhino.
87. Dukkhāpanayanakāmā, dayā modā pamodanā;  
Vacīduccaritādīnaṃ, virāmo viratittayaṃ.
88. Lobho doso ca moho ca,  
Gedhacaṇḍamanandhanā;  
Kamena diṭṭhi duggāho,  
Uddhaccaṃ bhantataṃ mataṃ.
89. Ahirīkamalajjattaṃ, anottappamatāsatā;  
Saṃsayo vicikicchā hi, māno unnatilakkhaṇo.
90. Parassakasampattīnaṃ,  
Usūyā ca nigūhanā;  
Issāmaccherakā tāpo,  
Katākatassa socanā.
91. Thinaṃ cittassa saṅkoco, akammaññattatā pana;  
Middhamiccevametesāṃ, **lakkhaṇaṇica** naye budho.
92. Vedanādisamādhantā, satta **sabbagasaññitā**;  
Takkādiadhimokkhantā, cha **pakiṇṇakanāmakā**.
93. Saddhādayo viramantā, **araṇā** pañcavīsati;  
Lobhādīmiddhakantāni, **saraṇāni** catuddasa.
94. Issāmaccherakukkuccadosā kāme dayā mudā;  
Kāme rūpe ca sesā cha-cattālīsa tidhātujā.
95. Chandanicchayamajjhattamanakkārā sauddhavā;  
Dayādī pañca mādī, cha **yevāpana** soḷasa.
96. Chandādī pañca **niyatā**, tatthekādasa netarā;  
Ahirīkamanottappaṃ, lokanāsanakaṃ dvayaṃ.
97. Ete dve mohuddhaccāti, cattāro **pāpasabbagā**;  
Lokapālādukaṃ vuttaṃ, hiriottappanāmakāṃ.
98. Ārammaṇūpanijjhānā, **jhānaṅgā** takkacārakā;  
Pīti ekaggatā ceti, satta vittittayena ve.



99. Saddhā sati matekagga-dhiti lokavināsakā;  
Pālakā nava cetāni, **balāni** avikampato.
100. Ettha saddhādipañcāyu, katvātra catudhā matim;  
Vedanāhi dvisattete, indriyānādhipaccato.
101. Manarūpindriyehete, sabbe **indriyanāmakā**;  
Bāvīsati bhavantāyudvayaṃ katvekasāṅghaṃ.
102. Diṭṭhīhekaggatātakkasatīviratiyo **pathā**;  
Aṭṭha niyyānato ādicaturo bhivāna dvādasā.
103. Phasso ca cetanā ceva,  
Dvevetthāhāraṇattato;  
**Āhārā** manavojāhi,  
Bhavanti caturthavā.
104. **Hetu** mūlaṭṭhato pāpe,  
Lobhādittayamīritam;  
Kusalābyākate cāpi,  
Alobhādittayam tathā.
105. Diṭṭhilobhadusā kammaṭṭhāpāyassa maggato;  
Tabbipakkhā sugatīyā, tayoti cha pathīritā.
106. Passaddhādiyugāni cha, vaggattā yugaḷāni tu;  
**Upakārā** sati dhī ca, bahūpakārabhāvato.
107. **Oghā**haraṇato **yogā**,  
Yojanenābhavaggato;  
Savanenāsavā diṭṭhi-  
Mohejettha dudhā lubho.
108. Daḷhaggāhena diṭṭhejā, **upādānaṃ** tidhā tahim;  
Diṭṭhi dosena te ganthā, ganthato diṭṭhiha dvidhā.
109. Pañcāvaraṇato kāma-kaṅkhādosuddhavaṃ tapo;  
Thinamiddhañca mohena, cha vā **nīvaraṇānitha**.
110. Katvā tāpuddhavaṃ ekaṃ, thinamiddhañca vuccati;  
Kiccassāhārato ceva, vipakkhassa ca lesato.
111. Diṭṭhejuddhavadosaṇḍha-  
Kaṅkhāthinuṇṇatī dasa;  
Lokañāsāyugenete,  
**Kilesā** cittaḷlesato.
112. Lobhadosaṃmūhamāna-diṭṭhikaṅkhissamaccharā;  
**Samyojanāni** diṭṭhejā, bhivā bandhanato dudhā.
113. Tāni mohuddhavaṃmānakāṅkhādosejadiṭṭhiyo;  
Dudhādiṭṭhi tidhā lobhaṃ, bhivā sutte dasīritā.

114. Diṭṭhilobhamūhamānadosakañkhā tahiṃ dudhā;  
Katvā lobhamime sattānusayā samudīritā.
115. Diṭṭhi eva parāmāso, ñeyyo evaṃ samāsato;  
Attho sañkhārakkhandhassa, vutto vuttānusārato.

Iti saccasañkhepe khandhattayasañkhepo nāma

Dutiyo paricchedo.

### 3. Tatiyo paricchedo

#### Cittapavattiparidīpano

116. Cittam visayaggāhaṃ taṃ, pākāpākadato dudhā;  
Kusalākusalaṃ pubbaṃ, paramabyākataṃ mataṃ.
117. Kusalaṃ tattha kāmādibhūmito catudhā siyā;  
Aṭṭha pañca cattāri ca, cattāri kamato kathaṃ.
118. Somanassamatiyuttamasañkhāramanamekaṃ;  
Sasañkhāramanañcekaṃ, tathā hīnamatidvayaṃ.
119. Tathopekkhāmatiyuttaṃ, matihīnanti aṭṭhadhā;  
Kāmāvacarapuññettha, bhijjate vedanādito.
120. Dānaṃ sīlañca bhāvanā, pattidānānumodanā;  
Veyyāvaccāpacāyañca, desanā suti diṭṭhiju.
121. Etesvekamayaṃ hutvā, vatthum nissāya vā na vā;  
Dvārahīnādiyonīnaṃ, gatiyādippabhedavā.
122. Tikālikaparittādigocaresvekamādiya;  
Udeti kalamuttaṃ vā, matihīnaṃ vināmalaṃ.
123. Chagocaresu rūpādipañcakaṃ pañca gocarā;  
Sesaṃ rūpamarūpañca, paññatti chaṭṭhagocarō.
124. Ñāṇayuttavaraṃ tattha, datvā sandhiṃ tihetukaṃ;  
Pacchā paccati pākānaṃ, pavatte aṭṭhake duve.
125. Tesuyeva nihīnaṃ tu, datvā sandhiṃ duhetukaṃ;  
Deti dvādasa pāke ca, pavatte dhīyutaṃ vinā.
126. Evaṃ dhīhīnamukkaṭṭhaṃ, sandhiyañca pavattiyam;  
Hīnaṃ panubhayatthāpi, hetuhīneva paccati.
127. Kāmasugatiyaṃyeva, bhavabhogadadaṃ idaṃ;  
Rūpāpāye pavatteva, paccate anurūpato.
128. Vitakkacārapīṭhi, sukhekaggayutaṃ manam;

Ādi cārādipītādisukhādīhi param̐ tayam̐.

129. Upekkhekaggaṭāyantamārappañcevamaṅgato;  
Pañcadhā **rūpapuññaṃ** tu, hotārammaṇato pana.
130. Ādissāsūbhāmantassu-  
Pekkhā mettādayo tayo;  
Ādo catunnaṃ pañcannaṃ,  
Sassāsakasiṇāni tu.
131. Nabhatammaṇatassuññatacittacatuḅgocare;  
Kammaṇātikkaṃmār**rūpapuññaṃ** hoti catubbidham̐.
132. Amalam̐ santimārabbha, hoti tam̐ maggayogato;  
Catudhā pādakajjhānabhedato puna vīsati.
133. Diṭṭhikaṅkhānudaṃ ādi, kāmadosaṭanūkaṃ;  
Param̐ param̐ taducchedī, antam̐ sesakaṇāsakaṃ.
134. Evaṃ bhūmittayam̐ puññaṃ, bhāvanāmayametta hi;  
Paṭhamam̐ vatthum̐ nissāya, dutiyam̐ ubhayenapi.
135. Tatiye ādi nissāya,  
Sesā nissāya vā na vā;  
Honti ādivayam̐ tatha,  
Sādhenti sakabhūbhavam̐.
136. Sādhentānuttaram̐ santim̐, abhiññā paṇidheva tu;  
Jhānūdayaphalattā na, phaladānāpi sambhavā.
137. Nāññabhūphaladaṃ kammaṃ, rūpapākassa gocarō;  
Sakammagocaroyeva, na caññoyamasambhavo.
138. Pāpam̐ kāmikamevekaṃ, hetuto tam̐ dvidhā puna;  
Mūlato tividdham̐ lobha-dosaṃmohavasā siyā.
139. Somaṇassakudiṭṭhīhi, yuttamekamaṇākharam̐;  
Saṇākhāraṃmañcekaṃ, hīnadiṭṭhidvayam̐ tathā.
140. Upekkhādiṭṭhiyuttampi, tathā diṭṭhiviyuttakaṃ;  
Vedanādiṭṭhiādīhi, **lobhamūle**vamaṭṭhadhā.
141. Sadukkhadosāṇākhāram̐, itaram̐ **dosamūlakaṃ**;  
**Mohamūl**ampi sopekkham̐, kaṅkhuddhaccayutaṃ dvidhā.
142. Tatha dosadvayam̐ vatthum̐, nissāyevitare pana;  
Nissāya vā na vā honti, vadhādisahitā katham̐.
143. Pharussavadhabyāpādā, sadosena salobhato;  
Kudiṭṭhimethunābhijjhā, sesā kammaṃpathā dvibhi.
144. Sandhim̐ catūsvapāyesu, deti sabbattha vuttiyam̐;

- Paccate gocaraṃ tassa, sakalaṃ amalaṃ vinā.
145. Abyākataṃ dvidhā pāka-kriyā tathādi bhūmito;  
Catudhā kāmapākettha, puññapākādito dudhā.
146. Puññapākā dvidhāhetu-sahetūti dviraṭṭhakā;  
Ahetū pañca ñāṇāni, gahaṇaṃ tīraṇā ubho.
147. Kāyañāṇaṃ sukhī tattha, somanassādi tīraṇaṃ;  
Sopekkhāni cha sesāni, sapuññaṃva sahetukaṃ.
148. Kevalaṃ sandhibhavaṅga-tadālbacutibbasā;  
Jāyate sesametassa, pubbe vuttanayā naye.
149. Manussavinipātīnaṃ, sandhādi antatīraṇaṃ;  
Hoti aññena kamma, sahetupī ahetunaṃ.
150. Pāpajā puññajāhetu-samā tīraṃ vinādikaṃ;  
Sadukkhaṃ kāyaviññāṇaṃ, anīṭṭhārammaṇā ime.
151. Te sātagocarā tesu, dviṭṭhānaṃ āditīraṇaṃ;  
Pañcaṭṭhānāparā dve te, parittavisayākhilā.
152. Sampaṭicchadvipañcannaṃ, pañca rūpādayo tahiṃ;  
Paccuppanāva sesānaṃ, pākānaṃ cha tikālikā.
153. Rūpārūpavipākānaṃ, sabbaso sadisaṃ vade;  
Sakapuññaena sandhādi-sakiccattayataṃ vinā.
154. Samānuttarapākāpi, sakapuññaena sabbaso;  
Hitvā makkhamukhaṃ taṃ hi, dvidhā magge tidhā phale.
155. Kriyā tidhāmalābhāvā,  
Bhūmito tattha kāmikā;  
Dvidhā hetusahetūti,  
Tidhāhetu tahiṃ kathaṃ.
156. Āvajjahasitāvajjā, sopekkhasukhupekkhavā;  
Pañcachakāmāvacarā, sakalārammaṇā ca te.
157. Saheturūparūpā ca, sakapaññaṃvārahato;  
Vuttiyā na phale pupphaṃ, yathā chinnalatā phalaṃ.
158. Anāsevanayāvajja-dvayaṃ puthujjanassa hi;  
Na phale vattamānampi, moghapupphaṃ phalaṃ yathā.
159. Tisatta dvicha chattīmsa, catupañca yathākkamaṃ;  
Puññaṃ pāpaṃ phalaṃ kriyā, **ekūnanavutṭividhaṃ**.
160. Sandhi bhavaṅgamāvajjaṃ, dassanādikapañcakaṃ;  
Gahatīraṇavotṭhabba-javataggocaraṃ cuti.

161. Iti esaṃ dvisattannaṃ, kiccavuttivasādhunā;  
Cittappavatti chadvāre, saṅkhepā vuccate kathaṃ.
162. Kāme sarāginaṃ kamma-nimittādi cutikkhaṇe;  
Khāyate manasoyeva, sesānaṃ kammagocaro.
163. Upaṭṭhitam tamārabba, pañcavāraṃ javo bhava;  
Tadālambaṃ tato tamhā, cuti hoti javehi vā.
164. Avijjātaṅhāsāṅkhāra-sahajehi apāyinaṃ;  
Visayādīnavacchādi-namanakkhipakehi tu.
165. Appahīnehi sesānaṃ, chādanaṃ namanampi ca;  
Khipakā pana saṅkhārā, kusalāva bhavantiha.
166. Kiccattaye kate evaṃ, kammadīpitagocare;  
Tajjaṃ vatthum saḥuppannaṃ, nissāya vā na vā taḥiṃ.
167. Tajjā sandhi siyā hitvā, antarattaṃ bhavantare;  
Antarattaṃ vinā dūre, paṭisandhi kathaṃ bhava.
168. Iheva kammataṅhādi-hetuto pubbacittato;  
Cittaṃ dūre siyā dīpa-paṭighosādikaṃ yathā.
169. Nāsaññā cavamānassa, nimittaṃ na cutī ca yaṃ;  
Uddham sandhinimittaṃ kiṃ, paccayopi kanantaro.
170. Pubbabhave cuti dāni, kāme jāyanasandhiyā;  
Aññacittantarābhāvā, hotānantarakāraṇaṃ.
171. Bhavantarakataṃ kammaṃ, yamokāsaṃ labhe tato;  
Hoti sā sandhi teneva, upaṭṭhāpitagocare.
172. Yasmā cittavirāgattaṃ, kātuṃ nāsakkhi sabbaso;  
Tasmā sānusayasseva, punuppatti siyā bhava.
173. Pañcadvāre siyā sandhi, vinā kammaṃ dvigocare;  
Bhavasandhānato sandhi, bhavaṅgaṃ taṃ tadaṅgato.
174. Tamevante cuti tasmiṃ, gocare cavanena tu;  
Ekasantatiyā evaṃ, uppattiṭṭhitibhedakā.
175. Athaññārammaṇāpātha-gate cittantarassa hi;  
Hetusaṅkhyam bhavaṅgassa, dvikkhattum calanaṃ bhava.
176. Ghaṭṭite aññavatthumhi, aññanissitakampanaṃ;  
Ekābaddhena hotīti, sakkharopamayā vade.
177. Manodhātukriyāvajjaṃ, tato hoti sakiṃ bhava;  
Dassanādi sakadvāra-gocaro gahaṇaṃ tato.
178. Santīraṇaṃ tato tamhā, voṭṭhabbañca sakiṃ tato;

Sattakkhattuṃ javo kāme, tamhā tadanurūpatō.

179. Tadālabadvikaṃ tamhā, bhavaṅgaṃtimahantari;  
Javā mahante voṭṭhabbā, paritte nitare maṇaṃ.
180. Voṭṭhabbassa paritte tu, dvattikkhattuṃ javo viya;  
Vadanti vuttiṃ taṃ **pāṭhe**, anāsevanato na hi.
181. Niyamopidha cittassa, kammādiniamo viya;  
Ñeyyo ambopamādīhi, dassavā taṃ sudīpaye.
182. Manodvāretarāvajjaṃ, bhavaṅgamhā siyā tato;  
Javokāme vibhūte tu, kāmavhe visaye tato.
183. Kāmīnaṃ tu tadālabbaṃ, bhavaṅgaṃ tu tato siyā;  
Avibhūte paritte ca, bhavaṅgaṃ javato bhava.
184. Avibhūte vibhūte ca, paritte aparittake;  
Javāyeva bhavaṅgaṃ tu, brahmānaṃ catugocare.
185. Mahaggataṃ panārabba, javite dosasaṃyute;  
Viruddhattā bhavaṅgaṃ na, kiṃ siyā sukhasandhino.
186. Upekkhātīraṇaṃ hoti, parittenāvajjaṃ kathaṃ.  
Niyamo na vināvajjaṃ, maggato phalasambhavā.
187. Mahaggatāmalā sabbe, javā gotrabhuto siyuṃ;  
Nirodhā ca phaluppatti, bhavaṅgaṃ javanādito.
188. Sahetusāsavā pākā, tīraṇā dve cupekkhakā;  
Ime sandhi bhavaṅgā ca, cuti cekūnavīsati.
189. Dve dve āvajjanādīni, gahaṇantāni tīṇi tu;  
Santīraṇāni ekaṃva, voṭṭhabbamitināmakāṃ.
190. Aṭṭha kāmamahāpākā, tīṇi santīraṇāni ca;  
Ekādasa bhavantete, tadārammaṇanāmakā.
191. Kusalākusalaṃ sabbāṃ, kriyā cāvajjavajjitā;  
Phalāni pañcapaññāsa, javanāni bhavantime.

Iti saccasaṅkhepe cittapavattiparidīpano nāma

Tatiyo paricchedo.

## 4. Catuttho paricchedo

Viññāṇakkhandhapakiṇṇakanayasāṅkhepo

192. Ekadhādinayodāni, paṭuvaḍḍhāya yoginaṃ;  
Vuccate visayaggāhā, sabbamekavidhaṃ maṇaṃ.

193. Ekāsīti tibhūmaṭṭhaṃ, lokiyaṃ suttarañca taṃ;  
Sesaṃ lokuttaraṃ aṭṭha, anuttarañcītī **dvidhā**.
194. Lokapākakriyāhetū, cekahetūti sattahi;  
Tiṃsa nādhipatī sādhi-patī sesātipī dvidhā.
195. Chandacittihavīmaṃsā-svekena matimā yutaṃ;  
Vinā vīmaṃsamekena, ñāṇahīnamanaṃ yutaṃ.
196. Parittānappamāṇāni, mahaggatamanāniti;  
**Tidhā** chanava caṭṭha ca, tinavā ca yathākkamaṃ.
197. Dvipañca cittaṃ viññāṇaṃ, tisso hi manodhātuyo;  
Chasattati manoñāṇa-dhātūti **tividhā** puna.
198. Ekārammaṇacittāni, anabhiññaṃ mahaggataṃ;  
Amalaṃ pañcaviññāṇaṃ, navapañca bhavantime.
199. Pañcālambaṃ manodhātu, sābhiññaṃ kāmadhātujam;  
Sesaṃ chārammaṇaṃ taṃ hi, tecattālīsa saṅkhyato.
200. Kāmapākadusā cādi-maggo cādikriyā duve;  
Rūpā sabbetirūpe na, tecattālīsa hontime.
201. Vināva rūpenārappa-vipākā caturo siyuṃ;  
Dvecattālīsa sesāni, vattantubhayathāpi ca.
202. **Catudhāpi** ahetvekadvihetukatihetuto;  
Aṭṭhārasa dve bāvīsa, sattacattālīsaṃ bhava.
203. Kāme javā savoṭṭhabbā, abhiññādvayameva ca;  
Rūpiriyāpathaviññattikarāme caturaṭṭhakā.
204. Chabbīsati javā sesā, karā rūpiriyāpathe;  
Dvipañcamaṇavajjāni, kāmarūpaphalāni ca.
205. Ādikriyāti cekūna-vīsa rūpakarā ime;  
Sesā cuddasa bhinnāvacutī sandhi na tīṇipi.
206. Ekakiccādito **pañca-vidhā** tatthekakiccakā;  
Dvipañcacittaṃ javanaṃ, manodhātutuṭṭhasaṭṭhime.
207. Dvikiccādīni voṭṭhabbaṃ, sukhatīraṃ mahaggate;  
Pākā kāmamahāpākā, sesā tīrā yathākkamaṃ.
208. Dassanaṃ savanaṃ diṭṭhaṃ, suttaṃ ghāyanakādikaṃ;  
Tayaṃ mutaṃ manodhātuttayaṃ diṭṭhaṃ suttaṃ mutaṃ.
209. Diṭṭhaṃ suttaṃ mutaṃ ñātaṃ, sābhiññaṃ sesakāmikaṃ;  
Viññātārammaṇaṃ sesamevaṃ **chabbidhamīraye**.
210. **Sattadhā** sattaviññādhātūnaṃ tu vasā bhava;

Vuccatedāni tasseva, anantaranayakkamo.

211. Puññesvādidvayā kāme, rūpapuññamanantakaṃ;  
Tappādakuttarānantam, bhavaṅgañcāditīraṇam.
212. Dutiyantadvayā tīram, bhavaṅgam tatiyadvayā;  
Te anantāmalam puññam, majjhattaṅca mahaggatam.
213. Sabbavāre sayañceti, tepaññāsa tisatta ca;  
Tettiṃsa ca bhavantete, rūpesu pana puññato.
214. Tappākā ca matiyutta-kāmapākā sayam dasa;  
Āruppapuññato te ca, sako pāko sayam puna.
215. Adhopākā ca antamhā, tatiyaṅca phalantime;  
Dasekadvitipañcāhi, maggā cekam sakam phalam.
216. Lobhamūlekahetūhi, antakāmasubhā viya;  
Satta dosadvayā kāma-bhavaṅgapekkhavā sayam.
217. Mahāpākatihetūhi, sāvajjā sabbasandhiyo;  
Kāmaccutīhi sesāhi, sāvajjā kāmasandhiyo.
218. Kāmaccuti ca voṭṭhabbam, sayaṅca sukhatīrato;  
Paṭicchā tīraṇāni dve, itarā sakatīraṇam.
219. Sakam sakam paṭiccham tu, viññāṇehi dvipañcahi;  
Rūpapākehi sāvajjā, sandhiyohetuvajjitā.
220. Arūpapākesvādimhā, kāmapākā tihetukā;  
Antāvajjampi cārappa-pākā ca nava hontime.
221. Dutiyādīhi teyeva, adhopākam vinā vinā;  
Phalā tihetukā pākā, sayañceti catuddasa.
222. Dvipaṅcādikriyā hāsā, sayañcārappavajjitā;  
Ñāṇayuttabhavaṅgāti, dasa voṭṭhabbato pana.
223. Kāme javā bhavaṅgā ca, kāmarūpe sayampi vā;  
Navapaṅca sahetādi-kiriyadvayato pana.
224. Sayam bhavaṅgamatimā, rūpe sātakriyāpi ca;  
Tappādakantimañceti, bāvīsa tatiyā pana.
225. Te ca pākā sayañcante, phalam majjhā mahaggatā;  
Kriyāti vīsati honti, sesadvīhi dukehi tu.
226. Vuttapākā sayañceti, cuddasevam kriyājavā;  
Tadārammaṇam muñcitvā, paṭṭhānanayato naye.
227. Atha sātakriyā sātam, sesam sesakriyāpi ca;  
Tadālambaṃ yathāyogaṃ, vade aṭṭhakathānaya.



228. Mahaggaṭā kriyā sabbā, sakapuññasamā tahiṃ;  
Antā phalantimaṃ hoti, ayameva visesatā.
229. Imassānantarā dhammā, ettakāti pakāsītā;  
Imaṃ panettakehīti, vuccateyaṃ nayodhunā.
230. Dvīhi kāmajavā tīhi, rūpārūpā catūhi tu;  
Maggā chahi phalādi dve, sesā dve pana sattahi.
231. Ekamhā dasa pañcahi, paṭicchā sukhatīraṇaṃ;  
Kāme dosakriyāhīna-javehi gahato sakā.
232. Kāme javā kriyāhīnā, tadālabhā savotṭhabbā;  
Sagahañceti tettiṃsacittehi paratīraṇā.
233. Kāmapuññasukhītirakaṇhavoṭṭhabbato dvayaṃ;  
Mahāpākantimaṃ hoti, anāruppacutīhi ca.
234. Sattatiṃsa panetāni, ettha hitvā dusadvayaṃ;  
Etehi pañcatīṃsehi, jāyate dutiyadvayaṃ.
235. Sukhatīrādi sattete, kriyato cāpi sambhavā;  
Ñeyyā sesāni cattāri, bhavaṅgena ca labbhare.
236. Maggavajjā savotṭhabbasukhitīrajavākhilā;  
Cutīti navakaṭṭhāhi, tatiyadvayamādise.
237. Etehi dosavajjehi, sattatīhitaradvayaṃ;  
Rūpapākā vināruppapākāhetuduhetuke.
238. Tehevekūnasatṭhīhi, hontiruppādikaṃ vinā;  
Hāsāvajje jave rūpe, aṭṭhachakkehi tehi tu.
239. Sādhopākehi teheva, dutiyādīni attanā;  
Adhodhojavahīnehi, ekekūnehi jāyare.
240. Sukhatīrabhavaṅgāni, sayañcāti tisattahi;  
Antāvajjaṃ anāruppabhavaṅgehi panetaraṃ.
241. Vuttānantarasāṅkhāto, nayo dāni anekadhā;  
Puggalādippabhedāpi, pavatti tassa vuccate.
242. Puthujjanassa jāyante, diṭṭhikaṅkhāyutāni ve;  
Sekkhassevāmālā satta, anantānitarassa tu.
243. Antāmalaṃ anāvajjakriyā cekūnavīsati;  
Kusalākusalā sesā, hontī sekkhaputhujjane.
244. Itarāni panāvajjadvayaṃ pākā ca sāsavā;  
Tiṇṇannampi siyuṃ evaṃ, pañcadhā sattabhedato.
245. Kāme soḷasa ghānādittayaṃ dosamahāphalā;

- Rūpārūpe sapākoti, pañcavīsati ekajā.
246. Kāmapākā ca sesādimaggo ādikriyā duve;  
Rūpe javāti bāvīsa, dvijā sesā tidhātujā.
247. Vitthāropi ca bhūmīsu, ñeyyo kāmasubhāsubhaṃ;  
Hāsavajjamahetuñca, apāye sattatiṃsime.
248. Hitvā mahaggate pāke, asīti sesakāmisu;  
Cakkhusotamanodhātu, tīraṇaṃ voṭṭhabbampi ca.
249. Dosahīnājavā so so, pāko rūpe anāriye;  
Pañcasatṭhi chasatṭhī tu, parittābhādīsu tīsu.
250. Ādipañcāmalā kañkhādiṭṭhiyutte vinā tahiṃ;  
Teyeva pañcapaññaṣa, jāyare suddhabhūmīsu.
251. Ādimaggadusāhāsarūpahīnājavā sako;  
Pāko voṭṭhabbanañcāti, titālīsaṃ siyuṃ nabhe.
252. Adhodhomanavajjā te,  
Pāko ceva sako sako;  
Dutiyādīsu jāyante,  
Dve dve unā tato tato.
253. Arūpesvekamekasmīṃ, rūpesvādittikepi ca;  
Tike ca tatiye ekaṃ, dve honti dutiyattike.
254. Antimaṃ rūpapākaṃ tu, chasu vehapphalādisu;  
Kāmasugatiyaṃyeva, mahāpākā pavattare.
255. Ghāyanādittayaṃ kāme, paṭighadvayameva ca;  
Sattarasesu paṭhamaṃ, amalaṃ mānavādisu.
256. Ariyāpāyavajjesu, caturodipphalādikā;  
Apāyāruppavajjesu, hāsarūpasubhakriyaṃ.
257. Apāyuddhattayaṃ hitvā, hotākāsubhakriyaṃ;  
Tathāpāyuddhadve hitvā, viññāṇakusalakriyaṃ.
258. Bhavaggāpāyavajjesu, ākiñcaññasubhakriyaṃ;  
Diṭṭhikañkhāyutā suddhe, vinā sabbāsu bhūmīsu.
259. Amalāni ca tīṇante,  
Bhavagge ca subhakriyā;  
Mahākriyā ca hontete,  
Terasevānapāyīsu.
260. Anāruppe manodhātu, dassanaṃ savatīraṇaṃ;  
Kāme aniṭṭhasaṃyoge, brahmānaṃ pāpajaṃ phalaṃ.
261. Voṭṭhabbaṃ kāmapuññañca, diṭṭhihīnaṃ sauddhavaṃ;

Cuddasetāni cittāni, jāyare tiṃsabhūmisu.

262. Indriyāni duve antadvayavajjesvahetusu;  
Tīṇi kaṅkhetarāhetupāpe cattāri terasa.
263. Cha ñāṇahīne tabbantasāsave satta nimmale;  
Cattālīse panaṭṭhevaṃ, ñeyyamindriyabhedato.
264. Dve balāni ahetvantadvaye tīṇi tu saṃsaye;  
Cattāritarapāpe cha, hontī sesaduhetuke.
265. Ekūnāsīticittesu, matiyuttesu satta tu;  
Abalāni hi sesāni, vīriyantaṃ balaṃ bhava.
266. Ajhānaṅgāni dvepañca, takkantā hi tadaṅgatā;  
Jhāne pītivirate ta-ppādaṃ amale duve.
267. Tatiye sāmāle tīṇi, cattāri dutiye tathā;  
Kāme nippīṭike cāpi, pañcaṅgāni hi sesake.
268. Maggā dve saṃsaye diṭṭhihīnasesāsuhē tayo;  
Duhetuketare suddhajjhāne ca dutiyādiṃke.
269. Cattāro pañca paṭṭhamajjhānakāmatihetuke;  
Sattāmale dutiyādi-jjhāniṃke aṭṭha sesake.
270. Hetvantato hi maggassa, amaggaṅgamahetukaṃ;  
Chamaggaṅgayutaṃ natthi, balehipi ca pañcahi.
271. Sukhītiratadālambaṃ, iṭṭhe puññajupekkhavā;  
Iṭṭhamajjhetaṃ hoti, tabbipakkhe tu gocare.
272. Dosadvayā tadālambaṃ, na sukhikriyato pana;  
Sabbhaṃ subhāsuhē naṭṭhe, tadālambaṇavācato.
273. Kriyato vā tadālambaṃ, sopekkhāya sukhī na hi;  
Itarā itarañceti, idaṃ suṭṭhupalakkhaye.
274. Sandhidāyakakammena, tadālambapavattiyāṃ;  
Niyāmanaṃ javassāha, kammassevaññakammato.
275. Citte cetasikā yasmim,  
Ye vuttā te samāsato;  
Vuccare dāni dvepañce,  
Sabbagā satta jāyare.
276. Takkacārādhimokkhehi, teyeva jāyare dasa;  
Pañcaṭṭhānāmanodhātu-pañcaṃke sukhatīraṇe.
277. Ete pītādhikā hāse, vāyāmena ca dvādhikā;  
Voṭṭhabbanepi eteva, dasekā pītivajjitā.

278. Pāpasādhāraṇā te ca, tipaṇcuddhaccasaññute;  
Kaṅkhāyuttepi eteva, sakaṅkhā hīnanicchayā.
279. Kaṅkhāvajjā paneteva, sadosacchandanicchayā;  
Sattarasa duse hontī, salobhantadvaye pana.
280. Dosavajjā salobhā te,  
Tatīyādidukesu te;  
Diṭṭhipītidvayādhikā,  
Dvinavekūnavīsati.
281. Pīticārappanāvajjā, ādito yāva tiṃsime;  
Uppajjanti catutthādi-rūpārūpamanesu ve.
282. Pīticāravitakkesu,  
Ekena dvititikkamā;  
Tatīyādīsu teyeva,  
Tiṃsekadvetayodhikā.
283. Etevādidvaye kāme, dutiyādidukesu hi;  
Matim pītim matippītim, hitvā te kamato siyuṃ.
284. Jhāne vuttāva tajjhānikāmale viratādhikā;  
Tatthetā niyatā vittim, vade sabbattha sambhavā.
285. Kāmapuññesu paccekaṃ,  
Jayantāniyatesu hi;  
Viratīyo dayāmodā,  
Kāme sātāsubhakriye.
286. Majjhattepi vadanteke, sahetukasubhakriye;  
Sukhajjhānepi paccekaṃ, hontiyeva dayāmodā.
287. Thinamiddhaṃ sasaṅkhāre, diṭṭhihīnadvaye tahiṃ;  
Mānena vā tayo sesadiṭṭhihīne vidhekako.
288. Issāmaccherakukkucā, viṣuṃ dosayutadvaye;  
Tatthantake siyuṃ thinamiddhakena tayopi vā.
289. Ye vuttā ettakā ettha, iti cetāsikākhilā;  
Tatthettakesvidantevaṃ, vuccateyaṃ nayodhunā.
290. Tesatṭhiyā sukhaṃ dukkhaṃ, tīsupekkhāpi vedanā;  
Pañcapaññāsacittesu, bhavē indriyato pana.
291. Ekatthekattā ceva dvesatṭhiyā dvīsu pañcahi;  
Paññāsāyāti viññeyyaṃ, sukhāindriyapañcakaṃ.
292. Dasuttarasate hoti, nicchayo vīriyaṃ tato;  
Pañcahīne tatokūne, samādhindriyamādise.
293. Chando ekasatekūnavīsa saddhādayo pana;

Ñāṇavajjā navahīnasate honti matī pana.

294. Ekūnāsītiyā cāro, chasaṭṭhīsu panappanā;  
Pañcapaññāsake pīti, ekapaññāsake siyā.
295. Viratī chaṭṭhake vīse, karuṇāmuditātha vā;  
Aṭṭhasopekkhacittena, aṭṭhavīsatiyā siyuṃ.
296. Ahīrikamanottappamohuddhaccā dvādaseva;  
Lobho aṭṭhasu cīttesu, thīnamiddhaṃ tu pañcasu.
297. Māno catūsu diṭṭhi ca, tathā dvīsu manesu hi;  
Doso issā ca maccheramaṃ, kukkuccañca bhavantime.
298. Ekasmiṃ vimatī hoti, evaṃ vuttānusārato;  
Appavattinayo cāpi, sakkā ñātuṃ vijānatā.
299. Asmiṃ khandheva viññeyyo, vedanādīsvayaṃ nayo;  
Ekadhādividho yutti-vasātenāviyogato.
300. Upamā pheṇupiṇḍo ca, bubbuḷo migataṇhikā;  
Kadalī māyā viññeyyā, khandhānaṃ tu yathākkamaṃ.
301. Tesamaṃ vimaddāsahanakhaṇasobhappalobhana-  
Nisāravañcakattehi, samānattaṃ samāhaṭamaṃ.
302. Te sāsavā upādānakkhandhā khandhāvanāsavā;  
Tatthādī dukkhavatthuttā, dukkhā bhārā ca khādakā.
303. Khandhāniccādidhammā te, vadhakā sabhayā itī;  
Asukhaddhammato cikkhā, ukkhittāsikarī yathā.

Iti saccasaṅkhepe viññāṇakkhandhapakiṇṇakanayasāṅkhepo nāma

Catuttho paricchedo.

## 5. Pañcama paricchedo

### Nibbānapaññattiparidīpano

304. Rāgādīnaṃ khayamaṃ vuttaṃ, nibbānaṃ santilakkhaṇamaṃ;  
Saṃsāradukkhasantāpatattassālaṃ sametave.
305. Khayamattaṃ na nibbānaṃ, sagambhīrādivācato;  
Abhāvassa hi kummānaṃ, lomasseva na vācatā.
306. Khayoti vuccate maggo, tappāpattā idaṃ khayamaṃ;  
Arahattaṃ viyuppāda-vayābhāvā dhuvañca taṃ.
307. Saṅkhatamaṃ sammutiñcāpi, ñāṇamālamba neva hi;  
Chinde male tato vatthu, icchitabbamasāṅkhatamaṃ.

308. Pattukāmena taṃ santiṃ, chabbisuddhiṃ samādiya;  
Ñānadassanasuddhī tu, sādhettabbā hitatthinā.
309. Cetanādividhā **sīla-suddhi** tattha catubbidhā;  
Sopacārasamādhī tu, **cittasuddhī**ti vuccate.
310. Sampādetvādivesuddhiṃ, namanā nāmaṃ tu ruppa-  
To rūpaṃ natthi attādivatthūti ca vavatthape.
311. Mañindhanātape aggi, asantopi samāgame;  
Yathā hoti tathā cittaṃ, vatthālambādisaṅgame.
312. Paṅgulaṇḍhā yathā gantaṃ, paccekamasamatthakā;  
Yanti yuttā yathā evaṃ, nāmarūpavhayā kriyā.
313. Na nāmarūpato añño, attādi iti dassanaṃ;  
Sodhanattā hi duddiṭṭhiṃ, **diṭṭhisuddhī**ti vuccati.
314. Avijjātaṇhupādāna-kammenādimhi taṃ dvayaṃ;  
Rūpaṃ kammādito nāmaṃ, vatthādīhi pavattiyāṃ.
315. Sadā sabbattha sabbesaṃ, sadisaṃ na yato tato;  
Nāhetunāñño attādiniccahetūti passati.
316. Evaṃ tīrayate kaṅkhā, yāya paññāya paccaye;  
Diṭṭhattā suddhi sā **kaṅkhātarāṇaṃ** iti vuccati.
317. Pattaññātapariñño so, atraṭṭho yatateyati;  
Tīraṇavhapariññāya, visuddhatthaṃ sadādarō.
318. Tikālādivasā khandhe, samāsetvā kalāpato;  
Aniccā dukkhānattāti, ādo evaṃ vipassati.
319. Khandhāniccā khayatṭhena, bhayatṭhena dukhāva te;  
Anattāsāraakatṭhena, iti passe punappunaṃ.
320. Ākārehi aniccādicattālīsehi sammase;  
Lakkhaṇānaṃ vibhūtatthaṃ, khandhānaṃ pana sabbaso.
321. Evañcāpi asijjhante, navadhā nisitindriyo;  
Sattakadvayato sammā, rūpārūpe vipassaye.
322. Rūpamādānanikkhepā, vayovuddhattagāmito;  
Sammasevannajādīhi, dhammatārūpatopi ca.
323. Nāmaṃ kalāpayamato, khaṇato kamatopi ca;  
Diṭṭhimānanikantīnaṃ, passe ugghāṇādito.
324. Avijjātaṇhākammanna-hetuto rūpaṃ ubbhaye;  
Vināhāraṃ saphassehi, vedanādittayaṃ bhaye.
325. Tehiyeva vinā phassaṃ,

Nāmarūpādhikehi tu;  
Cittaṃ hetukkhayā so so,  
Veti ve tassa tassa tu.

326. Hetutodayanāsevaṃ, khaṇodayavayenapi;  
Iti paññāsākārehi, passe punūdayabbayaṃ.
327. Yogissevaṃ samāradhdayabbayadassino;  
Pātubhonti upaklesā, sabhāvā hetutopi ca.
328. Te obhāsamatussāhapassaddhisukhupekkhanā;  
Sati pītādhimokkho ca, nikanti ca dasīritā.
329. Taṇhādiṭṭhunnatiggāhavatthuto tiṃsadhā te ca;  
Taduppanne cale bālo, amagge maggadassako.
330. Vipassanā pathokkantā, tadāsi matimādhunā;  
Na maggo gāhavatthuttā, tesam itī vipassati.
331. Upaklese aniccādi-vasage sodayabbaye;  
Passato vīthinokkantadassanaṃ vuccate patho.
332. Maggāmagge vavatthetvā, yā paññā evamuṭṭhitā;  
**Maggāmaggikkhasaṅkhātā**, suddhi sā pañcamī bhavē.
333. Pahānavhapariññāya, ādito suddhisiddhiyā;  
Tīraṇavhapariññāya, antago yatatedhunā.
334. Jāyate navañāṇī sā, visuddhi kamatodaya-  
Bbayādī ghaṭamānassa, nava honti panettha hi.
335. Santatīriyato ceva, ghanenāpi ca channato;  
Lakkhaṇāni na khāyante, saṃkiliṭṭhā vipassanā.
336. Tatotra **sammase** bhīyyo, punadevudayabbayaṃ;  
Tenāniccādisampassaṃ, paṭutaṃ paramaṃ vaje.
337. Āvaṭṭetvā yaduppādatṭhitiādīhi passato;  
Bhaṅgeva tiṭṭhate ñāṇaṃ, tadā **bhaṅgamatī** siyā.
338. Evaṃ passayato bhaṅgaṃ, tibhavo khāyate yadā;  
Sīhādiva bhayaṃ hutvā, siyā laddhā **bhayikkhaṇā**.
339. Sādīnavā patiṭṭhante, khandhādittagharaṃ viya;  
Yadā tadā siyā laddhā, **ādīnavā**nupassanā.
340. Saṅkhārādīnavaṃ disvā, ramate na bhavādisu;  
Matī yadā tadā laddhā, siyā **nibbidapassanā**.
341. Ñāṇaṃ mucchitukāmaṃ te, sabbabhūsaṅkhate yadā;  
Jālādīhi ca macchādī, tadā laddhā **cajjamati**.

342. Saṅkhāre asubhāniccadukkhatonattato mati;  
Passantī cattumussukkā, **paṭisaṅkhānupassanā**.
343. Vuttātra paṭubhāvāya, sabbañāṇapavattiyā;  
Mīnasaññāya sappassa, gāhaluddasamopamā.
344. Attattaniyato suññaṃ, dvidhā ‘‘nāhaṃ kvacā’’ dinā;  
Catudhā chabbidhā cāpi, bahudhā passato bhusaṃ.
345. Āvaṭṭatiggimāsajja,  
Nhārūva mati saṅkhataṃ;  
Cattabhariyo yathā dose,  
Tathā taṃ samupekkhate.
346. Tāva sādīnavānampi, lakkhaṇe tiṭṭhate mati;  
Na passe yāva sā tīraṃ, sāmuddasakuṇī yathā.
347. **Saṅkhārupekkhāññāyaṃ**, sikhāpattā vipassanā;  
Vuṭṭhānagāminīti ca, **sānulomāti** vuccati.
348. Patvā makkhamukhaṃ satta, sādhetiriyapuggale;  
Jhānaṅgādippabhede ca, pādakādivasena sā.
349. Aniccato hi vuṭṭhānaṃ, yadi yassāsi yogino;  
Sodhimokkhassa bāhullā, tikkhasaddhindriyo bhava.
350. Dukkhatonattato tañce, siyā honti kamena te;  
Passaddhivedabāhullā, tikkhekaggamatindriyā.
351. Paññādhurattamuddiṭṭhaṃ, vuṭṭhānaṃ yadinattato;  
Saddhādhurattaṃ sesehi, taṃ viyābhinivesato.
352. Dve tikkhasaddhasamathā, siyuṃ saddhānusārino;  
Ādo majjhesu ṭhānesu, chasu saddhāvimumtakā.
353. Itaro dhammānusārīdo, diṭṭhippatto anantake;  
Paññāmuttobhayatthante, ajjhānijjhānikā ca te.
354. Tikkhasaddhassa cantepi, saddhāmuttattamīritaṃ;  
**Visuddhimagge** majjhassa, kāyasakkhittamaṭṭhasu.
355. Vuttaṃ makkhakathāyaṃ yaṃ, tikkhapaññārahassa tu;  
Diṭṭhipattattaṃ hetañca, tañca natthābhidhammike.
356. Te sabbe aṭṭhamokkhānaṃ, lābhī ce chasu majjhasu;  
Kāyasakkhī siyuṃ ante, ubhatobhāgamuttakā.
357. Anulomāni cattāri, tīṇi dve vā bhavanti hi;  
Maggassa vīthiyaṃ mandamajjhatikkhamatibbasā.
358. **Visuddhimagge** cattāri, paṭisiddhāni sabbathā;  
Evamaṭṭhasāliniyā, vuttattā evamīritaṃ.



359. Bhavaṅgāsannadosopi, nappanāya thirattato;  
Suddhiṃ **paṭipadāññāḍassane**vaṃ labhe yati.
360. Āvajjaṃ viya maggassa, chaṭṭhasattamasuddhinam;  
Antarā santimārabbha, tehi gotrabhu jāyate.
361. Saṃyojanattayacchedī, **maggo** uppajjate tato;  
**Phalāni** ekaṃ dve tīṇi, tato vuttamatikkamā.
362. Tathā bhāvayato hoti, rāgadosatanūkaraṃ;  
Dutiyo tapphalaṃ tamhā, **sakadāgāmi** tapphalī.
363. Evaṃ bhāvayato rāgadosanāsakarubbhave;  
Tatiyo tapphalaṃ tamhā, tapphalaṭṭhona**gāmiko**.
364. Evaṃ bhāvayato sesadosanāsakarubbhave;  
Catuttho tapphalaṃ tamhā, **arahā** tapphalaṭṭhako.
365. Katakicco bhavacchedo, dakkhiṇeyyopadhikkhayā;  
Nibbutiṃ yāti dīpova, sabbadukkhantasaññitaṃ.
366. Evaṃ siddhā siyā **suddhi**, **ñāḍassana**saññitā;  
Vuttaṃ ettāvataṃ saccam, paramatthaṃ samāsato.
367. Saccam sammuti sattādiavattu vuccate yato;  
Na labbhālātacakkaṃva, taṃ hi rūpādayo vinā.
368. Tena tena pakārena, rūpādiṃ na vihāya tu;  
Tathā tathābhīdhānañca, gāhañca vattate tato.
369. Labbhate parikappena, yato taṃ na musā tato;  
Avuttālamamiccāhu, parittādīsavācato.
370. Pāpakalyāṇamittoyaṃ, sattoti khandhasantati;  
Ekattena gahetvāna, voharantīdha paṇḍitā.
371. Pathavādi viyekopi, puggalo na yato tato;  
Kudiṭṭhivatthubhāvena, puggalaggahaṇaṃ bhave.
372. Etaṃ visayato katvā, saṅkhādīhi padehi tu;  
Avijjamānapaññatti, iti taññūhi bhāsītā.
373. Paññatti vijjamānassa, rūpādivisayattato;  
Kāyaṃ paññatti ce suṭṭhu, vadato suṇa saccato.
374. Saviññattivikāro hi, saddo saccadvayassa tu;  
**Paññāpanattā paññatti**, iti taññūhi bhāsītā.
375. Paccuppannādiālambaṃ, niruttipaṭisambhidā-  
Ñāḍassāti idaṅcevaṃ, sati yujjati nāññathā.
376. Saddābhidheyyasaṅkhādi, iti ce sabbavatthunaṃ;

**Paññāpetabbato** hoti, **paññattipadasaṅgaho**.

377. “Sabbe paññattidhammā”’ti, desetabbaṃ tathā sati;  
Atha paññāpanassāpi, paññāpetabbavatthunaṃ.
378. Vibhāgaṃ ñāpanatthaṃ hi, tathuddeso katoti ce;  
Na kattabbaṃ visuṃ tena, paññattipathasaṅgahaṃ.
379. Paññāpiyattā catūhi, paññattādīpadehi sā;  
Parehi paññāpanattā, iti ācariyābravuṃ.
380. Rūpādayo upādāya, paññāpetabbato kira;  
Avijjamānopādāyapaññatti paṭhamā tato.
381. Sotaviññāṇasantānānantaraṃ pattajātinā;  
Gahitapubbasaṅketamanodvārikacetasā.
382. Paññāpenti gahitāya, yāya sattarathādayo;  
Iti sā nāmapaññatti, dutiyāti ca kittitā.
383. Saddato aññanāmāvabodhenatthāvabodhanaṃ;  
Kicchasaḍhanato pubbanayo eva pasamsiyo.
384. Sā vijjamānapaññatti, tathā avijjamānatā;  
Vijjamānena cāvijjamānā tabbiparītakā.
385. Avijjamānena vijjamānatabbiparītakā;  
Iccheta chabbidhā tāsū, paṭhamā matiādikā.
386. Satto saddho narussāho,  
Seniyo manacetanā;  
Iccevametā viññeyyā,  
Kamato dutiyādikā.
387. Evaṃ lakkhaṇato ñatvā,  
Saccadvayamaṅkaraṃ;  
Kātabbo pana vohāro,  
Viññūhi na yathā tathāti.

Iti saccasaṅkhepe nibbānapaññattiparidīpano nāma

Pañcama paricchedo.

Saccasaṅkhepo niṭṭhito.